


JACOBI FACCIOLATI
ORATIONES
SELECTÆ XXVII.

*Quarum aliquæ nunc primum
editæ.*



85. Res.
141739

V E N E T I I S,
M D C C L X X V I I.

Ex TYPOGRAPHIA BALLEONIANA.
SUPERIORUM PERMISSU, AC PRIVILEGIO.

AD LECTOREM.³

NOsti, amice Lector, suos esse cuique, ut in rebus aliis, ita etiam in litterarum & artium studiis sæculo mores. Nostrum hoc librorum multitudine & magnitudine, quos superioribus annis avide quærebat, tandem fatigatum, libellis hoc tempore potius se dedit. En tibi, cur volumen hoc, quod ad multa Rhetoricæ exercitationis genera olim paraveram, sæpiusque edideram, nunc denique contrahendum existimaverim. Si ad ædium tuarum ornamentum, quod a multis fieri video, bibliothecam paras, aliunde chartarum molem tibi cura, quibus pluteos impleas, & videndi curiosos allicias. Ego pagellas has meas non ostendi, sed legi cupio, non pulchris ornari tabulis, sed tractari atque usu teri. Itaque ne illud quidem valde curavi, ut editio hæc quæsito se tibi nitore commendaret, modo typorum careret erroribus, qui legentes turbant, & interdum decipiunt. Si plusculum aliquid desiderari cognovero, alias tibi non deero. Vale.

4 TABULA SYNOPTICA.

- I. **O** Ratio ad Grammaticam.
- II. Oratio ad Humanitatem.
- III. Ad Rhetoricam.
- IV. Ad Philosophiam.
- V. Ad Theologiam.
- VI. Ad S. Scripturam.
- VII. Ad Jurisprudentiam.
- VIII. Ad Historiam.
- IX. Ad Ethica.
- X. Ad Mathematicam.
- XI. In Funere Card. Cornelii.
- XII. In Funere Al. Pisani Ducis Venet.
- XIII. Ad Dialecticam.
- XIV. De Rhetoricæ & Dialecticæ differentia.
- XV. De Litterarum & Artium felicitate.
- XVI. De fallaciis litterariis.
- XVII. De Lege Regia.
- XVIII. De Philosophiæ fontibus.
- XIX. De Medicis judiciis.
- XX. De Alexandro Zeno Eq. & D. Marci Proc.
- XXI. De laudibus Ludovici Pisani Eq. & D. Marci Proc.
- XXII. De Oratore Juvene.
- XXIII. De Oratore Sene.
- XXIV. Presbyteri nomine Synodum alloquentis.
- XXV. In Funere P. Abb. Alexandri Busenelli.
- XXVI. In Funere Vincentii Bonifacii Episcopi Fa-
maugustani.
- XXVII. Pro vernacula lingua.

ORATIO I.


AD GRAMMATICAM,

Habita in Seminario Patavino coram

GEORGIO
CARD. CORNELIO

A. MDCCX.

*Latina lingua non est ex Grammaticorum
libris comparanda.*

 Uoties ex hoc ornatissimo loco publice dico, ita delector praesentia vestra, & celebritate hac litteratorum hominum tanta, ut satis amplum mihi videar, non unius modo Orationis, sed ingentium laborum fructum collegisse. Unum enim dicere, tacentibus omnibus, cum est ubique gloriosum, tum vero ibi maxime, ubi qui audiunt, & frequentissimi sint, & rebus omnibus ad subtiliter graviterque judicandum instructissimi. Non tam hercule olim illustre fuit, florente republica, Romae [dicere, sive in foro, sive in curia, ubi, nullo delectu habito, promiscue omnes subsellia occupabant; quam est hoc tempore, hoc in loco, unde lectissimum quemque ex omni litteratissimae Civitatis ordine circumspicio, Theologos, Philosophos, Medicos, Mathematicos, Jurisperitos, atque horum sane plurimos, qui eloquentiae laudem cum sua quisque arte conjungunt.

Videte, quæso, Auditores, in vestro beneficio quantopere mihi placeam. Ego equidem litterarum splendorem ac dignitatem cum Magistratum imperio & maiestate minime comparo; sed tamen cum veteres Romanorum supplicationes, orationes, triumphos in mentem revoco, plane non tanti facio, ut amplissimæ huic mihiq̃ue iucundissimæ dicendi exercitationi præponam. Nullus enim hic plebi locus est, nullus femellis, insanæ clientium turbæ ad plausus & acclamationes plane nullus; sed & viri totius Civitatis principes ad dignitatem, & Patres omnium ordinum gravissimi ad honestatem, & Doctores Collegiorum omnium sapientissimi ad iudicium, & ingenui adolescentes ad gratiam & celebritatem convenerunt: quorum lætæ frontes, & secunda admurmuratio dicentem potest mirum in modum erigere, ac beatum prorsus efficere. Verum felicitas hæc humanarum omnium, ut mihi quidem videtur, longe maxima, quam est infinitis prope difficultatibus ac periculis circumsepta! Cujus est, bone Deus, tanta ingenii vis & fecunditas ad res præclarissimas inveniendas, distribuendas, ornandas, ut ne leviter quidem ulla in parte deficiat, nusquam incurrat, displiceat nemini? Sunt enim eodem tempore præstanda multa, diversa, ac prope contraria; nec solum laborandum, quomodo dicas, sed in primis quare dicas: ut si semel in re proponenda alicujus animum offendas, eum deinceps habeas in tota oratione aversum. Est qui nihil velit audire, nisi vetustum; quosdam gratia tantum novitatis conciliat; alii Græcas Latinasque eruditiones postulant; amplificatione alii delectantur: eoque
sunt

sunt singuli acumine ingenii, quibus ut imponas, nulla arte consequaris. Hæc me reputantem, ac sæpe antea expertum, iussere denique libertatem illam abdicare, quæ solet ceteroquin ex hoc suggesto dicentibus concedi omnibus, ut de re quolibet suo quisque arbitrato verba faciant. Quare quem mihi ordinem ipsa studiorum ratio ac natura præscribit, eum in posterum religiose servabo, ut hoc quidem tempore de Grammatica, tum de Humanitate, post de Rhetorica, deinde de Philosophia, postremo de reliquis disciplinis, ut quæque solet addisci, orationem habeam, & quod de singulis sentio, id quotannis exponam. Ita mihi boni Superi tantum vitæ concedant ac virium, ut curriculum hoc primum conficiam, deinde non improspere; libenter tum demum celsurus aliis provinciam, cum laboribus, & ætate confectus vel fato fungar, vel in otio honesto conquiescam. Interim de Grammaticis studiis, quibus solet ætas prima occupari, non raro etiam altera, aliquando & postrema, quid mihi videatur, habete; & qua soletis benignitate, diligenter attendite.

Et si omnes artes ac disciplinas in dies amplificari tam est rei litterariæ gloriosum atque utile, quam Reipub. augeri opibus & imperio; tamen quod Reipub. accidit, ut nimia crescendi libidine non raro decrescat, idem solet in hoc litterarum quasi regno evenire. Nihil ego de Platoniciæ Philosophiæ, nihil de Peripateticæ fatis, variaque fortuna disputo, quarum utraque tum demum vel corrui, vel certe plurimum detrimenti cepit, cum impotenti sectatorum studio altissime evecta, in præcipiti stetit, ac mole sua

laboravit. Unum illud Latinitatis tradendæ artificium urgeo, quod Grammaticen communiter appellant; opus suapte natura exiguum ac tenue, sed immodica hominum industria adeo amplificatum, ut volenti omnia percurrere nihil sit nisi Grammaticum tota vita legendum. Conatus hos præstantium virorum, si eo spectant, ut Latini sermonis diligens quædam historia exstet, non solum non reprehendo, sed etiam laudo: sin vero nobis Latinitatis discendæ gratia ostentantur, longissime abjicio, nulliusque esse momenti, nullius utilitatis contendo. Prima enim illa Guarini Veronensis rudimenta ut corrigerent & illustrarent, boni præceptores depravarunt; eoque res demum deducta est, ut qui velit Latine scire, hunc sibi a Grammaticorum insidiis cavere maxime oporteat, Quod ut evincam, cum mihi necesse sit de Grammaticorum tricis & ambagibus aliquanto disputare liberior, quæso vos, Auditores, ne me honestissimo generi hominum infensum putetis, qui & natura ipsa ad benevolentiam comparatus, omnem invidiæ suspicionem diligentissime fugio, & pro suscepto vitæ instituto eorum in primis amore delector, qui de litteris bene mereri pro virili parte conantur. Sunt enim eorum lucubrationes etsi ad recte loquendum non necessariae, tamen ad cognoscendum non illiberales: neque ego, (ita me Dii ament) industriam hanc magna cum eruditione conjunctam contemno; sed parum admodum ad Latinæ locutionis usum valere dico. Et sane, ubi puer singulas nominum ac verborum declinationes memoriæ mandavit, paucasque illas in universum regulas probe tenet, quibus tamquam cardinibus tota vertitur Latina lingua; quid est,

cur

cur statim non ad Classicum Scriptorem ducatur, quem sine intermissione verset, memoriæ tradat, habeatque veluti unum ex familia, quicum magistri ope & auxilio familiarissime loquatur ac vivat? Cum enim ille potissimam diei partem in scholis traducat, quid in causa esse dicamus, ut perpetua rerum Latinarum tractatione Latine tamen minime discat; domi vero minore multo exercitatione minusque accurata, a parentibus, a nutricibus, a vernis domesticam linguam assequatur? Ego certe ita mihi persuadeo, tenellos angustosque puerorum animos immensa illa regularum, appendicum, scholiorum farragine terreri atque opprimi, ut ne respirare quidem possint, nedum se explicare, Latineque interrogando ac respondendo naviter audere. Quemadmodum enim subitarius miles, si in confertissimam hostium aciem statim compellatur, periculi magnitudine atque insolentia despondet animum, sui que prorsus oblitus vix telum expedit; ita litterariæ palæstræ tirunculi ingentes Grammaticorum commentationes aggredi jussi, cogitatione ipsa difficultatis ac laboris exanimantur, spemque omnem evadendi statim abjiciunt. Hinc scholæ tædium, hinc quæsi sæpe morbi, hinc impatiens vacationum desiderium, hinc denique commenta illa calidissime excogitata ad otium & ignaviam, si fieri potest, impune fovendam. Hæc ego si probem, ad nuces profecto redire videar, & pueris similia facere: sed tamen quoties animo colligo exsucca illa, frugisque omnis ac delectationis expertia Grammaticorum præcepta, quibus tot annos impallescere vivida ingenia coguntur, quam quasi miseratione commoveor, iustoque do-

lori

lori libentissime parco. Quotus enim quisque vestrum (juvat præterita repetere, & memoriam pueritiæ renovare ultimam) ita fuit ad omnes litterarum labores recte compositus, ut ante cœperit æquo animo frequentare scholas, ac domestico carerè otio, quam positis Grammaticis, Latinos Scriptores tractaret, eorumque lectione & imitatione Latine aliquid conaretur? Ego sane, ut de me dicam, obruebar infinita illa atque implicatissima regularum strue; nec pluribus votis adversa tempestate jactati nautæ portum desiderant, quam ego, inde me ut expedirem, & improbi laboris terminum aliquando contingerem, Deorum hominumque opem implorabam. Ut autem ad amœniora paullo transivi; cœpique ex Orationibus ac Poetis delibare aliquid, tum vero quasi in novum orbem repente translatus, tanto animi ardore Latinæ linguæ studium arripui, ut ludorum & vacationis oblitus, magno etiam sæpe cum valetudinis incommodo libris diu noctuque inhærerem. Quod si ardentissimæ illi proficiendi voluntati aliquando respondisset ingenium, ut certe (magno cum dolore dico) numquam respondit; nec vos hoc tempore plebejo dicendi genere molestissime detinerem, nec ullus esset hac ætate Latinus Orator, cui de orationis nitore, numero, perspicuitate ullo pacto concederem. Nunc vero in magna virium infirmitate siquid valeo, qui valeo sane minimum, totum Cicero ni Terentio, Livio, Cæsari, Virgilio, Horatio, ceterisque ejus ætatis Scriptoribus elegantissimis debeo. Nihil a me repetundarum jure postulet Priscianus nihil Donatus vindicet, nihil Valla, nihil Sanctius nihil ille ipse, deliciæ quondam

nostræ, Emmanuel Alvarus, quos omnes cum crepundiis vel abjeci, vel deposui; nec ex eo umquam in manus sumsi, nisi per hosce dies, ut huic Orationi materiam compararem. Excidere jamdiu animo eorum monita, excidere leges, nihilque mihi potest ad stilum retardandum contingere infestius, quam tristis quædam eorum recordatio ac metus, unde solent arida omnia, sicca, exsanguia proficisci. Quid enim est aliud Grammaticæ loqui, quam omnino Latine non loqui, si credimus Præceptorum maximo Quintiliano?

Instit. I.
l. c. 6.

Nam ut omnia Grammatici vere dicant, utrum aliud efficiunt, nisi ut sine barbarismis, sine solæcismis sit oratio? In quo si tota laus consistit Latinitatis, jam ne ipse quidem Cicero Latinus est, cujus libri, si ad Grammaticorum cavillationes exigantur, solæcismis non carent. Neque vero, id ignorant, sed quæ in aliis magnopere damnant, hæc in Cicerone, mutato nomine, figuras appellant, & veluti lumina variandæ orationi accommodata, valde commendant. Nituntur enim omnes Latinum sermonem certis completi legibus, quibus deinde contraria multa apud Latinos Auctores cum inveniant, ad schemata, metaplasmos, antiptoses, archaismos, hellenismos, & id genus alia magnifica figurarum nomina confugiunt, quorum ope non quidem eorum famam tueantur, qui sine piaculo reprehendi non possunt, sed nobis illudant, ne Grammatica præcepta cum illis ipsis pugnare Scriptoribus, unde sumuntur, intelligamus. Fuit olim Latina lingua, quemadmodum ceteræ, juris plane sui, ex colluvione multarum gentium Romæ nata, populari convictu, communique rerum tractatione aucta,

dc-

denique usu ipso, & forte quadam inveniendi ligandique verba, non ratione & consilio ad hanc copiam propagata, numerisque suis absoluta.

Gell. 1. 2.
c. 25.

Hanc proinde præceptis coercere totam, perinde est, ac de scientia, non de lingua disputare: quod Varro ipse, analogiæ ceteroquin exactor molestissimus, aliquando cum didicisset, nullam esse observationem similium docuit, & in omnibus pæne verbis unam consuetudinem dominari. Id vero quam mirum videri debuit Alvaro nostro, qui de sola nominum, verborum, ac participiorum constructione quingentas ferme regulas non sine multis præterea observationibus concinnavit? Fuit ille certe magno ingenio, magna industria, magna Latini sermonis peritia, cui ego de re tota libenter concedam, si suas regulas non dicam omnes, non plurimas, non aliquas, sed principem illam, ac ceterarum caput de verbo *Amo* adversus irruentem undique inimicorum impetum defendat, sartamque ac tectam ab omni detrimento conservet. Quid enim primum decernis, Emmanuel, de verbo *Amo*? Num esse activum, & inter activa familiam ducere? At Aufonius ad neutra rejecit: *Ut apud Deum fieri amat*. Quid tum? Num esse primi ordinis, nec alium postulare casum nisi quartum? At est qui secundi faciat, eique genitivum apponat. *Nolo Thaidam amare tanti*. Quid postea? Vis ne esse primi & secundi? At Cicero ad quartum refert: *Si quicquam me amas*. Quid deinde? Esse etiam quarti? At idem in sextum conjicit. *De raudusculo multum te amo*. Pro pudor! Ejus rei artem efficimus ac venditamus, cujus fundamenta prima tam facile corruunt. Novi equidem, & qui ana-

In gratiar. Act.

Att. 7. 5.
cp. 17.

Att. 1. 7.
cp. 2.

logiam summa ope defenderent, ab ipsa florentis Romæ ætate fuisse nonnullos; sed nemo tamen cum hac nostrorum Grammaticorum turba comparandus, qui ut nihil intentatum relinquant, ab ipso mundi exordio, & vetustissima Hebræorum lingua Romanarum vocum causas, similitudinem, & originem petunt, petituri altius vel ab Arcadibus si Arcades, quod Poetæ eorum jactare consueverunt, ante lunam orti fuissent. Nihil novi affero apud eos, quibus est aliquis cum Martino, cum Becmanno, cum Vossio usus. Cum his autem? Imo etiam cum viris nostræ hujus ætatis præstantissimis qui abrepti sæculi more, gravissimum certamen de vocalæ nescio cujus origine nuper instituerunt, multasque ac reconditas eruditiones ex Hebræis codicibus, ex Syriacis, ex Arabicis, ex Græcis ductas in tam leve negotium contulerunt. Quod si, quam sunt ingeniosi ad hæc excogitanda, tam essent unanimes in tradendis, fortasse nos aliquando fefellissent. Verum hoc percommode cadit, quod sibi invicem de rebus omnibus bella movent, seque mutuis vulneribus conficiunt, quod ipsum argumento est, nihil huic arti inesse certi, quæ homines procaces efficit, & novarum rerum nimio plus amatores. In ipso enim statim Grammaticæ limine nonne de partibus orationis principes in hac arte viri acerbissime pugnant? quodque ridiculum est, gravissimos totius antiquitatis Scriptores Aristotelem, Platonem, Plutarchum, D. Augustinum pro se quisque stare jubent? Perge porro. De pronominum causa, numero, ac natura quam dubia, quam varia, quam sibi contraria decernunt Varro, Probus, Priscianus, Donatus, Quintilianus? Hi autem

Minerva
Sanct. 1.
I. c. 2.

tem ipsi inter se cum casibus nomina ab officio fuisse indita consentiant, nonne Scaliger tamen negat? Valla castigat Priscianum, quod *ficum* morbum quartæ declinationis fecerit: rursus in Vallam arma movet Petrus Ramus, quod *ficum* fructum masculo genere extulerit. Scaligero commune genus pessime a Græcis ἐπίχρῳνον, optime a Latinis *promiscuum* appellari videtur; Sanctius Latinos damnat, Græcos absolvit. Impersonalia dicit Alvarus *decet*, *pœnitet*, *pluit*, & similia; nulla esse impersonalia, testatus Deos hominesque Scioppius affirmat. Si quis verborum modos statuat esse quatuor, ecce tibi qui quinque, qui sex, qui octo, qui multo plures inducit. Est qui probet *gerundia*, ac *supina*; non deest, qui pura Grammaticorum deliramenta dicat. Alii verbis in *or* Præterita tribuunt, alii adimunt. Quibusdam placent verba Neutra, ac Deponentia, quidam toto Latio exulare jubent. Denique in tanta Scriptorum multitudine neminem unum invenias, qui malit aliorum vestigiis insistere, quam nova comminisci, ceterosque omnes allatrare. Nolo vos, Auditores, per singulas partes ducere, omnesque de Orthographia, de Prosodia, de Etymologia, de Syntaxi controversias hoc loco explicare, ne gravissimo officio, ne tempore, ne patientia vestra nimium abuti videar. Percurrite, si vacat, quæ solent homines libellorum suorum initio longissime præfari, ubi ceteris, qui ante se de re Grammatica scripsere, diem dicunt, eorum lucubrationes mendosas, nugaces, sordidas, cloacinas (sit verbo Scioppiano venia) audacissime appellant, seque ex Deorum immortalium sede quasi delapsos, allaturos optima pollicentur. Cumque

fin.

singuli & universi eadem recinant, quo se ver-
tant miseri adolescentes? cui se tamquam duci
tradant germana Latinitate instituendos? Numquid
Varroni? At litterarum porcus dicitur a Palæmo-
ne. Num Prisciano? At Græcum hominem Latī-
næ linguæ fucum fecisse existimat Alvarus. Num
Vallæ? At ejus *Elegantias* Ramirezius de Prado
inelegantes appellat. Num Donato, num Probo,
num Servio, num Charisio? At hos omnes pas-
sim labi, & monstra effutire contendit Scioppius.
Num denique Scioppio ipsi? At miserabilis litte-
rator dicitur ab Hornio, vir desultoriæ levitatis
a Labbeo, canis Grammaticus a Lambecio. Indi-
gnamini ad hæc, Auditores: sed artis, mihi cre-
dite, seu vitio, seu fato quodam fieri solet, ut
nec sua quisquam afferre possit, nisi carpat alie-
na; nec aliena carpere, nisi modum excedat.
Quam indecoræ, quam pudendæ, quam prope in-
sanæ fuere contentiones illæ Poggii cum Valla,
Politiani cum Merula, Scaligeri cum Erasmo de
rebus his minutissimis quasi de aris & focis?
Quam illa ridicula Francisci Philelphi cum Ti-
motheo quodam Græco, qui de vi syllabæ pu-
gnaturi ea lege in aciem ex composito descen-
derunt, ut victus barba mulctaretur! O magnas
nugas magno conatu actas! O vos miseros qui-
cumque ab his tamquam ex tripode de Latīnæ
linguæ ratione responsa petitis! Quos æstus, quas
tenebras vobis offundent Grammaticæ illæ Philo-
sophicæ, Minervæ, Aristarchi, Mercurii, Thesau-
ri, in quibus ad criticam eruditionem multa qui-
dem sunt acute ac subtiliter excogitata, ad locu-
tionis vero Latīnæ usum propemodum nihil! Est
illustre quiddam Latinus sermo, ingenuum, per-
spi-

lib. i. de
O at. c.
20.

spicuum, tricis & ambagibus carens, quod nemo umquam ex his hominibus pugnacissimis consecutus est: nec vero intelligo, scriptis suis quo pacto fidem concilient, quibus ipsi, quæ præcipiunt, præstare non possunt. Polycletum accepimus, statuarum artificem totius Græciæ peritissimum, non ante celebrem illum recte fingendi Canona in lucem edidisse, quam publice proposita statua, velut artis exemplo, suas ipse regulas egregie præstando confirmasset. Ita se mihi Grammatici probent; tum vero fatebor non invitus, Latine loquendi facultatem eorum præceptionibus tamquam canone probandam esse. Sed profecto, quod Carneades apud Ciceronem agebat oratoriæ artis scriptorem ne mediocriter quidem disertum fuisse ullum, idem de Grammaticis affirmare licet, neminem adhuc artem, quam traderet, Latine loquendi ne mediocriter quidem calluisse. Non est hujus temporis, aut loci, multo vero minus mearum virium, singulorum vitia commemorare: veruntamen, ne quid gratis ad invidiam afferre videar, prodeant in medium hinc Terentius Varro veterum Grammaticorum, hic Julius Scaliger, nostrorum sine controversia principes, quorum alter aurea ætate Deorum beneficio natus, Ciceronis æqualis & amicus, ita tamen scripsit, ut cum Livio Andronico Romanæ linguæ incunabulis exceptus videatur; alter vero Josepho filio communi omnium consensu primas cedit; illi inquam Josepho, cujus peregrinitates, barbarismos, solæcismos nec unos, nec leves Scioppius collegit, in suo *De stilo historico* libro posteritati mandavit. Tametsi Latinæ linguæ laudem, ut ante dixi neque totam, neque præcipuam in solæcismis vi-

tan-

tandis collocari puto quod est emendate loqui, sed in ipsa potius plena ac tereti compositione verborum, colore & habitu quodam, ut nihil claudicet, nihil diffluat, nihil fluctuet, sed tota permista & temperata numeris, æquabiliter constanterque feratur oratio, quod unum est, si recte sentio, Latine loqui. Numerosa hæc & concinna verborum comprehensio nulla definiri arte potest, nullis Grammaticorum præceptis concludi; cuius vel maximum vitium est, si de industria quaesita ad certas leges operose exigatur. In auribus est singulorum tota, & ad aurium sensum judicanda; quod fortasse olim præstare non fuit valde difficile audientibus ac loquentibus nihil nisi Latine; at vero his temporibus, nisi quis se totum veteribus scriptis dedat, & in eorum lectione & imitatione dies noctesque versetur, nec tolerabile quippiam Latine conabitur, nec nisi insipienter judicabit. Hinc fatuæ passim orationes, in quibus tam est perspicuus Grammaticus labor ut omnia macra sint, meticulosa, hiulca, sine numero, sine veneribus, sine gratiis, quæ tamen auditori misero laudandæ sunt, quod nequeat barbarissimos & solœcissimos ex Grammaticorum regulis designare. O te dementem, M. Tulli, qui cum Varronis de re Grammatica libros haberes, linguæ tamen nitorem ex perpetua Catonis, Plauti, atque in primis Terentii lectione hauriendum tibi existimabas. Te levem, Demosthenes, qui Thucydidis historias cum sæpe legisses, octies insuper descripsisti. Tantumne tibi a foro, & a curia supererat otii, ut non te potius Grammatico homini traderes unde Atticam illam sermonis elegantiam ocys arriperes? Itane igitur, Audi-

Svet. de
ill. Gram.
c. 22.

tores? Ne vivam, si quis ex nostris, qui se Tullianos profitentur, unam Tullii Orationem aut semel in vita descripsit, aut octies lectitavit. Vel igitur Cicero in quo esset Latini sermonis ratio, Demosthenes, in quo Græci, non satis intelligebant; vel nos in Crammatico ludo, aliud agentes, quam oporteat, frustra laboramus. Valeant Prisciani, valeant Servii, valeant Donati; vel eos consulamus eatenus ut ab aliquo Pomponio Marcello de solæcismo postulati respondere possimus. Ergo (ut extremum aliquid habeat Oratio mea, quo tota hujus generis ratio concludatur) traditus mihi ad institutionem adolescens norit linguam esse quamdam, quæ Latina dicatur, Italicæ parentem, eique magna parte similem. Hujus sciat esse nomina, esse verba; nominumque ac verborum Ordines certis adstringi legibus, quæ sint memoriter ante omnia discenda: summa Constructionis capita altissime infigat animo, calleatque probe velut ungues digitosque suos: in Prosodia versetur aliquanto magis; quod ratio condendi carminis certior est, magisque definita, quam solutæ orationis: ad extremum paucis ex Etymologia & Orthographia delibatis, Grammaticos longissime ableget; sibi que valde persuadeat, non Latinum sermonem ex Grammatica, sed Grammaticam ex Latino sermone natam esse. Quid ita? Nimirum ut aquas ex ipso fonte hauriat, hoc est Latinos Scriptores, legendi scribendique exercitatione nunquam intermissa, in succum & sanguinem suum convertat; unde ille existit orationis ambitus ac nitida circumscriptio, quæ supra Grammaticorum vires posita, auribus longa disciplina exercitatis judicari potest, verbis

explicari non potest. Id unum in hac palæstra arduum est ac difficile, quod & liberale ingenium postulat, & morum conformationem quamdam ingenio similem, & illam extremo loco diligentiam, quæ sola in hac arte minimum valet, ceteris tamen adjuncta naturæ præfidiis, Tullianum illud dicendi genus efficere potest, quod tantopere commendatur. Hoc scilicet ab hominibus non tam miti fidere natis, aut excultis frustra requiramus, qui, ut carmina edant sæpe optima, orationem tamen, cujus non est nisi aurium sensu definitus modus ac numerus, ostendent fortasse nullam, quæ Latina dici possit. Vos igitur, adulescentes, quibus in Italia natis atque altis illud insuper accedit, quod in Italiæ parte nobilissima, & ad animi cultum opportunissima erudimini, pergitte strenue in hoc curriculo, ut majorum vestrorum laudem retineatis. De bellica Italorum virtute nihil sane ausim pronunciare; sed litteras quidem certe non amissimus. Commigrant ad nos quotidie callidi homines pecunia instructissimi, & præclaram illam Musarum suppellectilem, optima volumina nobis abripiunt; artes etiam ac disciplinas paullatim abducturi alio, nisi studio ac diligentia resistitis. Vestrum est communis patriæ famam ac splendorem ex tanto periculo eripere, vestrum luctuosam calamitatem ab hoc solo, a nobis, a vobis ipsis prohibere; ut omnes intelligant, Romanum imperium Italici auferri potuisse, Romanas litteras non posse. In vos coniecere oculos, vos hortantur atque impellunt parentes pro familiæ honestate, cives pro Reip. gloria, magistri pro scholæ fama, sed n primis Antistes Eminentissimus pro Religio-

nis caussa, quæ cum litterarum caussa conjunctissima est.

EPISTOLA

AD LECTOREM

Præposita editioni primæ hujus Orationis.

O Rationem hanc cum haberem, non defuerunt, qui crederent, me nova moliri, ac de Grammaticis studiis hoc in loco mutandis cogitare. Id me coëgit Orationem ipsam typis committere, totamque consilii mei rationem & caussam patefacere. Nec igitur is ego sum, ut tantum possim; nec si maxime possem, rerum nostrarum conditio quippiam de veteri instituto mutari pateretur. Pueri enim fere omnes, qui huc accedunt, Grammaticen attigerunt, nec juvat curriculi partem emensos, nova proposita via, rursus ad carceres revocare. Præterquamquod nihil umquam tanti erit, ut me ab ea docendi consuetudine avocet, quam diligentissimi Societatis Patres ubique tenent, Emanuele Alvaro duce. Cum enim accuratissimo ingenio Viri juventutis recte instituendæ vias omnes ac rationes scrutati, quam denique illam invenerint, quam Italia omnis amplexa est, quid nos in tanta virium imbecillitate novi conemur? Satis erit, si ductores sapientissimos, quantum labore & solertia possumus prope sequamur; desperantes post tot tantosque conatus inveniri posse meliora. Quid igitur, inquis, in Oratione istâc

stac tua de Grammaticis blateras? Ego vero nihil dixi, nisi exercendi st li gratia; in quo st quid peccatum est, cur non illi peccarunt, qui injustitiam, qui muscam, qui quartanam, qui asinum laudaverunt? Non est sane idem in civili hominum convictu reprehendere aliquid, & laudare; in Academicis exercitationibus est prorsus idem. Vale.



O R A T I O II.

A D H U M A N I T A T E M .

*Pueris ad Latinam eloquentiam informandis
nocet librorum copia.*

Qui Grammaticorum insidias hoc ipso ex loco deprehendere præterito anno conatus sum; &, si recte sentio, deprehendi; non satis videor commissæ nobis juventuti consuluisse, nisi ad Humanitatis studia progredientem manu veluti ducam, numquam ab ejus latere, nisi universo confecto curriculo, discessurus. Quamvis autem ingens præstantissimorum hominum numerus, qui optime docent, & scribunt optima, nihil reliqui fecerit, quod ad alendos puerorum animos pertineret; suus tamen est & copię morbus, nec tam sæpe animal humorum inopia, quam nimia quadam redundantia conficitur. Neque vero mihi tantum tribuo, ut putem posse me, qui nihil ferme possum, utra peccetur in parte, remedium adhibere: sed tamen siquid est a nobis in commune scholarum bonum conferendum, quemadmodum suscepti muneris ratio non postulat modo, sed etiam flagitat, multo quidem mihi videtur esse facilius detrahare inventis supervacanea, quam addere necessaria. Nam ferere arbores, disponere, lætificare non est nisi agricolæ peritissimi: stolonē amputare, & inutilem fruticationem cohibere hominis est in re rustica vel mediocriter exercitati. Ut igitur de Grammaticis cum agerem ,
fa-

latius duxi pro virium mearum infirmitate ablegare præcepta multa, quam nova excogitare, ita Humanitati non quid adjiciam, hodierna luce laboro, sed quid potissimum inani propagatione subortum sine invidia præcidam. Quoniam vero delicatissimis hujus ætatis auribus nihil libere dicendum est, nihil ex vetere illo Romani sermonis ingenio, quod a principis terrarum populi gravitate profectum, tum denique in hanc barbariem degeneravit, cum ad blanditias & adulationes traductum est, ea nomina tacebo lubens, quæ jamdiu tacito animi sensu devovi, & in ultimas barbarorum oras amandavi. Non est tutum, Auditores, mihi credite, non est tutum quibusdam Scriptoribus diem dicere, & si qua peccarunt, ne multis noceant, fortiter constanterque patefacere. Nemo est eorum tam lutulentus, nemo tam desertus & abjectus, quin plebem aliquam, plebisque Tribunum inveniatur, cujus voce ac pæne armis per summam legum & actoris injuriam judicio eripiatur. Fruantur, per me licet, fortuna sua; regnent in scholis: imponant discipulis ac magistris; legantur, recitentur, describantur: non est ut hominum benevolentiam amittere velim, simultatesque gravissimas tam levi de causa subire. Quod unum arbitror sine periculo fieri posse, dicam in universum, acriterque contendam, pueris ad Latinam eloquentiam informandis librorum copiam in primis officere: proinde non esse conditione ulla permittendum, ut extra principes Latinitatis Auctores evagentur. Utinam Patavinis parentibus eam prolem Superi donent, quæ vel a teneris librorum studio teneatur, quod omen est in reliquas ætates sane præ-

clarum: sed utinam etiam magistris omnibus eam mentem injiciant, ut pueris ad instituendum sibi traditis librorum multitudinem mature laudent, fero concedant. Id ego nostris solemni quotannis denunciabo, si modo a vobis in præsens obtinere potuero, quemadmodum spero, ut quæ ex animo dico, & confirmare aggredior, suffragio vestro comprobetis.

Cic. 3. de
Orat. c. 9.

Apud A-
thenæum
l. 3. c. 1.

Siquid ego mihi non brevissimi temporis experientia comparavi, ut de primæ ætatis studiis judicare possim, in duo ferme genera distribuo; primum est eorum, qui Grammaticæ cursum vix emensi, ac litterarum veluti dulcedine prægustata, libros undique impense conquirunt, iisque se totos dedunt; alterum eorum, qui invita Minerva nati, librorum genus omne, non secus atque ovis lupum, averfantur. Medium enim ætas illa, prudentia omni destituta, nihil agnoscit. Utrumque sane vitium est: sed alterum illud, quod ex Musarum odio nascitur, insanabile? primum vero etiam optandum, modo adsit peritissimus docendi artifex, qui frenos adhibeat, qualis fuit Isocrates in Theopompi concitatione temperanda. Quod si quis existis librorum amatoribus in eum magistrum incidat, qui per se currenti stimulos addat, cujusmodi sunt ubique multi, pejore futurus est conditione, quam qui in ipso Grammaticæ limine libros omnes ejuravit. Quandoquidem hic sibi uni detrimento est, ille multos mortales inficiet, & in erroris communionem doctrinæ fama perducet. Si enim, ut Callimachus agebat, *μεγα βιβλίον ἴσον μεγάλῳ κακῷ*, quid illum ex multis, magnisque libris colligere putatis, Auditores, qui simul ætate, simul judicio infirmus nondum

fatis

tatis æra lupinis distinguit? Ipsa profecto memoria, qua solet pueritia valere plurimum, ipsa, inquam, memoria facile omnia sine ordine ac sine delectu recipiendo nocebit; si modo non scitulum blateronem, sed Oratorem instituimus. Cum enim hominis animus ex earum rerum contemplatione, quæ in memoria reconduntur, duci fere soleat ad parienda similia, nonne ille confusa pariat ac perturbata necesse est, cujus memoria non thesaurus, ut a Tullio dicitur, sed tale quiddam sit, quale Poetæ finxere chaos? Sit oratio sublimis & exaggerata, sit vera, sit gravis, sit callida, sit verborum ac sententiarum floribus refertissima; si caret perspicuitate, quæ prima est dicendi virtus, nec in animos hominum penetrabit, nec artificio capiet, nec rationibus vincet, nec affectibus permovebit. Atque ego perinde loquor, quasi puer multa legendo, multa discat tum bona, tum mala, quod nequeat ex imbecillitate iudicii delectum adhibere. Nimis equidem egi liberaliter, nimio plus concessi, quam oporteret. Pejora undique arripiet, probabit, excribet, memoriæ mandabit, & ut in vacua rebus mente altissime infixæ, quamdiu vivet, retinebit. Amat enim ætas illa convenientia sibi, vana, levia, ludicra, in verbis novitatem, in sententiis fucum, in tota oratione tumorem & audaciam. Jacet Cicero, si cum Seneca compares; serpit Virgilius, si conferas cum Statio; friget Catullus, si Martiali opponas: uno verbo non rem & veritatem, sed colores & pigmenta confectantur. Quid vero si in fabulas illas forte incurrat. quas vulgo Romanenses appellant? quid si in quadrata quædam carmina, cubica, retrograda?

quid

quid si in elogia, anagrammata, acrosticha summa cum Latini sermonis verecundia non multis abhinc sæculis in Latium importata? Valeat, inquiet, omnis antiquitas frigida, meticulosa, sine animis, sine spiritu, sine fruge; perierat Latina lingua, nisi cum Romanis periisset; nunc demum revixit venusta, florida, elegans, par famæ ac nomini tanto. Ignorabant veteres illi, quantum liceret hyperbolæ, metaphoræ, allegoriæ; non ita fecundi erant, ut decem antitheta uno spiritu funderent; non norant quid esset argute dicere, quid subtiliter, quid magnifice. Quid autem norant? si, qui unus ad sæculi hujus elegantiam accedere maxime visus est, Senecam dico, ejus lucubrationes Quintilianus nescio quis corruptas in eloquendo, perniciosissimas, & dulcibus vitiis redundantes judicavit. Nolite, quæso, existimare, Auditores, ad causam ista confingi. Audi vi ego, audi vi nobilem adolescentem, qui cum multa ex Barclajo recitasset pluribus ante annis memoriæ tradita, & in sui perniciem arctissime custodita, quærenti mihi, utrum aliquid ex Cicerone didicisset, subiratus respondit, aridam illam Ciceronis Latinitatem obsolevisse. Magna hæc illius, magna multorum calamitas, non tamen paullo attentius consideranti valde mira. Quemadmodum enim pueri ex picturis maxime novas & coloratas, ex gemmis rubentes & pel-lucas, ex nummis fulgidos elegantissime cufos; ita ex hoc litterario quasi thesauro non solida & gravia, sed fucata & sonantia sibi decernunt. Hinc morbus in omnes ætates consequentes vel nullo umquam remedio, vel ferro atque igni depellendus. At enim est, qui in magna

libro.

librorum multitudine nullum habeat nisi optimum. Gratulor ego illi, qui optima multa in rebus humanis invenire potuit. Est quod ad Oraculum Delphicum referamus. Esto, sint optimi, sint probatissimi omnes; ipsa enimvero multitudine sua, copia ipsa rerum optimarum legenti nocebunt. Neque enim tam multa capit angustissimus pueri animus; non impletur hoc modo, sed obruitur; respuit omnia, nisi sensim immitas. Quod si quis eximia natura præditus, laborisque & vigiliarum præter ejus ætatis morem insigniter patiens cuncta recipiat, quantum inde utilitatis ad eloquentiam redundabit? quantum scilicet ad valetudinem ex optimorum ciborum intemperantia. Non satis est ad morbos vitandos comedere saluberrima, nisi opportune, ac temperanter comedas. Porro sicut insitus stomacho ignis immodico cibo opprimitur, aut etiam extinguitur; ita ingenium nequit, ut ita dicam, nimis multa concoquere, sed quasi oppressum otiiatur, vel cruda & indigesta in malos humores convertit. Inde strigosus ille dicendi modus, inconstans, salebrosus, involutus, ut nihil intelligas sine interprete; inde illa historiarum, fabularum, ἀποφειγμάτων perpetua & inordinata congeries in exordio, in confirmatione, in peroratione, nulla rerum, nulla temporis, nulla loci ratione habita, quæ omnia vulgus pulcherrimas eruditiones appellat, sapientes viri pulcherrima monstra. Est enim, ut aliarum rerum, ita eruditionis modus quidam, ut definiendo, probando, amplificando erudita identidem fundas ad delectationem, non effundas ad satietatem; tamquam ornamenta pulcherrimæ domus, non cumulata, sed

explicata. Verum sibi temperare nequit, ut maxime nitatur qui cœpit ab infantia lectitare, & *μνημονεύματα* conficere. Proponitur huic aliquid ad dicendum, five in Templo, five in Academia. Igitur statim ad adversaria. Quid tum? Non inclusum, aut cogitantem videas, sed magna corporis animique contentione hac atque illac discurrentem, parantem undique libros, bibliothecas prope ipsas sedibus convellentem. M. Tulli, quid præbes ex Tusculanis, quid ex Officiis? Cave diligenter, C. Plini, jam est in Historia tua. Plato, Laerti, Plutarche, præclare vobiscum agitur, si indice caretis; sin minus, conferte symbolam. Jam processit opus, versiculos numerat; non satis est: hæret, rodit ungues. Instauretur librorum acies; succedant sacri, Biblia, Concilia, Interpretes, Græci omnes Latinique Patres; nemini parcendum est. Quid expectatis, Auditores? Exit, non Oratio, sed Polyanthea. Verum enimvero non novit ingenia, nec artem novit, qui ab hoc genere hominum aliter postulat. Cum enim lectioni a pueritia deditissimi, numquam assueverint cogitare ac promere sua, coguntur deinceps in omni vita aut rostris abstinere, aut aliena temere compacta profundere. Careat stilo necesse est, careat dicendi genere sibi proprio, qui qua ætate maxime formandum erat, legendo tempus trivit, five, ut ex ejus sensu loquar, eruditioni parandæ operam dedit. Sed quæ, malum, est ista eruditio vel frustra, vel intempestive ab Oratore quæsitæ? Numquid non satis ad erudiendas vel Musas ipsas, numquid non satis ad fatigandas ingentia illa Gruteriana & Græviana volumina, nisi Oratiuncula quælibet ad erudi-

tionem traducatur? Convenere homines judicaturi, five suadeas, five dissuadeas, five laudes, five vituperes, five accuses, five defendas; teque tuamque causam, non si erudita, sed si vera dicas, aut vera dicere videaris, secuturi. Nolo hic dissimulare, Auditores, & esse, & me ipsum vidisse nonnullos ita laboris patientes, naturaque fecundos, ut cum multa quotidie legant, scribere tamen non supersedeant; & utramque conjungant exercitationem. Horum ego stilum non nego esse aliquem, sed nego esse probabilem, qui optime norim, non ad unius hominis, aut ætatis imitationem, sed ex omnibus promiscue Latinæ linguæ sæculis, & ex omni Scriptorum genere conflatum esse; ut cum dicunt, non uno ore, sed prope multiplici dicere videantur. Non enim potest esse unus, non constans, non æqualis stilus ille, qui multorum librorum lectione trahitur in diversa; nec Oratorem sapit, quod Poetica multa, nec Poetam, quod Oratoria contineat. Hoc vitium est elocutionis maximum, in quod vel sapientissimi viri necessitate quadam labuntur; hic *κοινισμός*, quem evitare ne ille quidem potuit summus in hac civitate patrum nostrorum memoria litterarum arbiter Octavius Ferrarius, quem tamen accepimus & pro sua prudentia se probe novisse, & pro ingenuitate sæpe dixisse, Humanitatem se, non Eloquentiam profiteri. Quippe intelligebat vir immortalitate dignissimus, publice docendi munus ab ipsa adolescentia susceptum aditum sibi ad universam eruditionem Græcam Latinamque patefecisse, ad Oratorias scriptiones interclusisse. Cogebatur enim pro ea, quam iniebat, docendi ratione totam versare antiquitatem,

nec

nec ullo umquam certo loco consistere; modo esse in Tullio, modo in Apulejo; a Livio descendere in Marcellinum; a Catullo in Aufonium; a Virgilio in Claudianum; a Latinis continuo ad Græca transire; a Græcis ad Latina; undique autem ea colligere, simulque committere, quæ a stili similitudine longissime abhorrebant. Libuit in rem hanc Ferrarium afferre, tum ut quibusdam responderem, qui locutionem ejus ex Orationibus judicantes accusare solent; tum vero maxime, ut tanti viri nomine Orationi meæ fidem & auctoritatem conciliarem. Ad nostros redeo, quos video tanto peccare gravius, quanto minus peccare se sentiunt. Ille enim adolescens, ille vir, ille senex ex instituto multa legebat, isti ex desidia. Etenim varia multorum Scriptorum lectio quid habet laudis, quod non sit vel cum ignavissimis commune? Nemo est tam otiosus, nemo tam bardus, modo litteras aliquando attigerit, quin Poetas saltem, aut Historicos jucundissime legat. Hinc ad longissimas æstatis horas fallendas, hinc ad lenienda solitudinis tædia, hinc ad somnum conciliandum remedia petuntur: ut jam experientia didicerim, eos fere, qui se mihi gloriantur multa legere, dulcissime otiari, sed laudem ex otio malitiose quærere. Quos ego tantum abest, ut velim confirmata jam ætate ad scribendum compellere, ut etiam valde deterream; ne in vitium incidant, de quo ante dicebamus hoc est in confusam sibi que dissimilem dictionem, cujus partes singulæ Latinæ sint, genus vero totum barbarum ac pæne monstruosum. Huc sispectant eorum consilia, in eo, quem instituerunt vitæ cursum, sapientissimi sunt, quod nihil au-
deant

deant supra vires: fin autem laboris metu, quod plerique omnes confueverunt, abhorrent a pugillaribus, est quod illis bonam mentem precemur. Interim vero sine ulla dubitatione statuamus, legendi iucunditatem ab omni labore vacuum primam esse causam, cur adolescens libentissime legat. Altera aliquanto turpior solet esse furandi libido, orta procul dubio ex illa rerum ac verborum inopia, quæ nondum progressum ad Philosophica comitatur. Fit enim inde, ut de se ipse desperans, aliena perquirat; quæ si quando callide corrasa, & in rem propositam belle deducta magister laudat, actum de illo est: nihil amplius cogitabit, nihil inveniet; libros compilabit omnes; alia sumet, alia detorquebit, modo libere, modo furtim, apte, inepte, ut unumquodque implendæ tabulæ idoneum videbitur. Scribatur dica, plagiarium est. Neque enim video, cur furti appelletur, qui totam ab uno orationem furripuit, parcatur vero illi, qui multorum laciniis usus est, & pessimum nobis quasi centonem venditavit. Sed hac ratione nimis plane multi inter Oratores irrepsere, numeroque ipso defenduntur; atque adeo honestissimo imitatorum nomine, probante ac volente populo, gaudent. Ego equidem veteri Romano populo quid liceret in danda hominibus verbisque Romana civitate, satis intelligo; quid nostro huic Patavino, quid Veneto; quid Florentino liceat, prorsus ignoro. Inconditum hoc Latinæ dictionis genus probent civitates omnes, probet Italia tota, Gallia, Germania, Hispania probet, nisi grande illud nomen, *Senatus Populusque Romanus* e suis tumulis excitetur, jubeatque ita fieri, intercedo.

Etsi

Et si autem scribendi ratio hæc, seu potius describendi ex multorum lectione plerumque oritur, quod minus videantur ablata, quæ a multis, quam quæ ab uno auferuntur; non tamen negare auserim contingere posse, ut ex unius Scriptoris penu tale aliquid educatur. Quod si quis in Longolio, viro ceteroquin elegantissimo, diligenter animadvertat, non multa fortasse inveniet in ejus Orationibus membra, quæ non sint Ciceroni tamquam domino adjudicanda. Sed ille cum cœpisset suum sibi formare dicendi genus, immatura morte præreptus, non potuit efficere, ut multis ad latinam eloquentiam exemplo esset. Quod vero Bembum Italici Latinique sermonis lumen in omnium sæculorum oculis splendidissimum, barbari quidam Transalpini in eo accusare non dubitarunt, concedendum est illis, ut de re, quam ignorant, perperam judicent. In quibus tamen Justum Lipsium æquissimum virum censere nolo, qui cum esset aliquando non prorsus honorifice de Bembi stilo locutus suum ipse errorem & in epistola sexta *Centuriæ ad Italos*, & in fine *Commentarii ad Tacitum*, & in *Defensione posthuma* ingenuè confessus est, magnique & Oratoris & Historici nomen immortalis genere laudum exornavit. Si tamen alterutra in parte delinquendum est, minus offendit aures, qui uni plus justo adhæret, quod aliena quidem sed inter se similia jungat; quam qui ex multis, ætate ac dicendi forma diversis nullo modo cohærentia suffuratur. Jam vero ultima causa afferenda est, cur adolescentes multa legant; quam unam si probatis (videte quantum tribuam sapientiæ vestræ) cedo statim de re tota, puerosque nostros dux

ego atque auctor in magnam bibliothecam statim duco. Hoc nihil est aliud quam modus legendi ita velox, ita præceps, ut singulis diebus singula volumina percurrantur: unde tantum existit ad eloquentiam comparandam adjumenti, quantum ad historiam ex eorum peregrinationibus, qui citatissimis equis per urbes feruntur. In quo ego ætatem illam non reprehendo, quæ impetum sequitur ac levitatem sibi propriam; utque ejusdem loci, ita ejusdem libri cito satietate tenetur. Illos reprehendo, qui levitatem istam laudando fovent, putantes magnæ cujusdam esse virtutis multorum Scriptorum nomina recitare; siquidem nihil præter nomen tanta velocitate legentibus hæere potest. Sentio me Oratione ipsa ducente, ad eos delapsum, qui sibi persuadent, & ubique prædicant, hujus ætatis studia, studiorumque famam librorum titulis & indicibus contineri. Isti si sapiunt, tota concidit Oratio mea; in eoque laborandum est unice adolescenti, ut mature incipiat per bibliothecas cursitare. Itane vero patiemini, Auditores, utilem hanc doctrinæ speciem in sapientissima civitate jactari, ac vobis obtrudi? Impune ergo Oratores laudabit, ac reprehendet; Poetas & Historicos pensabit; de Philosophis, de Theologis, de Jurisperitis sententiam feret, qui gravissimas facultates prima Scriptorum pagina definierit? Est aliquid respondere posse de Plutarchi nomine & patria; quot in libros ejus opera distribuuntur; quis quoque sermone verterit; quis primus, quis postremus ediderit; quis Anglus, aut Batavus variis lectionibus illustraverit: sed quia interim vacat ingenium, nobilissima hominis pars, malim hæc in

bibliopola, quam in viro litterato, reperire. Video enim quam sit difficile, hæc omnia præstare, quæ totam hominis vitam occupant; nec tamen illa omittere, quæ utilius & honestius occupare possunt. Non eo fane consilio pueros nobis vestros tradistis; non huc spectant cogitationes illæ, labores, impensæ, quas eorum causa libentissime suscepistis & suscipere nos una vobiscum tantopere vultis. Est aliquid supra librorum titulos, quo contendatur; sed illud ejusmodi est, ut in tanta legendi celeritate deprehendi non possit. Immorari oportet rebus singulis, quæ maxime eminent; idem submissa voce legere, idem elata; quodque semel legeris, iterum sæpiusque repetere; & cogitatione vehementissima in omnem partem versare. Si enim lectio ad imitationem instituta est; imitari vero nihil est aliud, quam similes eorum fieri, quos nobis ad imitandum proponimus; certe non cursu, sed mora longissima opus est, ut illorum dicendi genus modo in universum, modo per partes singulas meditates, in nobis ipsis altissime defigamus. Ita si legat adolescens, vix unum, aut alterum, Latinæ linguæ Scriptorem ad multam ætatem evolvat; nec erit nobis a librorum multitudine revocandus. Non alia, credo, causa primi illi attritæ Latinitatis ac pæne sepultæ reparatores tantopere floruerunt, ut uno tempore studium hoc & inchoasse videantur, & perfecisse, nisi quia paucissimos libros habebant, quibus se addicerent, vel nondum editis tot voluminibus, vel nondum satis librariorum opera propagatis. Nunc vero quanta undique succrevit librorum seges! quam multæ, & quam operosæ officinæ! quot publicæ
pri-

privatæque bibliothecæ, non modo ad litterarum studia, sed, quod ostentationis est non ferendæ, ad parietum quoque ornamentum! Quæ copia multum quidem major, quam a nobis explicari possit, vel fastidium parit, vel levem illam legendi curam, quæ sine ullo eloquentiæ fructu, atque adeo cum detrimento plerumque expletur. Cavete, Adolescentes, magna animi provisione cavete. Insidiæ vobis ubique parantur, eoque periculosiores, quod parantur ab amicis. Nolite animum pravis libris vitare, nolite turbare multis. Habete rationem ætatis, habete studiorum, habete etiam aliquam voluntatis in vos meæ, quæ nihil me finit aut cogitare, aut efficere, quod non ante cognoverim certis exploratisque argumentis institutioni vestræ profuturum. Illos ipsos, qui ætate jam sunt confirmata, *non multa legere, lib. 7. ep. 9. sed multum*, ex veteri proverbio Plinius jubet: quanto vos minus vagari oportet, atque in varia discurrere, qui nunc primum ire aggressi, de via si paullum deflectitis, tanto magis errabitis, quanto solent esse aberrationes a scopo itineris initio longiore. Unum vobis sufficere Ciceronem viri in hac arte peritissimi existimarunt: Querebamini; largius egimus; Cæsarem concessimus, Terentium, Nepotem. Non satis fuit; Horatium addidimus, Catullum, Virgilium. Peragentibus altius & Livium, & Curtium, & Ovidium, & alios deinceps præbebimus. Sint alii de se solliciti; nihil vobis deesse potest, ubi tam multi vestra causa laborant, ubi Princeps liberalissimus laborare jubet. Quamdiu nos per ætatem ac valetudinem gravissima onera sustinebimus, quamdiu ille, qui nequit a seipso desciscere.

scere, sustinentibus benefaciet; non libros, non typos, non præceptores, non alia studiorum vestrorum adjumenta desiderabitis.

E P I S T O L A A D L E C T O R E M

Præposita editioni primæ hujus Orationis.

Politiorum litterarum cognitionem, quod ad hominis naturam ac dignitatem supra ceteras artes ac disciplinas pertineret, veteres Humanitatem appellarunt: nos communem secuti scholarum nostrarum usum, eam dicimus Humanitatem, quæ Rhetorices elementa tradit, hoc est recte conficiendæ periodi ornandæque præcepta. Huic proludere cum deberem, eam removi librorum copiam, quæ puerorum stilum aut retardare, aut vitare poterat tanto quidem periculosius, quanto rectius magna specie boni commendata incautis nocere solet. Ubi ætas ac stilus confirmata sunt, non ego homines a legendo deterreo: tametsi Plinius alter, & alter Seneca, tametsi Franciscus Petrarcha, vir utroque illo præterquam annis nihilo minor, cuilibet ætati ad solidam bonarum artium gloriam contendenti paucos libros concedunt. Sed alia fortasse aliis studiis, atque temporibus præcipienda sunt. Interim ego pueros instituo; nec porro pergo, nisi ubi aliquorum vitia a pueritia contracta, pravæque consuetudines jubent me viros senesque ad exemplum producere, & alia ab aliis ducendo per omnes ætates discurrere. Tu, si quid rectius habes, noli modeste petenti denegare, vel danti, quod habet, succensere. Vale.

ORA.

O R A T I O III.

AD RHETORICAM.

Præcipua Rhetoris cura debet esse verborum.

ET si de primis puerorum studiis cum dicerem, non prorsus timore carebam, quem abjicere totum hoc in loco nemo potest, nisi prius verecundiam abjecerit; attamen res ipsa per se parva non tantam eloquentiæ vim postulare videbatur, nec tantam movere hominum expectationem, ut tamquam in magno discrimine examinarer. Nunc vero longius progressus, ad Rhetoricam cum pervenerim, tantumque dicendi genus augere debeam, quanto res, de qua dico, sublimior est; incredibili quodam timore perfundor, nec animum qua ratione confirmem in hac mearum virium imbecillitate, omnino reperio. Miserum est enim, ne dicam turpe, de Rhetorica differentem nihil afferre posse Rhetorica dignum; illamque orationis exilitatem arti ceterarum principi accommodare, quæ, de minutis rebus cum sermo esset, vix toleranda videbatur. Licuit de Grammatica sive summissè, sive temperate dicere, licuit de Humanitate: nunc autem nisi rerum ubertate ac magnitudine, nisi verborum ac sententiarum splendore, nisi vocis & gestus dignitate ostendimus eloquentiam ipsam in rostris esse, officio abutimur ac nomine tanto, abutimur celebritate hac, tempore, loco, patientia vestra plane abutimur. Neque vero tacere licet, ubi facultas hæc nostra malevolorum obtrectationibus in magnam invidiam adducta, nobilissima

sui parte, hoc est elocutione periclitatur. Increbuit enim sermo, latiusque ad ignaviā fovendam quotidie disseminatur, eloquentiæ nervos & gravitatem infringi verborum ornatu, frustra que adolescentes in elocutione paranda ad multam ætatem laborare. Id ego si mihi obtrudi patiar, saxeus plane sim; si me tacente, obtrudi aliis, turpissime videar mearum partium oblitus. Excusso igitur timore omni, ipsaque erectus scholæ vindicandæ necessitate, hoc ipsum contendo in Rhetorica tradenda præcipuum esse, quod isti minimum putant, delectum & collocationem verborum: idque ita contendo, ut nisi penitus in aures vestras animosque inseruero, totum hunc studiorum nostrorum ordinem improbari velim; meque meosque omnes ab hoc intento cursu ad litterarum elementa tamquam ad carceres revocari.

Age, congrediamur. Quid est quod ægre ferant, nos in verborum cura tantopere occupari? Quoniam, inquiunt, ex tribus eloquentiæ partibus invenire ac disponere prima sunt, eloqui vero postremum, minimique laboris, minimæque dignitatis. Hic ego non tam doleo, quod in illam artem disputant, cuius naturam & rationem ignorant, quam quod nomina ipsa rerum non assequuntur, sibi que ipsi per summam imprudentiam contraria dicunt. Cur enim eloquentiam appellant, cuius eloqui postrema pars est, cum possint ac debeant a principe parte suæ facultati nomen dare? Non decet gravissimos homines eorum auctoritate moveri, qui cum statuissent eloquendi virtutem in Oratore supra ceteras eminare, non eum inventorem, non compositorem, sed

sed eloquentem appellarunt. Quid non ludum aperiunt? Quid tamdiu suam istam doctrinam nobis invident? Quid dubitant exire, veteresque magistros, mutatis & rebus, & rerum nominibus, docendi gloria discipulisque spoliare? O te beatum, J. Cæsar, si tales vel Romæ præceptores, vel Athenis invenire potuisses. Profecto non scripisses, *verborum delectum originem esse eloquentiæ*. Miseret me tui, M. Tulli, qui tibi persuades, ac litteris mandas, *inventionem ac dispositionem prudentis hominis esse, eloquentiam Oratoris*. Non hos audire potuisti arcana doctrina viros. Tu quoque, M. Fabi, doctore indiges, cujus ea vox est, *elocutionis rationem partem operis difficilissimam esse, idque inter omnes Oratores convenire*. Falleris; non convenit inter nostros. Ego equidem, Auditores, cum diu multumque cogitarem, unde tantum esset quibusdam hominibus eloquendi fastidium, malleque ratione aliqua excusare, quam stultitiæ tribuere, illud unum invenienbam, quod λογισαῖδαλοι nescio qui, omiſſa rerum cura, verbis se totos dedant, quæſtionesque gravissimas molli & effeminato dicendi genere sine ulla verecundia tractent. Peccant hi quoque ex parte altera, gravissime peccant, quod debeat esse aliquid, ut in rebus omnibus, ita in elocutione satis: sed tamen turpissimum est, quod Græci dicunt, καὶ κακοῖς ἰσθαι, eoque ornamento oratoriam artem spoliare, quo ferme uno ab aliis distinguitur, & in suo quodam genere collocatur. Qui nimius est in ornando, quamvis non ita bonus, tamen Orator est; nec sane alia re ulla, nisi verborum copia & elegantia in Oratorum numerum pervenisse Curionem, Oratorum Princeps judicavit.

Apud Ciceronem in Bruto. c. 72.

In Orat. c. 14.

lib. 8. in proœmi.

* mala malis curare.

Cic. in Brut. c. 59. & 66.

vit. Qui vero invenire potest, sed ornare non
 potest, is disputator est, Dialecticus est, quid-
ib. c. 7. vis est potius, quam Orator: ut si quæras a M.
 Tullio de Pisistrato, de Solone, de Clisthene,
 deque aliis omnibus, qui Athenis dixerunt ante
 Periclem & Thucydidem, neget Oratores fuisse;
 non quod Civitati omnium bonarum artium pa-
 renti per tot annos defuerit ingenium, sed quia
ibid. c. 29 defuit ingenium ad eloquendum. Poterant illi qui-
 dem, quemadmodum Romæ M. Scaurus, & P.
 Rutilius, res optimas invenire, apteque locare;
ibid. verumtamen (ut ipsius Ciceronis verbis utar)
non refert videre, quid dicendum sit, nisi id queas
solute & suaviter dicere. Est enim alia quædam
 dicendi ratio, differendi alia; nec debent Rhe-
 torica, & Dialectica iisdem terminis concludi,
Rhet. 3 l. 1. c. 1 unaque definiri facultate, quæ ἀντιστοιχεί ab Aristo-
 tele dictæ sunt. Idem est utrique propositum, ut
 quid unaquæque res sit, definiendo explicet; ut
 separet ab ambiguis; ut in suas partes tribuat;
 ut genera, ut species, ut quæ antecedunt, quæ-
 que consequuntur, notare possit, & singula
 singulis conferendo dijudicare. Utraque interro-
 gat ac respondet, probat & improbat, impugnat
 ac defendit: sed altera anguste & exiliter, alte-
 ra copiose & ornate; illa disputatione, nostra
 hæc oratione. Quod cum Zeno Stoicorum Prin-
Cic. in erat. c. 32 ceptus ostendere vellet, manus similitudine ute-
 batur, eandemque contractam dicebat esse Dia-
 lecticam, explicatam esse Rhetoricam. Quam ego
 multos putissimos Dialecticos arguere possem, qui
 olim hac ipsa in urbe habiti sunt Oratores, non
 quidem a vobis qui recte sapitis, sed a multis
 tamen non infimi ordinis hominibus, quod am-
 bi-

biguas quæstiones ad rostra afferentes acute subtiliterque differerent. Sed nolo in eam invidiam recidere, quæ tum mihi conflata est, quod eos Oratores non putarem. Prodeat in medium Brutus ille, cui tantum tribuere solebat M. Tullius, ut libros de hac arte pulcherrimos ejus maxime caussa scripserit, & ad eum instituerit: ille, ille, inquam, prodeat in medium, qui ab omni periculo invidiæ tutus affirmare non dubitabit, Stoicos fere omnes & suæ civitatis, & Græcos, prudentissimos fuisse in disputando, sed eosdem tractatos a disputando ad dicendum inopes esse re-
Apud Cic. in Brut. c. 31.
 pertos. Itane igitur sapientissimi viri cum de rerum humanarum contemptu dicerent, de magnitudine animi, de modo, de gravitate, de indolentia, deque aliis hujusmodi, cumque tam multi essent, omnesque ea viderent, quæ in re qualibet optima sunt, & ad persuadendum aptissima; nemo tamen unus ex iis aut eloqui potuit aut sine elocutione placere? Nihil existimo afferri posse clarius, nihil certius, ut non solum intelligatis, sed oculis prope ipsis videatis, tantam illam Oratoriæ artis difficultatem, quanta efficere potuit, ut ex omni memoria temporum ac populorum vetera repetentes nihil rarius, quam præstantes Oratores inveniamus, in una propemodum elocutione versari. Hæc Oratores facit; hæc illos a ceteris, ipsosque inter se per varia genera variosque, ut ita dicam, colores vel sola vel pæne sola distinguit. Etenim cum dicimus orationis genus aliud esse sublime, aliud medium, aliud infimum; cumque in his ipsis generibus Asianos Oratores a Laconicis, & Atticos ab utrisque distinguimus, non de iis, quæ dicun-
 tur

1. 3. de
orat. cap.
6. & in
orat. c.
44.

tur, cogitamus, sed de modo dicendi; non de rebus, sed de stilo, qui unus est in magna similitudine rerum pro cuiusque natura & exercitatione diversus. At enim stili nomine non verba solum, sed sententiæ quoque significantur. Ita videlicet; sed nulla tamen sententia illustris est, nulla Oratore digna sine apta comprehensione verborum. Tuæ sunt omnes, M. Tulli, singulares exquisitæ, ac prope divinæ sententiæ; ipsæ tamen illæ & cum dicerentur, ingenti populi Romani admiratione exceptæ, & cum scriptæ sunt, totius Orbis omniumque ætatum consensu probatæ, si vel Apuleji, vel Tertulliani, vel Marcellini dictione efferantur, non secus ac pulcherrimæ matronæ obsoletis sordidisque vestibus indutæ, pulchritudinem omnem ac dignitatem amittent. Contra vero nulla est tam minuta sententia, tam nulla vulgaris, quæ Tulliana periodo comprehensa, Tullianis floribus ornata, Tulliano colore picta, non in aliam statim naturam migret, auresque hominum & novitate capiat, & suavitate detineat. Hoc vero non Oratoribus proprium, sed etiam Poetis esse commune, cum ipsa probat artis utriusque cognatio, tum vir acutissimi ingenii T. Tassus animadvertit; qui de Italico Casæ epigrammate cum diceret, ostenderetque præcipua eius lumina esse verborum, sine ulla dubitatione affirmavit, communes tritaque sententias elocutionis splendore illustratas, reconditis atque eximiis sed luce carentibus & ornatu, longissime antecellere. Verum de Poetis nihil ad nos: Oratores quidem certe, nisi huc labores omnes cogitationesque conferant, ut quæ invenerint, concinne & eleganter efferant,

rant, nihil invenisse, nihil tenere videbuntur, vacuisque subfelliis verba facient. Sin autem mirabili hac augendarum rerum & ornandarum virtute valuerint, nihil tam modicum de administranda Rep. dicent nihil de rerum natura, nihil de juris legumque scientia, quin plura & majora scire, quam illi ipsi, qui hæc tractant, judicentur. Est enim composita & expolita oratio instrumentis illis non valde dissimilis, quæ oculis admota ex una quidem parte res minimas in immensam magnitudinem augent; ex altera vero maximas ita contrahendo minuunt, ut vix esse in rerum natura videantur. Tale sibi quippiam nisi fallor, Isocrates proponebat animo, qui oratoriam artem cum definiret, hoc totum volebat esse, facere de parvis magna, de magnis parva, quod cum diceret, perspicuis sane verbis ornandi copiam & varietatem significabat. Quæ enim re ipsa, parva sunt, omniumque experientia & confessione parva, non aliter fieri magna possunt, quam si multiplici ratione explicata, & per varia figurarum genera fusa ita pingantur, ita colorentur, ut auditorum animos mentesque præstringant. Hæ sunt præstigiæ illæ, a quibus sibi suisque civibus cavebat Cato, qui Carneadem Atheniensium Legatum cum audisset ita pro justitia dicentem, ut nemo non assentiretur, eundemque rursus ita, quæ dixerat, impugnantem, ut omnes sententiam mutarent; ejicite, inquit, hunc hominem, cui nihil persuadere difficile est. In quo ego Catonem, si hominis mores damnavit, non reprehendo; si eloquentiam, Catonem in Catone requiro. Huc spectabant Leoninus Gorgias, Thrasymachus Chalcedonius, Protagoras Abderi-

Plutare.
in Vita
Isocrat.

Cic. in
Brut.
cap. 8.

derites, Prodicus Chius, Hippias Eleus, cum *docere se profitebantur, quemadmodum caussa inferior dicendo fieri superior posset*. Ingens sane promissio, & nimium fortasse audax; nisi quod tanta est elocutionis vis ut novam quandam rebus formam inducens, humilibus dignitatem tribuat, parvis magnitudinem, obscuris lumen, abjectis nobilitatem. Itaque in hoc qui dominatur, viresque suas & facultatem sentit, gloriatur per melicet, se vertere posse omnia, imponere omnibus, trahere, impellere, concutere, forum curiamque totam permiscere. Videtis, opinor, Auditores in quo ea posita facultas sit, quæ nobis ad docendum proponitur: neque vero illi non vident, qui adversus nos disputant, sed, quod assequi non potuerunt, fatis callide aspernantur. Verumtamen novimus homines: clament, irrideant; Nizolium, Doletum, Calepinnum nobis obijciant; numquam obtinere poterunt, ut desipiamus. Id antea si didicissent, unde nos avocare conantur, efficere aliquid fortasse possent, quia ne eloquentia quidem ipsa oppugnari potest sine eloquentia. At vero sua illa jejunitate inopiaque sermonistantum abest ut quippiam a nobis exprimant, ut modo risum moveant, modo stomachum, modo etiam miserationem. Quid quod etiamsi non tanta esset in eloquendo vis, non tanta dignitas, non denique difficultas tanta, quantum ex iis, quæ diximus, quilibet cognoscere potest; nihilo tamen secius puerorum studia, nec puerorum tantum, sed etiam adolescentum in verborum delictu & constructione diutissime teneremus? Est enim præceptoris non desipientis sequi naturam, & ea singulis ætatibus addiscenda proponere; quæ
fin.

singulis aptissima sint. Valet memoria juvenus, ingenio non satis valet; quin ea juventuti tradimus, quæ non tam ingenio indigent, quam memoria? Quid Stoa, quid Peripatus, quid Academia ad hanc ætatulam, ad hoc ingeniolum? Ipsum illud Philosophicum pallium, ora hominum ad rerum gravissimarum tractationem composita, ipsa scholæ species, nomen ipsum sapientiæ, severitatis plenissimum, accedentes perterrebit. Nullus est in Philosophia locus tam planus & facilis, quam qui de moribus inscribitur & officio: hunc tamen ipsum cum explicaret Aristoteles, adolescentes procul esse jubebat, & aliunde sibi, quæ discerent pro ætatis suæ viribus, comparare. Aut igitur nihil est, in quo ætatem primam exercere debeamus; aut una est verborum cura; quæ cum tam necessaria sit, quam est a nobis multis rationibus confirmatum; cumque tam minuta appareat, ut neque viros deceat, neque senes; non potest nisi per summam stultitiam a Rhetoricis scholis ablegari. Sed ablegetur, si Diis placet, ablegetur: succedant ejus loco spinosæ Dialecticorum ambages, ambiguae Jurisconsultorum formulæ, retrusæ Philosophorum ideæ: traducatur per hæc adolescentia; veniatur ad rostra: quid tum? Nonne vides, te populum habere judicem, hoc est qua parte minime vales, plurimos homines; qua aliquis es modo centesimum quemque, modo nullum? Itaque cum paucissimis placeas communione studiorum, plerisque omnibus insanire videaris. Philosophica quædam delibas, & feliciter explicas? Euge, Lucretius aliquis annuit. De publico privatoque jure sermonem infers, sciteque

Ethic.
I. I. c. 3.

* Tam-
quam e
plauſtro
loquen-
tes.

disceptas? Euge, Scævola probat. Altius affur-
gis, & ſiderum motus deſcribis non inepte? Eu-
ge, Manilius laudat. Interim vero in verbis pec-
cantem ceteri omnes reprehendunt, puerique ipſi,
 * ὡς ἐμὲ ἀμάρτυρα λαλῶντες, impune irrident. En, in-
 quiunt, præclarum Oratorem, qui ne illum qui-
 dem ſermonem callet, in quo ſe jaçtat. Audisti
 ſolæciſmos? Vidisti quo ore, quam duro, quam
 impudenti in magna civitatis luce, velut in um-
 bra ludoque noſtro, ea diceret, quæ nulla poſ-
 ſet Latini Scriptoris auctoritate confirmare? Ubi
 illa invenit adverbia *intrinſece*, *extrinſece*, *amo-
 do*, *cælitus*, *diviſim*, *fuſim*, *jûre merito*, *private*,
duriuscule, *gnare*, *diverſimode*, *ſeorſim*, *undequa-
 que*, *ſæpeſapius*? Ubi verba *ablactio*, *abhorreſco*,
eluceſco, *inſoleſco*, *correſpondeo*, *exardeo*, *efformo*,
elucido, *frigeſacio*, *irrito*, *intertexto*, *obtenebro*,
promano, *unio*, *ſubintelligo*? Ubi nomina *hiſtorio-
 la*, *hiſtoriuncula*, *notula*, *extemporaneus*, *gratitu-
 do*, *aptitudo*, *oſtenſio*, *verſutia*, *valor*, *oſcitan-
 tia*, *ironicus*, *panicus*, *cælicus*, *promptitudo*, *ſu-
 blunaris*, *exuvium*? Ut nihil pudet? Quid illa,
 inquit alter, quæ ferrea cum ſint, ferreisque pe-
 jora, populo tamquam aurea venditavit. *Influ-
 xus* & *ingratitude* Firmici, *latinior* & *latiniffi-
 mus* Hieronymi, *incapax* Prudentii, *licite* Oro-
 ſii, *proficius* Caſſiodori, *titillamentum* Fulgentii,
nullatenus Capellæ, *econtra* Servii, *accino* Dio-
 medis, *adinvicem* Auguſtini, *abjuratio* Iſidori,
certitudo, *collimo*, *nuspiam*, *verſio*, multoties for-
 taſſe nullius. A barbaris ad *σέλοικα* & impropria
 descendunt, ſibiſque invicem magno cum riſu me-
 morant *erubeſco* negligentiae, *gratulor tecum*, ut
 tu inquis, ſiquæ ſtudia, materna lingua, *abs re*,
 ſemel

semel & bis, si fortasse, & sexcenta. Talia qui
ferre libenter potest, & fieri puerorum fabula,
verborum curam abjiciat: sed nobis tamen ali-
quanto verecundioribus nolit esse molestus. Qui
vero ferre non potest, mature incipiat de verbis
quærere, & in memoriæ thesaurum, ad prima
quælibet recipienda paratissimum, selecta recon-
dere. Atqui non desunt, qui serius in viam re-
vocati velis remisque conentur, summoque labore
& ingenio adolescentiæ damna rependant. Non
desunt enimvero, quia non debent, ad hanc re-
rum humanarum pulchritudinem & varietatem,
nec in natura, nec in civili administratione, nec
in litteris deesse monstra. Sed isti tamen, ut ce-
tera consequantur, numquam profecto ita flectent
orationem, quin ex orbe universo labor appa-
reat ac difficultas, qualis in citharædo, qui sero
fidibus didicit, obduratosque ætate digitos perti-
naci exercitatione nonnihil mollivit. Et hi qui-
dem nostri sunt, sed longo tamen intervallo no-
stri; quippe elocutionem probant, sed elocutio-
nem similem suæ, ne ipsi non optima consecuti
videantur. Nolunt sermonem nudum & rudem,
sed si paullo ut ornatior, tamquam muliebrem &
effeminatum rejiciunt. Nihil mite laudant, nihil
suave, nihil fluens; sed vehementia, concitata,
vibrantia; horrida etiam sæpe & antiqua; trun-
ca & aspere cadentia; strigosa, hiulca, rigida,
dissipata. Genus hoc orationis puræ & emenda-
tæ, sed neque factæ, neque conclusæ, libenter
arripitur ab adolescentibus, tum quod numero
caret, in quo tota est ducendæ periodi difficul-
tas, tum quod crebris hiatibus insistent, gravi-
tatem habere videtur, levesque sententias strepitu
ipso

ipso sustinere. Ego equidem hoc malo, quam nullum; cetera, quam hoc. Neminem enim vidi, qui cum posset ornate ac numerose dicere, in hoc præsertim epidiæctico genere, in quo una Latina eloquentia a foro curiaque pulsa denique constitit, non ita mallet, quam numeros incidere, & per abrupta inæqualiter ferri, seu potius subsultare. Adde quod Romani ipsi, quorum eloquentia non ad pompam, sed ad pugnam nutriebatur, non ante se foro populi que judicio committebant, quam omnes orationis delicias sibi comparassent, vel comparare conati essent; non ut iis ubique uterentur, sed ut, cum res postularet, uti possent. In ipso enim judiciorum certamine remittenda est aliquando contentio, & judicis animus pacata suavi que dictione relaxandus; quod perpetuus idem que cursus, non euntis, sed bacchantis esse videatur. Ceterum quod verentur, ne concidat oratio, si quando motum inhibeant, & moderatius progrediantur, velim eos cum Cicerone aliquanto versari familiarius. Quis illo ardentior, quis incitator, cum in Verrem, cum in Clodium, cum in Pisonem, cum in Antonium invehitur? Quæ vis, quæ actio, qui cursus universa torrentis instar abripiens? Cum tamen satis putat calere animos, impetum cohibet, & ab acerrima contentione ad elegantem expositionem, ad lepores, ad facetias, tamquam a Tragicis ad Comica, repente descendit. Inde relictis viribus, rursus bellicum canit; crebroque mutato dicendi genere, urgendo, jocando, irridendo, execrando ad perorationem accedit, in qua præsertim ostendit, quantum ipse elegantia valeat & varietate, quantum varietas & ele-

elegantia valeat in eloquentia. Si ergo vitiosum est suaviter & numerose dicere, amandetur hinc Cicero, cujus Orationes aliquæ suavissimæ totæ sunt, ac pæne Isocraticæ, ceteræ variæ, magnæque sui parte ad delectationem compositæ. Cicero autem? Amandetur eloquentia ipsa, quæ nisi splendida est, nisi compta, nisi elegans, nisi numeris perfecta & conclusa, eloquentia non est, sed incondita quædam & ingrata loquendi profluentia. Non ignoro, futuros esse aliquos, qui totam Orationem hanc ad invidiam detorquentes, dicant hoc ipso die, me rerum inventionem abstulisse oratori, inanem verborum sonitum reliquisse. Sed utcumque dicant, qui omnia referunt ad reprehensionem; ego illud primum dico, res Oratori necessarias esse, quia probare necessitatis est; sed rebus fidem artificio verborum afferri, verborum artificio derogari: deinde dico, inventionem esse veluti solum & fundamentum elocutionis; sed illam ad multas facultates, hanc ad Rhetoricam solam pertinere: denique dico, inveniendi facilitatem longe melius, quam in prima, in aliis ætatibus comparari posse; facilitatem eloquendi nisi in prima & altera comparari non posse. Hæc nos in verborum studio detinere solent; hæc detineri nolentibus prædicamus; hæc eadem Ciceronem, hæc Quintilianum, hæc ceteros dicendi magistros impulerunt, ut eloquendi præcepta multo plura scriberent, nobisque diligentius commendarent, quam inveniendi simul & disponendi. Quapropter qui contra nos dicunt, non nos quidem adversarios habent, qui nulli sumus, sed viros in hac arte totius antiquitatis peritissimos. Quam-

quam neminem ego eloquentem virum contra dicentem audivi; audivi Theologos, audivi Philosophos, audivi Jurisperitos, audivi etiam clamatores aliquos, sed qui vel ingenii tarditate, vel laboris fuga, vel utroque ab hac laude repulsi, nihil sibi laudandum putarent, nisi quod ipsi præstare possent. Porro cum Theologos nomen, cum Philosophos, cum Jurisperitos, intelligo sane quos viros quantæque auctoritatis, sed meum est nihil cum fraude dissimulare, vestrum autem rationum momentis, non hominum opinione moveri. Illi enim quod sibi imperaverint, presse & acute ad veritatem inquirendam disputare, pati nullo modo possunt verborum circuitus, & illam figurarum copiam, quæ in sensus irrepit, eosque tractando ac permovendo, quocumque incubuerit, sequi jubet. Liceat illis amare sua; sed nobis quoque liceat amare nostra: illi subtiliter differant, nos eleganter; illi strictim, nos late; illi ad sapientes, nos ad populum; illi vera, nos non tam vera, quam vero similia. Quod si obtinere poterimus sine pugna, præclaro fœdere juncti, Apollini Musisque litabimus; sin minus, æterna bella sustinere parati sumus, te duce atque auspice, Princeps Eminentissime, qui magno ingenio præditus optima vides, magna prudentia jubes, magna constantia tueris.

EPISTOLA

AD LECTOREM

Præposita editioni primæ hujus Orationis.

SIve fato aliquo fiat, siue tanta illa deteriorum Orationum copia, quæ in lucem quotidie mittuntur, certe fit, ut in summa bonarum artium felicitate magnum sit eloquentiæ fastidium, nec jam Oratorem nisi de verendis Religionis mysteriis dicentem æquo animo toleremus. Hinc & qui libros parant, & qui typis mandant, ita sibi Orationes cavent, ita omnes pæne ominosas putant, ut non modo oblatas rejiciant, sed (quod alicubi contigit) ne sibi offerantur, propositis publice monitis, mature diligenterque provideant. Quod si quis ea patientia & humanitate est, ut donari sibi aliquam sinat, non ea conditione accipit, ut artificio distincta sit, non ut electis verbis gravibusque sententiis composita, non ut æqualiter constanterque ingrediens, & in omnia genera prudenter fusa; sed ut variarum rerum eruditione exaggerata, ab Orationis forma quam longissime discedat, & quædam quasi disputatio talia quærenti sæculo videatur. Quasi vero domina illa fori, domina curiæ eloquentia, ceterarum facultatum apud Græcos Latinosque facile princeps, nugatorium aliquid sit; nec diutius in re litteraria ferri debeat, nisi suam illam verborum copiam splendoremque abijciat, & in aliam quamdam facultatem evadat. Audiui ego homines, audiui, qui totum eloquendi studium contemnerent; nosque pro sua quadam bonitate monerent; ne miseros adolescentes tantopere de verbis sollicitos red-

deremus. Id me potissimum movit, ut elocutionis causam susciperem; & quantum fieri per me posset, ostenderem, nihil tam esse ejus ætatis proprium, quæ Rhetoricis vacat, quam diligens ac diuturnum verborum studium. Itaque primum artem ipsam. tum eorum naturam considero, quorum mihi studia commendantur; unde partes existunt Orationis duæ. Atque in prima quidem elocutionem potissimam esse Oratoris virtutem ex nomine ipso confirmo; deinde ex Cæsaris, Ciceronis, & Quintilianæ auctoritate; tum quod sola sine inventione satis bonum Oratorem faciat, inventio sine illa non faciat; postea quod eloquentiam ab aliis facultatibus distinguat; deinde quod Oratorum genera inter se diversa constituat; postremo quod faciat de parvis magna, de magnis parva, in quo totam esse eloquentiæ vim Isocrates existimavit. In altera vero parte ita urgeo, quod institui, ut nihil magis adolescentiæ convenire, quam verborum studium, nihil verborum studio convenire magis, quam adolescentiam, contendam. Itaque per quamdam ὑπόθεσιν ejus ætatis vitia subjicio, quæ, verborum cura primis annis omissa, ad dicendum accedit; multisque confirmo, perfectum Oratorem esse nullum, nisi qui studiorum suorum tempora ab ipsa pueritia recte distribuit, & ætati cuique propria mature assignavit. Hæc ii si legent, quos maxime optamus, desinent, ut spero, aliquando illorum calamitatem dolere, quos in hoc studio ferme uno diu multumque occupatos detinemus. Quod si non desinent, pergam nihilominus incudem hanc validissime tundere. Neque enim mihi causam, sed vires ad eorum animos expugnandos defuisse putabo. Vale.

O R A T I O I V.

A D P H I L O S O P H I A M.

*Nulla est adolescentibus tradenda Philosophia,
nisi historica.*

QUOD eos fecisse puto, qui primum Abylam & Calpen prætervecti, nova ingredi maria, novasque regiones quærere ausi sunt, ut multis subinde difficultatibus impediti, aliisque ex aliis periculis territi, suam ipsilevitatem audaciamque incusarent; id ego hodierna luce facio, qui ex minoribus facultatibus longo mihi usu familiarissimis, tamquam ex patrio littore solvens, Oceanum ipsum tentare cœpi, & Philosophicæ provinciæ velificari. Aliud est enim de Oratiunculæ partibus, ac de naturæ principiis disputare; aliud syllabas metiri, atque orbem terrarum; aliud denique rerum nomina, ac res ipsas, quæ cælo terraque continentur, ad multorum institutionem definire, distinguere, illustrare. Nullus hic verborum globulis locus, nullus translationibus, nullus antithetis; exulat elegantia, jacet amplificatio, artificium omne figuræque frigent; quibus juventuti nostræ aliquando imposuimus, & in dicendo esse aliquid visi sumus. Quamquam sit hoc difficile multis, qui se Rhetorico ludo conclusos existimant, umbræque illius terminis tota vita circumscriptos; mihi vero non debet esse arduum, nec inusitatum, qui ab ipsa adolescentia ex loci hujus institutis in omnes disciplinas excurri; qui Philosophiam i-

Cic. de
Orat. I.
3. c. 19. &
Quintil.
I. 1. proœ.

psam triennium professus sum, qui demum ita in Oratoria facultate constitui, ut non eam Quintiliani præceptis definiri putarem, sed infinita quadam artium ac disciplinarum cognitione comprehendere, quibus pro re nata (quantum quidem popularis artis natura patitur) in foro, in curia, in judiciis uteretur. Accedit, quod ex omnibus disciplinis nulla est tam eloquentiæ conjuncta, quam Philosophia, quæ ne distincta quidem ante Socratem fuit; & cum per illum distincta est, pristinae tamen communionis memoriam adeo retinuit, ut consecutis inde temporibus Philosophi præstantissimi nimiae contemplationis laborem, scholæque severitatem dicendi exercitatione temperare consueverint; & Oratores eloquentissimi a fori curiæque tempestate in Philosophicas litteras, tamquam in portum aliquem, se se recipere. Verum, utcumque est, juvat fidem solvere tribus abhinc annis vobis obstrictam; & id, quod sentio de hujus facultatis studiis, non ex officio solum, sed ex more quodam meo, mihiq; insita dicendi libertate, sine ulla trepidatione patefacere. Ego equidem, Auditores, & ab aliis sæpe quæsi, & mecum ipse reputavi, quid causæ esset, quod cum adolescentes in Philosophicis scholis diutissime teneantur, nihil tamen inde nisi præjudicia quædam plerumque colligant, quibus quasi superstitione adstricti, ne fieri unquam Philosophi possint, impedian-
tur: cumque & ejus ætatis imbecillitatem, & scientiæ naturam, & communem docendi rationem attente considerassem, in eam denique opinionem veni, ut existimem, constanterque defendam, nullam Philosophiam, seu veterem, seu

novam, adolescentibus tradendam esse, nisi historicam. Historicam porro cum dico Philosophiam, differendi studium prorsus excludo, & grandia illa Academicorum, Peripateticorum, Stoicorum nomina adolescentibus adimo, quæ consequi tam mature nequeunt; nec vero umquam consequentur, si immature affectabunt. Hoc ut ostendam, multa mihi de tota ratione Philosophiæ, multa de adolescentum ingeniis, nonnulla etiam de magistris dicenda erunt; in quibus non vereor, ut æquissimos hujus civitatis Professores ne levissime quidem offendam, quos extra omnem ingenii aleam multis in rebus perspecta sapientia, ordinis dignitas, fortuna loci, & quod longe maximi momenti est, Principis judicium constituit. Non eadem est ratio privatæ, publicæque scholæ; quæque nos in hac umbra nostra angustissimis definita regionibus vel probanda, vel saltem ferenda ducimus, ea si in tantam illam lucem hominumque conspectum afferantur, vel nimis exigua sunt, vel etiam fortasse inepta. Imo ne nostris quidem ita dico, ut statim majorum instituta mutari velim, novamque iniri philosophandi rationem; quippe mihi ipse imperavi, nova multa, si fieri per me possit, excogitare, sed paucissima facere.

Scholarum fere omnium consuetudine receptum est, ut Rhethoricis studiis Philosophica statim succedant; quod hæc omnibus disciplinis communia sint, viamque ad contemplandum, & intelligendum patefaciant. Sive enim Medicus esse velis, sive Theologus, sive Jurisperitus; sive demum ad poesim, aut eloquentiam redire; facem veluti quamdam facultatibus ceteris præfert Philosophia, illis se omnibus inserit, magnamque sui

partem pro cuiusque necessitate liberalissime sup-
peditat. Sed cum philosophandi rationes multæ
sint, maximeque diversæ, nulla est earum tam
diligenter colenda, si fructum quærimus institu-
tionis, quam quæ latissime patet; & ad quam-
libet disciplinam contendentibus auxilia plurima
ferre potest. In quo si Philosophos ipsos consu-
lamus, hanc sibi quisque laudem magnis clamo-
ribus sumet atque arrogabit; sin autem ratione
agamus, facile reperiemus, non vetus philoso-
phandi genus, aut novum, non Academicum,
non Stoicum, non Peripateticum tot tantisque
rebus sufficere; sed unum illud, quod omnia
cum veterum, tum juniorum Philosophorum dog-
mata, sine ullo partium studio descripta & ex-
posita complectatur. Si enim Theologis Aristote-
les potissimum & Plato, si Pythagoras Mathema-
ticiis, si Moralibus Socrates, si Solon & Lycur-
gus Jurisperitis, si Medicis utiles illi sunt, qui
non tam contemplando, quam experiundo philo-
sophantur: ad omnes istorum libros adolescentes
ducendi sunt, omniumque doctrinis instituendi;
ut quocumque tandem sive necessitate, sive con-
silio, sive etiam casu aliquo deferantur, munitis-
simi accedant. Neque vero hoc tam est infini-
tum, quam sibi aliquid fortasse fingunt. Ita me
Superi ament, ut multo plus operæ ac laboris
insumunt, qui uni se Philosopho dediderunt, e-
jusque cogitata omnia per ambages æternasque
lites proposita addiscunt, quam qui Philosopho-
rum omnium opiniones simplici narratione con-
clusas memoriæ mandant. Ut enim principem
totius Philosophiæ locum attingamus, nonne fa-
cilis est naturæ principia, quæcunque sunt pro
Secta.

Seſtarum varietate inventa, litteriſque tradita, in medium afferre, & ſine ullis controverſiis explicare, quam ſe totum ad unius hominis aucto-ritatem conferre, cujus dicta innumeris quæſtio-nibus enucleanda ſint, argumentis munienda, pri-vatis publiciſque experimentis propugnanda? Me-mini ego, memini, quam multis non diebus, ſed menſibus, quantoque cum tædio ingentia il-la volumina aliquando volutarem, in quibus de Ariſtotelica materia, de forma, de privatione tantopere diſputatur; nihilque demum percipitur, niſi hominis unius ſententia, acuta certe quidem & Ariſtotele digna, ſed immenſis difficultatibus involuta, anceps, ambigua, & antiquis oraculis pæne ſimilis. Animadverti ſæpenumero, quam totum illud ſcrutandæ naturæ genus auditoribus identidem oſcitantibus diſpliceret, cum magno verborum apparatu, magnaſque animi contentio-ne quærerem; *utrum privatio eſſet aliquid; utrum cum materia & forma componeret totum; utrum totum ipſum a ſuis partibus ſimul ſumptis diſtingue-retur; utrum materia poteſtas eſſet, an actus; utrum ſola poſſet exiſtere; utrum nihil, an non ens appellari deberet;* & id genus alia alio tem-pore, & aliis hominibus fortaffe pulchra. Sed hæc cum more facerem inſtitutoque majorum, nec aliter facere vellem, quam juberer; id tamen inde uſque decrevi, ſiquando mihi dicendi publi-ce copia daretur, totum hoc, quidquid eſt ope-ræ, improbare, & historicum quoddam philoſo-phandi genus proponere, quod varietate rerum & facilitate juventutem alliceret, & ſine ſatietate detineret. Quanto enim eſt ad docendum libera-lius, & ad diſcendum expeditius, ſi dicas, res
omnes

omnes apud Pythagoreos materia numerisque constare, hoc est materia certo partium numero compacta; materia & ideis apud Platonicos, hoc est materia per varias divinæ mentis ideas varie disposita; apud Peripateticos materia & forma, hoc est materia per suas formas absoluta & perfecta, & in certis rerum generibus bollocata? Quod si addas infinitum Xenophanis & Melissi, chaos Empedoclis & Anaxagoræ, plenum & inane Democriti, frigidum & calidum Parmenidis, terram Hesiodi, aquam Thaletis, aerem Anaximenes, ignem Heracliti; tantumque in singulis immoreris, quantum satis est ad explicationem; jam id effecisti in partē totius Philosophiæ difficillima & implicatissima, quod omnes debeat adolescentes non dicam ingenuos, & ad studia natos, sed etiam bonarum artium osores mirifice delectare. Ex quo etiam fieri potest, ut illi ipsi, qui consuetudine potius, aut otio quodam, quam philosophandi cupiditate Philosophos audiunt, multiplici hac & expedita cognitione pelliecti, aliarum rerum cogitationem deponant, & in hoc studio diutissime consistant. Quamquam quis est unus ita philosophandi cupidus, & ad has præsertim Dialecticorum ambages, unde gravissimæ facultatis initia ducuntur, ita factus, ut eas statim avidissime arripiat, & sine ullo magistri artificio persequatur? Omnes ferme adolescentes, quicumque ingenio aliquo & industria valent (tardis enim & inertibus æque omnia solent esse molesta & impervia) omnes, inquam, istiusmodi adolescentes a suavissimo Musarum amplexu inviti divelluntur, ut ad severissimos homines Zenonem & Aristotelem adducantur; nec mihi adhuc

adhuc inventus est ullus, quin ipso in limine valde palluerit, tamquam ab amœnissimis hortis in vepres & dumeta compulsus. Quod siqua ratio est terroris hujus vel tollendi prorsus, vel minuendi, ut certe non deerit differendi libidinem coercenti, quid est, cur nolimus auditoribus hilaritatem, & scholis frequentiam comparare? Sed hætenus de illis, quorum vitæ ratio dubia est, necdum quo tendant, certo consilio constituerunt. Agedum ad illos veniamus, qui politiorum litterarum cupidissimi, eo curas omnes ac studia referunt: neque enim omnes tam brevi oratione complecti possumus, neque tamen illos omittere debemus, quorum ipsi laudem & gloriam sequimur, tametsi non assequamur. Jam porro cum litterarum & eruditionis nomine veterum Scriptorum interpretatio præter cetera contineatur, tantumque pateat provincia hæc (nequid supra hominis vires ab homine postulemus) quantum Græcæ Romanæque littæ; uter de se plura præstare poterit, & magnam illam eruditi personam sustinere, isne, qui totus sit Aristotelicus, vel Platonius, vel Democriticus, an vero ille, qui Aristotelis, qui Democriti, qui Platonis, qui denique Philosophorum omnium, quicumque in aliquo numero sunt, & familiam aliquam ducunt, opiniones teneat, alias ab aliis distinguat, & ad auctorem quemque suum, ubicumque invenerit, referre possit? Primus quidem ad pugnandum paratior erit, & siquid incidet ex schola sua, Philosophus etiam judicabitur valde bonus; sed ubi se alia ex aliis scholis petita pro Scriptorum varietate offerent, in plerisque deficiet, sibi que dissimillimus, nec Philosophus

phus esse videbitur, nec eruditus. Alter vero ad philosophandum nullo certo genere acer, sed in omnibus tamen diligenter instructus, perpetua quadam, sibi que consentiente doctrina in omni antiquitate versabitur, & quidquid occurret ex Philosophia, cujuscumque tandem sit ætatis, cujuscumque sectæ, cujuscumque hominis, ita pertractabit, ut id potissimum profiteri videatur, nec tamen ad loquacitatem & contentionem profiteri. Vix dici potest, in Poetarum præsertim interpretatione quam multa requirantur ex omni Philosophica historia deprompta. Stoici quidam sunt, quidam Epicurei; sed neque Academici desunt, neque Peripatetici, neque Pythagorei, & in uno sæpe carmine multorum Philosophorum placita conjunguntur. Accedat huc aliquis ex illis, qui tantopere sibi placent, quod sectæ alicujus nomine censeantur: hærebit identidem, dubitabit, hallucinabitur, modo librarium negligentia, modo Poetam obscuritatis postulabit; & ipsa illa, quæ recte dicet, timide, cunctanter, ambigue, quasive divinando dicet. Ex hac totius Philosophicæ eruditionis ignoratione magna quædam Criticis scribendi seges exorta est, qui Homerum præsertim tamquam ineptum fabularum narratorem condemnarunt; quod multiplicis sapientiæ semina, ex vetusta Ægyptiorum ac Phoenicum disciplina collecta, fabulisque conclusa non intelligerent. At enim paucis loquimur; nec tanti est in litteraria Rep. Grammaticorum & Rhetorum ordo, ut statim Philosophicæ institutiones ejus causa mutandæ sint. Non omnia brevissimo tempore afferri possunt, ut ante dixi: verumtamen si numero agenda res est, non eruditos modo, sed

sed universam hominum societatem complectar ; quibus ad honeste colloquendum , seque mutuis sermonibus oblectandum tanto magis studium hoc nostrum , plurima cognitione diffusum , prodesse ostendam , quanto pulchrius est multis in rebus versari dicendo posse , quam eodem semper vestigio hære , eademque recoquere . Etenim si humanæ vitæ conjunctio nulla re magis , quam honesta quadam & jucunda sermonis communione alitur , quid est , quod hominum consuetudines & familiaritates magis ornare possit , quam collecta hæc ex omni Philosophiæ genere , de quacumque re , quæ in disputationem cadat , dicendi copia & prudentia ? Etsi autem non omnis de rebus Philosophicis controversia est , nulla tamen ceterarum facultatum tam ipsa per se constat , quin ad veteres Philosophos , unde omnis profluxit cujuscumque generis scientia , aliquo modo referatur ; ut qui se hac in parte munierit , nullum doctissimorum hominum sermonem , nullam disputationem reformidet . Itaque si quis est , quem potissimum velim Philosophica historia ad elegantiores vitæ usum erudiri , ii certe sunt , a quibus nobilitas generis , & fortunarum copia nihilo plus scientiæ postulat , quam quantum ad honestas amicitias conciliandas , & probe colendas politissimis moribus satis sit . Nihil enim in amicitia potest esse insuavius , quam intemperantia illa subtilius disputandi , & quæsitæ alternis pæne verbis in uno aliquo genere scientiæ opinio : quo tamen morbo omnino carere nequeunt homines isti molestissimi , qui non multiplicem , sed magnam eximiamque cognitionem e scholis haustam profi-

ten-

tentur . Fac enim illos sibi videri Peripateticos (magnum sane nomen , & antiquæ gloriæ fama verendum , ac pæne sacrum , si loco & tempore usurpetur ; ridiculum , si ad ostentationem obtrudatur) fac , inquam , eorum aliquem Peripateticum sibi videri : nullum jam licet inferre sermonem , quin eodem revolvatur . Græcorum Remp. attingis ? Græcorum , inquit , Aristoteles sapientissimus fuit . Macedonas appellas ? Magnum , inquit , Alexandrum instituit Aristoteles . De Rhetore aliquo mentio est ? At ille , Rhetorica præcepta Aristoteles optime scripsit . Ad Philosophum transis ? Hic vero magna voce clamat , Philosophorum princeps est Aristoteles . Nihil denique nec infra Lunam , neque supra nominabis , quin ad Aristotelem & Aristotelicos libros , velis nolis , citissime deducaris . Nimirum nihil præterea novit . Quare nobilissimi adolescentes , qui ad unam communis vitæ elegantiam , civilemque convictum instituuntur , ne quando per hæc aut similia ridiculi fiant , non tam ut multum discant , curare debent , quam ut multa . Ergo , inquiet aliquis , adolescentes illi , qui Philosophi futuri sunt , totiusque gloriæ , aut etiam vitæ spem in hoc studio collocarunt , certis se claudere finibus debent , partesque illas mature eligere , quas deinde sine ulla aberratione sequantur . Equidem non diffiteor , in re ceteroquin valde plana , id unum esse scopulosum atque difficile , quod historica Philosophia satis ornare videatur ad alia pergentes , non satis munire philosophantes . Videte , Auditores , quam nihil diffimulem : sed simul illud pro vestra sapientia cogitate , quam nihil meæ causæ diffi-

diffidam , qui locum maxime lubricum extrema oratione persequor , & quod ex arte declinare debueram , vel leviter attingere , ad totum explico , vestrisque cogitationibus ac prope oculis , quantum quantum est , ingenue subjicio . Age igitur , habete quid sentiam . Mitto , quanto illi ornamento sit , qui se Philosophum putat , omnium Philosophorum historiam a primo illo inventore Thalete (quantum quidem antiquissimarum rerum memoria concedit) distincte cognoscere ; quæ singulæ sectæ fuerint , quando inventæ , quomodo propagatæ , quamdiu cultæ , qua ratione sublatae : mitto , quam sit etiam necessarium proponenti sua in eodem genere aliena non ignorare . Hoc unum dico , quod maximam vim apud homines sapientissimos habere debet , qui velit ex multis philosophandi rationibus unam eligere , eum temere prorsus facere , nisi omnes sibi ante oculos ponat , accurate perpendat , mature , prudenterque dijudicet . Nisi forte , quod accidit Chærephonti , ut oraculi voce ad Stoicos mitteretur , id sibi quisque promittit ; mactatisque hostiis in ipso Philosophiæ limine , de secta eligenda Apollinem sciscitatur . Zeuxin ferunt Heracleotem , cum pulcherrimæ mulieris simulacrum ex Crotoniatis virginibus effingere jussus esset ; cumque in palæstram ductus mira dignitate pueros vidisset , ex quorum fororibus formosissimas conjiciendo deligeret , non prius tamen delectum habere voluisse , quam virgines ipsæ unum in locum publico consilio conductæ essent , & suismet oculis singularum formam aspexisset ac judicasset . Quod si nos parem in re multo gravissima diligentiam adhiberemus , pro-

Luc. de
Sectis .

Cic. de
Inv. l. 2.
c. 1.

perfecto non committeremus , ut adolescentes nostri casu Philosophi fierent, & unam aliquam sectam suspicando amplecterentur , contra ceteras propugnandam , quas illis non ratio , sed impetus & inscientia reddit invisas. Nihil enim tam ridiculum dici potest , quam quod isti respondere solent , quoties interrogantur , quemadmodum Hermotimus a Luciano in Dialogo de Sectis , quoniam certo consilio ducti eam præter ceteras viam inierint , quam sequuntur ; eumque sibi ducem elegerint , cuius præceptionibus irretiti , reliquos omnes nulla re sibi nisi nomine cognitos contemnunt, irrident, & falsi crimine , indicta causa , condemnant. Ecce autem præjudicia illa , quibus homines ab ipsa adolescentia occupatissimi ad philosophandum accedunt, & rationi , & sensibus ipsis fidem potius negare parati , quam susceptas semel partes umquam deferere , atque aliena probare . Utinam vero hæc ut multi damnant in publicis privatisque scholis , ita tollere conarentur . Sed nimirum facilius est recte dicere , quam recte facere . Cur enim qui maxime possunt , non tamen occurrunt morbo huic ? Quin ita adolescentum studia regunt , ut quoniam ætas illa ad recipiendum aptissima est , nec Platonem Deum esse sibi persuadeant , nec Aristotelem , nec Epicurum , nec eorum aliquem ex junioribus , qui veteres istos excitarunt ; sed omnes omnium opiniones percurrant , tamdiuque retineant , donec ipsi per se , confirmata jam ætate , singulas singulis conferre possint , libereque rejicere , libereque probare ? Sunt illi quidem , pro suo quisque ingenio , valde præstantes , & ea fama digni , quam sibi multorum

torum consensu pepererunt : sed nihil profecto est aut a natura , aut ab arte simplici in genere omnino perfectum ; maximeque curare debemus , necujus doctrina tenellis mentibus altissime consignata ita illas assiduo usu , & quadam , ut ita dicam , familiaritate capiat , ut vitia quoque libenter suscipiant , aliorumque præclare inventis pertinacissime præponant : quod quidem tantum abest a recta veritatis inquirendæ ratione , nihil ut magis veritati possit esse contrarium . Ex quo Philosophi esse cœperunt , satis superque compertum est , convelli præjudicia non posse . Quin ergo curamus , ne fiant ? Quin scholas ea prudentia moderamur , ut odio & amore vacui exeant adolescentes ; ipsique per se libere cum primum potuerint , philosophentur ? Nam illud quid attinet refutare , quod hæc mihi proponenti quispiam fortasse reponet ; nimis jam esse Philosophorum , nihilque pro tanta ista copia laborandum , nisi ut sapientissimum mature eligamus . , a quo uno quidquid est in ceteris boni , & ipsum per se facillime cognoscamus ? Apagesis . Annon enim hoc ipsum sapientissimi hominis est statuere , quis sit sapientissimus ? Fac porro statuas . Ex veteribus ne aliquem , an ex nostris ? Si ex veteribus , Platonis ideæ offendunt Aristotelicos ; Aristotelis forma non placet Democriticis ; infinitæ Democriti atomi non probantur Pythagoreis ; Pythagoræ monas displicet fere omnibus ; tantaque se mutuo contentione petunt , ut alius alii non minus quidem sapere , sed plane desipere videatur . Si ex nostris , quis ita ingenii doctrinæque fama omnium hominum suffragium tulit , ut

eum sapientissimæ antiquitati , totique Scripto-
rum ordini sine injuria præponas ? Difficile est
enim abstinere risus , quoties boni viri ludum
aperiunt ; magnisque promissis ante denunciant ,
se non Platonicos esse , non Aristotelios , non
Gassendicos , non Cartesianos ; esse in veteribus ,
esse in novis , quod sibi displiceat ; esse etiam
in utrisque , quod placeat ; nemini se auctora-
tos fore , sed ex omnibus optima colligendo ,
suisque miscendo , liberum philosophandi genus
ingenti cura & meditatione quæsitum allaturos .
Euge , belle , pulchre : tibi Musisque gratulor .
Accedant adolescentes , audiant , excipiant , in
codicem referant : nihil est editum post homi-
nes natos æque divinum ; exscribere oportet ,
addiscere , memoriæ mandare . Ac mihi qui-
dem ita videtur , nihil esse adolescenti pericu-
losius , quam hujusmodi homines ab initio offen-
dere ; qui non vident , quandoquidem certum
Philosophiæ genus tradendum putant , satius esse
unum aliquod ex illis tradere , quæ probatissima
sunt , & auctoris fama commendata , quam suo
de nomine Philosophos facere , & cito dediscen-
da venditare . Sed ego hæc adolescentibus per-
suadere fortasse potero , magistris persuadere non
potero , qui nullam se laudem referre clamant ,
si nihil de suo , nisi vocem in scholas afferant .
Hoc scilicet eorum vitium est , ut velint non
ad discipulorum utilitatem , sed ad ingenii osten-
tationem docere , nec tam esse magistri , quam
videri Philosophi . Sed heus tu , si ratio hæc
qualiscumque Philosophiæ illis utilis est , quo-
rum causa laboras , quid est , cur gloriam aliun-
de quæras ? Satis laudis retulisti , si officio fa-
tisfe-

tisfecisti . Præterquamquod itane sentis ex animo , hanc docendi rationem carere laude ? Ergo laude carent Theologi hujus ætatis præstantissimi , qui innumeras quæstiones ad exercendum ingenium subtiliter excogitatas longissime ablegarunt ; totamque gravissimam scientiam Scripturæ præceptionibus , Sanctorum Patrum dictis , & Conciliorum decretis concluderunt . Jam isti omnes , qui non sua , sed aliena fideliter referunt , Theologi nomine indigni sunt ; inveniant oportet , excogitent , comminiscantur , tum vero sapere videbuntur . Sed alias erit de Theologis sermo . Ad Philosophos redeamus , quos ego ab inveniando non revoco , siquidem possint , sed rogo obtestorque , ut aliam quandam docendi , aliam contemplandi exercitationem esse constituent . Non est Philosophi narratorem agere ; at est præceptoris . Historia Philosophica non est Philosophia ; at neque possunt adolescentes , neque tam cito cupiunt esse Philosophi . Sed quænam istorum est , Dei immortales , Philosophia ? Annon humanæ mentis vires cognoscere pro varia corporis conformatione singulis ætatibus varias , pars quædam est , nec sane parva Philosophiæ ? Nunc illi quidem satis cognoscere videntur , quid ipsi tradere possint ; non satis tamen , quid illi capere , quibus tradunt . Si enim pro illa , quam sibi arrogant , naturæ cognitione reputarent , eam cerebri partem , qua hominis animus ad ingenii memoriæque munia , quamdiu corpori conjunctus est , necessario utitur , ita in adolescentibus conformatam esse , ut sua quadam molli-
tie facile excipiat quidquid injicitur , ea ta-

men ipsa mollitie impediatur , ne spiritus ad intelligendum facile expediat & moderetur ; non sane erubescerent , ætati illi consentanea nar- rando potius , quam differendo , consignare . At- qui dum sua crepant , dum eadem perpetuo di- cunt , repetunt , confirmant , insinuant , non id assequuntur , ut auditores minime apti re- pente Philosophi prodeant ; sed ut ejus doctri- næ quæcumque est , præjudiciis occupatissimi , ac veluti sacramento rogati , nullam præterea pati possint Philosophiam . Quam vero indeco- rum est , quam incongruum , quam a tota scien- tiæ natura alienum , adolescentem hominem de rebus abditissimis judicare , decernere , affirma- re ; & , ut ejus ætatis est , tanto magis clamo- re & audacia , quanto minus ratione potest , su- sceptas partes propugnare ? Non ego cum ju- ventute tam dure agam , ut eam per multos an- nos Pythagorico more filere jubeam , nihilque respondere umquam , nihil interrogare ; ve- rumtamen si Philosophica eruditione contenta sit , nec sapientiam immature affectare videbitur , & in eo tamen valere , cujus præsidio perfectam absolutamque sapientiam comparare aliquando pos- sit . Nam quod ipsa per se intempestive com- mentari velit , & sine prudentia garrire , ic- circo factum est , ut nobilissima disciplina , non hominum ingeniis parta , sed ut Plato existi- mavit , Deorum munere nobis concessa , in- credibili invidia laboret ; nihilque jam de re- rum natura tam Poeticum fingi posse videatur , quod non ab aliquo dicatur Philosophorum . Hinc modo cum horologiorum inconstantia , mo- do cum ægrotorum somniis , modo cum an-
daba-

dabatarum pugnis a sapientissimis Scriptoribus comparata : hinc senatusconsulto a Romanis expulsa, & ad suos Græculos redire iussa : hinc denique a Græcis ipsis simulandi ars sæpe dicta, cujus fama & auctoritas non ipsa dignitate rei, sed singulari habitu, & contemptu ceterorum sustineretur. Quemadmodum enim summi in Repub. Magistratus si vulgari cœperint, & cuilibet ætati mandari, splendorem & auctoritatem amittunt : unde fit ut habitus ipse, & antiqua potestatis insignia, ad mores degeneres accommodata, irrideantur ; ita Philosophica studia maximarum tractatione rerum pæne divina, postquam in medio posita sunt, & cuique sine delectu communicata, in contemptum abiere, palliumque ipsum pristinae majestatis insigne ad irrisum traductum est. Ago igitur causam vestram, sapientissimi viri, cum dico, non esse adolescentibus dandum, ut ipsi per se, cum paullum aliquid in schola sederint, statim philosophentur. Cum enim præstare nequeant, quod conantur, tanto nomini injuriam faciunt, & numerum quidem augent, si Diis placet, Philosophorum, sed pretium imminuunt. Ago etiam vestram, Adolescentes studiosissimi, quos cum videam in rerum difficillimarum tractatione magno cum labore fluctuare, ex illo velut Euripo in tranquillum pacatumque mare deduco, ubi & facilitas navigandi jucunditatem pariat, & oportunitas laudem, & modus utilitatem. Ago denique causam tuam, Princeps Eminentissime, qui cum velis, & identidem jubeas, juventutem hanc ad morum & litterarum institu-

tionem tibi creditam , non garrulam in disse-
rendo esse , non acerbam , non pugnacem , ge-
nus hoc nostrum adsciscere potes Philosophiæ ,
quod nullam sententiæ dictionem habet , sed so-
lis narrationibus continetur .

E P I S T O L A A D L E C T O R E M

Præposita editioni primæ hujus Orationis.

Veteres philosophandi institutiones , si numero
censeantur , tam multæ sunt , ut omnibus co-
gnoscentis ne illius quidem anni sufficere videantur ,
qui tres hominum ætates vixit ; sin autem re , ita
partim antiquitate obruta periere , partim similia
continent , ut uno , nec immodico volumine , Thomas
Stanlejus universas comprehenderit . Nihil ergo con-
ficiunt , qui Jonicam Sectam , Italicam , Eleaticam ,
Epicuream , Cyrenaicam , Eliacam , Megaricam ,
Academicam , Peripateticam , Cynicam , Stoicam ,
Pyrrhonicam , Potamoniam nobis commemorant : quasi
vero immensum aliquod onus Oratione hac adolescen-
tibus imponamus , quod viros senesque opprimere
possit . Hoc præmonere iccirco volui , ne quis lem-
mate ipso , quemadmodum sæpe accidit , a legendo
deterreatur ; putetque a nobis ea proponi , quæ cer-
tis firmisque argumentis non solum non probentur ,
sed omnino probari non possint . Et vero cum de re
hac sermonem apud amicos intulissem ; dixissemque
videri mihi multis de causis , non Philosophiam ,
sed historiam philosophicam adolescentibus tradendam
esse ,

esse, primum quidem lapides loqui visus sum, tum id pervici, ut de illis adolescentibus concederent, qui nollent ex vitæ instituto philosophari; sed ut ambas manus darent, mibique in universum assentirentur, id vero nec exprimere potui, nec ut exprimerem, pro illo, qui in familiaritatibus servari debet disputandi modus, pertinaciter laboravi. Nunc vero tamquam in aciem ductus, nervis omnibus viribusque contendo, primum quidem adolescentibus, quorum vitæ ratio adhuc incerta est; deinde illis, qui Græcam Latinamque eruditionem unice spectant; tum illis, qui ad generis commendationem vitæque elegantiam bonis artibus informantur; postremo illis, qui se totos philosophicis studiis dediderunt, per sectas omnes excurrendum esse, nihilque præter historiam ex tam longo itinere colligendum. Quid opus est pluribus? Oratoriam scriptionem afferro: nec tam me, quod ostendo, persuasisse juvabit, quam ad persuadendum non inepte dixisse. Vale.

O R A T I O V.

AD THEOLOGIAM.

Theologus nemo dici potest, nisi probus vir.

JAm primo illo, quod mihi superiore anno ad altiores disciplinas progredientia Philosophis injiciebatur, periculo defunctus, ad ipsum denique sapientiæ fastigium ascendo, & in gravissima Theologorum corona, communem studiorum naturam scholæque hujus instituta secutus, libentissime confido. Quo in loco mihi quidem honestissimo, & a prima adolescentia multis laboribus multaque industria quæsito, una me res sollicitum habet, quæ multorum sermone contrita veluti proverbium circumfertur, magnos Theologos nihil credere; & quod inde consequitur, sine Superum metu, ac sine ulla immortalitatis cogitatione suis legibus vivere. Sive autem id ipsorum levitate percrebuit, quorum plurimi antiquitatis oppugnatione singularis reconditæque doctrinæ famam quærunt; sive etiam superbia, quod aliqui revera nihil credant, nisi quod ipsi ingeniolis suis longe minimis consequi possunt; sive demum infana quorundam improbitate, ac ferme desperatione, qui eam sibi necessitatem vitiorum suorum legibus impositam putant, ut ne Deum quidem esse concedant, nisi forte cæcum & otiosum, id ejusmodi est, ut magna animi provisione caveri debeat, & a nobis, nostrisque adolescentibus tamquam triste aliquid ac detestabile averruncari. Quamobrem in ipso statim Theologiæ limine, pro eo, quod suscepi, monendæ

nendæ juventutis officio, huc accedentibus edico, non solum ne exiguum ingenium afferant, quod est a natura impedimentum nulla fortasse industria nulloque artificio superandum; sed quod in cujusque potestate est ne mores afferant liberos plusquam satis, & ad vivendi licentiam solutiores. Neque vero putetis, Auditores, me fines illos, quos mihi ipse circumdedi, sine causa perrumpere, & in eorum provinciam excurrere, qui cum vitiis & cupiditatibus bella gerunt: sed cum ita mihi videatur, mores & ingenium in hoc studii genere conjunctissima esse & alterum ab alteto mirifice adjuvari, id ipsum publice expono; & quantum quidem per me licet non mediocris jam usus, sed minimæ facultatis hominem, ostendo, Theologum neminem dici posse, nisi probum virum. Quod si iis persuadere potero, quorum mihi studia commissa sunt, ipsi se ab obtrektoribus aliquando defendent, & nobilissimæ disciplinæ gloriam per has insidias petitam justo sacramento vindicabunt.

Priusquam vero rem ipsam aggredior, peto a vobis hanc veniam, Auditores, ut de me, quod sæpe desideravi, pauca dicam: nam & brevissime faciam, & ea moderatione, ut omnes intelligant, me quidem non de me ipso laborare, sed de hujus dignitate loci, quem quoniam Principis sapientissimi judicio tenere cœpi, fortissime constantissimeque in omni vita defendam. Audi vi, nostrum hoc dicendi genus planum & æquabile non satis implere capacissimas quorundam aures, qui sales identidem facetiarum, & exag Gerardam multarum rerum eruditionem non tacita voluntate requirunt. Et ad primum quod attinet,

net, utrum sit aliquis in nobis urbanitatis lepos
opportune adhibitus, cujusmodi fuit in illis,
quos nobis ad imitandum proponimus, nec ipse
judicare possum, nec si possum, dicere ausim;
dicacitatis quidem certe & comicæ cavillationis
est admodum nihil. Ut enim lenissimum mihi
ingenium natura largita est, ita neque voci,
neque oculis, neque fronti addidit scurrile ali-
quid, cujus auxilio ad hanc eximiam laudem
dicendo contenderem. Nihil vero minus est, quod
arte comparari possit, quam ratio jocandi, &
mimica quædam ad movendum risum pronuncia-
tio: ac si qui comparare conati sunt, cum es-
sent suopte ingenio vultuque ad seria compositi,
stomachum & indignationem commoverunt. Quam-
quam si me natura ad istorum voluntatem con-
formasset, & tempus ita postularet, ipsi vos
mihi gravitate vestra incredibilem verecundiam
offunderetis; nec tam me voces quædam adole-
scentum levitatis indices ad audendum excitarent,
quam mehercule primi hujus & alterius subsellii
conspectus modestiæ moneret. At enim neque
eruditi sumus. Si, quod isti faciunt, eruditio
est, sexcenta Scriptorum nomina uno spiritu re-
citare, fateor equidem neque esse me, neque
futurum umquam eruditum; non quod bibliote-
cis caream, unde talia sumuntur, sed quod lon-
ge diversum esse statuam Oratoris officium; &
quale demum cumque sit, nolim in eorum pos-
sessiones irruere, qui per hæc fucum facere con-
sueverunt, seque pulchros beatosque plebeculæ lit-
terariæ venditare. Sin autem eruditio est color
quidam antiquitatis, non ille quidem ex libro-
rum titulis semihoræ spatio collectus, & in
omni

omni sermone intemperanter fusus, sed ex diuturna priscorum monumentorum tractatione comparatus, eaque parsimonia & prudentia adhibitus, ut non facere ipse orationem, sed ornare videatur, est, si Diis placet, ut de eruditionis laude non omnino desperemus. Atque ut intelligatis, Auditores, quid hoc hominum sit, qui talia postulant, scitote, illos non ingenio quidem carere, sed sanitate. Est in quo laudari possint, si sua laude contenti, aliis quoque non nihil concedant. At vero cum ita populo persuadere velint, se unos scire omnia; neque tamen id honesta aliqua ratione consequi possint, universam litterariam provinciam criminando perturbant, magnumque sui iudicii metum qualiacumque conantibus injiciunt. De his plus satis; ad rem veniamus.

Objiciunt quidam, ut ante dixi, Theologis præstantissimis ἀδελφοί, omnisque, præter eam, quæ a natura est, pietatis ac religionis contemtionem. Accusatoribus istiusmodi, qui nullorum omnino, vel paucorum vitia in omnes derivant, non esset mihi difficile audaciam excutere, si quidem vellent hoc in loco tamquam in iudicio calumniam ejurare: sed & illos abesse juvat, & nos ita dicere, ut nihil aliud spectasse videamur, nisi ut adolescentum nostrorum mores optimis monitis præceptisque componeremus. Veteres Socraticæ disciplinæ Philosophi, quorum doctrina Christianis legibus castigata in Theologicam scholam adscita est, non aliter se inter suos numeratum iri putabant, quam si ita viverent, quemadmodum docebant. Hinc magna illa rerum humanarum tolerantia, fortunæ contemptus, projectio

jectio divitiarum, mentis consiliique constantia, virtutesque reliquæ, quas in Socrate primum ipso, deinde vero in Aristippo, in Cratete, in Biante, in Diogene, in Anaxarcho, in Zenone ceterisque Stoicis æquales eorum admirati sunt, nobisque ad exemplum tradiderunt. Neque vero aut Græca juvenus in eorum scholas convenisset, aut ipsi prudentissimæ gentis magistratus convenire passi essent, nisi, quæ dicerent, agendo confirmassent; totiusque vitæ ratio in publicis privatisque negotiis cum illius severitate doctrinæ consensisset. Tu vero, Theologe, quid mihi de Deo ejusque legibus; quid de Superis, atque Inferis; quid de vitiis, quid de virtutibus prædicas; si ita vivis, ut nihil eorum facias, quæ nos, nisi faciamus, æternos cruciatus minitaris? Jam quid restat, nisi ut putemus, te ad ingenii commendationem talia confingere; & multorum credulitate velut ad ludum faciendum abuti? Levissimum est enim, nec omnino ferendum, quod vulgo dicunt, se neque Augustini quærere gloriam, neque Thomæ, neque Bonaventuræ; illos quidem, & præterea paucos illorum similes non communi hominum conditione natos, sed tamquam cælo demissos divinarum humanarumque rerum studio incredibilem in omni virtutum genere exercitationem non sine miraculo conjunxisse. Dii boni, quid ita nugantur? Anne umquam fando auditum est, pietatem pugnare cum litteris, aut opus esse miraculis, ut res natura simillimæ jungantur? Si enim Mathematica siderum & planetarum contemplatio, ut septimo de Rep. libro contendit Plato, pios ho-

mines

mines facit ; si illa ipsa litterarum exercitatio , quæ Poeticis fabulis continetur , tamen plurimas habet ad vitæ institutionem opportunitates , ut elegantissima Oratione *πρὸς τοὺς νέους* D. Basilius ostendit ; quid est , quod esse possit in Theologicis studiis ad probitatem impedimento , nisi forte illis , qui stomacho laborant , optimosque cibos in pessimum succum convertunt ? Neque tamen postulo , ut insignia illa sapientiæ ac bonitatis exempla , ne singula quidem singulis ætatibus visa , Theologi nostri continuo referant , quod esset Theologicis scholis solitudinem ac vastitatem afferre : id quæro unum , quod & facillimum est , & cum hoc litterarum genere suapte natura conjunctissimum , ut æqui , ut honesti , ut moderati sint ; nihilque dicant , aut faciant , quod a sacræ professione scientiæ abhorere videatur . Cum enim omnes non parum offendere solent alterius cum altero de re tam gravi concertationes , tum nihil potest esse odiosius , quam ejusmodi cum ipso pugna , & tale aliquid , quale in histrionibus videmus , qui cum a scena discesserint , nihil sibi minus agendum putant , quam quod mimico illo habitu professi sunt . Quod si in facultatibus illis , quarum ratio & natura ad contemplandum unice refertur , totusque contemplationis fructus oblectatio est , qui ea ponit auditoribus suis , multumque commendat , a quibus ipse tamquam incertis assensionem cohibet , turpissime peccat ; quanto minus ferendum erit , in Theologica disciplina , cujus pars maxima actionis gratia est , & ipsa contemplatio sempiternam beatitatem propositam habet , ea doceri , vetari , juberi , quæ magister ipse , ubi descen-

scendit, ante omnes contemnat, & ad irrisionem etiam, quod ipsum aliquando contingit, animi causa traducat? Qua in re si sibi noceret uni, pessimumque virus in ipso cohibitum, nequaquam glisceret ad aliorum innocentiam inficiendam, nihil laborarem: sed cum ille in magna quadam luce vivere credatur, & cum Superis quodammodo colloqui, multis ad improbitatem exemplo est, partim omnino cæcis, partim vero malitiose cæcutientibus, quod minime audeant sine duce & auctore pudenda patrare. Præclara vero Theologi laus, sceleri ducatum præbere; constituere signa facemque improbis; intemperanter, cupide, libidinose & agere ipsum, & agentibus excusationem parare. Nolite porro existimare, Auditores, vitium ullum in hujusmodi homine modicum esse, omnia summa sunt, perditam omnia, & ad infinitum quoddam malitiæ genus profligata. Qui enim potest rerum divinarum tractationem cum vitiorum cœno componere, & in utroque dies noctesque versari, cum necesse est stimulos omnes extudisse conscientiæ, nihilque sibi ultra vitæ terminos polliceri. Huc ubi ventum est improbitatis, cave hominem reprehendas, aut ullo modo sanare coneris, conclamatum est. Non sibi ab ignoratione, non ab incogitantia, non ab infirmitate naturæ, unde ceteris solent, excusationem quærit; non patitur hoc Theologi nomen; in Superos ipsos causam convertit; partim dubitat, partim negat, partim irridet, calidaque circuitione & anfractu eo demum recidit, ut ex diuturno divinarum rerum studio nihil se certi collegisse significet. Adde huc in familiari sermone identidem jactas de animæ immortalitate dubitationes, de sa-

crorum librorum sensu, de Ecclesiæ legibus, de alterius vitæ pœnis, deque iis omnibus, quorum cogitatio monere homines solet, & in officii religione continere. Ex hoc uno fonte, vel prope uno novæ in dies effluunt opiniones, quas hæreticas appellamus, unde sibi istæ Theologorum quiescentiæ sepem circundant, causasque præterdunt ne temere facere videantur, quod ipsi ceteroquin minime omnium facere deberent. Ac primum quidem suis moribus obtegendis talia prætexunt, ad tempus quæsitæ; deinde malo quodam inconstantia metu propugnare conantur; denique vitiosi ingenii pertinacia, & pessima famæ libidine eo usque deveniunt, ut spargant in vulgus, privatim publiceque confirmant, nec solum gratia, auctoritate, fortunis omnibus, sed capite ipso, si opus sit, per summam desperationem insaniamque tueantur. Cavete igitur per Deos immortales, adolescentes, ne moribus incompotitis huc accedatis, ubi qui non sit optimus, pessimus esse necesse est. Nihil artificiose dicimus, nihil perfunctorie, nihil ex illa consuetudine nostra, qua vobis officii jura, pudorem, honestatem, veritatem, & in primo litterarum limine, & in Rhetorico, & in Philosophico ludo sine intermissione commendavimus. Est hic peculiare aliquid, quod nos pro vestra gloria & salute vehementer inflammat, vocemque nostram & contentionem præcipuo quodam modo reposcit. Nam ceterarum professores artium, si in vitio sint, sibi in primis nocent, aliis vero vel nihil prorsus, vel parum, vel in eo nocent, quod non est momenti maximi. Grammaticus, & Philosophus sua sibi malitia obest, nullique præterea; Medicus

cus aliorum valetudini, Orator fortunis infestus est : at vero Theologus ; si malus sit, animum lædit , quæ pars una est in homine excellentissima ; religionem, pietatem, Dei cultum non a se uno distrahit, non a singulis hominibus eximit, sed a civitatibus & provinciis evellit , ejicit, exturbat. Hinc vero seditiones per omnem ætatem consecutæ , bella civilia , cædes , incendia, rerumpub. mutationes, & siquid calamitosius humanæ societati contingere potest . Testis mihi Germania sit , Helvetia , Anglia , Batavia crudelissimis bellis diu vexatæ atque afflictæ ; testis Gallia ipsa , quæ quamvis ad hanc diem singulari providentia ab hæreticorum infidiis erepta fuerit , identidem tamen a suis Theologis multo etiam gravius , quam ab externis hostibus , conflictatur . Quod cum reputo , valde miror, ecquid tam diligenter ac severe illorum ingenia expendantur, qui inter Theologos referendi sunt ; quamdiu , quo loco , quo magistro quisque studuerit ; quæ sit ejus ad res percipiendas retinendasque memoria ; quæ ad interrogandum ac respondendum calliditas ; quam cultus sermo ; quam promptus , quam eruditus ; de moribus vero paullo plus quæraturs, quam in milite de Theologia . Quamquam ipsa quoque ingenii inquisitio jamdiu cœpit esse remissior , nihilque facilius est homini non stolidissimo, quam Theologum salutare. Sed profecto ita sibi duo hæc conjuncta sunt probitas & sapientia , ita alterum altero nititur , ut a quo æstuantium cupiditatum moderatio non requiritur, ab eo neque cogitandi acumen , nec intelligendi celeritas, neque facilitas explicandi magnopere sit requirenda. Quæ
cum

cum ita sint, intelligitis, Auditores, non me Theologis rem utilem commendare, sed plane necessariam; ut si nolint innocenter integreque vivere, aliud quoddam litterarum genus suscipere debeant, omnemque Theologicæ gloriæ cogitationem abjicere. Est enim Theologia in vehementi quadam altissimarum rerum contemplatione posita, quæ hominem totum occupat, absorbet, & a terra quodammodo abripit; nec ullam ejus partem avelli patitur, ut in vitiorum fordibus tam dispari studio volutetur. Hoc sibi illa proprium vindicat supra reliquas disciplinas ob infinitam meditandi vim, ut nequeat inesse nisi illis, qui a rebus ceteris alienissimi sint. Cedo mihi, si lubet, Ecclesiæ fastos: plures ego tibi Theologos ostendam, qui templis arisque coluntur, quam tu mihi ex omni litteraria Rep. Grammaticos, Rhetoras, Philosophos, Medicos, Mathematicos. Immo (dicam enim, quod sæpe animadverti) vix mihi unum, aut alterum ex tota antiquitate recitabis tam gravi dignum nomine, ut Theologus appelletur, quin insigni virtute excelluerit, suamque sapientiam non satis per se firmam probitatis accessione confirmaverit. Nihil de nostris loquor, quos nondum *Libitina sacravit*: adhuc illis cum invidia confligendum est, quæ quoties a fronte nequit, a tergo, a lateribus aggreditur; & quorum sapientia in tuto est, vitæ morumque famam labefactare conatur. Qua in calamitate, si calamitas est habere aliquid invidia dignum, primum se benefactorum conscientia solari debent, sibi que ipsi perfugium esse; deinde vero aliquid etiam inimicis condonare, qui nihil hujusmodi

F

aude-

auderent , nisi plurimi essent , qui se uno eodemque tempore & flagitiis , & Theologicis studiis nobilitare conarentur . Verumtamen aliud est Theologum videri , aliud esse : ac si quis vestrum , Auditores , signum sibi aliquod præberi cupit , cujus ope tamquam lydio lapide singulos experiatur , sic habeat ; vitia pervertere naturam omnem , & cum infimas animæ partes contaminaverint , in ipsam quoque arcem invadere , suisque tenebris obscurare , ne quid magnopere capiat nisi crassum materiaque concretum ; idcirco tam esse difficile vitiosis hominibus in Theologica facultate præstare , quam lippis & cæcutientibus in pictura . Nihil est , quod dici possit absurdius , quam in bene constituta Repub. ordines omnes sibi respondere , & in unum quasi corpus coalescere , hominem vero ipsum , ex cujus exemplo Reipub. ratio ducitur , partes habere naturæ quidem nexu colligatas , sed ita officio dispares , ut altera humi depressa flagitiis obruatur , altera prorsus libera in sublimem feratur , & purissimis spiritibus se se immisceat . Dum animus corporis custodia continebitur , rerumque imagine sensibilibus indigebit , nisi sensus sedatissimi sint , nisi castigati , nisi pravæ cujuslibet cupiditatis expertes , numquam se totum explicare poterit , viresque omnes ad contemplandum intendere . Minima quæque perturbatio sive amoris , sive odii in supremam animæ partem impetum facit , & ubi certamen nequit , tumultum edit ; qui si non est ejusmodi , ut omnem contemplandi ardorem extinguat , illas tamen commentationes interturbando impedit , quæ debent esse intensissimæ , & spiri-

spiritum a corpore, ut ita dicam, alienare. Quod cum intelligerent utriusque scholæ principes, D. Thomas, & Scotus, & in quodam veluti portu viverent ab humanæ vitæ tempestatibus remotissimo, numquam tamen Theologicum studium aggrediebantur, quemadmodum accepimus, quin se se precationibus, votis, sacrificiis diligenter expiarent, omnique ceterarum rerum cura deposita, quantum mortali licet, cælesti naturæ conjungerent. In quo uno maxime consenserunt, imitatores habent admodum paucos; in quo sibi contrarii sunt, immensam uterque familiam ducit, nimio quodam contentionis amore & superandi cupiditate flagrantem: quod maximum est Theologorum vitium nullo meo clamore fanandum, non tamen tacendum. Hinc enim exitium quoddam ortum est pulcherrimæ facultatis, in qua potissimum excellere creduntur, non qui gravissima ad cognoscendum, sed qui subtilissima ad fallendum excogitant: hinc vanæ quædam otiosæque disputationes, quæ mentem a S. Bibliorum doctrina, a Sanctorum Patrum dictis, a Conciliorum legibus, a Pontificum decretis longissime abducunt, & sine ulla utilitate fatigant: hinc pertinax & insanum partium studium, quo fit, ut acerrime decertemus, cum minime oportet; idque viribus omnibus propugnemus, non quod veritati proxime accedit, sed quod iis placet, quorum institutum amplexi sumus. Itane vero, Auditores, tot annos pallebimus, tot volumina diu noctuque teremus; tam multos dicendi scribendique labores non sine valetudinis detrimento, atque adeo cum vitæ periculo suscipiemus; ut id aliquando teneamus, quod

nec placeat nisi nostris ; neque nobis ipsis placere possit , aut debeat , si pallium commutemus ? Agedum enim , bone vir , cur ita pronuncias , & ingenti bacchatione confirmas , *virtutes divinæ naturæ tributas nihil quicquam esse ab ipsa distinctum , quantumvis a nobis intelligendi gratia distinguantur* ? Itane sentis ex animo ? Itane ad docendum , non ad fallendum ? Quid si te parentes tui in adversæ partis castra ab ipsa pueritia compulissent ? quid sentire , quid propugnares ? Contrarium scilicet . Ergo pro tuo illo libello pugnas , in cujus verba jurasti ; pugnas pro pallio illo , non autem pro veritate . Tunc igitur me tibi adungere conaberis ; tu te mihi Theologum venditabis , quem video nihil minus quærere , quam veritatem ; quem scio contraria prorsus fuisse dicturum , si te vel casus , vel consilium , vel domesticæ rationes alibi vivere coegissent , alioque colore uti ? Grave est quod dico , grave est , sed nihil tamen reprehendendi causa dico . Fateor enim præstantissimos utrimque viros & majorum , & patrum nostrorum memoria prodiisse , qui utilissimam litteris & Ecclesiæ operam navarunt , suisque lucubrationibus immortalī gloria dignissimis multorum nugas compensarunt : sed hi quidem illam habebant , quam postulamus in omni vita , probitatem , & cum arma tenerent omnia , quibus egregie pugnare possent , minime tamen pugnares erant ; ubi vero pugnarent , eo victoriæ genere delectabantur , cujus fructus veritatis cognitio esset , non ambitio triumphī . De his nemo unquam dubitavit , utrum aliquid crederent ; nemo illis tamquam crimen Theologiam objecit ;

nullam

nullam ipsi de se fallaciæ suspicionem commoverunt; sed benevolentiam & admirationem cum sibi, tum suæ facultati vel ab hominibus procacissimis compararunt. Quoniam tamen in magno numero pro rerum humanarum conditione plures sunt deteriores, inde ortæ multorum querelæ, diæteria, criminationes. Sed vela tandem colligamus. Ego hac in re siquid sapio, ita constituendum puto, Theologum neminem esse, aut certe neminem haberi posse, cujus non sit vitæ ratio Theologo digna. Plurimum enim interest non solum quid dicatur, sed etiam a quo dicatur; sæpiusque contingit, ut ne optima quidem a malo auctore accipere velimus. Lacedæmonii acerrimi iudicii, suæque disciplinæ homines, cum de re gravissima in senatu consuleretur, & improbum civem, ut sit in Republica, non solum pati deberent, sed etiam sententiam rogare, ita decreverunt, ut cum optima aliquando dixisset, hæc ipsa a bono viro quamvis indiserto repeterentur, ejusque nomine senatusconsultum fieret; ne quid auctoris infamia saluberrimo decreto apud populum derogaret. Quid si de virtute ipsa, aut religione in illo gravissimo consilio relatum esset? Futurum ne umquam fuisse putatis, ut flagitiosi hominis vocem ferrent; nedum in ejus verba decreta facerent, publicis monumentis consignanda, & populo proponenda? Videte igitur, Adolescentes, videte diligentissime, quale quantumque sit; quod suscipitis, præstandæ bonitatis onus, quoties in hanc classem nomina datis; & id vobis assumitis, ut de virtute ac religione consulentibus respondeatis. Disciplina augustissima est, ipsum

GeI. lib.
18. c. 36

hoc nomen Theologiæ divinum aliquid sonat ,
parietes ipsi scholæ hujus sanctissimis verbis quo-
tidie perculsi , religiosum aliquid animo , ac
prope oculis objiciunt . Sed ut omnia desint , quæ ta-
men deesse non possunt , hic certe non deest ,
quem nobis ex gravissimo morbo divina provi-
dentia restitutum lætissimi intuemur , Princeps
Eminentissimus . Ille , ille me quotidie urget &
extimulat non jussu modo , quod est Principis ;
sed , quod est mitissimi Præsulis , impulsu quo-
dam & cohortatione ; addo etiam pæne preci-
bus , quod est amantissimi patris , imo patris
hujus ; ille , inquam , me magnopere urget , ut
non tam vobis litteras , quam virtutem & ho-
nestatem , quandocumque possum , quibuscum-
que rebus possum , assidue diligenterque com-
mendem . Vidi ego vos , vidi singulos & uni-
versos ejus incommodi cogitatione defixos , pro-
stratos , attonitos , illa etiam timentes vana &
futilia , quæ otiosi homines ad studium novita-
tis comminiscabantur . Jam salva res est : ejus-
que valetudine ad plurimos annos confirmata ,
nihil denique restat , nisi ut vos magna mode-
stia & pietate vivatis , ne ullo umquam tempo-
re vestra caussa laboret .

EPISTOLA

AD LECTOREM

Præposita editioni primæ hujus Orationis.

RECTÆ honestæque vitæ rationem ita suæ ple-
rique arti conjunctam existimant, ut sine
illa ne ars quidem ipsa esse possit : iccirco nec O-
ratorem esse, nisi bonum virum, neque Philoso-
phum, neque Jurisperitum, passim audimus. De
Theologo nihil simile veteres scripserunt, nostri ve-
ro etiam longe dissimilia. Ac veteribus quidem
veniam tribuamus ad ignoscendum, quod cum de
Diis nihil certi statuerent, Theologos quoque ipsos
inter nugigerulos recensebant : nostri vero, siquam
Theologo impietatis dicam impingunt, id ita fa-
ciunt, quemadmodum solent & Medicis objicere,
quod medicinis abstineant, & Jurisperitis, quod
numquam lege agant ; ipsi tamen & Medicorum,
& Jurisperitorum opera maxime utuntur. Hoc
ipsum mihi Orationis habendæ occasionem præbuit,
quam emitto. Quidam a nobis de Theologi indu-
stria & ingenio, quam de moribus, audire ma-
lebant ; sed nimirum, quam sint hæc inter se con-
juncta, non reputabant. De Digressionem noli quic-
quam suspicari. Facile enim erratur ; quod ea
fere sibi quisque persuadeat, quæ potissimum cu-
pit. Puta, me mihi accusatores apposuisse, crimen-
que finxisse ; ut eam quoque Tullianæ eloquentiæ
partem attingerem, quæ egreditur extra causam.
Non desunt sane adversarii, in quos stilum exer-
ceam ; sed quia & natura me a jurgiis alienissi-

*mum fecit , & humanitas ipsa litterarum jubet
esse mitissimum , malo videri tamquam in scena
fabulam agere ; quo etiam ostendam , non me qui-
dem armis , sed pugnandi voluntate carere . Quod
supereſt , utinam hic conſiſtendum ſit , ut otio il-
lo perfruentes , quo uno litteræ maxime aluntur ,
ſuſcepta ſtudia ſine ullius offenſione proſequa-
mur . Vale .*

ORATIO VI.⁸⁹

AD S. SCRIPTURAM.

*Sacræ Scripturæ studium cum veterum linguarum
studiis conjungendum est.*

SI quis forte dubitat, quid in tantam hanc doctorum hominum frequentiam, hodierna luce afferre statuerim, ad illa se animo tantisper referat, quæ superiore anno hoc ipso ex loco disputavi: nam & sacras Litteras cum Theologicis studiis conjunctissimas esse statim intelliget, neque posse me ex instituto jam ordine alteras ab alteris separare judicabit. Nulla est in toto disciplinarum orbe rerum simillimarum cognatio tanta, nulla tam arcta societas, quæ cum illa comparari possit, quæ inter Theologiam Scripturamque intercedit; ut si quis vinculum hoc, non hominum opinione, sed ipsa rerum natura constrictum effringere velit, vehementer alteram debilitari necesse sit, alteram vero prorsus dilabi, aut in imum detrusam sine ulla nobilitate jacere. Etenim Scriptura quidem in scholis sine Theologicis disputationibus manca est, multisque luminibus destituta; Theologia vero sine Scripturæ ope nimium depressa humi, sophistica, incerta sui, sanoque homine & ad Christi leges exculto prorsus indigna. Quare non fuit mihi magnopere dubitandum, qua de re dicerem; sed quid, & quomodo dicerem, id vero me, ut ingenue fatear, multis de causis iisdemque gravissimis sollicitum habuit. Cum
enim

enim ipsa per se Sacra Scriptura arcanum quiddam est, omniumque hominum æstimatione & iudicio sublimius; tum ita quoque expositum, ut ne ipsæ quidem mulierculæ in re familiari occupatissimæ, otium sibi, aut ingenium ad legendum & interpretandum deesse arbitrentur. Quæ igitur me, cum de aliis facultatibus verba facerem, solari consueverat, iudicium intelligentia, & quæ cum intelligentia fere conjungitur, summa æquitas, non ea quidem mihi in præsentia dicenti deest, sed, quæ dixerò, de more vulganti, magna ex parte defuturam, cogitando præsentio. Neque vero hæc aut ipse artificiose confingo, aut primus in medium profero, ut laudem ex difficultatibus quæram; cum ille ipse Divinorum Librorum interpres, omnium ætatum omnisque memoriæ longe doctissimus, & Interpretum ceterorum facile princeps D. Hieronymus, ad Paullinum scribens, ita conquestus sit: *Quod Medicorum est, promittunt Medici, tractant fabrilis fabri; sola ars Scripturarum est, quam omnes passim sibi vindicant; hanc garrula anus, hanc delirus senex, hanc sophista verbosus, hanc universi præsumunt, lacerant, docent.* Quod ego non eo dico, quod sacros codices e populi manibus excuti cupiam, & in abdito collocari, veluti carmina Sibyllina non inspicienda nisi Duumviris. Nulla hic tacenda mysteria sunt, non Nyctelia, non Faunæ, non Cereris arcana; sed omnia omnibus sine ullo discrimine patent, quia fucō carentia; & ab ipso veritatis fonte, non ab aliqua Ægeriæ spelunca, aut a Cumanis antris petita. Sed tamen cum sit litteratorum ordo ab omni
 pror-

prorsus vulgi commercio sejunctus, in hac quoque ceteroquin communi palæstra genus quoddam sibi proprium habere debet, armisque & exercitatione ab ignava turba differre. Siqua vero ratio est, ut id recte fiat, & nobilissimæ doctrinæ partes suis ingeniis, suisque locis assignentur, ita constituo, Sacrarum Scripturarum studia ipsa per se pulchra, omnibusque communia, in scholis tamen & Academiis vetustarum linguarum cognitione vehementer ornari, novaque hac accedente quasi supellectile, in propriam litteratorum hominum ditionem transire. Quod quidem ne temere a me dictum putetis, aut vana quadam nostrarum exercitationum jactatione, aut illo fortasse studio, quo quidam solent ad ingenii subtilitatem difficilia consecrari, id ipsum, quam maxime potero, collectis undique, & excogitatis rationibus patefaciam. Itaque ipsa mihi dicendi difficultas initio proposita, orationis copiam facit, & eo me ultro sequentem adducit, quo jamdiu meditabar, ut adolescentibus nostris veterum linguarum curriculum ægerrime ingredientibus, ingenti laboris fructu proposito, stimulos addam; ingressosque jam & sua sponte currentes, audientibus vobis, &, ut spero, etiam probantibus, confirmem. Video, me negotium suscipere multis difficultatibus implicatum; cumque animo reputo, quam ægre homines laudari sibi aliena patiantur, valde metuo, ne magnas invidiæ flammæ ipse mihi succendam, ex quibus denique nisi ambustus egredi nequeam. Nam illud pro mea quadam verecundia facere non possum, quod tamen Oratores plerique solent, ut nostris popularibus ea tribuam, quæ revera non

in-

infunt; & solemne illud, tritaque adulationis plenum acroama veteri more recinam, *Patavii dicimus*. Nulla est in Italia, in Italia autem? Nulla est in Europa universa, atque adeo in Orbe terrarum tam culta litteris civitas, quam nostra hæc, si simul omnia, quæ rem litterariam constituunt, complectamur; at in singulis generibus quædam sunt, quæ si nobis vindicare velimus, multæ nos Academiæ ex jure manum confertum statim vocabunt. Hoc ipsum est ex gravitate sapientis hominis, se aliqua nescire fateri; & quæcumque honesta sunt, aut utilia, non aliunde, quam ex rebus ipsis, judicare. Hoc nimirum Patavinum est, hoc hujus soli cælique proprium, unde fucus & levitas ab Heroicis usque temporibus exularunt: nec vero me in locum tam lubricum coniecissem, ut vetustarum linguarum studio tantum tribuerem, quantum mox audietis, si mihi omnes succensuros putassem, qui laude ista carerent. Ignavis quidem & fo-cordibus concedo libens ut doleant, imo etiam ut reprehendant: quid enim potius? nihil illis operosum placere potest. At vos, Viri optimi ac præstantissimi, quorum singuli in magna aliqua doctrina excellitis, multi vero etiam in multis, tam mihi benevolos fore confido, quam longe abesse ab omni prorsus ignaviæ suspitione, certo scio.

Vetus est aliquorum opinio, eorum præsertim, qui se præter ceteros sapere arbitrantur, disciplinas artesque omnes, quæ ingenuis adolescentibus tradi solent, vernacula cujusque provinciae lingua explicari oportere, ne florentissima ætas latinitatis addiscendæ labore frangatur, quæ

Geometricis & Geographicis studiis multo gravioribus opportunissima esset. Quod si quis latina monumenta cognoscere velit, tam multas esse interpretationes ajunt, tam certas, tam fideles, tam ornatas, ut nihil melius ex ipso latinorum Scriptorum ore, siquando ex suis tumulis excitentur, accipi possit. Ac de disciplinis quidem sine latinis litteris addiscendis nihil ajo, nihil nego: quod autem de latinis monumentis dicitur per interpretationes cognoscendis, si de aliquo genere dicitur, facile patior, si autem de genere omni, vereor, ne homines isti non solum otio suo, sed etiam patientia nostra turpiter abutantur. Cum enim poetica & oratoria non tam rerum, quam verborum artificio constent, & cujusque sermonis figuræ quædam propriæ sint, modo syllabarum sono, modo vocum ambiguitate, modo ipsa positione formatæ, qui fieri potest, ut latina carmina & orationes suis verbis, suæque constructione spoliata, non suam quoque naturam exuant? Utcumque tamen est, juvat & oratorum & poetarum opera in alias migrare linguas, ut bona pars hominum domesticis commodis & otio superfluentes, desidium legendo ponerent; & quandoquidem eruditione carerent, aliquam saltem eruditionis umbram consecrarentur. At vero si quis est ad docendum vocatus, qui interpretationes hujusmodi impigræ juventuti proponat, & ad latinas exhedras afferat, næ ille aut barbarus est, aut insanus, aut pestis aliqua longe deterrima ad tenellas animas labefactandas scholis affusa. Videtis, Auditores, quorsum ista pertineant. Nimirum Sacra Biblia multiplici sermone vulgari pulchrum est, & pro humanarum

mentium infirmitate etiam necessarium; at ipsos Bibliorum magistros ita cum vulgo torpere, ut nihil in scholas afferant, nisi communem aliquam & omnibus obviam interpretationem, valde miserum est, nec in tanta ceterorum studiorum felicitate ullò modo ferendum. Si enim latine scripta in nostrum hunc sermonem latino simillimum, & ab eo procul dubio propagatum sine fraude transferri nequeunt, quis mihi se tam eximium profitetur, ut Palæstinum orationis genus, supra quam dici, aut cogitari possit, a latino diversum, ita tamen latine reddiderit, nihil ut præterea postulare debeamus? Quis ancipitem Hebraicarum dictionum significationem, quis pondus, quis brevitatem, quis denique illa omnia per ellipsim, per emphasim, per paragogem, per onomatopœjam abrupta, aucta, traducta, formata, latinis vocibus assequi potuit; & duas linguas toto genere disjunctas ita consociare, ut verba verbis, figuræ figuris, constructiones constructionibus ex æquo respondeant? Id, non dicam, si factum est umquam, sed omnino si fieri potest, fileant per me licet Hebraica omnia. Ne ipse quidem Græcus sermo, qui tamen aliquanto propius ab Hebraico distat, & copiosissimus reliquorum est, vim omnem Sacrorum Bibliorum capere potuit; nec Septuaginta illa Sapientum societas potentissimi Regis jussu in hoc uno certantium effecit, ut Hebraicis codicibus Græci non indigerent. Verumtamen interpretatio ista, siue instinctu inflatuque divino, ut quidam putarunt, edita sit, siue tota, ut credibile est, humanis viribus debeatur, tantum auctoritatis a primis usque temporibus obtinuit, tantoque

que usui Christianæ religionis Patribus fuit, ut ob eam præsertim Græcas litteras cum Hebraicis ad egregium Sacrarum Scripturarum studium conjungere oporteat. Id si firmum certumque constituatur, jam non Philosophus, non Rhetor, non Grammaticus, non recens a ferula litterator, paullum modo latinitalis attigerit, gravissimum sibi munus tradendæ Scripturæ deposcet; nec amplius in scholis inanes quæstiones ad explendam contentionis cupiditatem excitatæ, sed sacratissima religionis mysteria ab ipso religionis exordio fideliter ducta, quemadmodum decet, personabunt. Tu ne igitur, inquiet aliquis, interpretationem excludis, quam Vulgatam appellant? Ego vero id ne cogitavi quidem umquam; neque si quis cogitet, satis mihi sanus videatur. Imo hæc dominetur una in privatis exercitationibus, dominetur in publicis, quam & multorum sæculorum vetustas, & Concilii Tridentini auctoritas, & plura deinceps Pontificum decreta adversus obtrectatores in omnem ætatem permunierunt. Verum enimvero ubi explicanda est, & ad scholæ usum referenda, nisi & cum Græcis aliquando congrediari, & cum Hebræis, & cum Syris, & cum Arabibus, & cum Chaldæis, eorumque rationes suis momentis perpendas, tamquam unus paterfamilias judicaberis, de domesticis religionibus cum pueris & uxore disputans. Si enim illa ita clara & expedita est, ut nullius egeat explicatione, quid te mihi operamque tuam fallaciter vendas? Sin autem alicubi obscura est, & verborum ambiguitate perplexa, quomodo aut explanabis ipse, aut aliorum explanationes judicabis, qui fontes illos ad-

re nequis, unde omnia profluxerunt? Hærent enim adhuc in Vulgata aliarum linguarum idiotismi, alibi brevitās apparet Hebraica, alibi Chaldæorum παραφρασις, alibi Septuaginta Interpretum ἑρμηνεύσεις; quibus expediendis non Philosophus, non Theologus, non Civilis, aut Canonici juris peritus, sed exoticorum sermonum interpres adhibendus est. Quid vero idiotismos dico? Multæ etiam sibi voces hanc operam poscunt. Cedo enim, quid illa significant ab Hebræis sumpta, *Ephod*, *Sabaoth*, *Hosanna*, *Alleluiah*; quid illa Syriaca, *Raca*, *Eppheta*, *Golgotha*, *Gabbatha*, *Maranatha*; quid alia multa a Græcis inflexa? Non desunt, inquis, lexica, unde petam. Primum quidem, si D. Augustino credis (quem virum, bone Deus, quo ingenio, qua rerum divinarum humanarumque scientia!) si huic, inquam, credis, *Sunt quædam verba certarum linguarum, quæ in usum alterius lingue per interpretationem transire non possunt*: deinde gratulor egomet mihi, cui, si lexicon suppetat, nihil est opus te Magistro. Sed cominus, quæso, congregiamur. Novi enim esse aliquos, qui veteribus linguis amplissimas laudes tribuunt, sed nihilo plus temporis concedendum putant, quam quantum lexica versare volentibus necesse est. Age vero, lexicorum manceps, quid si ego verbo negem, quod tu de lexico recitas? Unde habes, ut confirmes? Ridicula sunt hæc, Auditores: neque enim omnia in lexicis esse possunt, neque debent; & ea ipsa, quæ sunt, memoriæ serviunt, non ingenio. Scilicet lexica consules, cum in capite Geneseos quarto de voce שבעה te quispiam interrogabit, utrum ad gravitatem

De doctrina
Christi. 1.
2. c. 11.

n. 15.

pæ-

pœnæ, an ad rationem temporis sit referenda. Nam *septuplum*, quod est in Vulgata, non facile capies, nisi ab Arabibus auxilium petas, conjunctisque viribus adversus Rabbinos, & Chaldaicum Paraphrasten pugnare possis. Quid cum te de voce סרה in Psalmo quinquagesimo secundo ^{n. 18.} percunctabimur? Quo te lexico expedies? cujus opem implorabis Interpretis? Junius & Tremellius adverbium putant; Paulus Burgenfis & Chircherus vocem ἐγγλιπῶ; Matthæus Polus exclamationis signum; Calovius & Olearius pausæ significationem; Buxtorphius musicam notam. Ut vero tot capita concilies, adhuc tibi & cum Joanne Paschio, & cum Rabbinis, & cum Syris, & cum Æthiopibus Interpretibus in diversa abeuntibus futura res est. Quam te porro miserum excruciabimus, cum veteres ad te controversias afferemus de verbo חַיִּים in capite Geneseos tri- ^{n. 24.} gesimo sexto; de קרן in Exodi trigésimo quarto; ^{n. 29.} de למך in vigésimo Levitici; de חַשִׁיָּה ^{n. 2.} in duodécimo Numerorum; de אֲרֵרְתוּ in libro ^{n. 1.} Regum secundo; atque insuper sexcentis, quæ si- ^{c. 2. n. 8.} ne magna Hebraici sermonis peritia frustra explicare contendes? Audivi nonnullos, qui talia contemnerent, quippe magnis contentionibus non satis digna. Quibus primum respondere possum, nihil in re tanti momenti minutum esse; deinde libenter illos interrogarem, utrum id satis grave ad disputandum videatur, quod est in verbis נִסְקוּ בַר ^{v. 12.} Psalmi secundi, unde Rabbini Trinitatis ^{Gen. 49.} mysterium exturbare conantur? Quid illud ^{10.} tantopere celebratum Jacobi vaticinium de Messia venturo, ablato Judæ imperio; cujus verba singula Christiani nominis hostes callidissime op-

pugnant, & alio torquent? Est ne par ingeniis tantis? Quid quod habet Isaias secundo, & septimo capite de nova lege, de Christi Evangelio, de Virginis partu, satisne capit magnarum mentium cogitationes? Verum siquid hujusmodi sine Hebraica pertractabis eruditione, nostri illi ex Synagoga pertinacissimi adversarii aut dormitabunt, aut ridebunt. Sed jam Hebræorum natio parum nobis negotii faceffit, aut multo certe minus, quam ipsi Christiani homines heterodoxi. Nemo enim se ab Ecclesia Romana subduxit, novumque sectæ genus molitus est, quin suis opinionibus vel monstruosis Sacras litteras prætexuerit. Inde novæ interpretationes exortæ, quæ cum veterum linguarum auctoritate malitiosius adsumpta plerumque propugnari soleant, inepti plane sumus, nisi paribus armis arma retundimus, & populum peregrinis litteris attonitum admirantemque, ab insidiis & fallaciis liberamus. Quid enim est, quod ex illo suggesto doceas, teque mihi Scripturæ professorem magnifice jactes, si cum suas tibi interpretationes objiciunt Junius, Castalio, Leo Judæ, Munsterus, Œcolampadius, fidemque veterum codicum, & Hebraici Græcique sermonis appellant, tu illos ne intelligis quidem, petitionesque gravissimas ignorantiae confessione declinas? Tute tibi habe veteres illas de Terrestri Paradiso, de Turre Nembrothi, de Henoch & Elia, de Melchisedecho, de Jobo disputationes, quæ tametsi pulchritudine ipsæ per se non careant, tam multis tamen libris expositæ sunt, profligatæ, & ad exitum prorsus adductæ, ut jam supervacaneum sit ad eas recoquendas magistros arcessere, & miseram juven-

tutem

tutem fatigare. Licuit in summo Ecclesiæ otio per hæc inter nos velut ensibus præpilatis ludere; nunc vero ingruentibus undique Catholici nominis hostibus, & alia super alia bella ferentibus, in aciem prodire oportet, iisque armis configere, quæ ipsi potissimum pertimescunt. Atque ego ut inter Academicos hætenus disputavi; quid si jam monere incipiam? quid si leges Ecclesiæ proferam, quibus resistere nefas sit? Annon enim Concilium Viennense trecentorum Episcoporum & Pontificis Maximi præsentia verendum, gravissimo decreto sancivit, ut Hebraicis, ut Chaldaicis, ut Arabicis, ut Græcis literis in quavis locus esset Catholicæ ditionis provincia? Nonne id ipsum Gregorius XIII. earum linguarum magistris & librariis Roman accitis, illustri ad imitandum exemplo confirmavit? Quid Paulus V. quid reliqui subinde Pontifices? nonne studia hæc magno favore ac benevolentia profecuti, ad Monachos ipsos traducere conati sunt, iisque præmiis ornare, quæ vel ignavissimos excitarent? Græcis, credo, fabulis, aut antiquitatis ambitione ducebantur. Quid enim est reliquum parere nolentibus, ut dicant? Modestius agunt, tempora accusant: Græcos & Hebraicos Codices tum ipsa vetustate exesos, tum etiam multorum audacia corruptos esse: huc ipsos Tridentini Concilii Patres spectavisse, cum Vulgatam unanimi consensu probarunt; & unam ex omnibus Sacrorum Bibliorum editionem Christianis hominibus commendarunt. Non tantum mihi a vobis conceditur otii, ut veteri calumniæ sæpiusque retusæ hodierna luce respondeam; id unum dicam, quod, ubi opus fuerit, gravissimo-

Cleni. 1.
de Mag.

rum Scriptorum suffragiis confirmare possum ;
Vulgatam editionem non Græcæ, aut Hebraicæ,
sed reliquis Latinis, quarum magna copia & va-
rietas in dies exhibat, necessario illo Tridentino-
rum Patrum decreto præpositam fuisse . Multa
quidem commoda, & prope innumera in Chri-
stianam Ecclesiam, ad Fidei morumque leges
componendas, per Synodum Tridentinam redun-
darunt ; sed nihil tam grave accepimus, nihil-
que tam utile, quam quod ex omnibus Latinis
Sacrarum Scripturarum interpretationibus una il-
la probata est, quæ ceterarum optima ac fidelis-
sima, nutantia multorum ingenia tamquam clavo
firmaret, certisque regionibus circumscriberet .
Neque tamen ideo Hebraicis, aut Græcis cōdi-
cibus unde Latini omnes, ceterique manarunt,
quippiam auctoritatis detractum est : stat adhuc
eorum fides firmissimis præsidiiis fulta, licetque
in rebus dubiis ad prima illa verbi divini exem-
pla non modo sine crimine, verum etiam cum
laude provocare . Haud equidem nego, mutila
quædam in illis esse, nonnulla vero etiam men-
dosa ; sed & menda ipsa antiquitatis indicia sunt,
& partibus insunt minime necessariis ; & in Vul-
gatam quoque librorum incuria, si minuta
quælibet animadvertimus, irrepperunt . Nihil no-
vi affero, nihil quod summi Vulgatæ patroni,
si serio & ex animo agant, negare possint . Sed
vereor, Auditores, ne quemadmodum qui digni-
tates in repub. obtinere non possunt, privatum
otium laudare solent, omnemque rei gerendæ ra-
tionem conquisitis difficultatibus improbare ; ita
qui Græca & Hebraica studia sive animi infir-
mitate, sive inertia defugiunt, eorum laudem
ma-

malignius imminuant, tantumque Latinis concedant, ut modum fidemque superet. Hunc porro desidiæ morbum tum demum mihi videor depellere posse, si pauca quædam de Hebraica lingua dixerò, ejusque naturam & rationem minus multo implicatam, quam timidi homines sibi confingunt, patefecero. Nam Græca quidem multis jam locis refflorescens non indiget opera nostra. Agite dum qui Hebræorum pronuntiatio-
 ne perterrefacti, ab hoc litterarum genere tantopere abhorretis; quid est, si primos Grammaticæ labores superaveritis, quod studia vestra retardare possit? Num copia, num varietas, num inconstantia? Nihil sane hujusmodi esse potest in lingua illa, quæ multis abhinc sæculis oblitterata, in uno tantum Sacrarum Scripturarum Scripturarum codice, grandi quidem ac splendide scripto, sed tamen uno superstes est. Nisi forte Talmudica commentaria neque rebus, neque verbis pura recipimus, & multiplicem illam loquendi sartaginem ad Hebraicum sermonem revocandam existimamus. Fingite vobis animo unum ex omnibus Latinis Scriptoribus Ciceronem, ex omnibus Græcis Demosthenem unum superesse, jam intelligitis, quam in angustum copiosissimæ ceteroquin linguæ compingantur; vocum numerus statim exiguus, dialectus una, forma constructionis non admodum varia. Nihil est enim aliud, quod Græcas Latinasque litteras adeo in immensum propagaverit, ut multos studiosis hominibus annos eripiant, quam ingens Scriptorum multitudo, qui pro ingenio quisque suo, pro patriæ, pro ætatis, pro rerum tractandarum natura verba dictionesque formarunt, mul-
 tisque.

tisque ex omni lingua detortis, infinitos labores
 discuntibus ac docentibus proposuerunt. Adde,
 quod Hebraicus sermo ceterorum antiquissimus,
 & mundo æqualis, nullam litteram aliunde mu-
 tuatur, nihil in se barbari, nihil externi admix-
 tum habet, sed ubique suus sibi que similis, quod
 nulli præterea contingit, in modico illo sacro-
 rum Bibliorum ambitu planissime & expeditissi-
 me incedit. Quamobrem paucis mensibus, ut
 scribit Erpenius, & quidem duobus, aut tribus,
 ut Amama, tantum ex illo percipi potest, quan-
 tum est ad intelligendum satis; anno vero, &
 eo citius ita totus memoria scientiaque compre-
 henitur, ut jam difficultas supersit omnino nulla.
 Non desunt, qui mense brevioris diem satis esse
 affirmant; quorum ego sententiam neque proba-
 re ausim, neque rejicere: sed nulla certe vete-
 rum linguarum est, quæ paucioribus verbis con-
 stet, nulla, quæ tam paucis plura significet. Ni-
 hil hic vastum, nihil redundans, nihil effluens,
 nulla neque μακρολογία, neque βαττολογία, sed
 pressa omnia, tantaque brevitate castigata, ut
 una sæpe vocula, atque adeo syllaba una senten-
 tiam absolutissimam complectatur: unde est il-
 lud doctissimi Possevini in *Bibliotheca selecta*,
 tot esse in Hebraica Scriptura sacramenta, quot
 sunt litteræ; tot mysteria, quot puncta; tot
 arcana, quot apices. Quæ cum ita sint, per
 mihi mirum videri solet, esse homines cetera
 non insipientes, qui quidquid Hebraicum vi-
 dent, aut audiunt, statim explodant, nobisque
 etiam molestiam afferant, quod vulgatis interpre-
 tationibus contenti non simus. Quod siue difficul-
 tatem timent, siue præstantiam non agnoscunt,
 quæ-

quæro ego ab illis, cur ea saltem cura non moveantur, quæ humani ingenii propria est cognoscendi remota, siquo præsertim insignia facta ad religionem pertineant. Ergo difficillima & infesta itinera suscipient, ut illustrium virorum monumenta videant, easque regiones obeant, quas illi præsentia sua, rebusque mirabiliter gestis nobilitarunt; quæ vero longe pulcherrima curiositas est, ejus linguæ cognoscendæ, quam primi hominum parentes divinitus hauserunt; qua ipsi inter se, & cum suo conditore locuti sunt; qua rebus omnibus dedere nomina; qua se Deus ipse יהוה nuncupavit; qua Angelos interdum usos, qua Prophetas scripsisse accepimus; quæ omnium linguarum princeps ac mater, vestigia sua ubique impressit; hac, inquam, tam honesta, tam splendida, tam homine digna curiositate nihil omnino commovebuntur? Sed videant alii pro suo ingenio gloriæque cupiditate, quem sibi animum suscipiendum putent. Ego sic statuo, cum tanta sit ad Sacras Litteras profitendas veterum linguarum necessitas, cum Hebraicæ præsertim tanta facilitas sit, pulchritudo, dignitas, sanctimonia, etsi omnes omnium, qui nos quotidie circumstant, auctoritates repugnarent, nihilo tamen minus ad hanc præclarissimam laudem contendendum esse. Nunc vero cum re & ratione expressa veritas, ipsius quoque Ecclesiæ legibus, multarum Academiærum usu, & quod maximi apud me debet esse ponderis, nutu & admurmuratione vestra confirmetur, quid est præterea quod dubitemus? Ac ne id quidem omittere debeo, ita esse in more institutoque loci hujus,

ubi me Superi litterarum custodem ac vindicem collocarunt. Quod leve fortasse alicui videbitur; at ego quidquid reperio ab eximio illo atque immortali studiorum nostrorum auctore, quem honoris, atque adeo pietatis causa nomino, Gregorio Cardinali Barbadico constitutum, ita accipio, quemadmodum divina debent. Quoties enim singula reputo, quæ vel ipse a se invenit, vel ab aliis inventa huc adduxit, artium, linguarum, ac disciplinarum genera tanto consilio distributa, tot prædiis munita, tam multis exercitationibus a vana specie, in quam fere degenerant, ad rem & veritatem revocata, videtur ille mihi non humano consilio usus, sed divina quadam virtute præditus ea vidisse & fecisse, quæ posteri sine piaculo violare non possent. In quo etiam divina vis ac providentia magis apparet, quod cum ille ad vitæ exitum vocatus, præclarissimarum rerum initia nondum satis firma reliquisset, hic nobis Princeps Eminentiss. veluti parens alter Superum beneficio concessus est, qui positus ab illo fundamentis mirificas moles excitaret, tantumque proveheret, ut ad majorem amplificationem nihil jam desit, nisi locus. Ergo, cum ille in magna attentissimaque rerum omnium cura nihil æque cogitarit, atque ut totius Orientis linguas ad S. Scripturam illustrandam in scholas nostras advocaret, Græcæque ac Latinæ conjungeret; cum hic ejus vestigiis insistens, qui tamen prægredi ipse poterat, idem velit, idem curet, idem jubeat, quo me animo esse oporteat, existimate. Id extremo loco ab Adolescentibus nostris vehementer peto, ut quoniam illorum gratia omnia.

nia dicuntur ac fiunt , in eo libenter laborent,
quod nōs certis probatisque de caussis optimum
ducimus ; ea insuper cogitatione ducti præstan-
tibus ingeniis digna , ut ornamenta sibi compa-
rent , quæ paucis communia sint.

E P I S T O L A

A D L E C T O R E M

Præposita editioni primæ hujus Orationis.

SI forte fortuna fiat, ut nostra hæc jejuna lucubratio in eas regiones deferatur, ubi linguarum studia florent, plerique omnes mirabuntur, quid me tandem moverit, ut in re satis plana & expedita tam multo sermone laborarem. Ego vero patriæ rationem habui, ejusquæ auribus dicere institui; nihil admodum de illorum judicio sollicitus, qui hæc sibi jamdiu persuaferunt, a majoribus tradita, & quotidiana consuetudine usurpata. Sed hinc, opinor nihil in me valde criminofum erit utcumque accipiant. Ab iis potius mihi timendum, qui superioribus contraria sentiunt, & nimis enucleatum putant, quicquid vernaculum sermonem & latinum supergreditur. His & nugari ipse in re mixtus utili videbor, & ad nugas juventutem allicere. Hoc vero non caret specie culpæ; sed nolo purgare. Satis superque verborum in ipsa Oratione. Numquam ego placere omnibus studui, imo neque pluribus; quia illi contraria, isti deteriora sequuntur. Si paucis illis, quos mihi animo & cogitatione proposui, feci dicendo satis, jam operam recte navavi. Vale.

O R A T I O VII.

AD JURISPRUDENTIAM.

*Expedit, omnes gentes Romanis legibus operam
dare, sed suis vivere.*

Splendidum Jurisprudentiæ nomen, & quod uni
ferme convenit, etiam solidum; omnique
generi hominum, five meditandi five agendi stu-
dioſo, pulchrum atque utile, jubet me majore
quadam animi ſecuritate hoc anno deſcendere, &
publicam hanc lucem veſtramque omnium expe-
ctationem ſuſtinere. Neque vero ante nugæ egi,
aut aliquid in medium attuli præter Oratoris
dignitatem; ſed litteræ omnes ad humanitatem
pertinentes, & Philoſophicæ ipſæ ac Theologicæ
diſciplinæ, magis per ſe honeſtæ ſunt, quam
vulgo probabiles; & quæ perverſe interpretan-
tium malitia eſt, in invidiam quoque non raro
vocantur, quod otium umbratile foveant, & a
reipublicæ cura, quæ una illis glorioſa videtur,
multos abducant. Una eſt legum ſcientia, de
qua omnes uno ore magnifice prædicant, & qui
ſe litteratos ferunt, & qui ambitione ducuntur,
& quibus medium ingenium eſt; quod latiffime
diffuſa publicam privatamque fortunam regat,
nullumque ſibi deditum jacere patiatur, etſi ma-
xime lucem formidet, nec niſi incluſus domi
de jure reſpondeat. Ac ceteri quidem liberalium
profefſores artium, præter admodum paucos, ſi-
lentio & inopia paſſim contabefcunt; ne Medi-
cis quidem ipſis, generi tantopere neceſſario,
recluſa ad opes via, niſi diu tolerando fatiga-
tis,

tis, & naturæ necessitate prope confectis : cum interim Jurisconsultus ubique fere liberalius acceptus, mature floreat, & ad gratiam, & ad opes, & ad summas in republica dignitates, modo paullo diligentius connitatur, faciles sibi aditus patefaciat. Nihil est opus in hac republica, hisque temporibus, ubi homines, a subselelliis propemodum regnant, antiqua repetere; sed tamen ut id exemplo fieri intelligatis, illa ipsa gentium domina, totiusque sapientiæ secundum Græcos, magistra, Romana civitas initio statim de jure cogitavit, ejusque peritis honorem habuit; cum ceteroquin incuriosa neque Grammaticos, neque Rhetoras, neque Philosophos, neque Medicos ipsos nisi multa post sæcula ferre potuerit. Verum tanta hæc gravissimæ scientiæ dignitas, tanta cum dignitate conjuncta fortuna, non caret invidiola, quod nondum omnes sibi persuaferint, Juris civilis studium Romanis legibus contineri, omnemque justitiæ rationem & æquitatis ex Justiniani codicibus tamquam ex oraculis petendam esse. Sua quidam libentius amplectuntur, alii Græca præferre malunt, nonnulli etiam Sacras litteras in medium afferunt, unde omnem imperandi parendique rationem, omne æqui & iniqui discrimen sumendum putant. Non is ego profecto sum, qui tam veterem controversiam disceptare possim, suisque regionibus humani generis jura definire; sed tamen cum dicere aliquid necesse sit, ut hunc disciplinarum orbem absolvam, fidenter affirmateque oportere constituo, gentes omnes Romanis legibus operam dare, sed suis vivere. Porro autem Romanas leges cum dico, non hæc certi juris, sed

sed ipsius prope justitiæ appellatio est , a recta ratione expromptæ , magnoque Deorum immortalium beneficio populo terrarum principi patefactæ ; quæ si non cunctis civitatibus , aut negotiis , aut temporibus convenit , fuccus tamen inde sanguisque existit , qui ad alios mores opportuna derivatione ductus , ingenia vel effertissima lenire potest , & cujusque instituta gentis ad bonum & honestum conformare . Itaque duo mihi facienda sunt , primum , ut ostendam , nullum esse jus ad cognoscendum Romano præstantius ; alterum , ut probem , patrias leges hoc jure temperari oportere , non abrogari .

Si quomodo jus in natura positum est , ita leges omnes , non hominum opinione , sed naturæ norma constituerentur , una esset omnium populorum vivendi ratio ; magnaue cura liberarentur , qui se legum studiis dediderunt . Verum & ipsum jus nescio quo pacto quidam a natura abdicant , quorum princeps Archelaus Socratis præceptor ; & leges populorum pro vario judicio & consuetudine vivendi variæ sunt , sibi que inter se contrariæ . Quid enim a moribus nostris magis alienum , quam promiscuas uxores habere , prolemque incertam educare ? Hoc tamen instituto Massagetæ usi sunt . Quid suapte natura foedius , quam filias & sorores in matrimonium ducere ? Alterum tamen Persis , alterum Ægyptiis familiare fuit . Furta Cilices probarunt ; otium & ignaviam Sybaritæ ; alii denique alia , non re , sed suis opinionibus justa & honesta judicant : quod pluribus ostendit Sextus Empiricus Pyrrhon. hypoth. l. 3. c. 24. Ergo prima illa cogitatio juris studiosos tenere debet , ut recti pravi-
vique

Laert. in
Archel.

Idein in
Pyrrhon.

vique discrimen ab eo populo petant , qui ceteris mortalibus sapientia & virtute præstitit ; eo-que affectus est , ut longe omnium potentissimus multis regionibus multisque sæculis leges scisceret . Is scilicet populus Romanus est , gravissima natio , maximæ cujusque virtutis exemplum , fortis , temperans , prudens , & ad jura componenda mirifice factus . Ceteras quidem artes , totamque humanitatem & eruditionem a Græcis discamus , disputandi peritissimis ; at vero Jurisprudentia Romanorum est , ab illis & parta & ex-culta , & ad Græcos ipsos , non facile aliena probantes , incredibili plausu traducta . Nam qui dicunt ex Græcia venisse leges , nolim ignorent , magnarum quoque rerum initia parva esse ; jusque omne Decemvirale Attica sapientia conspersum , vix primum magnæ hujus substructionis fundamentum fuisse , quæ deinde Romanis opibus paullatim elata , in hanc demum celsitudinem , quæ toti immineret Orbi , exædificata est . Quibus enim terrarum imperium Superi concesserant , iisdem pro sua providentia par ingenium imperio dedere ; ut aliarum nationum leges primum exciperent ; suas deinde plane innumeras ipsi juberent ; tum veluti justitiæ imaginem inde ducerent , quæ publicis tabulis ad æternitatem impressa , non Romæ solum , sed ubique placere posset . Est igitur hoc non unius civitatis , aut provinciæ , sed generis humani , & ipsius quodammodo naturæ jus , ex prisca omnium sæculorum sapientia conflatum , & cælo prope demissum ad barbariem tollendam , omnesque omnium populorum voluntates uno vinculo consociandas . Quid mihi adhuc Græcos commemoras ?

ras? quid me in eas scholas mittis verborum refertissimas, rerum vacuas? Plato, Xenophon, Aristoteles tradunt quidem reipublicæ gubernandæ regulas; sed a communi consuetudine, & civilibus moribus longe recedunt, multa sibi permittunt, quæ extra umbram ferenda non sunt; & pro suo quisque stomacho civitatem fingunt. Illi ipsi, qui in republica versabantur, prudentissimi viri, suisque civibus leges scribebant, ut est natio nimis acuta, mutuis se telis confecerunt, nullusque ex omnibus toti Græciæ satisfecit. Minos enim ex multis decretis Jovis nomine conditis vix pauca probavit Lycurgo; Lycurgi leges ab Apolline acceptas, ut ipse ferebat, agrestes ac feras Plato judicavit; Draconis instituta tamquam inhumana rejecit Solon; Solonis legibus addendum detrahendumque putarunt Clisthenes & Demetrius Phalereus. Etsi autem Solonis νόμοι (sic enim ille suas leges appellare maluit, ut nomine ipso, nisi fallor, a Draconis δεισμονίς distinguerentur) etsi, inquam, Solonis νόμοι auctoritatem longe maximam in Græcia obtinebant; attamen, sublato Solone, velut intermortui, verbo quidem eorum fidei commissi sunt, quos ἐξηγῆταις nuncupabant, sed re ipsa non alios habuerunt interpretes, quam ipsos forenses Oratores, causæ quemque suæ studio abreptos, & in id præsertim intentos, ut eloquentiæ fucō Judices fallerent, tabulasque per se bonas ad tempus & arbitrium explicando distorquerent. Nihil tale Romanis legibus contingere poterat. Ut enim rogatæ erant, & ab eo populo auctoritatem acceperant, qui populos omnes sui juris auctoritate continebat, ne ulla
son-

fontium interpretatione violari possent, custodes & explicatores habebant, quibus primum quidem civitatis consensus, deinde etiam Imperator tantum tribuit auctoritatis, ut Judices ipsi eorum responsis addicti, ita demum decernerent in lege esse, quemadmodum Prudentes (quod illis nomen scientiæ ac virtutis opinio dederat) respondissent. Hoc vero diligenter animadvertite. Cum enim leges paucis verbis comprehendantur, verbaque ipsa tempore obsolescant, pulcherrima antiquitatis instituta intercidissent, nullaque omnino esset Jurisprudentia, si Romani quoque Græcorum exemplum secuti, suarum legum interpretationem Oratorum arbitrio permisissent. Sed ut omnia a Græcis accepta fecere meliora, ita præsertim magis, quam illi, ad regendum facti, cum leges accepissent, multisque amputatis & additis, suis moribus accommodassent, primum quidem Pontificibus, deinde vero, quos modo dixi, Prudentibus earum explicationem commendarunt; unde orta scientia juris, Romanorum propria, & una ex omnibus humanæ societati utilissima. Neque vero caret lumine illo Philosophiæ, in quo tantopere se Græci jactant. Qui enim sibi tantum esse prudentiæ ingenique putabat, ut de jure respondere posset, is & antiquitatem omnem studio complexus erat, & Dialecticas regulas, & Moralem in primis Philosophiam perdidicerat; sine quibus nec vetera legum vocabula expediri, nec sensa ad sæculi mores traduci, nec omnino generalis præceptio rebus singulis aptari potuisset. Quo illud spectat Ciceronis in libro *de Orat.* l. c. 44. Jus civile Romanorum multis præclaris artibus ex-

cul.

cultum, ceterarum gentium inconditum fuisse ac
 pæne ridiculum, ne Lycurgi quidem libris, aut
 Draconis, aut Solonis exceptis. Nolite enim
 audire hominem *pro Muræna*. Causæ inservit
 more suo, & ut Sulpicium prosternat, nulli par-
 cit Jurisconsulto. Tota illa Oratio festiva est,
 & ad carpendum instituta, ut ne ipsi quidem
 parcat Stoicorum Philosophiæ. Quam cum audi-
 ret Cato ejus adversarius, *Dii boni*, inquit,
quam ridiculum Consulem habemus! Idem tamen,
 cum impetus ille forensis deferbuisset, amoris
 iræque expers, Duodecim Tabulas supra omnes
 Philosophorum bibliothecas extulit, nihilque tam
 honorificum in pace judicavit, quam Juris scien-
 tiam profiteri. Et vero qui fieri poterat, ut
 nobilissimi Romæ viri vel hoc sibi studio ad ho-
 nores ac dignitates viam munirent, vel ho-
 noribus jam perfuncti hinc sibi senectutis sola-
 tium & ornamentum quærerent, si tota juris
 scientia tenuis esset, ut ille contra Sulpicium di-
 xerat, formulisque & actionibus contineretur?
 Adde his, qui respondendo jure privatis cave-
 bant, illos etiam qui imperium meditabantur,
 seque ad leges ferendas, siquando opus esset, per
 hæc studia comparabant. Quod utinam semper ex
 hac schola magistratus exissent: neque enim tam
 cito tanta rerum moles corruisset. Equidem sæ-
 pe mecum ipse cogitare soleo, quamobrem qui
 reipublicæ operam navant, aliis se potius litte-
 ris dedant, & politicam artem a Philoso-
 phis petant, hominibus plerumque sibi viven-
 tibus. Quod ego non reprehendo, sed nus-
 quam certe, quam in Romana Jurisprudencia, cla-
 rius apparent civium negotia, personarum gradus,

Plut. in
Vit. Cat.

rerum divisiones, acquirendi modi; nusquam publica & privata crimina, poenæque criminibus constituendæ; nusquam officii veræque virtutis munus; nusquam demum cetera, quæ humanam societatem lædere, tuerive possunt: atque hæc quidem ad omnem civilis administrationis formam apposite scripta; quia nullus est rerum status, in quo Roma, perpetuis agitata motibus, aliquando non fuerit. Nam a Romulo ad Tarquinium usque Superbum experta regnum est; tum ad Aristocratiam per Brutum & Valerium Consules transiit; surgentibus deinde Tribunis, partemque honorum omnium sibi vindicante plebe, in Democratiam commutata est; post, a Cinnanis contentionibus ad Triumviros usque reipublicæ constituendæ, Oligarchiæ speciem quamdam obtinuit; denique amissa libertate omni, modo regio dominatui similia, modo tyrannidi passa est; tam sibi ipsa dissimilis, quam Priucipes habuit genere, moribus, ætate, ingenio diversos. Numquid alii sunt antiquæ doctrinæ fontes, numquid ulla Græcorum volumina, unde plura temperandæ civitatis documenta, unde certiora, unde magis probata, quodcumque tibi regimen fortuna dederit, sive regium, sive populare, sive mistum, parari possint? Sed, ut spero, Græcarum rerum amatoribus satis id superque futurum est, quia ratione ducuntur; nec unius disciplinæ gloriam Romanis gravate concedunt, reliquas omnes ex Græcia, Musarum & Apollinis patria, tamquam mutuas exorantibus. Gravior mihi pugna, multoque periculosior cum illis ineunda est, qui se religione quadam ad tempus adscita callide tegunt, totamque

que Juris scientiam Mosaicis legibus definiunt ; Haud ego sane inficias iverim, ex fonte illo saluberrimo, omniumque antiquissimo leges ac iura manasse omnia; ajo etiam, & confirmo: sed quando hæc in flumen amplissimum propagata sunt, cur fonti adhuc aridulo segnes hæreamus? Omnia sunt in libro illo divino, quæ ad religionis institutionem, vitæque honestatem ullo modo pertinere possunt; sed nimia quadam licentia fit, ut & Politicas, & Philosophicas commentationes quidam ex illo eruant, alii Oratorium, alii Poeticum artificium, nonnulli etiam incredibili depravatione rerum mysteria Chymica, & siquid est illis ab homine excogitatum inanius. Hoc genus hominum, qui se multa in Sacris litteris videre putant, ab earum proposito remotissima, jam a mente discessit, & insaniabili morbo laborat. Quos inter non eos censeo, qui summa Juris capita ab ipso legislatorum principe Moyse derivant: hi enim & valde sapiunt, & ut ante dixi, nobiscum faciunt. At qui privatum publicumque jus, omnemque juris legumque doctrinam indidem hauriunt, mihi quidem nimis videntur extendere, quæ ad unius populi regimen scripta sunt, neque sane perpetuum, sed Christi summi regis adventu jam extinguendum. Angusta fere sunt huiusmodi ingenia, & in quo maxime gloriantur in eo summam levitatem ostendunt. Cum ad eam pervenerunt insaniam, ut hinc acuminis laudem quærant, omnia sibi licere putant, contraria contrariis inferunt, nova sensa componunt, monstrosas interpretationes effutiunt, nihilque tam alienum a S. Scriptura est, quod ejus auctoritate non confirmet. Jam in eo

Quam sibi placent, cum dicunt, Romanis legibus
Vetitas cærimonias atque impia sacra juberi! Ita
nimirum. At nos ex iis, & præterea multis jam
obsoletis de sepulcrorum jure, de iudiciis dan-
dis, de bonis addicendis, de prisca parentum po-
testate, de servitute, eruditionem expromimus,
iussa & sanctiones temporis condonamus. Quod si
grave aliquid afferre cupiunt, quin potius obscu-
ritatem objiciunt? quod nos Romani juris vitium
pro nostra ingenuitate fatemur; si modo vitium
est, quod rei majestatem parit, & hominum se-
gnitiam exercet. Objiciunt enim vero multi; nec
tamen desunt, qui nimis plana omnia, & in me-
dio posita esse querantur; quia sibi convenire ne-
queunt, qui res optimas temere oppugnant. Qua
in re dicam universe quod sentio. Sunt in Ro-
mana Jurisprudencia, quæ maxima ingenia exple-
re possint, nihil quod opprimere; jus continet
verbis ac sententiis obscurum, non tamen anti-
quitatis studiosis; magnitudine immensum, non
tamen promptis & incitatis; rebus admodum va-
rium, & alicubi etiam sibi contrarium, non ta-
men intelligentibus; uno verbo, pelago illam Ju-
stinianus comparavit procellis scopulisque infesto,
in quo scilicet peritus nauta ingentem sibi lau-
dem comparare potest, imperitus ne minimam
quidem. Ergo huc, si viri sumus, operam o-
mnem studiumque conferre debemus, in hoc con-
tendere, hoc urgere, quod & pulcherrimum, &
Romanum est; immo mehercule pulcherrimum,
quia Romanum. Omnia sunt ab eo populo mi-
rabiliter facta, & nescio quo pacto in commune
hominum bonum æternitati consecrata. Lingua
ipsa in eo solo, ut fit, temere nata, nec anti-
quissi-

quissima, nec copiosissima, neque fortasse elegantissima omnium, quæ ad nos pervenerunt, Romanis tamen fati quodammodo prædita, adhuc toto orbe diffusa est; omnesque gentes humanitate aliqua imbutæ latine discunt: quasi inter se demum tacito consensu convenerint, ut ingens illud damnum hac una reparent, quod ex eorum superbia tulerunt, qui Babellicam turrin auctore Nembrotho ædificantes, in varios sermones distracti sunt; eamque vivendi communionem dissolvere coacti, quam diutius servare sine usu colloquendi non poterant. Quid igitur de Romanis legibus dicendum erit summo ejus reipublicæ consilio constitutis, suffragio gentium omnium probatis, prudentum hominum interpretatione expeditis, magnorum Imperatorum auctoritate novisque constitutionibus roboratis? Sed hætenus de illis plus satis. Nolo enim videri tantum Romanis tribuere, ut nostris detraham, quibus non quidem studia, sed vitam moresque regere oportet. Quod tamen non sine auctore facerem; quia fere humana ingenia ad extrema delabuntur, & cum alii ne in scholis quidem Romanas leges ferre possint, alii contra & judiciis, & curiæ quotidie obtrudunt. Ego vero ad suas quemque mitto, modo sint ea sapientia conditæ, quam sibi a Romanarum studio legislator comparare potuit. Quid enim? An Ægyptii sua sibi jura statuerunt, sua Cretenses, sua Lacedæmonii, Athenienses, vetustique Italiæ populi sua nos autem nobis diffisi aliunde mutuabimur? Itane Gentes omnes, cum staret Roma & æterna videretur, de suis institutis sollicitæ erant, ut *αὐτονομίαν* non secus ac libertatem, partim bello

tuerentur, quod Antiochus fecit, partim pretio redimerent, quod Strabo de Tyriis narrat; omnes autem, quæcumque possent, pulcherrimum hoc summæ nobilitatis ac felicitatis testimonium publicis monumentis ad posteros propagarent; nostri vero homines in rebus judicandis sollicite quærent, quid Romanis Decuriis ante annos bis mille videretur? Ergo Athenis, non dicam sapientissima civitate, sed sapientiæ ipsius domicilio, hoc tanti erat, ut νομοφύλακας, peculiaris magistratus, omnibus consiliis interessent, naviterque caverent, ne patriis legibus injuria fieret; nos vero etiam indignabimur, nisi nostris antiquatis, peregrinæ valebunt? At enim nondum ea tempestate Romana erat Jurisprudentia. Vero: atqui tempestate nostra non mores sunt Romanorum. Hoc enim facit unum, ut ne optima quidem in usu esse perpetuo possint, quod longinquitas temporis abolet consuetudines prisca, & hominum ingenia commutat. Da scilicet, hac nostris civibus religione, his moribus, hoc Principe, sub hoc cælo viventibus, da Labeonis responsa summo jure, ac Dialecticis regulis adstricta; da spinosa illa ceterorum Proculianorum ex Zenonis & Chrysippi ducta principiis, qui omnia crimina æqualia judicant, nulloque discrimine punienda: Deum profecto atque hominum fidem ipsa judiciorum subsellia, non modo homines implorabunt. Id demum justum est, quod temporibus convenit, non secus atque illud salubre dicitur, quod loco & tempore valetudini adhibetur. Ut igitur in arte Medica non cuilibet omnia, nec eadem semper salutaria sunt; ita in regendo & judicando, nisi justitiæ munia pro rerum ac temporum

porum conditione statuantur, iusta cum iustis aliquando pugnabunt; legesque illæ, per quas civitatis morbi curari debent, modo insalubres, modo etiam exitiosæ videbuntur. Quid quæritis? Ipsa quoque Romanorum jura pro variis rerum conversionibus mutata sunt, suisque temporibus, & civium ingeniis accommodata. Neque enim aut jus Papirianum, exactis Regibus, libero populo convenire potuit; aut Duodecim Tabulæ civibus in immensum auctis, variatisque opum magnitudine moribus satis fuere; aut plebiscita & senatusconsulta, amissa rursus libertate, non Principum constitutionibus indiguerunt. I nunc, & antiquas leges huic sæculo recita. Delectabis cognitione pulcherrimæ rei; at paucos, mihi crede, movebis, ut patrias deserant, & ad illos mores suorum dissimillimos adducantur. Quid vero si illis, quas Romanas appellant, non nihil immiscuit avaritia compulsus Justinianus? quid si multas ipse quoque vitiavit partim celeritate faciendi negotii, partim nescio qua malitia Tribonianus? Videlicet ita ferunt; quod ego nec affirmare ausim, neque refellere. Etenim utcumque sit, nostras ego malo, quam illas; sed illas, quam ceteras. Quod cum dico, non ego illis nostras oppono, quia meliores, sed quia tempori & moribus appositæ nostris. Si enim barbari cum Italiam occupassent, multisque sæculis beatissimam hanc Orbis partem incoluissent, numquam tamen ejus humanitatem & saluberrimam vivendi disciplinam ita senserunt, ut, suarum legum ferinarum amore deposito, Romanas adsciscerent; cur nos nihilo minus ad elegantiam, quam Romani, ad æquitatem vero etiam magis exculti, an-

tiqua illorum jura, nostris objectis, revocabimus? Ego vero ne hoc quidem moleste fero; Gothos & Langobardos, cum feritatem exuere in hac humanitatis patria nequivissent, pares moribus tenuisse leges; nedum velim, litteris ac religione cultissimas gentes suis se repente abdicare institutis, & ad aliena transire. Quid quod ipsius patriæ amor, & quædam veluti patriarum institutionum reverentia jubet unumquemque custodire sua, & adversus novatores propugnare? Ut enim commovemur, ut exardescimus, ut cælum terramque miscemus, quoties aliquis oblitus sui peregrinos mores usurpat; eaque arrogantia, quam quidam solent ex longis itineribus domum referre, patria quæque fastidit, mentas, vestes, studia, sermonem, nihilque nisi Gallicum, aut Anglicum admiratur! Quod si privatos homines sibi unis per hæc insanientes ferre non possumus, quomodo illos feremus, qui judicia administrant, unde pendet civitatis salus, si patrio receptoque jure contenti non sint? Quo loco Venetorum Patrum consilium, & præter omnia antiquitatis exempla insignem prudentiam, silentio præterire non possum; qui cum multa æternæ reipublicæ fundamenta jecerint, tum illud in primis religiose caverunt, nequid unquam in judicando novaretur. Hanc illis constantiæ laudem suarum legum confidentia parit, quæ certe non tanta esset, nisi optime nossent, majores suos officia vitæ omnia quam rectissime præscripsisse, omnesque posterorum conatus, jubendo optima, prævertisse. Quemadmodum enim omnium rerum publicarum formis inter se comparatis, hanc denique unam constituerunt, quæ plu-
rimas

rimas felicitate, diuturnitate omnes superavit ;
ita Græcis Romanisque legibus simul compositis ,
multaque opera expensis & æstimatis , hoc de-
mum condidere jus, quod Venetum dicitur, ex
omni vetusto jure sapientissime expressum, & æ-
quitas nomine, ubicumque gentium cognoscitur
æquitas, celebratum. Nullam esse regionem pu-
to, ubi mores & ingenia hominum ab antiquis
legislatoribus egregie explorata mitioribus vincu-
lis in officio contineantur ; quæ maxima est, ac
ferme una Principis gloria, non metu, sed amo-
re imperantis: at hoc singulare bonum, liquan-
do aliena subrepere jura patiemur, statim corrup-
petur, & ut legum arbitria, ita rerum cetera-
rum (quod Superi avertant) ad alios migrabunt.
Quamquam, quod fieri nolo, ne fieri quidem
fortasse potest. Fuit hoc quondam Romanæ rei-
publicæ fatum, ut una propemodum esset omnium
hominum civitas, nomenque unum, tantumque
Romana jura, quantum arma procederent; quod
victæ nationes ne victæ quidem sibi viderentur ,
si Romano jure uti possent, civesque ejus urbis,
quæ una credebatur ad imperium & immortalitatem
constituta, nominari. Nunc quæ tantula
civitas est, quæ non se ad imperandum natam
existimet; cujus non magni ad gloriam tituli, le-
gesque sint aureis litteris descriptæ, & , siquid
adversæ fortuna ferat, ipso civium sanguine custo-
diendæ? Qui paucorum jugerum Regulus non se
summis Principibus comparat, juris auctor sui,
custosque tanto solertior, quanto plura infirmi
timere solent? Non est igitur opus voce nostra ,
qua in re sibi quisque sapit. Id nobis curandum,
ut, quod primo loco dixi, Romana jura in scho-
lis

lis teneamus, quibus homines instructi sua mer-
hercule utilius tractabunt; eamque felicitatem ci-
vitatibus parient, quæ rectam judiciorum admi-
nistrationem plerumque consequitur. Hæc nos
præsertim exerceant, quibus si non conceditur in
foro esse, operamque litibus dare, illud tamen
propositum est, ut ex antiquis legum fontibus
magnam priorum verborum supellectilem, so-
lemnes formulas, omnemque eruditionis copiam
reconditæ & exquisitæ ad aliarum disciplinarum
usum colligamus. Utamur Principis Serenissimi
beneficio, qui celeberrimos toto orbe Jurisconsul-
tos magnis præmiis advocatos hac in urbe doce-
re jussit: utamur sæculi sapientia, in quo cum
litteræ facultatesque omnes pristinam dignitatem
recuperarunt, tum maxime juris scientia, excussa
barbarie, quæ per rabulas & leguleios obrepse-
rat, rursus ad Alciatos, ad Goveanos, ad Cu-
iacios, ad Hotomanos, tamquam in sinum com-
plexumque parentum, regressa est: utamur deni-
que fortuna ipsa, quæ bonis artibus tandem ali-
quando conciliata, undique Augustos, undique
Mæcenates excitat, & litterarum & litteratorum
studiosissimos. Quod postremum video a multis
negari; sed mihi quidem ad hujus Orationis exit-
um properanti, in te unum, Princeps Eminen-
tissime, veluti multorum exemplum conjicere o-
culos satis est, cui ad insignem & absolutam
erga litteras munificentiam, vel nihil omnino
deest, vel illud unum, ut tantum illis prodesse
possis, quantum cupis.

EPISTOLA

AD LECTOREM

Præposita editioni primæ hujus Orationis.

SI quam libenter fit aliquid, tam etiam recte fieret, nihil a nobis exisset hac Oratione tolerabilius; sed hoc in genere tum maxime ineptire homines solent, cum minime volunt. Nimius enim effusa voluntatis impetus ingenium fere ultra modum movere solet, tantumque agitare, ut neque parere prudenter possit, neque explicate disponere, neque apte luculenterque ornare. Id ego mature prævidi, fecique diligenter, ut ratione, non impetu ducerer; verumtamen ardua res est; neque illa diffiteor, quæ me hominem communibus vitiis obnoxium abripere potuerunt, & in devia propellere. Ergone invitius dicunt? Imo longe pejus. Cum enim studia humanitatis omnia in primis voluntate nutriantur, nihil neque Poeticum, neque Oratorium, quod iniquo animo fiat, potest esse probabile. Quid quæris? Libenter in hoc argumento versatus sum, quod ipsum per se grave, cum ea insuper eruditione conjungatur, quæ Latina studia tractantibus familiarissima est. Plura ego de me polliceri non ausim. Quantum voluntas & conatus in homine valeant infirmissimo, alii viderint. Vale.

O R A T I O VIII.

A D H I S T O R I A M.

*Qualecumque Historiæ studium ad omnes pertinet ,
Criticum ad paucos .*

MAgnopere vereor, ne nimio plus ab Adolescentibus nostris hodierna luce postulare videar, humanasque vires non satis prudenter æstimare, si gravissimis disciplinis, de quibus superioribus annis verba feci, Historicum studium suapte natura immensum nunc denique adjiciam: quasi vero rebus necessariis onustos, ac pæne impares, supervacuis opprimere velim, spiritumque illis, ut ita dicam, atque animam intercludere. Verum & me illi satis norunt neque multa, neque severius exigere solere; & ego illos quotidie video, quidquid socordia peccant, modo magistro, modo naturæ imputare; & utcumque tandem res se habet, quidvis potius committendum est, quam ut majores nostros, quorum consilia plane divina vel in rebus minutissimis recognoscimus, in tam gravi litterarum negotio minus vidisse judicemus; quamque ipsi statuerunt Historicam scholam, nobisque in primis commendaverunt, nos inani suspitione perterriti, aut levitate ducti prætermittamus. Equidem non diffiteor, nimis infinita esse, quæ hoc nomine comprehenduntur; quo cum antiqua monumenta veniunt obsoletis verbis fabulisque involuta; tum Geographicæ Chronicæque tabulæ æternis difficultatibus impeditæ; tum innumera rerum gestarum volumina

mina non sine partium studio scripta; tum denique magna quædam controversiarum copia ad hæc ipsa, si fieri possit, expedienda, si non possit, magis magisque implicanda. Sed quemadmodum patrisfamilias prudentis est menses apparatus struere, non eundem tamen pueris cibum ac viris præbere; ita officii nostri ratio postulat, ut cum omne studiorum genus, quæ libero homine digna sunt, in medio posuerimus, tum demum quid cuique, quove tempore conveniat, etiam atque etiam consideremus; & pro ingeniorum ætatumque varietate onera laboresque distribuamus. Ac si qua ars, aut disciplina duce solertissimo indiget, ne quid in illa ætatis imprudentia committatur, Historicum certe studium tam lubricum est, ut quædam non ignobiles Academiæ, cum de tanta solertia desperarent, quanta opus esse intelligebant, hoc tam insigni bono carere maluerint, quam levem juventutem periculo exponere. In quo, nequid dicam gravius, duobus Lycurgis similia fecerunt, sapientibus quidem viris, sed in hoc præter modum severis, quod alter, ut divitiarum aviditatem compesceret, omnem auri argentique usum Lacedæmoniis interdixit; alter, ut ebrietatem averteret, vites omnes in suo Thraciæ regno præcidi jussit. Nos exempla meliora secuti, moremque loci hujus, in quo alti educatique sumus, retinentes, ita statuimus, quaecumque Historiæ studium ad omnes pertinere, Criticum ad paucos. Hoc vero cujuscumque sit, quantum quidem animo ex vestra sapientia conjicio, plerique omnes intelligitis: sed ne quis tamen unus consilium hoc nostrum insimulet, oratione expli-

explicabo ; simulque faciam, ut, rerum præteritarum cognitio quanti sit in uno quoque genere, constet ; simul illud ostendam, quam multis naturæ industriæque præsidiiis paratum esse atque instructum necesse sit, qui velit antiquitatem curiosius expendere, & severa Criticorum trutina sine periculo castigare.

Cum discendi desiderium ab ipsa nobis natura inditum Philosophi fuisse dicunt, tametsi universe loquuntur, nihilque prorsus excludunt, quod in hominis cognitionem cadere possit ; ubi tamen eo descendunt, ut rem pluribus verbis exponant & confirment, facile apparet, in quo uno scientiæ genere omnes homines desiderando, conveniunt, id aut Historicum esse, aut ad Historiam quoquo modo referri. Qua enim ætate plurimum natura valet, necdum iis affectibus tangitur, qui nos ad ingrata etiam suscipienda compellunt, vix quippiam est tam invisum, quam schola & magister : at illa tamen ætatula ipsa narratiunculis delectamur, earumque studio ducimur ; quæ licet plerumque falsæ sint, magisque Poeticæ, quam Historicæ, certe declarant, quantum natura nostra rerum præteritarum cognitione afficiatur, cujus rei gratia fingendum etiam nutriculæ putant. Ubi porro adolevimus, rationemque adhibere jam licet, hoc insum naturæ judicium vel ex eo manifestum est, quod in aliis quidem disciplinis omnes industriæ nervos contendimus, nequid nobis nisi certum ac firmum, quantum rerum conditio patitur, inferatur ; at in hac temporum præteritorum investigatione, etiam vero similia libenter audimus ; scientesque ac volentes ad Poetas convolamus, qui insitam humano ingenio cupi-

cupiditatem fallendo expleant, suaque illa mendacia, quantumvis immania, nobis obtrudant. Curiositas hæc non unius, aut alterius hominis, sed plane omnium, quicumque, non dicam litteras norunt, sed litterarum nomen audierunt, quia scilicet naturalis est, nullo nos vitæ tempore, nullo loco deserit; & cum aliæ omnes tardius exortæ, ætatis flexu dilabantur, hæc una nobiscum nata, ad extremam usque senectutem perdurat. Igitur cum dico, Historiæ studium quaecumque ad omnes pertinere, naturam ipsam ducem sequor, cujus si ratio perpetuo haberetur, haud ita multos suscepti consilii pœniteret. Nullam gentem esse puto tam incultam, tam vecordem, tam omnis humanitatis expertem, quæ suæ reipublicæ acta non litteris mandet, legique cupiat; carere barbari eloquentia possunt, carere Philosophia, carere disciplinis omnibus, Historia carere non possunt. Hinc Spartani ad omnia rudes, præterquam ad arma, Dicæarchi tamen librum de majorum suorum gestis, totoque civitatis regimine, quotannis in loco publico recitari volebant: Romani vero antequam feritatem exuerent, rerum suarum annalibus dedere operam; quos quidem non quivis unus ex populo, sed Pontifices ipsi scribere jubebantur; ut iidem & Sacrorum & Historiæ curam haberent, resque duas potissimum necessarias magistratus unus, idemque gravissimus procuraret. Quid Hebræi, tam antiqua natio, quam natura ipsa, in omnibus ferme rebus numine afflata, ut gentibus consecuturis auspicia præberet legesque vivendi, quid, inquam, Hebræi? numquid aliunde suas litteras, quam

quam ab Historia auspicati sunt? Nullus est codex Mosaicis commentariis antiquior, ut ex hac tamquam naturæ voce discere possimus, quo homines suoapte ingenio ferantur. Quod si parum est in natura momenti, anne parum etiam in Dei optimi maximi providentia, qui sacrum Historicum movit, ut religionis mysteria, morumque instituta hac via & ratione doceret? Nolo enim hic plura quærere: liber omnium divinissimus, quo uno ad salutem indigemus, quem sine intermissione versare, legere, memoriæ mandare debemus, hic, inquam, liber tam necessarius historice scriptus est; num igitur sapere sine Historia ullo modo possumus? Sed nimis longe res ducitur: cominus agamus. Jam enim scire velim, quodnam litterarum, aut doctrinæ genus sine Historiæ adminiculo consistere possit. Non sane Poësis, quæ facta imitari fingendo solet; non nostra hæc dicendi facultas, quæ rerum vetustarum exemplis tum ad ornandum, tum vero etiam ad probandum frequentissime utitur; non Jurisprudencia, quæ sine Romani imperii totiusque antiquitatis notitia intelligi omnino nequit; non denique Civilis scientia, quæ multiplici rerumpublicarum & populorum historia constat, & ex ea maxime conflata est. De Philosophia vero quid dicam? Mitto quærere, utrum animalium & plantarum historia huc re vera pertineat; sed cum pulcherrima sit Philosophiæ pars, quæ de officio differit, sive a Pythagora, sive a Socrate inventa, num hæc præceptis tantummodo continetur? Nempe aut ipsa morum doctrina nihil est aliud, nisi Historia, aut ita cum

cum Historia conjuncta, ut, si caret exemplis, scholastica sit, jejuna, supervacanea. Tibi intus cane rigida illa & adducta virtutum genera, quorum usu & possessione felicitatem definis; nihil nobis hujusmodi persuadere poteris, nisi rerum eventu & hominum factis ostendas, quid pati possit humana conditio, minime nota illis, qui pallio inclusi intra parietes philosophantur. Quid fieri debeat, oscitantes audimus; ac cum id factum esse intelligimus, nec sine fructu, & a præstantibus viris factum, tum vero studio movemur conandi similia, tum æmulatione exardescimus. Magna est hæc Historici studii ad philosophica tractanda necessitas, & haud scio an maxima: non tamen major illa, quæ Theologicas disputationes comitatur. Utrum enim ullus potest esse, aut dici Theologus, tanto par nomini, qui omni prorsus Historiæ cognitione careat? Iners profecto est, qui profanam ignorat, siquidem Canum, optimum ac solertissimum harum rerum disceptatorem, consulimus; at si quis ne sacram quidem tenet, quem ego illum Theologum dicam? Nisi forte parum pertinent ad Theologiam Mosaicæ narrationes, acta Pontificum & Conciliorum, priscorum Patrum memoriæ, Apostolorum & Martyrum vitæ, totius denique veteris disciplinæ cognitio, unde multo firmitus & clarius Christianorum sacra, quam ex *possibilium*, & *impossibilium* contemplatione, multarum scholarum otio familiarissima, demonstrantur. Quod nolim perinde accipiatur, quasi ego Scholasticam Theologiam summovere cupiam; & eruditionem quamdam ejus loco ponere sine illo doctrinæ ordine, quam *μὲθοδος* Græci dicunt, sine acumi-

de loc.
Theol.
I. XI.

ne, sine disputationibus, uno verbo, quæ ingenio parcat, memoriam exerceat. Multa in Theologo esse oportet; nec satis muneri facit, qui Dialecticis commentationibus tantarum rerum scientiam circumscribit; nec item satis, qui omnia religionis dogmata ex Ecclesiæ fastis & annalibus egregie recitat, nisi eadem possit luculentis acutisque rationibus illustrare, & contra oppugnationum perfidiam communire. Ardeo, mihi credite, in parte tam ampla dicendi desiderio; sed multa necessario omittenda sunt, ut de Critico Historiæ studio, quemadmodum initio proposui, quæ sentio, vobis exponam, Vereor enim, ne sibi quidam emendandi gloriola abrepti nimis indulgeant, suisque illis judicandi regulis temere usi, non modo leviora antiquitatis monumenta concutiant, sed in arces quoque ipsas invadant, tantumque sibi licere putent, quantum Criticæ concedendum prædicant; quæ ipsa per se optima est, magnoque in litteris usui, sed invidia laborat, quod ad ingenia furiosa aliquando perveniat. Neque vero idcirco actionem instituo, ut ea judicio persequar, quæ legitimæ censuræ modum & potestatem prætergrediuntur. Nimis hoc longum esset, majorisque ingenii opus. Sed illud mihi tamen non difficile erit ostendere, paucissimis hominibus ætate & sapientia valentibus arma hæc concedenda esse; quibus non recte adhibitis, solitudo & vastitas nobilissimis historiis, multarum ætatum fide confirmatis, afferri potest. Etenim si Criticum hujus facultatis studium in eo consistit, ut nihil omnino credatur, quod non certissimis monumentis traditum ad nos devenerit, quotus quis-

quisque curam hanc tantam suscipere potest, ut obscurissimam antiquitatem excutiat, probet, castiget, excipiat, condemnet? Quot genera rerum, linguarum, studiorum teneat oportet; quam multa legerit, viderit, audierit, perceperit ex omni vetusta recentique doctrina, qui tantum in litteras sibi permittat, iudiciumque tam periculosum, volentibus reliquis, aut saltem non ægre ferentibus, exerceat? Jam vero illud quantum est, vulgares opiniones deponere, ab omni odio atque amore sibi cavere, nimios animi motus modo in vetera, modo in nova pronioris coercere, veritatem unam tamquam ducem ac pæne deam sibi proponere; contra suos, contra patriam, contra seipsum, si ita necesse sit, aliquando sentire, & quæ sentias, libere pronunciare? Nemo sane est, qui ita non profiteatur communi illo Criticis omnibus, ac fere jam ridiculo scribendi procæmio, in quo vitia humanæ naturæ omnia statim ejurant, multis ingenio abutentibus maledicunt, de sua fide & integritate magnifice pollicentur. At Carneades, summa quadam in suo illo philosophandi genere notissimaque sapientia vir, ita sibi hac in re diffidebat, ut cum adversus Zenonem scribere constituisset, ad bilis impetus temperandos helleborum sumpserit. Nunc tantam illam diligentiam plurimi rident, quibus purgandis ne tota quidem sufficiat Anticyra; vixque in provinciam tam difficilem ingressi, continuo stilum exacuunt, magnaue Scriptorum nomina ad eædem designat. Et hoc quidem juvenum solet esse vitium, aut eorum maxime; quod sibi videantur aliena obtreptione crescere, matureque ad famam sine multo labore pervenire. Herodotus,

inquiunt, Xenophon, ceterique Græci Poetarum similes sunt; Thucydides vero minus ad mentiendum aptus, obscuritate sermonis veritatem obnubit: ex Latinis Livius superstitiones confectatur, nec patriam verborum positionem dediscere potest; Sallustius vetustatem affectat; Cæsar gloriosus, Curtius mendax, Florus declamator est: ex Ecclesiasticis Sulpicius miracula venditat; Theodoretus fuco & metaphoris studet; Rufinus futilis est; Eusebius, Socrates, Sozomenus favent Hæreticis; omnes autem negligenter ac supine tempora signant. Utrum quilibet unus ita loqui potest? Non nego posse aliquos, sed eos scilicet, qui maximam vitæ partem in optimis studiis collocarunt; qui multas sibi litteras ac reconditas, præter Latinas, addiderunt; qui summa denique opinione ingenii consecuti sunt, ut extra invidiam positi judicentur. Nempe hæc sibi multi tribuunt, sed pauci præstare possunt: Ex hoc enim tam ingenti hominum numero, qui in hoc pulvere defudamus, quique nobis ipsi, ut fateamur ingenue, tacito quodam sensu blandimur, aliis fere valetudo deest, aliis voluntas, aliis ingenium, aliis subsidia librorum, aliis in vestigando contentio, aliis patientia, aliis denique alia, quæ singula ubi deficient, multi adhuc ad planiora litterarum genera aditus patent, ad Criticum Historiæ studium ferme nullus. Fac enim, se tam immenso ac scrupuloso pelago adolescentem committere: jam primus ejus labor Sacra Biblia, quo in codice sine controversia fidelissimo, quam sæpe tamen secum ipse luctabitur, si omnia ad Criticæ leges exigere velit! Agedum incipe computare tempora, unde studium hoc

exor-

exordia ducit: ecce tibi statim nubem offundunt Septuaginta Interpretes, qui annos centum generationibus singulis adjicientes, Hebræam, vulgataque *χρονολογία* in magnum discrimen conjiciunt. Constitue mihi Beli tempus, de quo non uno, aut altero sæculo, sed annis ferme mille principes hoc in genere Scriptores inter se differunt. Quandonam Assyriorum, quando Persarum imperia cœpere; quos in annos confers egregium Judithæ facinus; unde Babylonicæ captivitatis tempora numerare incipis, unde Danielis hebdomadas, unde ipsum Christi Domini adventum tam celebrem, tam notum, tam illustrem, de cujus tamen anno, si Orbis conditi rationem habeas, opiniones plus nonaginta, partim aliquo modo varias, partim omnino contrarias invenies? Te vero miserum, si sacra cum profanis componere velis, nomina nominibus, facta factis conciliare. Te Belus vexabit, te Nembrothus, te Cyrus, te Assuerus, te Artaxerxes, te multi Darii, te non modo temporum, sed regionum terrarumque descriptio; quæ omnia si quis distinguere recte potest, & suo quæque loco statuere, hunc ego hominem non cum cetera Criticorum turba comparo, sed in primo subsellio colloco, & Musis ipsis proximum judico. Quod si tanta est in historico illo difficultas, qui nec falli potuit, neque fallere voluit, quo animo ad eos accedes, qui homines sunt, humanisque erroribus obnoxii? Qua mentis acie, quo conatu opus erit, qua prudentia, quo ingenio, ut cum te ad horum lectionem contuleris, quanti quisque valeat, statim attendas, sitne natura sua ad laudandum inclinatio, an ad carpendum; quam sit ambitiosus,

quam credulus, quam superstitiosus; utrum dubia, utrum contraria narret; undeumat, quomodo sciat, a quibus acceperit, quorum partes sequatur, quibus adversus sit? Neque vero cum tantam animi intentionem, tantamque diligentiam adhibueris, salva res erit. Solent enim Scriptores, ubi imponere volunt, stilum naturamque commutare; & interdum quidem veracissimi falsa dicunt, quemadmodum fallacissimi interdum vera. Quo fit, ut cum facta, & auctoritates inter se pugnant, nemo nisi sapientissimus momenta illa colligere possit, quibus in partem omnem pensitatis, iudicium conjiciendo feratur. At enim regulæ Criticæ sunt ab hominibus perspicacissimis compositæ, quarum ope ne adolescenti quidem difficile fuerit istiusmodi freta, & si quid istis infestius est, superare. Fateor equidem eo me compulsus, velut in acie declinando atque effugiendo, quo minime volebam; non quod vulgari Sophistarum artificio usus, libenter graviora diffimulem, sed quod regulæ istæ a præstantissimis ingeniis excogitatæ, magnam quandam animo venerationem metumque obijciunt, nec liberam vocem erumpere sinunt. Verumtamen audendum in loco est; tametsi id ipsum parcissime faciam, ne forte videar caput artis eatenus petere, ut totam convellam. Prætereo igitur, quod vulgo fit, regularum auctores sese invicem labefactare; non dico, ex iisdem contraria concludi, quod Abgari litteræ, ne multa recenseam, per eadem oppugnata propugnataque demonstrant; taceo, si quid in illis est nimis subtile, nimis varium, nimis multiplex, non tam ad veritatem enodandam, quam ad involvendam accommodatum; o-

mitto

mitto præterea multa magni quidem momenti , sed quæ nec invidia carent, nec tantula oratione comprehendi possunt . Verum date mihi hanc , quæso, veniam ; ut de illa nonnihil dicam , quam Critici omnes ceterarum principem judicant, certissimam, inconcussam, ante oculos diu noctuque habendam . Age igitur recita . **SIQVVD IN ANTIQVVIS MONVMENTIS OBSCVRVM, PERPLEXVMQVE ERIT, CRITICI INTERPRETES SVNT.** Euge, nihil moror . **SI NARRATIO NARRATIONI OPPONITVR, HOC PRIMVM JVS ESTO: QVA QVIS ÆTATE, QVOVE LOCO VIXIT, EJVS ÆTATIS LOCIQVE HISTORIAM SCRIBENTI FIDEM HABETO; TVM QVI PROXIME VIXIT, CONSVLITO; AB ALIIS CAVETO .** Hoc tamquam filo per avia ducti memorias antiquissimas Critici quidam condemnarunt, & narratiunculas nescio quas multorum sæculorum contemptu situque oblitæ, in earum locum suffecerunt ; parati negare verenda quælibet, si quis Scriptor ab inferis subito, erumpat eorum æqualis , vel ab eorum ætate recens, de quibus est controversia . Numquid igitur priscis tēporibus nullæ erant animi perturbationes, affectus nulli, non amor, non odium, non injuria, non beneficium, quibus Sriptores labefacti rerum fidem violarent, seramque posteritatem aut malitia, aut infirmitate deciperent ? Nunc certe Deum quendam esse oportet, qui potentum virorum facinora, seu pulchra, seu turpia, viventibus ipsis, fideliter scribat . Amicorum quoque ducenda ratio est, multo vero magis filiorum, interdum etiam nepotum ; ut numquam fere simplex ac nuda veritas, nisi tar-

diffime, efflorescat. Multa profecto in hanc rem dici possent, nobis ipsis non audita modo, sed visa, nisi esset hoc ipsum periculosum; ut jam conjicere possitis, quam vera de aliis Historici dicant, cum de Historicis ipsis vera dicere intuitum sit. Quapropter ad illos redeamus, *quorum Flaminia tegitur cinis, atque Latina*. Numquam enim ego eorum opinionem probavi, qui nova & inusitata vitia sæculo affingunt. Veteribus morbis laboramus, repente in singulos homines terrima lue, qua se primus ille parénsque ceterorum ad totius generis humani exitium contaminavit. Non est, opinor, Tacitus inter recentes adnumerandus; nec sane inter illos, qui minus acute aliorum peccata vident. Is tamen, tanti ingenii tantæque calliditatis vir, nihil valentius invenit, quo suam in narrando fidem commendaret, aliorum infringeret, quam si ostenderet, ceteros ante se Scriptores eorum facta retulisse, quibuscum vivebant. *Veritas, inquit, pluribus modis infracta; primum inscitia reip. ut alienæ, mox libidine assentandi, aut rursus odio adversus dominantes. Ita neutris cura posteritatis inter infensos, vel obnoxios. Sed ambitionem Scriptoris facile adverseris, obrectatio & livor pronis auribus accipiuntur: quippe adulationi fœdum crimen servitutis, malignitati falsa specie libertatis inest. Mihi Galba, Otho, Vitellius nec beneficio, nec injuria cogniti. Videte igitur, quanti sit ad veritatem canon iste, quem nobis Critici primo loco constituunt, nisi summa sapientia, quæ paucorum est, adhibeatur. At quo canone, quove duce per ea tempora ibis, quæ omni litterarum luce carent? Quis te, nisi sit multarum rerum*

cogni-

cognitione firmata mens, quis te, inquam, in
his tenebris reget, in quibus Pontifices Pontifici-
bus oppositi, sacerdotia pecuniis empta, magna
rerum divinarum ignoratio, & ex ignoratione
error, scelerum & armorum impunitas, exiguum
sacri & profani discrimen, quædam veluti nox
Ecclesiæ offusa, in qua vix oculatissimi sine pe-
riculo versari possunt? Ætatis æstus, & levitas,
& humani ingenii curæ in pejora vergentes,
transversum agent: nihil jam sanum tibi videbi-
tur, nihil certum; quodque ipse percipere non
poteris, neminem probe percepisse judicabis. Ac-
cedet illa etiam, quæ multis exitio fuit, anti-
quarum rerum satietas, & mutandi libido, qua
fieri solet, non ut vera, sed nova delectent;
omnino ut in cibis aliquando usuvenit, quorum
exquisitissimi consuetudine vulgati fastidium affe-
runt, deteriores novitate probantur. Quod si quis
primos verecundiæ fines transierit, & antiquita-
tem contemnere cœperit, ubique Annios, ubique
Inghiramos, ubique Ceccarellos, ubique Ligorios
inveniet; modo hunc, modo illum auctorem cri-
minabitur; nunc de stili varietate dolebit, quæ
tamen potest esse quæsitæ; nunc de temporis fal-
lacia queretur, quæ tamen ad librarium referri
potest; nunc illum Scriptoris nomen, aut libri
titulus commovebit, quæ multis tamen casibus
fere variantur. Quid multa? Vel in scirpo no-
dos quæret; neque putabit ex Critica dignitate
esse, si quippiam apud se valeat, quod vulgatum
sit, multisque commune: ex quo etiam falsa con-
sulto defendet, ubi vera ab aliis occupata vide-
buntur. Siquidem hoc ipsius artis proprium ac
præcipuum est, ut homines faciat præstandi cupi-
dos,

dos, aliorum contemptores, rerum mirabilium nimis studiosos; quæ vitia tanto magis tantoque facilius penetrant, quanto molliori accedunt ætati. Ac nimis undique magna, & fortasse etiam aliquibus molesta dicendi seges mihi succrescit: temperandum orationi est, temporique servendum. Quod reliquum est, ingenuam hanc studiosamque juventutem, quæ se nobis in disciplinam tradidit, oro atque obsecro, ut in suscepto præteriti temporis studio pergat. Neque enim est, cur antiquas statuas, arcus, thermas, theatra, sepulchra tam curiose inspiciamus; eorum vero animos immortales ac splendidos, qui hæc posuerunt, quibusque posita sunt, in Historiis descriptos cognoscere nolimus. Egregium quiddam est ac dignitatis plenum, majorum nostrorum memoriam revocare; religionis initia, incrementa, propagationem intueri; gentium ac populorum migrationes, bella, fœdera, regimina, fata ad prudentiæ usum perlustrare. Horum notitiam qui nullam habent, censentur inter pueros; qui ne habere quidem volunt, inter amentes. At simul illud ex animi sententia moneo, ne plus capere velit, quam possit; hoc est ne nimis sapere, neve maturius, quam oporteat. Nemini umquam crimini datum est, quod tardius se ad reprehendendum contulisset; multis quod citius: & nimirum gravius est judicandi opus, quam ut prope-rari debeat. Ad hoc, qui narrat, aut laudat, impune alicubi peccare potest; qui censores agit, ne in minimis quidem rebus sine summo dedecore delinquit. Neque vero Criticorum inopia laboramus, ut undique omnes assumendi sint; quin etiam affirmare licet, ut suum cuique sæculo in-

lo ingenium est, quasque fidus, ita nostrum hoc ubertate atque indole quadam sua Criticos ferre. Verumtamen decus hoc tam pulchrum & exquisitum in quodam veluti præstantiæ acumine consistit, unde minima quavis inclinatione in vitium & noxam detorquetur; ex quo fit, ut tamquam e longinquo adolescentibus aspiciendum putem, nec ante attingendum, quam diuturna mentis exercitatione vires confirmaverint. Hanc mihi cogitationem Criticæ arti honorificentissimam cum illa iniecerunt, quæ hætenus dixi; tum etiam nostrum hoc vivendi institutum non nimie contentionis capax; tum denique tua, Princeps Eminentissime, toties testata voluntas prudensque iudicium, nequid nobis in rerum memoriam, præsertim sacrarum, tam cito licere existimemus.

EPISTOLA

AD LECTOREM

Præposita editioni primæ hujus Orationis.

RESTE judicandi studium, quod mutuato a Græcis nomine, Criticum dicitur, etsi per omnia litterarum ac disciplinarum genera late fusum, ubique locum habet, attamen Historicam provinciam jure quodam præcipuo tenet, eamque in primis moderatur. Nam præterquamquod ipsa per se narrandi ratio, quod ex multorum fide pendeat, lubrica est, magisque periculosa, quam cogitandi; accedit insuper Historico vel oculatissimo admirabilitatis cura nimia, qua fit, ut sponte aliquando aberret, nec tam sollicite vera persequatur, quam mirabilia. Et ipsa igitur Historiæ natura, & Historicorum indoles artis Criticæ auxilium flagitat, eoque nititur uno, ut nobilissima facultas ad otiosos detrusa, in scholarum lucem interdum veniat, & cum ceteris consistere possit. Id magis certum est atque exploratum, quam facile, præsertim illis, qui ob ætatis infirmitatem fidei nostræ ac tutelæ commissi sunt. Itaque his publica Oratione commendaturus Historiam, & quod Historiam sequitur, Criticum studium, non stimulos tantum, sed frenos quoque adhibendos putavi, ob eas causas, quæ, ut alibi minus valeant, in hoc certe loco magnum momentum ac pondus habere debent. Siquis hæc aut sibi, aut suis non satis existimat opportuna, ne me tamen iccirco ita fatuum credat, ut idem omnibus propinare velim. Vale.

ORA-

O R A T I O IX.

A D E T H I C A.

Moralis institutio magis a Poetis, quam a Philosophis, petenda est.

Non deerunt, qui mirentur, cur ego meo quodam consilio, fortasse non malo, sed certe inusitato, ex aliis in alia quotannis aberrans, nova dicendi argumenta quæram, singulisque facultatibus in hanc lucem adductis, perinde disputem, quasi universum scientiæ orbem tantulo ingenio complecti velim, meque, ut vani Sophistæ solent, conflato ad invidiam nomine multiscium venditare. Attamen qui me, moresque meos parumper attendet, facile intelliget, neminem esse, qui istiusmodi ἐγκυκλοπαιδείαν aut minus sibi tribuat, aut aliis ægrius concedat, veluti quamdam mortalis ingenii intemperantiam ultra vires nitentis, & siquidem se posse, quod nititur, putat, etiam insani. Neque tamen inficior, id mihi a prima adolescentia fuisse propositum, ut studiorum decursu quam plurimas litterariæ provinciæ partes obirem; non ut aliquando immensum aliquid profiterer, sed nequid eorum omitterem, quæ ad Oratorium & Poeticum artificium aliquo modo conferre possent; tantumque doctrinæ & eruditionis haurirem, quantum de re omni probabilia dicturo in tempore satis esset. Nulla est enim ars, aut facultas ita cum alia conjuncta, ut omnes simul cum Poetica & Oratoria: quod cujusque artificis

de Or.
l. i. c. 16.

cis sit propria materia suique fines, Poeta vero & Orator nullam certam ac definitam regionem habeant, sed late vagentur, omnemque dicendi & scribendi copiam, cujuscumque sit ordinis, jure suo sibi arrogent, comprehendant, moderentur. Ac de Oratoribus quidem video inter omnes convenire; de Poetis autem, ne rem infinitam aggrediar, quo tempore aliud quiddam instituo, alii viderint. Hoc ego dumtaxat in præsentia dicam, sive in omni sermonis & humanitatis genere recte versentur, ut multis visum est sapientissimis viris, & in his etiam Ciceroni; sive aliqua tantum rerum capita complectantur, ut morosi quidam tristesque Grammatici ab hac laude repulsi scriptitarunt; unum tamen esse, quod illis negari sine injura nequit, in quo præsertim tamquam in regno suo ab ipsa litterarum origine confederunt, quodque uni cum maxima dignitate & utilitate generis humani diutissime tenuerunt. Hæc Motalis institutio est, quam cum olim Philosophi, sive Pythagora, sive Socrate duce, ad certa officiorum capita rede-gissent, quidque sit in unoquoque primum, quid proximum, quid postremum, ratione atque ordine explicassent, in ea repente tamquam in fundo occupato pedem posuerunt, non admodum reclamantibus Poetis, genere hominum minime frugi, litium incurioso, & in diem vivente. Verum si tandem aliquando ex-pergefacti jus suum persequi velint, eoque restitui, unde sine caussa dejecti sunt, ego illis hodie tamquam in judicio Centumvirali fidem meam operamque præstabo; vobisque cognoscentibus, spon-sionem faciam, ni pareat, officii præscriben-

bendi rationem, quam Latini Moralem dicunt, Ethicen Græci, non tam ad Philosophos, quam ad Poetas pertinere. Quod ut perspicue faciam, omnemque dubitationem tollam, altius mihi repetenda sunt Poeleos initia: ex quo cognoscetis, cui potissimum litterarum parti, velut ab ipsa natura naturæque auctore, morum disciplina commissa sit; tametsi postea Philosophi iuraturbarint, & in rem alienam, quasi vacuum & caducam, dolo malo irreplerint.

Quod singuli homines facere solent, ut a prima pueritia fabulas sequantur, nullumque studii genus ad multam ætatem libentius tractent, quam Poeticum, id ipsum universe ab humano genere factum est, cujus prima cura Poetice fuit, eaque una divinæ humanæque litteræ diutissime comprehensæ sunt. Quicumque aliquo doctrinæ genere excellunt, suoque ordine censentur, Theologi, Philosophi, Jurisperiti, olim a Poeticis scholis exierunt, in quibus scientia omnis parta est, atque unice culta, ut Strabo, ut Plutarchus, ut Max. Tyrius, ut ille, qui unus nominari poterat, M. Tullius, nullo ferme repugnante, tradiderunt. Quod quidem non ad ipsa Mundi incunabula referendum est, nec divinando conjiciendum, cum ex hoc numero fuerint Musæus, Homerus, Hesiodus, Parmenides, Epimenides, Solon, Empedocles, aliique notissimæ memoriæ Græci, qui divisionem, ut nunc est, disciplinarum & artium cum præcessissent, variam multiplicemque eruditionem carminibus comprehenderunt, & modo Poetæ habiti sunt, modo generali nomine Sapientes dicti. Crevere ab eorum ætate mirandum in modum

dum litterarum studia, exorientibus undique nescio quo fidere magnis ingeniis; laticesque ex uno fonte manantes in varios subinde rivulos deducti sunt, qui magis magisque una cum Græciæ opibus adaucti, ingentia doctrinarum flumina certis finibus distincta celeriter constituerunt. Hinc enim Juris & æqui scientia propagata est; hinc illa, quæ de Deo rebusque divinis differeret, Theologia; hinc Physicæ & Mathematicæ disciplinæ, quæ naturam latentisque naturæ causas subtiliter investigando patefacerent. In quo sane Poetarum sapientiam & æquitatem recognoscimus, sed adversæ fortunæ conjunctam. Cum enim ultro rerum naturalium scholas abdicassent, quod viderent, in singulis partibus jam præter modum amplificatis totam hominis industriam desiderari; novæque litteratorum classi, qui se vel Sophos, vel Philosophos dicerent, provinciam hanc tam amplam ac nobilem liberaliter concessissent; homines isti a Poetis, ut ita dicam, geniti, in parentes arma verterunt; quamque illi sibi reservaverant officii explicandi potestatem, eam ipsam compilare conati sunt. Sed quo successu jam habete. Prodierunt novi isti morum magistri, ut eorum est institutum, obsoleto nigroque pallio, obstipo capite, ore inculto atque horrido, barbati, capillati, superciliosi, hominum potius terricula-menta, quam homines: cum autem se tamquam cælo demissos ad hominum licentiam coercendam magnifice jactassent, tum dogmata fundere cœperunt, quæ cum illo vultu atque habitu convenirent; peccata omnia esse æqualia; de re nulla dolendum, de nulla lætandum; vo-
lupta-

luptatem omnem turpem esse ; paupertatem , morbos , captivitatem non recte haberi inter mala ; jus omne , nisi sit summum , iniquum esse ; nullum amicitiae locum , nullum gratiae , nullum misericordiae tribui debere ; & id genus multa , quæ si communiter persuadere potuissent , jam nullas haberemus civitates , hominesque cum hominibus vivere nequirent . Porro autem quia prava infinita sunt , sibi que minime cohærent , vulgato arcano , bonorum & malorum fines pro libidine philosophantium variari posse , multi se repente familiarum duces constituerunt ; in eo sibi uno convenientes , quasque conjurati , ut per pudenda & ridicula officium omne perverterent . Vix equidem mihi persuadere possum tantam aliquando fuisse hominum patientiam , ne dicam stuporem , ut cum viderent Diogenem cum suis Cynicis nudum ac sordidum ex professo jacere , Aristippum cum Cyrenaicis mollem & unguentis delibutum voluptatibus operam dare , Zenonem Stoicosque ceteros veluti lapides nullo rerum humanarum sensu tangi , Democritum in ridendo occupatissimum , Heraclitum in lacrimando ; hos tamen non solum ferrent , sed & sapientes , & morum quasi canones judicarent . Qui si aliquid probabile in tam ridiculo vitæ genere attulerunt , non tamen Poetas de antiqua possessione detrudere debuerunt , elegantes homines ac politos , qui sua præcepta ad naturam & communem sensum conformare solent , more hominum vivere , & id quod est in unaquaque re bonum , quamvis non sit admirabile , ad imitandum proponere . Et hæc quidem magnæ hujus disciplinæ principia fuerunt , quæ

morum censuram tam prospere suscepit, quam videtis; donec ad Academicos, & Peripateticos ventum est, qui magis aliquanto ad humanitatem accederent, sed tamen Philosophi essent. Nomen hoc tam ferium & grave jam apud omnes fide laborat, quod tota Philosophia litibus & controversiis implicita, cultores suos factionibus addicat, pugnaces faciat, acerbos, acres, redarguendi cupidos, per abstrusa & difficilia admirationem sectantes. Ac si officia disputandi causa discerentur,isque optime moratus esset, qui subtilissime de moribus diceret, non esset ab his discedendum, qui in omnes humanas affectiones acutissime penetrant, multiplicique divisione rerum ac distributione minimas quasque differentias persequuntur: sed cum omnis hujusmodi disputatio ad actionem referri debeat, non video, tam minuta subtilitas quid valeat ad hominum animos permovendos; aut quomodo tandem plus valeat, quam Poetica oratio, rebus confecta de medio sumptis, lucida, suavis, ornata, per numeros, per imagines, per figuras, non in aures solum, sed in omnes pæne sensus contorta & vibrata. Nisi quis forte putet monogrammos, qui rem nudis lineis repræsentant, magis movere oculos, atque allicere, quam picturas perfecte coloratas, umbrisque ac luminibus distinctas. Equidem non diffiteor, ut in monogrammis partium varietatem, numerum, ac positionem, ita in Philosophicis libris omnes officii partes, & partis cujusque membra clare distincteque apparere; at in hac tanta luce rerum etiam minimarum friget animus, & in sermone tam bono vir bonus desideratur. Neque
vero

vero magna doctrina opus est, ut virtutem, ejusque pulchritudinem cognoscamus; quod cum secundum naturam sit; suo se lumine prodit, & in cuiusque oculos incurrit: atque in eo potius præipientis industria versari debet, ut per omnia artificiosæ dictionis instrumenta naturam revocet ad prava conversam, & in suæ dignitatis cogitationem adducat. Quod cum Æsopus, Philosophus non indiligens, animadvertisset, abjectis disputationibus, ad apologos animum convertit, initoque cum Poetis foedere, spem omnem formandæ vitæ in rerum communium imaginibus collocavit. Genus hoc fabularum miræ urbanitatis ac virtutis ad persuadendum, non in familiari solum sermone, aut in cantiunculis locum habet, sed etiam in gravissimis deliberationibus; quod multitudinem valde afficiat, trahat, delineat, pertentet, callidoque artificio ducat ad earum rerum assensum, quæ certis ac notis simile sunt. Cedo mihi Philosophum aliquem, cujus scripta simul omnia tantum potuerint, quantum una illa fabella, qua Menenius Agrippa Romanam plebem cum Patribus conciliavit, & in urbem reduxit. Nimium posco: cedo ex his unum, qui non frustra clamet; quem populus libenter ferat; cujus præcepta, quamvis egregia, si cum Æsopeis hisce nostris conferantur, non frigida sint, & audientibus molesta. Agedum enim, si quis a Zenone contendat, aurum habenti nocere, quis patienter audit, quis non Stoicam severitatem accusat? At idipsum si Phædrus per apologum muli a latronibus spoliati eleganter tectèque ingerat, accipitur, probatur. Fac, nimium vindictæ studium Philosophus

lib. 2.
fab. 7.

Id. 1. 4.
fab. 4.

damnet; creditur scilicet umbraticus homo consulere timori suo. At siquid hujusmodi Poeta, velit, equo illo descripto, qui hominem armavit adversus aprum, placet narratiuncula, perpenditur, imbibitur. Non est, cur singula commemorem. Quaecumque litteris consignata sunt de mendacio, de furtis, de fraudibus, de maleficiis, si ex schola Philosophica veniant, aures fatigant; si blanda & eleganti comprehensione verborum per fabulas efferantur, facile subeunt animos, & ubi infederunt, conscientiae stimulos excitant. Si igitur res non ex specie & magnitudine, sed ex usu judicandæ sunt, pluris mehercule Phædri opusculum, quam decem ipsi ad Nicomachum libri, & sexcenta volumina ad eorum interpretationem scripta, non meo quidem, quod video quam leve sit, sed multorum sapientum judicio æstimari debet. Atqui adhuc in limine sumus, nec nisi minimam fabularis industriæ partem, nutriculis ipsis familiarem, adversariorum contentionibus opposuimus. Quid si ad graviores fabulas, quas proprie *μύθους* appellant, orationem ducamus? Quid si Comicas fictiones, si Tragicas, si Epicas in Partes vocemus? Tamen ne impetum morales Philosophi sustinebunt? Verum ego neminem vestrum tam expertem litterarum existimo, ut harum fabularum commoda & utilitates ad civilis prudentiæ usum, & communis vitæ institutionem non sæpe audierit; mihi que potius verendum est, ne inopia dicendi latissimum campum quæsisse videar, in quem *μυθορραγοί* ipsi, Poetarum explanatores, Critici, & Grammatici omnes infinitam prope segetem congefferunt. Itaque non
doce-

docebo, vivendi præcepta figmentis istis involuta latere; sed potius causas exequar, cur ita Poetæ latere voluerint, cum simplex rectusque sermo, a Philosophis tanto post occupatus, ne ipsis quidem deesse posset. Omitto quod ante dixi, non admodum egere homines schola & magistro, ut in quo sit virtus, intelligant, ejusque contrarium; sed figuris potius & imaginibus, per quas moniti, de se ipsi cogitare cogantur, & digna suscipere natura sua. At si docendi tamen sumus, ut aliquo certe modo sumus, nonne qui docet, rationem inire debet, quæ cum maxime impellat, tum vero etiam molestia careat & satietate? Poterat enim vero, poterat Poeta quoque de laboribus ac periculis fortiter adeundis, quemadmodum Philosophus, multa verba facere; at quanto magis mulcet ac movet, cum Herculem nobis monstra superantem ob oculos ponit, & per hæc divinos sibi honores promerentem? Poterat de calamitatibus æquo animo tolerandis illa omnia proferre, quæ Philosophis tam pulchra videntur; at cum Ulysssem & Æneam per magnas ærumnas ad immortalitatem perducit, nonne & eadem canit, & canendo ad æmulationem incendit? Poterat denique de virtutibus omnibus, de amore patriæ, de fide, de justitia, de religione præclaros istos libellos ipse quoque conficere, nisi vidisset, quanto magis per exempla proficeretur. Unum vero neque ille consequi verbis poterat, neque Philosophi, quantumvis se ament, consequentur umquam, ut heroicam virtutem, quæ in summo præstantiæ fastigio, ac pæne supra hominem posita est, suis coloribus ornent, & recte subjiciant imitaturis.

Eth. 1. 1
c. 7.

Eximiam hanc & inusitatam excellentiam, quæ ad Superos proxime accedit, ut exprimeret Aristoteles, ipse quoque ad Poetica simulacra confugit, & Homérico Hectore producto, fidem quaesivit ex fabula. Et vero unum hominem exercitiis resistere, maria & navigationes aperire, populis salutem reddere ac libertatem, condere urbes ac gentes, orbem terrarum a tyrannis liberare, cujus putatis esse facultatis, quam divinæ, quam incredibilis? Quis talia, aut cui differendo persuadeat, quamvis disrumpatur? Aut omnis profecto inanis conatus est, aut unus historiæ fabularis heros ab egregio Poeta descriptus in tam difficili negotio plus valet, quam omnes omnium Philosophorum disputationes de hoc toto virtutis genere, de natura, de partibus, de fine, de sede, de nomine, de adjunctis, de contrariis: quæ ipsa dum nomino tam macra & spinosa, jam in ore vestro molestiæ signa conspicio. Malebam equidem scholarum tædia præterire, quæ nimis jam multos inimicos habent; sed hæc potissima ratio est, quæ fabulas peperit, veluti quædam blandimenta sanitatis, per quæ salutaria pocula prompte & alacriter sumerentur. Quam porro suave, in theatro sedentem sine ulla animi corporisque contentione, non audire modo quid sit honestum & inhonestum, quid utile & inutile, sed hæc ipsa in illustribus personis varia fortuna jactatis aspicere, eo rerum apparatu, ac verborum genere proposita, quod cum ad monendum plurimum valet, tum etiam ad movendum? Videtis, ut ad hæc omnes ordines libentissime conveniant, ut attente audiant, ut numquam fatigentur, ut vel in lacrimas jucunde

de soluti Tragicos eventus excipiant? Conferte nunc frequentiam istam cum solitudine, quæ circa Philosophos est; & plane intelligetis, utrum præstet per nostras hæc Poeticas blanditias, an per acumina Philosophica mores civitatis castigare. Ægre homines apertum monitorem audiunt; gravia sunt verba illa, *ne dicas, ne facias; debet, non debet; licet, non licet*; & cum vitia aliqua, nullo compellato nomine, reprehenduntur, ille sibi exprobrari putat, cui conveniunt. In scena neque histrioni, neque satyro irascimur. Irascimur autem? Tanto magis favemus, quanto acrius aspergunt; modo amicos, modo sodales, modo nos ipsos in iis moribus recognoscimus, & abditum ulcus ridendo tractari patimur. Ergo tota illa juvenum turba, quam, aperto Morali ludo, Aristoteles exclusit, habet ex hac officina unde sanetur; hinc nemo repellitur; nulla ætas, nullus ordo, nulla conditio Poetæ gravis est; omnibus animi perturbationibus, iræ, libidini, invidiæ, cupiditati medicamenta hæc adhiberi possunt. Huc etiam viri Principes invitandi sunt, quibus nullum monitum nisi callido artificio, & per ambages ingeri potest: quod tamen non ad reprehensionem referri velim, sed ad ipsam principatus naturam, quæ tueri majestatem quacumque ratione, modo honesta, debet; & privatorum in se arbitria cavere. Ad hos scilicet Philosophus accedat de jure & injuria disputaturus; his, si quis animus, edicat, ne tantum sibi licere putent, quantum possint; hos doceat aliud regem esse, aliud dominum; illum in primis parere legibus debere, cui le-

Eth. 1, 1.
c. 4.

gum cura commissa est; nemine peccare gravius, quam cujus exemplum transit ad alios. Amertem esse oportet, qui tantum audeat; præsertim proposito ante oculos Seneca, qui si tantum fa-
puisset, quantum profitebatur, non dicam tan-
tas opes non collegisset, in quo a multis est
accusatus, sed & opes quascumque habuisset, &
quæsitam in habendo paupertatis laudem, & to-
tam illam, qualiscumque esset, Philosophiam
procul a Nerone venditasset. Id tamen, quod
Philosophus sine offensione, atque adeo sine vitæ
discrimine facere nequit; per suas fabulas Poeta
facit, ita Principibus fere omnibus gratus, ita
acceptus, ita aliquando etiam necessarius, ut jam
inter aulæ instrumenta censeatur. Hic unus mo-
nere potest imperantem sibi, ancipitem fortunam,
foedusque tyrannorum exitus adumbrando; hæc
una reliqua est virtuti via, qua se per Poetica
involucra non quærentibus insinuet, & in illo
etiam fastigio aliquando consistat. Quo in loco
id velim tantisper cogitetis, quam angustis
regionibus Philosophorum diligentia contineat-
tur, quæ primum ultra privatos non progredi-
datur; deinde hos ipsos, si adolescentiæ cupi-
ditatibus irretiti curatione indigeant, tamquam
sibi minus idoneos alio dimittit. Ergo nihil re-
stat aliud, nisi ut tota hæc gravissima discipli-
na, quæ ad mores formandos spectare deberet,
ingenio & disputationibus serviat, consuetudinem
sequuta reliquæ Philosophiæ, quæ mentes con-
templando conterit, & in se ipsa quodammodo
vertitur. Quare nihil mirum, si tota est in
argutiis, nec jam laborat, ut optima edat, sed
ut *παράδοξα*; & quæ minime probentur in vul-
gus.

gus: *Sapientiam bonum esse, sapere bonum non esse; inter magistratum & repulsam interesse nihil; bona esse paria; mortem a vita non differre; virtutes esse animalia; & multa similia istis.* Sen. ep. 61. 113. 117. Tunc igitur, bone Seneca, hæc scriberes, si vitiis sanandis non ex Stoica superbia, sed ex animi sententia operam navares? Tu hisce lusionibus felicitatem inesse putas, summum illud humani generis negotium; nostroque Homero tamquam nugatori dicam impingis? At is per suas fabulas, si recte intelligeres, aut quod intelligis, sine invidia fateri velles,

----*quid sit pulchrum, quid turpe, quid utile, quid non,* Hor. 1b. ep. 2.
Plenius ac melius Chrysippo, & Crantore dicit.

Nolite, quæso, mihi succensere, Auditores, quod de summo viro, & ut illa tempora ferebant, etiam probo, libere dicam. Concoquere enim nullo modo possum, quæ ille in Homerum sive Poetam, sive Philosophum, certe sapientissimum, ep. 88. atque adeo sapientiæ parentem, audacter scribit, ubi ad ludificandum aggressus more suo, cuncta liberalia studia contemnit, & numerat in super- ep. 76. vacuis. Hæc si in illa Metronactis schola jactabantur, injuria profecto populum Romanum accusat epistola septuagesima sexta, quod ad pithaullem & tibicinem libentius iret. Quamquam ut nihil diffimulem ex veritate & fide loci hujus, De Reg. 1. 3. ipse quoque Plato ab ea republica, quam sibi animo ac perfectissimam formam effinxerat, Homerum, Poetasque ceteros, qui omnia promiscue imitarentur, abesse jussit; quod nobis adversarii tamquam ex judicato objicere solent. Grave est hoc, Auditores, non tam ipsum per se, quippe a Philosopho, quam fama & auctoritate Platonis,
 cujus

Cic. in
Bint c.
51.

cujus judicio vel in sua caussa multum deferre pro nostra æquitate volumus. Alios igitur sibi Heraclides Ponticus subscriptores adjungat, cum divinum hunc Philosophum, tamquam Ομήρου συκοφάντην, calumniæ postulat. Nos quandoquidem reputamus, Platonem Homeri studiosissimum fuisse; imo Poetas omnes tanto studio, seu potius veneratione coluisse, ut Deorum filios appellaret, & ipsi quoque Antimacho Clario, inepto ac verboso verificatori, unus ex omni Atheniensi populo aures præberet; quandoquidem, inquam, hoc reputamus, aliud quiddam illum spectasse credimus, quam quod vulgo existimatur, cum has delicias suas ab ea civitate removit, quæ nulla esset; aut si esse posset, heroum magis, quam hominum congregatio dici deberet. Pistores etiam mehercule & cupediarios exclusisset, si cives suos, quemadmodum sine vitiis & multarum voluptatum usu, ita sine cibis vivere posse existimasset. At enim ne Epicurus quidem Poetas probavit. Videlicet intemperantiæ patronus. Parcat vitiis necesse est, qui istius hominis benevolentiam captat. Ego vero non miror, Poetica studia alicui Philosopho displicere; sed ob eam displicere causam, quæ solet afferri, quod obscena multa a Poetis scripta sint, id valde miror; quasi vero quod multa herbarum ac frugum genera valetudinem lædant, herbas frugesque omnes odisse oporteat. Ac primum si negem, qui ita scribunt, esse Poetas, non injuria facere videar, sed ex ipso antiquitatis judicio, quæ cum Musas huic studio præfecerit, satis superque ostendit, quam esset hoc nomine indignus, qui puellas honestissimas turpi lenocinio contaminaret: deinde si dicam, artibus omni-

omnibus ad salutem inventis commune infortunium esse, ut improborum scelere ad perniciem convertantur, dicam id, quod & notissimum est, & vel in summa Poetarum nequitia Poesim tamen ab omni reprehensione liberare debeat. Quod si quidquam eorum querelæ valerent, qui tam male animati in Poetica sunt, quodnam de D. Basilio iudicium ferendum esset, qui Græcorum Poetarum lectionem adolescentibus commendat, multasque ad virtutem opportunitates apud Homerum, apud Theognidem, apud Hesiodum, apud Prodicum Chium eloquentissima oratione demonstrat? quodnam de ipso D. Paulo, qui cum ex Arato, ex Mænanandro, ex Epimenide aliqua referat, perspicue significat, in hoc litterarum genus quo animo fuerit. Esto, jure queruntur: Poetas ablegemus, totamque arenam Philosophi teneant, si ita demum salva res est. Quid? Utrum nos ignorare putant, quid doceat Epicurus, totusque ille voluptarius grex? an ita bonos esse, ut Calliphoni, & Dinomacho credamus, qui Epicuream voluptatem cum honestate copularunt, *tamquam cum homine pecudem*, ut Tullianis verbis utar? Hi nempe nobis Poetarum nomina recitant, qui a modestia desciverunt. At ego illis non unum aut alterum Philosophum, sed Sectas objiciam, Hegesiacos, Theodorios, Annicerios, & quos modo dixi, Epicureos, qui facto agmine virtutem oppugnant; nec ut Poetæ in conviviis & ludis genio indulgentes licentius canunt, sed in locis ad docendum gravissimis serio & ex instituto turpitudinis illecebras, & indignas homine voluptates commendant, inculcant, ratas faciunt. Adde his & qui contra verecundiam dis-

Orat.
τὸς νέος
πρὸς

Cic. 3.
Off c. 33

putant; & qui fraudes tuentur, & qui utile ab honesto sejungunt, & qui privata commoda anteponunt publicis, & qui Deorum timore sublato, cetera concedunt sine discrimine. Quæ ego vitia hominum non commemoro, quod in facultatem innocentissimam redundare putem; sed ut hac in parte si vincere non possumus, ex æquo pugnemus; nec magis Poetarum licentia Poesi noceat, quam Philosophorum imprudentia Philosophiæ. Est utrobique, si verum quærimus, quod caveri debeat: neque Philosophorum amatores Philosophica omnia sine delectu probent; & nos Poetis nostris sæpe illud commemoremus, quod est apud Aristophanem in Ranis a. 4. sc. 2.

..... ἀποκρύπτειν χρὴ τὸ πονηρὸν τόν γε Ποιητήν,
Καὶ μὴ παράγειν, μηδὲ διδάσκειν. τοῖς μοι γὰρ
παιδαίεουσιν

Ἐγὼ διδάσκαλος, ὅστις φράζει, τοῖς δ' ἡβῶσιν γε
Ποιητά.

.... quæ mala sunt, abscondere Poeta debet,
Non producere, neque docere. Nam puerorum
quidem

Magister est dicendi peritus, adultorum autem
Poetæ.

Sed jam amotis criminationibus, in viam redeamus, ut pauca quædam extremo loco de Poeticis numeris habeatis, quandoquidem in fabulæ commodis fatis, ut opinor, versati sumus. Altera igitur pars, & nescio etiam an prima, quæ Poësim constituit, carmen est, a quo res subjectæ tantum virium & virtutis accipiunt, ut se in animos facile infinuent, firmiter adhæreant, motusque illos vehementissime excitent, quarum gratia sunt comparatæ. Quod cum totum quan-
tum

tum est, explicari non possit, majus etiam aliquid ac mirabilius, quam veritas patiatur, huic arti tribui solet, ut & feras mitigare dicatur, & morari flumina, & silvas lapidesque commovere. Quare ut Poeta nihilo plus rerum, quam Philosophus, ad vitæ præcepta conferat, quantum tamen in eo putatis esse momenti, quod salter soluta ac simplici, alter ligata & numerosa oratione utitur? Huc illud pertinet, opinor, quod Pythagoras scripsit, plus posse tibicines ad mores corrigendos, quam Philosophos. Certe nisi quid excellens ac divinum ad mentes impellendas in Poetico sono numeroque esset, neque Archilochus Lyncambem ad suspendium adigere per jambos potuisset; neque Tyrtæi versibus fuisset inacie locus; neque Solon, aut Terpander suas leges carminibus conclusissent. Nunc si quis officia & vitæ communis rationem numeris adstringere possit, morbisque animi tam valida remedia adhibere, hunc tamen Philosophus extrudet; suisque commentationibus, ad differendum, seu potius ad rixandum comparatis, subsellia franget? Sed urget indictus mihi orationis modus. Jam ex veteri Quiritium more, unde initio constituendæ causæ formulas duximus, ite in consilium, Viri sapientissimi, & quod bonum, faustum, felix, fortunatumque sit, suam legitimis dominis possessionem fraude interceptam restitui jubete. Tu vero, Corneli Eminentissime, huic judicio moderando præpositus, cum plurimum legibus, quemadmodum semper soles, tum aliquid etiam benevolentiae tribue: siquidem & Romani Cornelii, suæ gentis principes, Ennio, Lucilio, Terentio familiarissime usi, hac se Poetarum amicitia vel

in

in primis nobilitarunt. Nihil tibi a Philosophis polliceri potes, in suas contemplationes abditis, nullique viventibus; Poetæ cum singulorum officia juvant, tum publicam gloriam, & magnorum virorum gesta ad immortalitatem propagant. Quamquam nihil te magis in præsentî movere potest, aut debet, quam si tibi persuadeas, vera esse, quæ dixi; tuamque istam Juventutem, de cujus institutione majorem in modum sollicitus es, ad virtutem & optimos mores per Poetica studia fingi posse: qua de re si testimonium quoque flagitas, Horatianum producam, eoque vel apud Philosophos longe gravissimo finem dicendi faciam.

*Os tenerum pueri balbumque Poeta figurat,
Torquet ab obscenis jam nunc sermonibus au-*
rem;

*Mox etiam pectus præceptis format amicis,
Asperitatis, & invidiæ corrector, & iræ:
Horat. l. 2. epist. 2.*

EPISTOLA

AD LECTOREM

Præposita editioni primæ hujus Orationis.

Quo die Orationem hanc habere debebam, studiisque nostris ex more atque instituto prælude-
re, accidit, ut abesset hujus Seminarii *Auspex E-*
minentissimus gravissima illa de caussa, quæ totius
Christiani Orbis Cardinales Romam concivit. Itaque
supersedi, maluique carere voluptate illa, quæ mi-
bi quidem mortalium omnium maxima est, publice
dicendi, quam dicere inauspicato. Ne tamen videar
ignavia potius, quam ratione fecisse, ut publico ju-
dicio abstinerem, hoc quidquid est, in lucem edo ;
in quo etiam superiorum annorum consuetudinem se-
quor, sed mehercule parum fidenter. Nam antea
eum vulgarem, quæ recitaveram, videbar quodam-
modo mihi tenere judicia hominum, eosque sponsores
habere, qui mihi aures non gravate præbuis-
sent ; nunc me totum fortunæ committo, plane incertus
quo casura res sit. Neque enim, ut audientium,
ita legentium ora vultusque notare licet, ubi caput
avertant, ubi oscitent, ubi lacunar spectent, ubi
proximum de hora interrogent ; ne quid postea
librario tradatur, quod fatigarit, aut offenderit.
Hoc anno jacta est alea : ferendum quidquid e-
venerit. Quamquam ego, ut verum fatear, ex re-
citatione magis speravi fructum aliquem, quam per-
ceperim ; quod fere nugarum tadia brevitate com-
pensem, habeamque auditores vel ad ea, quæ mi-
nus probant, attentos. Quod igitur dictioni audien-
tiam

tiam facere consuevit, idem, ut spero, benevolentiam scriptioni conciliabit; breuitas videlicet, in qua ego mihi maxime placeo, quæ me in primis, measque lucubrationes ornare solet, quam ego unus si defero, jam quomodo consistat in huiusmodi exercitationibus, omnino non habet. Nam plerique omnes, quos identidem audio, disertissimi cum sint, temperare sibi nequeunt; ego vel si velim multa dicere, tamen inopia ingenii intra cuticulam cohibear. Sed altera jam pagella procedit; modumque in epistola pæne præterii, quem tibi in Oratione polliceor. Hactenus satis. Vale.

ORATIO X.

AD MATHEMATICAM.

*Adversus eos, qui nimis paucis Mathematica studia
concedunt; tum adversus eos, qui
nimis multis.*

Q UOD opus decem abhinc annis jussu & auspicio tuo, Princeps Em. ex hoc illustri atque edito loco solemnibus verbis institui, tandem aliquando exædifico; Deoque opt. max. grates ago, quod mihi homini valetudinis parum firmæ, ingenii vero infirmissimi, tantum virium vitæque tribuerit, ut cûrsûm hunc, quem ne ipse quidem, cum auspicarer, totumque prospicerem animo, conficere me posse sperabam, tamen confecerim; & ad Mathematicam facultatem, quæ orbem claudit ceterarum, non sine aliqua certe felicitate, quantum ex hujus lectissimæ coronæ benevolentia conjicio, nunc demum pervenerim. Verum quod in magnis operibus fere accidit, ut ultima quæque difficillima sint, aut fessis jam viribus difficillima videantur, hic me postremus quasi actus vehementer terret, graviore quadam, ut sentio, persona imposita, novæque objecta non laboris modo, sed etiam difficultatis ac periculi specie. Nam de aliis quidem cum dicerem facultatibus, id unum requiri videbam, ut quæ cujusque tradendæ ratio mihi maxime probaretur, ex animi sententia declararem; nunc ipsa rei possessio in controversiam vocatur; nec jam ostendere oportet, cujûsmodi sit Mathematica.

matica scientia, aut quomodo comparetur, sed quem deceat, quemve dedeceat. Scilicet non defunt asperi homines ac difficiles, qui eam nobis invideant; & cum ipsi inter se de toto hoc genere sermones conferant minime æquos, tum nos quoque ipsos, ut sibi videntur arguti, aliquando interrogent, ecquid juventutem in spem Ecclesiæ nobis concreditam, in angulis ac triangulis dimetiendis inaniter occupemus. His ego animis tam parcis & angustis, ut magnam partem generis humani, eandemque studiosissimam ad Euclidem & Archimedem accedere nolint, aliud quoddam genus hominum opponere consuevi, qui neminem doctum virum existimant, cuiuscumque sit ordinis, si doctrinis careat Mathematicis. Cum enim utrique abeant ad extrema, ipsi se mutuo conficiunt. Sed jam ego quoque manus conferere tamquam in iudicio constituo, nec solum priores illos propellere, qui nos aggrediuntur, sed hos quoque laceffere, quorum opinionem utilem quidem nostris rationibus ad tempus duxi, universe autem nunquam probabilem. Quod ut ratione & ordine faciam, duplex mihi via non diversa modo, sed etiam adversa ineunda est, quarum prima veluti defensione constet, altera accusatione. Defendam operam & industriam nostram, quæ in Mathematicis disciplinis impenditur; accusabo labores eorum nimis, ut ita dicam, ambitiosos, qui has ipsas disciplinas in aliarum fines inducunt, infinitaque contentione suscepta, quæ Dii Deæque separarunt, communi vinculoungere & copulare conantur. Ac defendendi quidem propositum siue sit necessarium, siue super-
vacuum,

vacuum, quod nolo in præfenti quærere, a nemine reprehendi potest; illud vero accusandi cum re ipsa, tum nomine odiosum ita moderabor, ut omnes intelligant, non me levitate aut perturbatione aliqua ductum, sed studio veritatis ac justitiæ, suis finibus Mathematicam terminare, quos dum tenebit, in maximo ubique honore erit; ubi egredi incipiat, multas in se gravesque offensiones concitabit. Id vero quemadmodum se habeat, non ausim mehercule in hac luce exponere, nisi vestræ sapientiæ multis mihi rebus perspectæ magnopere considerem; qua me una tamquam scuto adversus invidiam tuebor, si quis forte tam cæcus atque audax obtrektor erit, ut cum audierit, quo ego sim in Artem plane nostram animo, quam benevolo, quam studioso, quam illius amplificandæ cupido, mihi tamen crimini tribuat, quod omnem litterarum provinciam per fas nefasve occupatam Mathematico non condonem. Nemo profecto est, qui possit de re ulla publice dicere sine periculo: at me præter ceteros timere oportet, qui, quod sentio, non circuitione & anfractu tegere, non ad gratiam & voluntatem audientium temperare possum, sed cujusquemodi est, ex officio & gravitate personæ, quam hoc loco sustineo, perinde proferre debeo, ac si aram tenerem. Atque hæc valere semper: illud vero hujus anni proprium ac peculiare est, quod peregrinus atque hospes in difficillimam regionem venio; nec ducere argumenta nisi ex universo genere possum, & ex communi quadam ratione, in quam litteræ omnes ac disciplinæ conveniunt. In his difficultatibus atque angustiis siquid efficere tamen

potero, plane intelligetis, neque nobis Ecclesiasticam vitæ rationem ingressis omittenda esse Mathematica studia, neque ulli ultra modum & rerum naturam promovenda.

Qui in hanc facultatem alieno sunt animo, apertaſque gerunt inimicitias, nihil sane afferunt valde firmum, ſed tamen ita multa dicunt, ut ſi reſpondere ſingulis velim, in re non tam difficili, quam longa & moleſta nullo litterarum bono tempus teram. At eſt callidum quoddam & inſidioſum genus hominum, quod ut cognoſcam, Auditores, indigeo ſapientia veſtra; ut reſellam, auctoritate & auxilio. Soleo enim pro munere hoc meo, quod neque ego tanta aſſiduitate ac vigilantia obirem, neque ullus obibit pro hac rerum temporumque conditione, qui non ſe divinitus vocatum exiſtimet, Deumque unum, contemptis mortalium conſiliis, in omni actione & procuratione ſibi proponat; ſoleo, inquam, diligenter omnia circumſpicere; neque amicos ſolum, ſed inimicos etiam, ſiqui ſunt, audire, ut quantum fieri per me poteſt, ſtudia noſtra perficiam, & ab omni reprehentione liberem. Sunt igitur quidam ad litteras juvandas voce atque ore præclare compoſiti, qui Mathematicæ dignitatem multis verbis extollunt, ſed uſum ajunt non videri Clericis convenire. Quid hoc ſit, non ſatis explicant; ſed ita tamen multa turbant, ut eos appareat profanum aliquid hoc nomine deſignare, quod in militari Architeſtura, aut in vana divinandi arte poſitum ſit. Quid dicam, Auditores? quid ſuſpicer? Eoſne malitioſe facere, ut inde alios abſterreant, quo ipſi accedere non potuerunt? At illi certe non ſunt ita vaſtri:
quam-

quamvis non negem, esse aliquos, ubicumque tandem sint (nam & Momo debet esse locus) qui pulcherrima quæquæ studia ob id unum carere audent, quod se ab illis exclusos videant. Cum his nobis nulla res est, qui toti sunt a mendacio, quorum vita fallaciis constat, quibus si quis unus fidem habeat, is ipse fabula fiat. Ergo illud est reliquum, ut qui nos a Mathematica revocant, non satis advertant, quam multa hoc nomen complectatur, quæ cum hoc nostro vitæ instituto consentiunt optime. Age enim, quid est in Physica scientia, nisi forte hanc quoque nobis denegant; quid est, inquam, in Physica scientia tam Philosophi privatum ac proprium, ut non magnam illius partem Mathematicus vindicet? Ratione quidem atque ordine contemplandi inter se differunt, rebus non differunt, nisi perpauca: Quidquid numero, aut figura aliqua constat, quidquid sono judicatur, quidquid luce distinguitur, quidquid aliquo mensuræ genere comprehendere potest in toto terrarum orbe, non tam Philosophici, quam Mathematici juris est. Atque hæc ante pedes. Quid *μετέωρα*, quid astra, quid planetæ, quid cælorum orbes? An hæc ignorare Philosophus potest, aut sine Mathematico studio scire? Ego vero ne satis quidem puto ad philosophandi præstantiam hæc studia conjungere; præcedant Mathematica necesse est, quæ animum a sensibus excitent, & ad intelligendi celeritatem exacuant: siquid modo vidisse Pythagoram credimus, qui nullum auditorem in sua illa Philosophica adyta admittebat, nisi prius Geometricam, *Gell. 1.* Gnomonicam, Musicam, Astronomiam didicisset, *c. 9.* Hunc secutus est Plato, qui Mathematicam id-

De Rep.
l. 7.

Eth. l. 6.
c. 8.

circo *προπαιδείαν* vocat. Platoni accesserunt Xenocrates, & Speusippus, qui eisdem legibus Academiam post ipsum tenuerunt; tum ipse quoque Aristoteles, qui certe a Magistris sententia discessisset, si ullo modo adolescentem his auxiliis destitutum fieri posse Philosophum existimasset. Itaque homines isti divino ingenio præditi, non Philosophorum modo principes, sed Philosophiæ parentes, ea scripta reliquerunt de Physicis rebus, quæ ne legi quidem, nisi a Mathematico, possent. Aut igitur nobis tota interdicatorum Physica provincia; aut concedatur, ut in eam tamquam cives & habitatores, non ut servi furesve, ingrediamur. Physica porro commemoro, non quod Logica & Metaphysica Mathematicis commodis careant, non quod Ethica ipsa alicubi non indigeant, non quod facultates reliquæ vim suam omnem ac dignitatem sine illis obtinere possint; sed quia nihil afferre constitui, quod subtiliter excogitatum videatur magis ad ingenium, siquod sit in nobis, quam ad veritatem ostendendam. At enim Philosophi sunt, & valde etiam, si Diis placet, beati, qui ne ipsum quidem quid significet Mathematicæ nomen, didicerunt. Esto: non tam bene cum litteris agitur, ut sapere non videantur, nisi qui sapiunt. Adhuc tamen est, quod nobis ætatiq; nostræ gratulemur. Nam per sæcula ante Galilæum bene multa unum illud Philosophicum studium privatas scholas publicasque tenuit, quo isti boni viri videntur esse contenti. Habete autem, quale fuerit. Sæctæ hostili odio invicem infestæ; ingenia certis hominibus sacramento addicta; impotens atque infinita pugnandi libido; nova
re

rebus nomina indita ad lites alendas ex compacto institutas ; fallaces & captiosæ interrogationes ; certæ quædam solemnesque formulæ, quibus nihil subesset nisi strepitus ; subtiles & acutæ speculationes de iis, quæ numquam fuissent, aut vero esse possent ; perpetuæ & ad ravim usque productæ inani labore disputationes ; omnia prius quæsitæ, quam veritas & natura. Videtis familias Gladiatorias ; nolo enim Scholasticas dicere, quod nomen est, aut esse debet honestissimi ordinis : at hæ tamen ipsæ, silentibus Mathematicis, famam occuparunt Philosophiæ. Cum caput Mathematica extulit, suasque vires Physicæ adjunxit, tum veluti renovato orbe, magni illi extitere naturæ interpretes cum omni antiquitate comparandi, Galilæus, Cartesius, Gassendus, Borellus, Hugenus, Leibnitius, Neutonus, Wolfius ; & qui horum secuti vestigia, Philosophare vera sunt, & habentur. Quis igitur nobis tamen erit insensus, ut inventis frugibus, rursus ad glandes mittat ? Ergo si tempus & industriam vanis contentionibus impendamus, simul Physici, simul Clerici nomen præclare tuebimur ; si naturam serio scrutemur, saltabimus extra chorum ? voces & nomina persequi licebit, res non licebit ? pro sectæ studio disrumpi gloriosum erit, pro studio veritatis indecorum philosophari ? Nihilo plus dico, quam quilibet unus ex imis litterarum subselliis cognoscere possit ; modo non ignoret, quam viam & rationem Philosophi teneant, ex quo iidem Mathematici esse cœperunt, suisque speculationibus sensuum testimonia & mechanicam operam adjecerunt. Atqui ego nimis exiguam laudem Mathematicis studiis tribuo, si nobis hætenus re-

finenda statuo, ut Physicis opem ferant: stant ipsa merito suo, eoque in primis magno atque admirabili, quod nullum vitæ statum, nullumque ingenium respuunt. Si enim is non inditus arte, sed animis innatus scientiæ amor, quo cuncti exardescimus, honestissimus est, locisque omnibus ac temporibus aptus; quid est, quod Clericus ignorare illa debeat, quæ cum maxime ad discendum referantur, præstabile hoc disciplinæ genus constituerunt, non a rebus ipsis, quas comprehenderet, sed ἀπὸ τῆς μαθήσεως, hoc est a discendo, nuncupatæ? Pœniteret me profecto conditionis hujus, si mihi naturam adimeret, qua impellor ad sciendum; aut si cum multa ad ingenium exercendum concedat, sive probabilia, sive ambigua, hoc tamen intercluderet, quod unum propemodum cadit in scientiam. Habeant sibi Peripatetici contentiones suas, habeant Academici, Stoici, Epicurei; volumina voluminibus opponant, factiones factionibus, ætates ætatibus; omnia sollicitent, turbent, misceant; ut non solum sempiternis laboribus nihil sciant; sed illud etiam dubium faciant, utrum sciri possit aliquid. Mathematica sane una ab incertis cura separatur; ubicumque sit veritas, eo accedit; non de tempore, non de loco, non de secta laborat; libera, soluta, expedita, uti est quidque, seu album, seu nigrum, sine ambage demonstrat. Hanc nobis qui auferunt, si nullum præterea litterarum genus relinquunt, parum abest, quin pecudes faciant; sin autem & Poetica, & Critica, & Dialectica, & Philosophica omnia liberaliter condonant, quid est quod illa excipiant, quæ ad doctrinam & eruditionem omnium certissima atque

exploratissima sunt? Nisi forte, ut initio significavi, quod multæ Mathematicæ partes sint, aliquæ vero etiam hominum vitio corruptæ, unius aut alterius invidiam ad universas traducunt. Ita siquidem fit in rebus omnibus, ut cuiusque laus ac reprehensio sumatur ex proximo. In quo ego tam communi malo nihil nobis præsertim dolendum puto: tantum dico, siqua sunt in Mathematicis, quæ cum hoc nostro instituto non apte cohæreant, ea, iudicio & temperatione adhibita, secerni posse, &, quatenus expediat, conciliari. Si me a militari Architectura abstinere volueris, parebo lubens; si a civili quoque, honeste resistam: si Musicam extorquebis, nobilissimam illius partem mihi reservabo, mollem ac theatralem sponte remittam: si Arithmeticam interdices, Pythagoricam retinere conabor, sed illam illiteratissimam ultro abjiciam; quæ tamen (pro mores!) fortunatissima est, ridetque Theologiam nostram: si me divinatricem Astrologiam ejurare jubebis, ejurabo non invitus, quam nemo umquam coluit nisi stultus, vel ut stultos deciperet; at interim non desinam de corporibus cælestibus quærere, quid sint, ubi sint, quid efficiant, quomodo moveantur, quando concurrant; quod genus Astronomiam vocant, nulli magis propriam, quam qui mente atque animo assurgere supra ceteros debet, ea contemplando, in quibus, vel ipso Tullio teste, divinæ virtutis ratio maxime apparet atque exstat. Tantus hic amplissimæ disciplinæ modus, tantopere castigatus ac sanus, video tamen quibus non probetur, quorum haberi fortasse ratio non deberet: sed quandoquidem in animum indu-

duxi, ut omnibus per nos satisfaceret, id ab illis peto, ut quam opinionem animo comprehenderunt, si ego illam hodie ratione labefactabo, tandem aliquando in hoc loco confessuque vestro deponant. Quodnam igitur est horum hominum de studiis nostris iudicium? Quale scilicet rudi ævo illorum fuit, qui antiquissima Græcarum Latinarumque litterarum monumenta undique conquisita, tamquam impura & execranda, devovebant; veriti, ne se a divinarum rerum cogitatione averterent, aut etiam contagione aliqua religionis ejus, unde essent profecta, contaminarent. Quantum tempestate illa jacturam fecerimus, nihil attinet commemorare. Nunc id agitur, ut cognoscatis, unde isti præclari monitores exierint, qui omnia perhorrescunt, quæ ad sacrarum rerum intelligentiam, aut morum compositionem aliquo modo non referantur. Hos enim nobis fines præstituunt, a quibus Mathematicos judicant abesse longissime. At non hercle ita judicabat Origenes, qui, ut est apud Eusebium, quos maxime idoneos ad sacra studia crederet, eos in Geometricis & Arithmeticis mature exercebat; ut tamquam præsidio aliquo eorum ingenia muniret, sine quo multi defecissent. Verum non accipiunt Origenis testimonium; credo quod erraverit in rebus maximis; at in hoc certe sapuit, in quo subscriptores approbatoresque habuit sine controversia sapientissimos, Hieronymum, & Augustinum, qui in sacrorum librorum interpretatione numerorum ac siderum scientiam, tamquam ad multa necessariam adsciscunt. Sed quid opus est testibus, ubi ratio non deest? Mitto, quantum momenti habeant Geometrici atque Arithmetici calculi in disputa-

tio-

tionibus de Arca Noe, de Babelica turri, de Salomonis templo, de Holocaustorum altari: mitto, quam sibi partem vindicet Astronomia in controversiis longe maximis de Hebræorum annis Solaribus, & Lunaribus; de computo Diluviali, de principis Planetæ motu vel inhibito, vel revocato; de variis denique modis, quibus hæc explicant Ptolemaici, Copernicani, & qui Gigantum more cum Superis bella gerunt, Spinofistæ: mitto etiam, quæ novi Testamenti studiosos exercere solent, Eclipsis Christi mortem consecuta, Magorum stella, cærimonix ad Lunæ tempora ordinatæ, omnisque calendarum ratio, quam Ecclesiæ Proceres, non adhibitis in consilium Mathematicis, numquam constituissent: hæc, inquam, mitto omnia, non quod exigua sint, sed quia nimis nota, multisque usurpata. Unum illud in præsentis vestris judiciis subjicio, de quo nescio an multi cogitent, sed mihi tamen gravissimum est: siquis Mathematicus pro ea, quæ nunc gliscit in dies magis, hujus facultatis propagandæ cupiditate fortasse nimia, ut mox ostendam; siquis, inquam, tantum sibi sumat, ut sacrorum mysteriorum veritatem Geometricis momentis expendere velit, huncne feremus arma tractare nobis ignota; nec solum Ecclesiasticam pœnam, ubi jus lædat Religionis, sed etiam judicium effugere? Non hic vanus metus est. Vidi ego, qui tamen in alio pulvere verfor, lepidulum libellum, cui titulus, *Theologiæ Christianæ principia Mathematica*; quibus callidissimus auctor Joannes Craigius cælestis doctrinæ fidem non tam ex divino testimonio, quam ex rerum humanarum conditione metitur, & utriusque Testamen-

ti au-

ti auctoritatem specie confirmantis infirmat. An ne hæc sua quadam lingua & notis arcanis scripta Theologi nostri ita ignorabunt, ut ne legere quidem valeant? Nihil ne juvabit, cum ejusmodi bella ingruent, esse ex hoc ordine, qui resistere possit? Non id ab omnibus requiro: atesse tamen aliquos singulis ætatibus necesse est, qui communem causam quoquo modo petitam, ubi res postulet, æquis armis defendant. Non deerunt exempla, quæ sequantur, Riccius, de Cusa, Caramuel, Cavalerius, Ricciolius, Petavius, Tacquetus, Mersennus, Villalpandus, & præterea multi pietatis ac doctrinæ fama nobiles, qui cum se sacramento obligatos Ecclesiæ dedissent, non ideo tamen existimarunt, Mathematicam palæstram sibi esse præclusam. Sive autem operam suam Religioni navarunt, sive navandi defuit occasio, nemo certe repertus est, qui non eos magnopere admiraretur, summisque honoribus dignos censeret. Numquid habent, quod istis objiciant, qui nos ab eorum imitatione deterrent? Nam quod a Seneca sumunt, nihil Mathematicis doctrinis inesse frugis; quod a Polyæno, & Aristippo, nihil veritatis; cum tam sit aperte falsum, miror equidem, cur Stoica & Sceptica ingenia non agnoscant? De toto hoc genere hominum anno superiore diximus: neque opus est pluribus, in his præsertim angustiis, in quibus alteri quoque parti initio positæ debet esse locus. Jam vero ad illam venio, quam pro modo temporis mihi ad dicendum constitui brevissime absolvam, magis ut rem tantam attigisse videar, quam tractasse. Neque vero mihi in animo est illos arguere, qui cum sibi Mathematicam lau-

dan.

dandam proponunt, eam in omnes artes ac doctrinas, maximas minimasque, nobiles atque ignobiles, tamquam necessariam inducere conantur, ut neque bonus aliptes, neque coquus, neque pistor esse possit, nisi Mathematicos diligenter audierit. Vetus est hæc, communis, protrita laudatorum consuetudo, ut nihil se dixisse putent; nisi omnia rerum genera comprehendant; fidemque hominum, & naturæ modum prætergrediantur. Non deerit alius querelis locus, quæ neque cessabunt umquam, neque proficient. Illa me hoc tempore cura sollicitat, quid tandem in mentem venerit Medicæ artis professoribus, ut sua omnia ad Mathematicam referant; nihil jam loquantur, nisi particularum figuras; fluida, solida, media, quæcumque corpori adhærent, aut corpus constituunt, ex pondere, ex nisu, ex mole, ex numero pensitent; medicamentorum vim & facultatem, bonam malamve corporis habitudinem, ipsum quoque spiritus motum Geometricis notis definiant; tandem illud efficiant, Medicum esse neminem, in quem Euclidis anima non migrarit. Non sum nescius, Hippocratem quoque ad Thessalum filium scripsisse, ut animum ad Geometriam & Arithmeticam converteret, unde esset aliquis in Medicina facienda usus; at nunc ~~eo~~ res adducta est, ut non jam Medicus studia sua Geometricis ornet, sed totus Geometra sit. Illud etiam fateor, morbos plane omnes, eorumque curationes formulis explicari posse ex arte Mechanica ductis, sicui tantum sit otii, ut nihil novi hominum salutem cum afferat, usitata verba mutare velit: verumtamen cum id fecerit, tam certum erit, Medicum iccirco esse Mathe-

Mathematicum oportere, quam certum est, futurorem ac textorem esse Geometram, quod futrina ac textrina Geometricis formis explicari possint. Non vereor, ne nimio plus dicam, quoties reputo, Joannem Fernesium, qui ad Celsum elegantia, doctrina ad Hippocratem proxime accessit, nihil Mathematicum suis scriptis, quibus universam Medicinam complexus est, aspergere voluisse; cum tamen ita ductus natura ipsa, omnes industriæ nervos in Mathesi contenderet; multoque maximam diei partem, & domesticas fortunas in hoc studii genus infunderet. Quid? Huncne admirabili ingenio virum, non suæ modo ætatis, sed omnis ab illa memoriæ Medicum præstantissimum, cum omnes morborum causas & remedia persequeretur, possetque unus, si quis unquam, Mathematicis speculationibus scientissime uti, penitus abstinuisse; nostros vero ne reduriam quidem sine illis curare? Discrimen hoc tantum unde sit, alii viderint: interim accipite, quid cum a nobis urgentur, minus tecti respondeant. Sæculum causantur Methodicis aversum; potentum mores nihil probantium, quod ipsi intelligant; divitum avaritiam, unde abradi pecunia nequeat, nisi per istiusmodi miraculorum ambages. Hactenus sapiunt: pergant, quod bene veritat, in hoc curriculo. Hic addunt, magnam suæ Arti injuriam fieri, si ejus criminis postuletur, quod sibi fortasse aliquam levitatis notam inurit, at in Politicis, in Theologis, in Jurisperitis, quorum jam multi audire Mathematici volunt, capitale est. Ne hic quidem prorsus aberrant a vero. Quas enim præstigias afferat necesse est, qui sibi imperavit movere omnia, quæcumque ingenio

genio possit, ut Theologicas doctrinas, omnemque civilem & Ecclesiasticam gubernandi rationem Mathematicis momentis adstringat? Tituli ipsi horum librorum, de quibus nihil amplius commemoro, offendunt oculos; & in quo se putant gratiam & auctoritatem Mathematicæ conciliare, in eo plane ipso fastidium pariunt & satietatem. Atqui malum malo mederi nequit. Non dico, Medicos tantum aliud agere: utinam quidem soli peccarent; at illi tamen, quod est in primis grave, nostro periculo peccant. Ceterum in libros quoque Philosophorum jam nimis multæ videntur mihi irrepisse Mathematicæ tabulæ; quamvis alioquin non tam ipsæ inter se Philosophiæ partes conjunctæ sint, quam earum quædam, ut paullo ante dixi, cum Mathematica. Sit artibus ac disciplinis inter ipsas conjunctio & societas, sed cujuscumque solet esse fœderatis civitatibus, quarum unaquæque suo jure utitur. Quid in rem quamlibet Mathematicos appellas; quid eorum methodum ad omnem disputationem traducis; quid jura perturbas? Non est ille ad veritatem satis numerorum linearumque apparatus. Neque enim Mathematica demonstrandi ratio tantam sibi fidem & auctoritatem acquisivit quod per lineas & numeros conficiatur; sed quo, principiis fulta certissimis, quæ ex his colligit, ea quoque certa esse necesse est. Linearis & numerica probatio in omnem fere artem, ac disciplinam adduci potest, principia poni Mathematicis æqualia vix alicubi possunt. Quoties igitur in magna illa volumina incidimus, quæ in latentibus causis & naturæ obscuritate versantur, nos quidem nihil moveant Geometricæ figuræ tabel-

Inst. l. i.
c. 10.

bellis inscriptæ elegantissimis, nihil illa Mathematica methodus tantopere jactata, si rebus inædificetur natura labantibus, ut sæpe usuvenit. Haud equidem ausim magnos Auctores nominare, præsertim & supra nos positos, & famæ securos; at videt etamen, quam nihil ferre nimium possim. Ille ipse Artis nostræ magister Quintilianus, Rhetorum oculus ac delicia, cum jubet Oratorem Geometrica percipere, ut ubi necessitas flagitet, de terminis ac mensuris apposite dicat, gestumque digitorum ad computationes accommodet, videtur mihi propemodum sui oblitus ad Sophistarum sollicitudinem delabi. Nam id si accipimus, jam & Miles, & Architectus, & Histrio, & Musicus debet esse Orator, ut de his artificiiis verba facere possit, vocemque & manus ex arte moderari. Quid illi, qui Grammaticum quoque ad Geometras mittunt, ut de orationis numero, & syllabarum quantitate recte judicet? Satin sani habendi sunt? Sentio, me magno quodam æstu commoveri; & ab eo litore, cui sponte mea consilioque adhæsi, in altum quodammodo abripi. Sed jam, ut in lubrico, nimis multa. Summa summarum sit, Mathematica studia patere latissime; nec ipsa per se solum, quæ colantur, dignissima esse, sed aliis præterea multis suffragari: nobis vero in primis amplectenda videri, illustranda, promovenda; quod status hic vulgari conditione exemptus, & in illustri fastigio collocatus, rebus ornari debeat omnibus, quæcumque humani ingenii solertia parari possunt; ut non muneris tantum dignitate atque excellentia ceteros mortales Clericus superet, sed seipsum quoque dignum ostendat, cui

Inst. l. i.
c. i.

tal

tale tantumque munus committeretur . His se igitur dabunt Adolescentes nostri ; modo , quod Fabius de Græco sermone præcipit, ne usque ad superstitionem . Facio equidem minus libenter , ut eorum industriæ modum ponam , cum ceteroquin aliunde non careant desidiæ invitamentis : sed nihil in omni vitatam lædit officium, quam quod extremum est . Magnum crimen istius ætatis , atque adeo ætatum omnium , ignavia ; sed nihilo tamen minus ingenii ostentatio : tametsi utrumque fortuna , orbis terræ domina , suis bonis interdum cumulet . Ego illos in omni re & actione veritatem & honestatem sequi volo ; nec omnino spectare aliud, quam quod tibi, P. Eminentissime, in cujus tutela positi sunt, mea voce declarandum videtur .

EPISTOLA

AD LECTOREM

Præposita editioni primæ hujus Orationis.

ÆGre admodum tali, quosdam se altera hujus Orationis parte læsos putasse, quos ego nec fando audieram, neque omnino suspicabar Medicos esse. Dispeream, siquid egi malitiose. Cum illa scriberem, gravi quodam valetudinis genere conflictabar: itaque dolor iram concitavit, ira veritatem expressit. Cum recte valeo, Medicos omnes, eorumque technas libentissime laudo; sed quedam ægrotanti condonanda sunt. Jam extra jocum. Ego equidem societatis ejus, quæ Medicinæ cum Mathematica intercedit, utilitatem agnosco, fateor, inculco; nec mihi aliud propositum fuit, quam quod nimium videretur, Oratorio stilo notare. Si quis hoc tamen in crimen vocabit (nam quibusdam nihil est satis) is sciat, rem sibi cum homine fore neque Medico, neque Mathematico, at certe rerum humanarum non prorsus ignaro. Vale.

O R A T I O XI.

I N F U N E R E

GEORGII CARD. CORNELII

EPISCOPI PATAVINI

Habita in Æde Cathedrali.

Video vos, NN., sicuti præter consuetudinem
 mæstos ac fordidatos, ita in me oculis a-
 nimoque defixos valde mirari, quomodo possim
 tam misero ac luctuoso tempore non dicam ver-
 ba facere, sed in hanc lucem acerbissimo casu
 contaminatam prodire, eumque jacentem aspice-
 re, qui me a prima ætate educavit; quicum per-
 petuo vixi; quem, in ipso adolescentiæ flore pa-
 rentibus orbatus, parentis loco habui; cui un-
 tantum debeo, quantum homo homini proxime
 ac secundum naturam debere potest. At si quis
 umquam filius, quod & Tiberium admodum ju-
 venem, & multos præterea veterum Romanorum
 more atque instituto fecisse accepimus; si quis,
 inquam, filius in patris funere tandiu compesce-
 re lacrimas potuit, dum illi Oratione parentaret,
 hanc mihi, quæso vos atque obsecro, veniam
 date, ut cum præter ceteros quærere sordes ac
 latebras ad explendum dolorem debeam, tamen
 aliquantisper in hominum conspectum procedam,
 ea dicturus, quæ ad deplorandum GEORGII
 CARDINALIS CORNELII Episcopi nostri in-
 teritum, ego illi tam multis rebus addictus per-
 tine.

tinere existimabo. Nullum jam est eximiae virtutis ac nobilitatis testimonium, quod levitas & adulatio non vulgarit; ipsaque hæc laudandi funeris consuetudo jamdiu ab antiqua institutione descivit, & ad multitudinem traducta est: ex quo fit, ut cum honor ipse obsoleverit, non videatur Principibus viris dignus, nisi pondus aliquod ab eo, qui dicit, ad hominum existimationem judiciumque accipiat. Atque in me quidem neque ullus dignitatis titulus, quarum rerum numquam studiosus fui; neque præstabilis dicendi facultas, quam mihi comparare pro hac ingenii tenuitate non potui; neque aliud quippiam ad speciem & pompam ornamentum est: sed ea tamen semper fuit observantiae ac pietatis meae erga Principem beneficentissimum vis & magnitudo, tam diuturna, tam constans, tam omnibus nota, ut hoc ipsum, quod ego loqui, quod hincere, quod respirare in tanta calamitate possim, mirabile quiddam sit, vestrisque cogitationibus & posterorum memoria aliquo modo dignum ac celebrandum. Itaque hæc ne laudatio quidem dici poterit, sed debita quædam mæroris ac luctus publico in loco significatio; in qua si vobis, quemadmodum spero, satisfecero, mihi tamen certe numquam satisfaciam: quia cum plus etiam contendero, quam possim, minus tamen semper, quam debere me intelligo, ipse mihi contendisse videbor. Non deerunt memoriae tanti Viri laudatores, donec stabit virtuti honos; eoque plures erunt, quod tale genus, dum viveret, pati non poterat: ego ea dicam, quæ ipse quoque, si vivus adesset, atque audiret, impro-

probare non posset ; quæque boni filii & officii memoris , non viri callidi & ad dicendum exercitati iudicentur. Sustinete me tanto dolori imparem humanitate & auctoritate vestra , *Nobiles ac Reverendissimi Viri* , princeps hujus Ecclesiæ pars, in quorum fidem ac tutelam Patavina sacra & sacrorum Ministri concesserunt ; sustinete, inquam, me, atque adeste supremo hoc in illum officio , qui vos universos perpetuæ concordia & caritatis vinculo complexus , plurimi semper fecit atque adamavit ; qui multos ex vobis in celsam hanc amplitudinis sedem evehit, familiariter adhibuit , privatis publicisque benevolentia testimoniis ornavit : neque plus quippiam postuletis , quam quantum a mœsto turbatoque ingenio in tam magna ac recenti ægritudine præstari potest.

Quantum igitur ad humana ac divina præsidium in unius hominis morte amisimus , Auditores ! Amisit patria Civem ornatissimum , suæ nobilitatis & gloriæ amplificatorem ; amisit Christiana respublica Cardinalem religionis studio , consilii magnitudine , rerum gerendarum experientia præstantem ; amisit Pontificem Patavina Ecclesia (pro Deum atque hominum fidem, quo tempore, quam importuno !) amisit tamen Pontificem integritate morum , pietate , intelligentia , vigilantia , liberalitate dignum prorsus , qui Ven. Gregorii Barbadici exemplum , non in hujus tantum Civitatis oculis, sed in totius Europæ luce positum unus exciperet ; ipseque aliis, qui succederent, exemplo esset . Jacturam hanc tantam si quis ex nostris sine lacrimis ac lamentatione ferre potest, si quis cogitando non com-

moveri, non plorare, non ingemiscere, is duritia & immanitate efferatus, ne inter homines quidem, nedum inter nostros, habendus est. Sed ut tantisper a nobis discedamus, eique Urbi ac Familiæ donemus aliquid, unde ortum Georgius duxit, quem esse putatis in vulnere tam acerbo Venetorum civium sensum, eorum præfertim, qui illi cognatione aliqua conjuncti fuisse, hoc est nobilissimorum? quem Serenissimi Fratris uno eodemque tempore, nescio quo siderum consensu & conjuratione, ut omnia dira essent, letali morbo prostrati? Sed qua ego te voce appellem, optime Princeps, amantissime Frater, Joannes Corneliorum decus atque ornamentum, qui jam vel mortuus, vel morti proximus, squalori squalorem addis? O nos miseros atque perditos! Ita ne duo lumina patriæ suæ longe maxima, tam illustria, tam splendida, tam benefica, uno pæne articulo temporis obscurata jacere? Ita ne Imperium nostrum, ac Sacerdotium uno ictu repente perculsum, funebri specie sordibusque fœdari? O tempora nobis aspera, o fata fera, o dies atri! Quis ita rerum humanarum sensu caret, ut cogitatione mali fatalibus causis impliciti non frangatur? Quis si non privata, at communi saltem causa non dolet? Quis Dei præpotentis indignationem non sentit; aut si sentit, cur non placare atque avertere conatur? Subeat animos vestros Gentis hujus splendor tam antiquus, quam patria ipsa; tam magnus, quam qui esse in privata fortuna potest; tam late fusus ac sublimis, ut non supremum modo Civitatis suæ gradum iterum ac sæpius occupaverit, sed ad Regium quoque fastigium

gium pertingere potuerit: hic porro vetusta quæque nomina uno intuitu prætereûntes, duo hæc ætatis nostræ decora splendidissima mentibus vestris infigite, attenteque contemplamini, Joannem Venetorum Ducem, Georgium Cardinalem Patavinorum Episcopum; utrumque altissimo loco positum, eique parem; utrumque complexum virtutes omnes, maximas minimasque, quæ tantam dignitatem ornarent; utilemque humano generi facerent; sed ea præsertim animorum ac voluntatum consensione, eoque amore conjunctos, qui sanguinis vim & naturam ipsam quodammodo superaret: tum vero reputate, par hoc Principum tam insigne, & pro temporum ratione plane unicum, eodem fere articulo temporis, quod certe ne posterorum quidem admiratione carebit, eodem inquam articulo sublatum. Me miserum atque infelicem, cui hæc tam fœda atque ominosa commemorare contingit! Vereor, ne aliquid in tantis terroribus lateat, quod nobis irati Superi hac ratione denuntient, ut ad veterum disciplinam moresque redeamus. Verum quo me rapit doloris impetus? Dii meliora! Exeamus jam patria, in qua fatis querelarum, fatis mœstitiæ luctusque est. Te, Roma, te inquam jam appello, altera veluti Georgii patria, quam sibi ipse divino consilio elegit, ubi gravissimos Magistratus gessit, cujus nomine celeberrimam Legationem ad Lusitaniæ Regem obivit, cui suffragio tuo bis Principem ac Pontificem Maximum dedit, visus ipse non longo intervallo abesse ab illo dignitatum omnium culmine, si quantum valebat animo, tantum etiam corporis viribus & valetudinis firmitate valuisset. Audiat Summus Religionis

Antistes idemque optimus extinctum sibi & Ecclesiae Cardinalem, qui nihil umquam aggressus temere, fide ac veritate sacra jura defendit, magnumque prudentiae exemplum litteris & posteritati mandandum reliquit. Scio equidem, quam ex iis multa, quæ nobis admirationi esse solent, in Urbe illa omnium principe exigua sint; sed tempora ipsa faciunt, ut cui aliqua Ecclesiae procuratio commissa est, is mirifica sapientia præditus ibi quoque videri debeat, si in tot hominum cupiditatibus sine ullius offensione ac sine turbis suam provinciam administret. Hæc singularis prorsus Cornelii laus fuit, quod per annos quatuor & viginti in regimine tam varie diffuso ac difficili nihil acciderit singulare. Neque enim tam periti Medici est accedentes morbos curare, quam ne accedant, præcavere. Viderat hoc, multisque ad imitationem memorare solebat, verum illud Summi Sacerdotii exemplum cum antiquis comparandum, Clemens XI.; in cujus egregia sensa successisse credendum est, qui in ipsam humanarum divinarumque rerum potestatem Dei Optimi Maximi providentia successit Innocentius XIII. Atque hunc etiam multo magis vidisse existimo, qui olim Georgio in Lusitana Legatione successus, recentia adhuc admirabilis virtutis vestigia in florentissimo illo regno ad immortalitatem impressa adspexit, & qualis quantusque esset, jam inde ab eo tempore cognovit. Hic tamen tanti nominis tantæque gloriæ Cardinalis ereptus est, hic, inquam, tibi, Roma, ereptus senectute prima, qui ne extrema quidem sine bonorum querimonia decedere potuisset. Verum ego quid diutius Romæ jacturas queror, nostrarum immemor?

amor? quid in tam lugubri hujus Civitatis conditione lugendi causas aliunde peto? Nobis ille, nobis ereptus est; nostrum est totum hoc infortunium. Patavium amisit sacrorum praesidem, religionis custodem, pietatis assertorem, Pastorem, Patronum, Parentem. Revocate animo, quicumque Georgium paullo familiarius cognovistis, compositam illam in tanta dignitate facilemque naturam, sensa illa in rem quamlibet prudentissima, acumen illud ingenii ad difficillima quæque expediti; intelligendi celeritatem, discernendi consilium, agendi industriam: reputate cum mentibus vestris perpetuam illam verborum vitæque continentiam, flagrans ad omnia pietatis opera studium, sollicitam Christianæ institutionis curam, effusam in egentes ac miseros benignitatem, totam denique illam optimæ indolis rationem, quæ ubi se alicui dederat, in eo statim admirationem & benevolentiam commovebat. Id cuiusmodi sit, intelligi magis potest, quam ex toto explicari: sed multi tamen animadverterunt, hoc proprium ejus ac peculiare fuisse, ut minimæ quoque virtutes excellentem quamdam speciem ac dignitatem ab ejus moribus sumerent, & quod in aliis vulgare esset, in eo tamen insigne atque eximium appareret. An ille, nisi tantus fuisset, aut etiam major, Barbadii famam, ut paullo ante dixi, excipere potuisset, ejusque locum magna omnium voluntate ac lætitia tenere, qui tamquam e cælo descendisse visus, eoque regressus, unde venerat, non humanis tantum laudibus, sed prope Superum voce ac prodigiis celebrabatur? Jacebat populus fere omnis ingentium damnorum memoria abjectus atque afflictus; moerebant sacrorum Ministri

nistri præteritorum memores , anxii trepidique futurorum ; querebantur sacri mulierum ac virorum Cœtus in diem viventes , & ad incerta casuum solliciti ; ejulabat egentium puellarum ac viduarum turba , tam certo subsidio ad vitam tuendam atque honestatem privata ; litteræ quoque ac disciplinæ tam secura spe dejectæ atque exanimatæ sibi metuebant . Hic tamen in tanto doloris ac timoris æstu superveniens , veluti Sol post atram turbidamque tempestatem , omnium vultus explicuit ; brevique effecit , ut hominem interiisse tota Civitas judicaret , non virtutem . Nihil mutandum ratus eorum , quæ invenisset a Viro illo divino constituta , eandem ubique justitiæ , disciplinæ , religionis viam tenuit ; quidquid ingrueret , ad illius decreta & majorum consuetudinem confugere consuevit ; at si quando enascentes novi generis morbi nova remedia postularent , quæ ipse egregie constitueret , maluit videri reperisse , quam fecisse . Quamquam ita quietas sub hoc Præsule ac tranquilla fuere omnia , ut cunctas amplissimæ Diœceseos rationes qui suis momentis expenderent , & tempora temporibus compararent , præstantissimum hominis ingenium ex hoc maxime agnoscerent , & supra omnem sæculorum memoriam prædicando efferrent . Princeps Veneta prudentia & Romana gravitate compositus duas res non tam natura diversas , quam moribus dissociatas , præclare copulaverat , obsequium , & libertatem ; obtinueratque , ut boni mores æquitate temperati plus valerent , quam antea bonæ leges . Ipse autem præibat omnibus intaminata quadam innocentia vitæ , ingentique instructu virtutum omnium , quæ in hunc statum

cade-

cadere possent: cumque initio esset paullo natura iracundior, ut plerique omnes solertis ac vividi ingenii homines, ita seipsum brevi tempore edomuit, ut inditos ignes pertinaci exercitatione patientiæ non compescuisse, sed prope extinxisse, videretur. Utinam vero eam valetudinem vegetam ac firmam, quam primum in hanc Urbem attulit, non interceptisset aliquando post articulorum dolor, qui cum in dies magis cœpisset esse gravis ac frequens, in causa demum fuit, ut ipse per se Diœcesim suam non tam sæpe, quam voluisset, obire posset; insuper vero etiam aliqua ommittere, aut differre, aut ad alios delegare cogeretur, quæ non animi solum imperio, sed corporis etiam ministerio indigerent. Hæc illum cura magis, quam morbus ipse, conficiebat; hoc unum, de quo assidue querebatur; hoc pretio æstimata valetudo; huc vota precesque conversæ, sensu ceteroquin ad perpetuos dolores obdurato. Ut vero aliquantum respiraverat, lecto adhuc affixus admittere humanissime omnes, audire gravissima negotia, inquirere, decernere, expedire ingenio ita libero, ita celeri, ita expecto, ut ipso corporis labore purgari animus atque illustrari videretur; tantoque magis exsurgere atque unus dominari, quanto illud magis excruciatum ac miserum contabesceret. Ubi porro stare, ubi sacras vestes sumere, ubi exire cubiculo poterat, statim quæ Pontificis munia essent, peragere omnia; nulla in re sibi parcere; non infirmæ adhuc valetudinis, non æstus, non frigoris ratione habita, quo commissi sibi gregis utilitate vocaretur, promptissime advolare. Quoties ego illum imbecillis adhuc viribus, pedibusque labantibus

tibus ad Seminarium accedentem vidi, quem locum, traditæ sibi provinciæ partem certe non ultimam, miro patrocínio ac benevolentia prosequabatur; quoties cum mane ibi fuisset, vespere redibat; quoties per multos dies sine intermissione exercitationibus nostris aderat, ut studiorum morumque rationes exigeret; ut omnes non præceptores modo, sed etiam discipulos nosceret; ut cuncta investigaret, pervideret, distribueret; ut litterulas nostras, qui maximus mihi semper fructus laboris fuit, sua præsentia iudicioque honestaret? Hinc sibi potissimum, nomine ipso Seminarii admonitus, furculos illos sumendos esse intelligebat, qui in omnem Patavinæ Ecclesiæ agrum pro temporum ac locorum necessitate transferrentur: de hoc & ipse libenter loquebatur, & alios loquentes audiebat; in hoc sibi magnopere placebat; huc hospites mittebat suos; nihilque abire patiebatur, quod ad istius pulcherrimæ atque utilissimæ institutionis incrementum quispiam moneret. Jam vero eo deveni, ubi cogor tamquam scopulo adhærescere. Cogitatio hæc una ita me totum obruit atque occupat, ut nihil versare aliud animo possim; ita me angit atque enecat, ut vocem jam ipsam pæne intercludat. Te ne Seminario tuo, te ne mihi Optime Præsu ac Parens, tam subito casu ablatum? O cæcas hominum mentes! Te ne mihi tam multa pridie, quam ægrotares, benevole amanterque dixisse, quæ nostra causa cuperes, nulla plane tantæ hujus calamitatis præsentione, quæ tibi tam prope nobisque imminebat? Ita ne illa omnia momento temporis cecidere, quæ mihi constitueras, ut hoc ipso die, quo studiorum nostrorum cursus veteri

more

more absolvi consuevit, tuo nomine edicerem? Ille, ille igitur dies mihi ultimus erat, quo te alloquerer, nec tamen, homo tibi devinctissimus, ullo naturæ motu commonebar, quam dicunt sentire in posterum terribilia? Pro dolor, pro factum, pro rerum omnium repente facta conversio! Sed ille jamdiu humanarum rerum tædio affectus, quod æterno dolore conflictaretur, usuque pedum ferme omni careret, ad quietem & beatitatem æquo animo ac libenti commigravit; neque me hercule verbum ullum protulit his totis octo diebus, quibus se morti proximum sensit, dimissaque cura rerum ceterarum, se proximum esse unus asseveravit; nullum, inquam, verbum protulit, quo vitæ longioris desiderium ostenderet, malletque aliud, quam quod Deus ipse vitæ necisque dominus constituisset? nos vero lacrimarum pleni, multarum rerum meditatione suspensi, abjecti, profligati, unde abierit aspicimus, non quo ascenderit. Erigamus tantisper animum, Auditores; & siquid esse solatii potest, ab eo loco ducamus, ubi ille susceptæ ad nostram utilitatem sollicitudinis præmio fruitur: quod certe ægre ferre non debemus, nisi ingrati videri volumus. Quamquam quæ ego solatia quæro? Vix humana mens humi defixa summum illud immortalitatis bonum, quod nemo nisi moriens consequitur, intelligere potest; & ad hujusmodi calamitatum levamen sincere vereque transferre: nos autem, ut in hoc tandem illius causa conquiescamus, adhuc tamen rerum nostrarum cura tangit, tangetque diu; minuenda fortasse aliquando, numquam prorsus deponenda.

E P I S T O L A

A D L E C T O R E M

Præposita editioni primæ hujus Orationis.

Fervens adhuc erga Episcopum de se optimè meritum Civitatis Studium & voluntas, insolito omnium ordinum luctu significata, jubet me Orationem hanc emitte, quam ad ejus funus impetu quodam doloris effudi. Ac si mihi persuaderem, laudes ejus æquari dicendo posse, valde dolerem, paullo plus biduo ad rem tantam comparandam ingenio tam exiguo concessum fuisse: sed cum ita vixerit, ut a nemine pro dignitate laudari possit, id unum faciendum puto, ut de tota ejus Vita quædam præmittam annalium more, qualia fere ad Ughelli supplementum altero abhinc anno brevi simplicique narratione exaravi. Ego equidem virtutem ejus, dum viveret, non fortunam admiratus, mortuum quoque perpetuo colam; nihilque omittam eorum, quæ ad ejus memoriæ propagationem quoquo modo facere videbuntur.

GEORGIUS CARD. CORNELIUS natus est ex Federico Equ. & Cornelia Contarena Kal. Aug. MDCLVIII. Paucis post annis, Melitensens Ordinem accepit, & Magni Commendatarii Cypri titulum, hujus Familiæ hereditarium. Politioribus litteris Veronæ, Philosophia & Iurisprudencia Patavii instructus, more majorum, anno MDCLXXVII. Doctoris nomen & insignia sumpsit; statimque per Europam iter instituit. In patriam cum rediisset, Navalibus præfectus est anno MDCLXXXV: quo
in

in munere ita se temporibus difficillimis gessit, ut gravioribus curis par judicatus, ad Gallicam Legationem designatus sit. Sed ille quidem alio spectabat. Itaque Ecclesiastica militiæ nomen dedit, Romamque commigravit anno MDCXC. Biennium fere in ea urbe commoratus, per eos Magistratus, quibus maxime solent Præsulum ingenia explorari, magnam de se expectationem movit. Proinde maritimæ oræ in magna pestilentiae suspitione præpositus est, deinde annonam curare jussus, demum vero ad Petrum II. Lusitaniæ Regem Legatus missus anno MDCXCII. Insignem jacturam rerum suarum in eo itinere cum fecisset, incredibili virtute fortunam elusit. Tanta enim rerum omnium apparatione & magnificentia, tanta fide ac sapientia munus illud longe gravissimum sustinuit, ut XI. Kal. Aug. MDCXCVII. ab Innocentio XII. Cardinalis creatus sit, & paullo post Episcopus Patavinus, cum in ipso Legationis initio Archiepiscopi Rhodiensis titulum obtinuisset. Inde igitur Patavium venit ingenti omnium civium lætitia & expectatione, quam postea non explevit modo, sed etiam superavit. Omnino is unus efficere poterat, ut optimi Decessoris Gregorii Card. Barbadici desiderium in hac urbe moderate ferretur: quippe instituta ejus omnia non retinuit solum, sed etiam amplificavit; ac siquid necessitate temporum aut moderari, aut tollere coactus est, id singulari quadam prudentia fecit, sine qua ipsum quoque religionis ac disciplinæ studium interdum vanum, interdum etiam exitiale est. Diocesim litteris, aut pietate cultiorem haud facile invenies: unde satis apparet, tantæ rei momentum in uno fere Episcopo esse. Capitulum habuit magna sibi observantia & caritate conjunctum, sed præsertim

Sertim Ecclesiastica disciplina & morum honestatē supra vetera exempla laudabile. Trestense Collegium sustulit, quod a prima institutione degenerare cœpisset, nec jam remedium patiposset. Ejus loco publicum Grammaticæ Gymnasium in urbe aperuit, optimosque præceptores sine ulla juventutis impensa docere jussit. In Seminario multa egregie constituit, quæ undique alumnos supra ipsam loci capacitatem invitarunt: sed quod caput est, Magistrorum numerum auxit; suaque humanitate & æquitate obtinuit, ut non deessent, qui se, libertatē, ac valetudinem tenuissima spe proposita, sine stipendio devoverent. Duobus Conciliis Pontificiis interfuit, quorum altero Clemens XI. altero Innocentius XIII. Summus Ecclesiæ Pontifex creatus est. Patavii diem obiit IV. Id. August. MDCCXXII. ipsisque Idibus elatus est, cum paucis ante horis Joannes Venetiarum Dux, frater ejus carissimus atque amantissimus, dira prorsus fatum consensione decessisset.

O R A T I O XII.

I N F U N E R E

A L O Y S I I P I S A N I

DUCIS VENETIARUM.

LAtendi consilium, quod Superis bene faventibus anno superiore ceperam, numquam sane deposuissem, nisi acerbissimus casus qui nec opinato civitatem perculit & afflixit, me quoque excitasset, communemque calamitatem fletu & lamentatione prosequi coegisset. Obiit Dux & caput Venetiarum **ALOYSIUS PISANUS**, quod bonis omnibus debet esse grave; atque ita obiit, ut quasi Romulus alter ex oculis spectantium repente sublatus, mentes hominum stupore quodam defixas reliquerit. Proh Dii immortales! Nondum plane depulso terrore illo, quem nobis repentina intulit Patriarchæ **CORRARI** mors, statim succedit alter, & casus celeritate, & mole rerum aliarum super alias decipientium longe atrocissimus; ut nemo mirari debeat, si inter ipsa civitatis gaudia pro rerum vicissitudine consecuta, multi adhuc silentio hærent, prima illa cura & cogitatione suspensi. Cum enim in privata domo hoc genus mortis, si quando contingat, vicinos terret, tum præsertim in viris principibus fatale aliquid habere videtur, quod non finibus illis, nec capite uno coerceatur. Sed juvat bene ominari. Quod autem in magnorum virorum funeribus institutum est, ut eorum facta ad animi solatium

N

e fug-

e suggesto referantur & ornentur, id in præsenti vix locum habet. Nam quæcumque ALOYSIUS fecit tum in primo illo privatae vitæ genere, tum in altero hoc publicis insignibus titulisque ornato, cum omnia ad bene merendum de humana societate firmo quodam animi proposito constantique retulerit, quomodo ego vos amissa bona commemorando solari potero? Non sum nescius, præsidia quædam ab eloquentia peti solere, quibus rerum formæ coloresque mutantur. At horum præsidiorum copia mihi quidem pæne nulla relicta est, qui per annos admodum sexdecim longe aliis exercitationibus occupatus, nihil aliud quæsiui, quam quomodo rerum veritas, quolibet sive fuce, sive ornamento spoliata, in aperto poneretur, hominumque studia ipsa per se alliceret. Ergo qui mihi id oneris imposuerunt, magis quid vellent ipsi, quam quid ego possem, æstimarunt; vel si hoc ipsum æstimarunt, hominem quæsierunt, qui cum industriæ vires omnes laudando contenderet, idem tamen fidem & pudorem retineret. Sed illud quoque fortasse spectarunt, ut, cum in ceteris funeribus Oratores adhibeantur, qui præficarum more ad vanam quamdam doloris speciem querelas e medio sumant, sciteque jactent, is ALOYSII funus dicendo ornaret, qui multis officiis obstrictus ex animo loqueretur, concionemque ipsam veri doloris explanatione commoveret. Et vero si, quæ animo complector, assequi verbis potero, simul illud efficiam, ut intelligatis, me non temporari servire, sed personæ: sin minus, efficiam tamen hoc ipso, ut, quæ non dixero, qualia & quanta sint, cognoscatis.

PISANA domus, cujus origo in ipsa civitatis hujus antiquitate latet, cum in Rep. cursum perpetuo tenuit, ut vel in summa opum ac dignitatum copia careret invidia. Ac si quis ex illa in hujusmodi instituto recte feliciterque permanfit, is certe ALOYSIUS fuit, cui ad honores ac divitias, quantum ordinis & loci natura patitur, cum fere nihil deesset, ipsa se quoque hominum benevolentia, & communis quædam animorum propensio comitem adjunxit. Neque enim propinqui solum & amici, sed populus omnis, atque adeo illi ipsi, qui ne de facie quidem hominem nossent, nomini ejus mirifice favebant, ægre admodum ferentes, si quis forte utcumque de patria meritis, in contentionem veniret aliquam, & cum illo dignitates peteret. Itaque nihil illi in hoc ambitionis cursu difficile fuit, nihil non expeditum. In ipso juventutis flore ad consultandum de Rep. Sapientum Collegio adscriptus est, cum fuisset annali lege solutus ob patruī Laurentii merita Cretico bello sublati. Atque in illo quidem gravissimo Consilio ita se gessit, tantamque sui spem excitavit, ut ad Gallicam legationem, ubi primum licuit, delectus sit. Iter ejus adhuc est in ore hominum, institutum comitatu ingenti, præmissis ad principes urbes, qui laute exciperent advenientem, effusis in hospitibus cuncta & diversoria regio more pecuniis, quæsitis opera omni benigne faciendi occasionibus. Per hæc Lutetiam cum venisset, in Aulam totius orbis splendidissimam, ipsi per vos cogitare animo & conjicere potestis, qua rerum omnium apparatione, quam copiosa, quam inusitata legationem instruxerit. Illud certo constat, ipsum Re-

gem Ludovicum XIV. & nomine magnum , & ad magna omnia natura factum, non sine admiratione aliqua tantum privatæ fortunæ splendorem adspexisse. Valuit hoc ad gratiam & benevolentiam, & quod consequitur, ad eam gerendi negotii rationem valuit, quæ sine benevolentia ejus, quicum agitur, multis est difficultatibus impedita. Incidit enim in tempora valde aspera, primo quidem cum de Hispanica successione, vivente adhuc Hispaniæ Rege, agitari cœptum est, intentis in curam hanc Principibus cunctis, aliis causa alia: deinde vero cum, illo mortuo, Italia bello flagravisset; nosque in terris nostris ingentes exercitus, amicos illos quidem, sed tamen exercitus, pro illa rerum ac temporum conditione vidimus. In tanto rerum motu quanta prudentia opus esset agenti cum Rege illo, qui unus omnia miscebat, non est cur pluribus explicem. Ea fuit Ludovici natura atque indoles, ut audendum in loco crederet, & fortunæ fidendum, quæ nimis consultationibus fatigatur: cum ex adverso Rerump. ratio poscat, ut nihil fiat nisi consulto, nullaque conditione committatur, ut liberæ civitatis homines ad incerta casuum trepidare debeant. Quapropter Regis consilia cum laudarentur officii causa, resistere tamen periculosa proponenti oportebat, atque ita moderari responsa, ut & causam suam probari crederet, nec tamen in illam posse descendere. Attamen Rex, ut erat summo ingenio summaque prudentia præditus, non solum non querebatur, sed quoties opus esset, PISANUM libenter audiebat, complexusque favore omni, credi malebat, se homini tribuere, quod tempori dabat. Absoluta legatione,

ne, quæ jam quinquennium excefferat, discedendum fuit: quo tempore maxime apparuit, quantus esset erga ALOYSIUM non Regis modo, sed Aulæ totius, atque adeo civitatis amor, collatis in illum undique officiis, donis ultra morem & exempla liberaliter datis, votis etiam pro ejus itinere, tantum non publice, susceptis.

In patriam cum rediisset, Sexvir publicis regendis consiliis creatus, singulari quadam innocentia, fide, integritate Remp. administravit; eamque de se omnibus opinionem indidit, ut locum hunc tam celsum non alia de causa quærere crederetur, si modo quælivit umquam, nisi ut multis beneficeret. Itaque nemo unus inventus est neque ætate nostra, neque superioribus, qui tanta illum civitatis approbatione, tamdiunque tenerit, donec ad summum evectus est. Inter hæc, jactatis Europæ rebus, cum Britannici regni possessio ad Annam venisset, Legatus extra ordinem ad gratulandum missus est una cum Equite Nicolao Eritio, magni nominis Senatore. Quid quæritis? Cum res tota ad dignitatem & pompam referretur, nec ignoraret ALOYSIUS, hac ipsa de causa munus hoc sumptuosum & grave sibi potissimum fuisse delatum; quibuscumque rebus potuit, efficere conatus est, planeque effecit, instituto per Germaniam itinere, ut Veneti Senatus majestatem circumferre videretur. Ubi vero Londini fuit, ubi se Britannis ostendit, ubi in conspectu Reginae stetit, ut officiose pro Rep. faceret; quanto rerum omnium apparatu, quam splendido, quam magnifico usus est! Magnopere vereor, ne quis existimet, me ex communibus locis laudes ALOYSIO quærere; qui tamen illa

ipsa cum faceret, quæ communia sunt, pro animi sui magnitudine ita faciebat, ut communia esse definerent, ejusque propria viderentur ac singularia. Hinc factum est ut cum Carolus VI. Romanorum Imperator Mediolani esset, & Catholici Regis titulo urbem illam teneret, idem ad gratulationes & officia eligeretur, addito collega Andrea Legio D. Marci Procuratore, qui animo præditus æque magno, cuncta fieri vellet, quæ in tanta Italiæ luce Veneto digna nomine judicarentur. Nihil profecto Legatione illa neque fieri, neque cogitari magnificentius potuit, nihil ornatus, nihil gravius; ad quam celebrandam, præter ipsum Legationis comitatum longe pulcherrimum, fama rei ex vicinis civitatibus viros nobilissimos acciverat. Eminebant supra omnia Legati ipsi, hominumque oculos ad se trahebant; quod constaret, non mitti extra ordinem a Senatu nisi summos viros & in rebus gravissimis exercitatos.

Jam vero litteræ quoque præsidium ab ALOYSIO sibi quærebant, litteræ, inquam, quæ si magnis patrociniis careant, vel parum procedunt, vel in ipso cursu fatigatæ contabescunt. Hunc igitur sibi patronum deposcebant, & rerum suarum moderatorem, qui honestatem & verecundiam amaret, velletque modeste petentibus, vel etiam non petere ausis, jura sua tribui. Res ex voto cecidit. Nam Patavini Gymnasii cura & administratio ad illum delata est, hominem non dicam litteratum (cur enim illi bonis suis tam multis ornato tribuantur aliena? *Tu regere Imperio populo, Romane, memento; hæ tibi erunt artes.*) sed tamen nec illitteratum, & ad re-

etc

de litteris judicandum natura ipsa rerumque
usu satis idoneum. Magistratu hoc tam gravi,
quem maiores nostri inter primo esse voluerant,
iterum ac sæpius defunctus, quantam sibi existi-
mationem & benevolentiam apud singulos & uni-
versos, qui in hoc curriculo sumus, comparavit,
cum multa declarant, tum in primis monumen-
tum illud, quod eius nomini in ipso Gymnasio
communibus impensis positum est ad memoriam
posterorum sempiternam. Nos, quod unum li-
cuit, voluntatem erga illum nostram verbis testati
sumus: at Resp. titulis & honoribus, quantos-
cumque capere civis potest, non dicam datis, sed
effusis, ALOYSIUM ornavit, auxit, cumulavit.
Nam cum Eques jam esset, qui fructus commu-
nis Legationum est, eosque magistratus teneret,
quos modo memoravi, ipsa quoque D. Marci
Procuratio, dignitas in civitate maxima, & uno
Principatu minor, incredibili civium consensu po-
puli que studio, ubi primum tulit occasio, adje-
cta illi est. Statim erecti omnes in gratulatio-
nes, & publicæ possessionis spectaculum; quod sa-
ne fuit ejusmodi, ludis, congiariis, totius urbis
ornatu, ut neque tot annorum cursu, neque ex-
emplorum similitudine ejus memoria deleri potue-
rit. Fama rei late pervaserat, nihilque magis ho-
mines expectabant, quam ut vertentibus annis su-
premam in Civitate sedem ALOYSIO fortuna
præberet: fortuna, inquam, quæ in hac una Reip.
parte plurimum valet, & cum virtute meritisque
ita certat, ut interdum superior sit. Ventum igitur
est ad interregnum. Meministis, opinor, qui con-
cursus ad Pisanorum ædes statim factus sit, quan-
tus universi populi favor, quæ voces, & quam

insolitæ animorum significationes. Forte accidit, ut cum eo peteret Senator gravissimus, ætate major, Eques ac D. Marci Procurator, Carolus Ruzzinus, cui cum a virtute nihil deesset, ne fortuna quidem deesse voluit. Magnum repente consecutum est Civitatis silentium ob summam hominis auctoritatem, quem ordines omnes suspiciebant, & loco dignum sine controversia fatebantur. Verum fervente adhuc in Pisanos patrum populique studio, ipsa D. Marci Procuratio a Ruzzino deposita ad ALOYSII fratrem Carolum Equitem translata est, quod uni accidit ex omni memoria non petenti. Ego equidem quoties reputo tantum illum animorum motum, de quo nec dici satis, neque fortasse cogitari potest; sic existimo, si illi ipsi, qui Remp. hanc constituerunt, patriæ parentes in hanc honoris contentionem cum Carolo venissent, repulsam fuisse laturos. Nolim tamen existimetis, impetu potius, quam consilio, factum, ut dignitas tanta Carolo tribueretur. Modus & tempus ad gratiam, quam summopere valet Pisanum nomen, referri debet; res ipsa stat jure suo. Cum enim vellent cives obtrectanti fortunæ resistere, & desiderio suo facere satis, quæsierunt aliquid, in quo ratio sola & libertas valeret. Non est hic locus, ut de Caroli meritis dicam, quem a prima adolescentia in omnibus Reip. bellis fortuna virtusque exercuit, ipsum quoque Principali fastigio dignum, nisi maluisset fratri cedere. Interim ALOYSIUS animum revocavit, suamque repulsam recte, ut debuit, interpretatus, fratris honorem erectus & alacer excepit. Satis enim perspiciebat, pro consueto naturæ cursu non sibi negari, quod petierat,

rat, sed differri, ut familiæ tituli dignitatesque augerentur; & hoc ipsum in beneficii loco ponendum sperabat, quod non statim obtinuisset. Ita prorsus evenit. Etenim extincto Ruzzino, quasi jus ad rem prima illa petitione acquisivisset, nemo præter illum inventus est, qui nomen suum profiteretur. Non deerant sane, qui putarent, sibi causas esse profitendi; sed noluerunt cum eo de dignitate certare, qui esset omnium sine controversia meritissimus. Hic vero ineptus plane sim, si putem posse me speciem aliquam illorum dierum informare dicendo, quibus de novo eligendo Duce actum est, electusque ALOYSIUS in populi conspectum venit. Cum ordines omnes præter morem læti essent, plebs bacchari quodammodo & furere lætitia videbatur; viæ, fora, templa novo quodam genere plausus & acclamationibus personabant; cives civibus non tamquam de communi bono, sed de suo quisque, gratulabantur. Hic mihi triduum illud explicandum esset per ludos & spectacula splendidissime actum. Sed utcunque dicendo contendam, numquam tamen illis, qui viderunt, satisfaciam. Sunt enim quædam, quæ verbis exprimi nequeunt; & cum eloquentia res parvas ornet, in magnis sæpe deficit. Enimvero siqua umquam in hac Urbe Romani triumphi imago fuit, ex illa novi Ducis processione species aliqua ad conjiciendum duci potuit. Reliqua subinde consecuta ad initia tantæ dignitatis illustranda processioni paria fuere. Ceterum traducta in Prætorium familia omni, Hermolaus frater a domestica bibliotheca divelli non potuit. Hermolaus, inquam, Senator emeritus, quo uno neminem vidi, qui animum ab hono-

norum

norum cupiditate facilius revocet, qui seipso magis gaudeat, qui humanæ vitæ vicissitudines benignius interpretetur. Hujus in primis cura factum est, ut bibliotheca ad Civitatis commodum in Pisanis ædibus construeretur; nullaque conditione committendum putavit, ut honoris specie suum illud senectutis solatium defereret, in quo jamdiu conquiescebat. Interim Aloysius viam omnem ac rationem quærere cœpit, qua se suis civibus probaret, & veterem, quæ de ipso erat, expectationem sustineret. Quid enim fuit, quod a Veneto Principe vel in Rep. administranda præstari posset, vel in personæ dignitate tuenda, vel in publicæ majestatis splendore suis exterisque ostendendo, quod non abunde præstiterit opera, consilio, largitate?

Negari profecto nequit, magnum aliquid in divitiis esse, quod homines capiat & in admirationem trahat: attamen sapientum judicio majores habentur, qui eas contemnunt, quam qui habent: ALOYSIO utrumque contigit, & habere, & contemnere. Tantam hanc seu virtutem, seu felicitatem reliqua comitabantur animi bona, quæ quidem mortalis natura capit, & quæ qui habent, beati dicuntur; singularis quædam ad optima quælibet suscipienda voluntas; ordo & constantia vitæ non ad legem modo, sed ad rationem compositæ; eximia rerum omnium diligentia etiam minimarum, exquisitum & elegans in vestibus, in servis, ceteroque rei domesticæ apparatu judicium; summa in rebus contrahendis æquitas & facilitas; dictorum & factorum omnium pro sua dignitate gravitas, & cum gravitate juncta moderatio; pietas & religio nec privatim
in-

intermissa umquam, & publice ad exemplum splendide culta. Hæc scilicet homines movebant, ut ALOYSIUM magnopere admirarentur ac diligenter, ut honores omnes illi delatos vellent, ut prodeunti sine satietate acclamarent. Accedit, quod natura quoque suavitatem quamdam induxerat ori ejus, quæ aspicientes statim alliceret, & ad benevolentiam conciliaret. Quid vero, si se tibi daret, si alloqueretur, si operam suam promitteret? Tum sane non vultus dumtaxat, sed ipsæ quoque cordis affectiones apparebant; ut si nihil daret, nisi verba, tamen verba ipsa, ex animo ducta minime tecto, pro factis acciperentur.

Sed quærat fortasse aliquis, numquid in tanto prosperitatis cursu ALOYSIO contigerit, quo se hominem esse & humanis casibus obnoxium reputaret. Est enim quiddam in ipsa quoque felicitate nimium, si humanam naturam & mortalitatem Christianis momentis expendamus. Quin etiam contingere multa, gravia, & atrocia, eaque fere in ipso secundarum rerum articulo. Sed qui alienis calamitatibus ita commovebatur, ut eas aspiceret tamquam suas: idem in suis fortissimus erat. Nolo singulas commemorare, ne illam attingam mihi quoque acerbissimam, quæ Principatus initia contaminavit. Id unum dicam, quod omnibus notum est, & crebris sermonibus per hosce dies ad miserationem repetitum, vidisse illum non modo parentum suorum interitum, quod æqua naturæ lege comparatum modice ferri debet; sed & uxoris, & fratrum, & filii, & nepotis, temporibus alienissimis: cumque suos omnes vehementer amaret, nullam tamen in tantis luctibus doloris significationem dedisse, quæ

modum excederet. Accidit, audiente, me, ut honesta lætitia exultanti luctus denunciaretur. At ille composito celeriter animo respondit, quidquid boni Deus dederit, eo loco ponendum esse, ut idem repetere, nobis non repugnantibus, statim possit; se quidem nec extolli rebus prosperis, nec adversis deprimi. Ceterum si quis inter ejus infortunia recenset, quod repente sublati se mori non senserit, is mihi de humanis rebus non recte judicare videtur. Hoc ego ipsum ad quemdam quasi cumulum felicitatis refero, quod non morbo prostratus & sensim confectus luctari cum natura debuerit; quod non foedam mortis speciem ac terrificam aspexerit; quod propinquorum lectulo adstantium lamentationes non audierit; verbo dicam, quod vitam cum vita commutarit. Cum enim ille in hoc postremo quasi actu, quo Principis personam sustinuit, nullis ambitionibus distractus sibi uni vacarit, atque ita vixerit, ut siquid humanitus accideret, quotidie paratum inveniret; quid erat optandum magis, quam ut ejus animus, fractis repente vinculis, momento temporis liberaretur? Quidquid est igitur in hac repentina morte calamitatis, non ad ALOYSIUM, sed ad nos pertinet, coactos carere adjumentis, quæ adversus mala summa paullatim ingruentia parari solent. Si ille feбри correptus jacuisset dies aliquot, ac veluti per gradus venisset ad extrema; licuisset nobis inter spem metumque jactatis parare animos in partem utramque; licuisset haurire oculis aviditate ultima vultum ejus; licuisset ad Superos abeunti supremum vale dicere, nosque illi ac nostra commendare: id quia non licuit, jure dolemus. Verumtamen
quia

quia dolemus de incommodo nostro, videndum est viris bonis & fortibus, ex hoc genere quantum liceat. Excitemus mentis vires; & quod tempus est allaturum, consilio & prudentia prævertamus. Non probat ille certe dolorem nostrum, in æterna animorum quante collocatus, qui dum viveret, ferre non poterat, quippiam alteri sua caussa molestum esse. Desiderio nostro delectari potest, mœrore non potest. Demus hoc Principis memoriæ de nobis meritissimi, ut nihil agamus, quod non sit ex voto ejus. Hac vos in primis cogitatione animum confirmate, Religiosissimi Patres, qui peculiari hoc officii genere Duci optimo parentare voluistis, factisque pro more sacris ad expiandas minores culpas, quibus in tanta naturæ infirmitate nulli fere mortalium carent, laudes supremo Numini gratesque agite, quod Vir tam bonus, tam integer, tam pius, humanæ vitæ laboribus ac periculis egregie functus, in beatorum sedes subito facilique transitu convolarit. Atque hæc ad hominem. Ad patriam quod attinet, quidquid in hoc infortunio jacturæ est, satis superque publici Consilii prudentia reparavit, suffecto cive illo sui ordinis principe, qui ab ipsa adolescentia in Reip. administratione versatus, nihil umquam suscepit sive domi, sive foris, quin summa felicitate perfecere; quem tota Civitas singulari studio ac benevolentia prosequitur; cui natura ipsa & rectum ingenium, & speciem imperio dignam largita est. Ergo cum justa Pisano solverimus, pro novi felicitate regiminis vota faciamus; ut quando in humanis nihil est æternum, sic tamen diuturnum sit, ut nostra omnium desideria expleat.

EPISTOLA

AD LECTOREM

Orationem hanc semel atque iterum ab aliis editam, & publici juris jam factam, mihi quoque proferre libet, ceterisque conjungere. Et quia pro temporis brevitate, quo scripta est, alicubi paulo angustior videbatur, magisque Orationis commentarium, quam Oratio, ubi commode fieri potuit, eam nonnihil extendi. Principis tanti merita fortasse poscebant, ut capita rerum singula plenius explicata pro dignitate dilatarentur; sed nec fides publica patitur, nec stili ratio ad eas temporis angustias accommodata, ut nimis multa adjiciantur. Intelligentibus id erit satis, litterariæ plebeculæ admodum nihil. Vale.

ORATIO XIII.

207

AD DIALECTICAM

Habita in Gymnasio Patavino coram

JO: ALOYSIO MOCENICO

URBIS PRÆTORE.

*Dialectica quasi contracta & adstricta eloquentia
putanda est; Eloquentia vero Dialectica
dilatata. Cic. in Brut. cap. xc.*

QUa sexdecim ante annos alacritate Philosophicum studium intermisi, ut humanitatem & eloquentiam, ad quam me natura ipsa illiusque ætatis impetus ferebat, amplecterer, eadem nunc, defervescente jam sanguine, ad primum illud institutum redeo; rerumque mearum fata, manifestis indiciis cognita atque comperta, libentissime sequor. In quo videor mihi, scilicet cum magnis parva componere, divini illius hominis, cujus ingenium unice admiratus, imitari etiam pro viribus semper studui, M. Tullii dico, litterarum cursum vitæque institutionem aliquo modo tenere: nisi quod ille, mutato reip. statu, ab arte dicendi cum jactationibus fori curiæque conjuncta, in philosophiæ quasi sinum & complexum se se recepit, ubi conquiesceret; ego improvisa quadam mutatione rerum a Rhetoricis ad Philosophica rejectus in novum discrimen adducor, eoque periculosius, quo locus hic in totius Europæ lucē collocatus, majorem operam industriam.

striamque requirit, quam quantam ad veteres illas nostras exercitationes, honestas quidem ac liberales, sed tamen angustis terminis circumscriptas, olim afferebamus. Atque utinam Cicero, quæ initio Topicorum pollicitus fuerat, absolvere potuisset, aut, siquidem absolvit, vetustas & barbaries non confecisset; ut quemadmodum in dicendi studio ab eo numquam disceffi, ita in hoc differendi, quod nunc aggredior, eo duce atque interprete uti possem: Attamen erit in posterum quoque, ubi illum cum Aristotele non inepte componam: non quod nullam esse Dialecticam putem in scholis ferendam, nisi ex fontibus Rhetoricæ manet, vel in eos demum derivetur; quod ipsum tamen nec sine ratione, nec sine auctore facerem; sed quod artes ipsæ natura valde similes, in eadem sæpe vestigia incurrant, & communione quadam rerum plurimarum contineantur. Ex quo fit, ut in eodem studio manere quodammodo mihi videar; aut certe non tam longe abire, quam homines quidam existimarunt, de nobis illi quidem optime meriti, sed pro humani ingenii cura plus nimio solliciti. Ipse quoque me ad eorum iudicium aliquando composui, & in speciem dolentis conformatus, quod ita requirere viderentur, quasi ad Antipodas mitterer, officiose respondi. Nam & periculosum putabant, quid esset Rethorica & Dialectica, extra loci huius auctoritatem docere velle, & utcumque acciperer, plane videbam, tam gravem disputationem tamque illis inauditam familiari sermone expediri non posse. Nunc jam publico decreto munitus, & quod in huiusmodi rebus valere plurimum debet, sapientissimorum Virorum præsentia
& ju.

& iudicio confirmatus, curam illis omnem ac dubitationem eximam; tantamque ostendam horum studiorum consensionem esse, quanta esse maxima in litteris potest. Quod antequam faciam, Triumviris litterariis, totique Veneto Senatui, mularumstrarum custodi, præsidi, moderatori, laudes gratesque ago; quod hoc mihi bonarum artium omnisque doctrinæ domicilium patere voverint; ubi siquid possem, ad florentissimæ juventutis institutionem expromerem, & immortalis Reip. gloriæ ipse quoque ingenio tam exiguo pro virili parte consulerem. Fecere illi sane pro suæ magnitudine auctoritatis cum me nihil tale cogitare ausum, & in umbra pæne privata delitescens, repente in hanc lucem extulerunt, quam siquis non reformidat, is mea quidem sententia aut supra mortales videt, aut nihil videt. Et quamvis certo sciam, ab eorum consiliis divinam quandam vim ac providentiam pro rerum humanarum ordine abesse non posse, quæ me cogitatio valde erigit atque confirmat; attamen cum reputo, quibus me quantisque Viris adjunxerint, quidve præstare debeam, ut in clarissimum ordinem non irrepsisse videar, sed venisse, magno quodam æstu commoveor; nec mehercule, siquid est in tanta honoris amplitudine jucunditatis, ut certe debet esse plurimum, ejus ego fructum, nisi facto virium mearum periculo, magnaue itineris parte confecta, percipere me posse spero. Sed jam audere incipiamus, & quæ sit Rhetoricæ cum Dialecticæ affinitas uti modo positum est, ex ipsarum natura, & antiquitatis testimonio explicemus.

Sentio me in quæstione versari neque nova,

neque difficili, in qua multa de medio sumpta, & Latinis Græcisque litteris vulgata afferre necesse sit. Sed primum qua de re Dialectici Rhetoresque omnes initio suorum operum scribere solent, non mihi de illa tacendum puto; nec si quid verum ab illis dicitur, idcirco omittendum, quia sit occupatum; quæ ratio si valeret, jamdudum homines de rebus præclarissimis siluissent; deinde non omnia, ut spero, communia erunt; tum communia ipsa & publica si quis conferre voluerit, inveniet a nobis more quodam nostro pertractata, & quomodo jubet Horatius, *privati juris facta*. Atque hoc primum constituo, orationem omnem, quæ sit modo litteris ac luce digna, Grammaticorum opera indigere ad emendationem, Rhetorum ad ornatum & elegantiam, Dialecticorum ad fidem & probabilitatem. Id enim mihi dari puto atque concedi, nostram hanc sive Dialecticam, sive Logicam ἀπὸ τῆς λέγειν, idest *a loquendo* nomen invenisse, in eoque esse positam: qua de re vix ullus jam dubitat; nisi forte illi, qui eam *Cogitandi Artem* appellare malunt, de quibus postea verba faciam. Igitur, cum sit nihil homini pulchrius, quam loqui; nihil vero dignius homine litterato, quam recte loqui; totum hoc anti momenti opus triplici disciplina comprehensum est, ut veluti per gradus perficeretur. Ætas prima, quæ minus ingenio valet, in sermonis proprietate cognoscenda exercetur; & cum pure atque emendate potest, hoc est sine solæcismis & barbarismis verba componere, Grammaticè loqui dicitur: proxima, in qua roborari animus incipit, & ipse per se aliquid parere, ad ornandum & augendum promovetur, in quo est elo-

que-

quentiæ virtus: tum demum quæ ordine succedit ætas, ad inveniendum & judicandum apta, argumentandi vim & rationem persequitur; ut rebus dubiis fidem faciat, & assensum temere negantes tamquam telo pervincat & jugulet. Quamquam vero hæc rationis inveniendæ atque adhibendæ facultas, quæ Logica dicitur, aliquo modo stare sine Rhetorum arte potest, velut ossa nervis adstricta; attamen Rhetorica ipsa sine Logicæ præsidio nulla est, ut succus & sanguis humani corporis sine ossibus ac nervis consistere nequit. Quod si quis recte accipere voluerit atque expendere, cito intelliget, quicumque probationes ab Eloquentiæ scholis ablegarunt, in quo graviter ab Aristotele Rhetoricorum initio reprehenduntur, non eos quidem existimasse, dicendi artem tueri se nomenque suum sine probationibus posse, sed eas petendas ab alia facultate esse, cujus tota ratio & natura in hoc uno consisteret. Nunc quandoquidem cum Aristoteles tum Cicero, tum etiam Quintilianus (quid enim alios attinet commemorare?) probationes quoque in Rhetorum ditione esse voluerunt, iisque locos assignarunt, quibus ad inveniendum uterentur, non jam mihi duæ istæ facultates sociatæ videntur ad eam, quam modo dixi, loquendi virtutem perficiendam, sed in unam quodammodo coaluisse; quæ cum fusa lateque incedit, verborum ac sententiarum luminibus ornata, Rhetorica appellari solet; cum subtilior est & squalidior, Dialectica nuncupatur. Nam cum ajunt horum studiorum duces atque antistites, Rhetoricam rebus Civilibus contineri, reliquis Dialecticam; alteram certa tempora causasque complecti, quæque illis convenient videre;

alteram in summis generibus versari, non habita rerum singularum ratione; hanc scrutari naturam rerum, uti est, vel sapientibus esse videtur; illam populares opiniones sequi, ex iisque argumenta ducere; discrimen afferunt sane aliquod: at cum iidem scribunt, utramque in rebus omnibus cerni, nullis regionibus clausam; quæstiones finitas ad infinitas revocari; tum Oratorem, tum Dialecticum disputare in partes contrarias; utrumque communia quærere; utrumque ab iudiciis hominum pendere; utrumque fidem facere dubiam & labantem; tum vero vincula miscent, & unum quoddam atque idem disputandi & dicendi genus efficiunt. Hinc nihil frequentius apud illos, quam alteram facultatem ex altera efflorescere, sibi invicem respondere; mutuis rebus ali; Dialecticam contractam esse Eloquentiam, Eloquentiam Dialecticam esse dilatatam: quæ loquendi formæ quamquam nisi in res duas aliquo modo diversas cadere nequeunt; attamen differentia ita est exigua, ut nec rerum variare naturam, nec omnino in quo consistat, explicari facile posse, viri sapientissimi judicaverint. Sed hæc singillatim atque ordine videamus. Quacumque de re disputetur, tria sunt ferme consideranda, id de quo ambigitur, argumenta ad probandum comparata, & argumentorum explicatio: quæ singula si suis ponderibus examinentur, vix leve quiddam inveniemus, in quo non sibi inter se Artes istæ convenient. Et ut a primo incipiam, quæ disputandi materia est, & quæstio in scholis dicitur, illud firmum ratumque puto, tam Rhetoricam, quam Dialecticam, per omnia rerum genera fundi, & in omnibus suo quodam modo dominari.

Sunt

Sunt quædam, Auditores, ita simplices ac perspicuæ veritates, ut verbis explicari, & ostendi quasi digito possint, probari rationibus omnino non possint. Non multis igitur contendam. Quidquid in rerum natura, aut supra naturam est, qualecumque sit, aut esse videatur, ne in mentem quidem cadere potest, & intelligentia comprehendi, nisi sit ejusmodi, ut dici de illo, ac differi possit. Quod si quis Hermogenis auctoritate movetur, aut Cornificii, qui, quæ moribus ac legibus adusum civilem sunt constituta, Oratori tribuunt; cetera a vulgo remota, quæ intelligendi disciplinam constituunt, Dialectico assignant; hunc ego ad illos adducam, quos paullo ante nominavi, rei litterariæ constituendæ quasi Triumviros, Aristotelem, Ciceronem, Quintilianum, quibus si credimus, & dicendi & intelligendi & judicandi magistris sine controversia peritissimis, nullis neque Rhetorica, neque Dialectica coercenda finibus est; quamvis altera in foro præsertim sedem habeat ac domicilium, altera libentius in rebus versetur Philosophicis. At illis, credo, respondere difficile fuerit, qui statuunt, Oratoris operam intra causas & controversias concludi, quas Græci *hypothèses* dicunt, quæstiones autem universales in potestate esse Dialecticorum. Ita videlicet, nisi idem ille Cicero, qui hæc in primo *de Inventionibus* scripserat, contraria deinde & in *Oratore*, & in *Topicis* præcepisset, omnemque thesimum ad dicendi copiam Rhetori concessisset. Porro cum dico, Ciceronem præcepisse contraria, ex aliorum sententia dico. Nam ego quidem ita existimo, cum ea, quæ in facto sunt, proprie & per se ad Oratorem pertineant, id primum ab

illo fuisse præceptum; deinde vero cum animadvertisset, latius de toto, quam de partibus dici posse, non sane quæ scripserat, improbasse, sed illud insuper addidisse, ut in media causa a certis personis ac temporibus, velut ex angustiis, avocaretur oratio, & in ampliorem arenam adduceretur. Quare cum illi pro Sex. Roscio Amerino dicendum esset, non thesim de parricidis posuit, sed hypothesim, num Sex. Roscius patrem occidisset; quam deinde a Roscii persona ad summum rei genus traduxit, & de culpa supplicioque parricidarum divinitus disputavit. Sequitur argumentum, ex quo alterum discrimen, siquod modo est, duci debet. Ajunt enim, Logicam scrutari naturam rerum, ex eaque rationes capere, quæ aut veræ sint, aut proxime ad veritatem accedant, Rhetoricam argumentis uti popularibus, qualibet contentam veritatis specie, magisque fidem & persuasionem, quam scientiam parere. At mihi quidem non ita videntur Dialectici de veritate solliciti, quæ una est in rebus omnibus; siquidem eorum est institutum differere in partem utramque, & parens artis Zeno (Eleatem dico) bilinguis est appellatus, quod contraria defenderet. Nam quod aliqui clamant, Sophistarum esse in Rhetorum ditionem irrepere, & per ea disputare, quæ nihil habeant veri nisi speciem; videant, opinor, quantum sibi licere in Sophistas existiment, & quatenus ab hoc nomine abhorrent, quod ipsum per se neque turpiter sonat, nec antiquis temporibus caruit honore. Sophistæ enim & Solon, & Pythagoras fuere, ut scribit Themistius in Orat. 4. qui cum animi & ingenii causa, non fraudis aut quæstus differerent,

tan-

tantam doctrinæ & sapientiæ famam collegere, quantam nemo ignorat, nisi omnem ignoret literarum historiam. At vero cum honesta & liberalis exercitatio in vitium decidit; multique se huic studio dediderunt, quibus aliud nihil propositum erat, quam ut homines minus sagaces fallacibus conclusiunculis implicarent, & ex alieno errore lucrum facerent; magna invidia Sophistæ laborare cœperunt, & in novam quamdam familiam compulsi sunt, quæ a germanis Dialecticis non quidem *δωδέμη* (ut verba ipsa Aristotelis teneam) sed *πρῶται* differret. Tanti ne igitur istorum audacia, qui nobilissimam facultatem corrumpere tentarunt, apud nos erit, ut eorum causa de iure nostro decedamus, in locum coacti tam angustum, quam angusta in rebus humanis veritas est? Totam ne igitur Logicam, levium Sophistarum odio, ad exiguam illam partem contrahemus, quæ ne Logicam quidem dicitur ab Aristotele? Si enim veritatis nomen suis terminis coercere velimus, ut nihilo plus significet, quam quod explicari per causam potest ac demonstrari, non Logici, sed Analytici juris est. Quod si vocem hanc latè sumimus ut omnia complectatur, quæ aliquo modo vera & necessaria sunt, tametsi per causam non demonstrantur; Logica quæ dicitur ab Aristotele, non ita veritatem occupavit, ut sola teneat. In hanc quoque segetem interdum Rhetores veniunt; nullisque sibi legibus edictum putant, ut vera ubi invenerint, iis abstineant. Id nisi esset, cur in Porticus & Lycea a Cicerone & Quintiliano mitterentur, ut divinarum humanarumque rerum scientiam sibi compararent? Cur & iura civitatum, & populorum

Rhet. 1.
1. c. 1.

mores, & Deorum religiones, & quidquid a Philosophis de natura scriptum est, cognoscere juberentur, si se ad imperitorum captum ubique conformare deberent; nihilque possent ex veritatis & sapientiæ fontibus ductum oratione explicare? Pauca sunt, inquit Aristoteles in lib. I. Rhetor. t. 91. *necessaria, ex quibus Rhetorici syllogismi fiunt.* Concedo esse pauca; sed tamen sunt aliqua. Ex quo sequitur illud, nullum esse locum, cujuscumque tandem sit notæ, Rhetori interclusum; sapienterque factum a Cicerone esse, cum illos ipsos, quos Philosophus noster ad Logicas disputationes paraverat, Oratoriis exercitationibus caussisque accommodavit. Topica dico; quorum interpretationem cum quæssisset Trebatius, ut est ejus libri initio, ad Rhetorem missus est. Quamquam mihi ex Topicis cito abeundum esse intelligo, quod pulcherrimam hanc artis partem, & natura primam, & usu planissimam, Dialectici nostri dudum omiserint, ut se totos alteri darent, quæ in judicando posita est. Moverant aliquando scholas rei tam necessariæ indormientes, viri doctissimi Agricola, Ramus, Gorscius, Titelmannus, Perionius, Carbo, Trapezuntius: sed quia nimis multa requirere videbantur, quæ simulari non possent, vicit consuetudo; jamque ætas nostra, cum Aristotelis Categorias, & pauca quædam de enunciationibus delibavit, octo ipsos Topicorum libros, tamquam alienos, prætergreditur, & in illo Analytico Mæandro, multiplici, obscuro, impedito consenescit. Omnis igitur eorum, qui nunc regnant, Dialecticorum industria ad argumenti refertur translationem, quod erat a nobis tertio loco positum.

Quia

Quia porro non unus est argumentandi modus, syllogismum & inductionem sibi sumunt, enthymema & exemplum relinquunt Oratori. Siquis autem ab iis quærat, quid sit enthymema & exemplum; alterum ad syllogismum, alterum ad inductionem referunt, tamquam partem ad totum, & imperfectum ad perfectum. Primum quidem hæc ipsa partitio satis ostendit, ea, in quæ cadit, genere saltem convenire: deinde illud quæri posse videtur, quomodo argumentationis forma imperfecta & angusta Eloquentiæ tribuatur, cujus natura nihil magis refugit, quam jejunitatem; plena & perfecta assignentur Dialecticæ, quæ copiam & ubertatem neque desiderat, neque capit. Sed num enthymema sit id, quod isti putant, & qua ratione differat a syllogismo, alias examinabimus. Nunc, quoniam in argumenti explicatione versamur, illud per mihi mirum videri solet, cur ab Aristotelis more desciscant, qui se pusillos Aristoteles putant, homines nescio qui, quorum oratio tota argumentis constat eodem cadentibus, & per veterem quamdam cantilenam numeratis, non brevis, non pressa, non facilis, non perspicua, non ulla denique earum virtutum prædita, quas ipsi magno supercilio ab aliis requirunt. Hosne ego Dialecticos appellem, hoc est acres & concisos disputatores, qui quæcumque proferunt, in longas & inanes propositiones atque assumptiones dilatant, crebris conclusionibus in orbem volvunt, bis terve singula repetunt, in minimas quasque particulas secant; ne illa quidem enunciata sine suis formularum ambagibus dimittentes, quæ notissima cum sint, nemo, nisi bardus, ad garrulitatis gloriolam impugnat? Si hoc

ex

ex arte fit, valeat Aristoteles, qui hac arte tota caret. Hæc enim vero illa Dialectica est, cum quæ nihil commune Rhetores habent; quæ tantum ab Eloquentia, quantum a sanitate, distat; quæ tota argutulis fallaciis constat ad ostentationum comparatis; quam nemo neque profiteri, neque mehercule intelligere potest, nisi, omni abjecta litterarum humanitate, in barbariem ac cœcū se se conjiciat. Quid? An tu, inquiet aliquis, ne illud quidem concedis communi opinione vulgatum, Dialecticorum esse adstrictum loquendi genus, fufum ac multiplex Oratorum? Nempe concedo libens: sed primum quidem velim, duo hæc genera recte finiri; quod certe non faciunt Logici nostri, dum rebus sunt pressi, verbis redundantes: deinde illud quoque velim, nequid nimis. Nam & Dialectici interdum cum rerum scientia eloquendi suavitatem conjungunt; qui mos est Aristotelis ipsius, Aristotelis dico, veteris illius Stagiritæ, qui Cræce scripsit, non Latine: & sæpe Oratores nudis brevibusque argumentis adversarium urgent; unde est illa causarum forensium pars, quæ dicitur Altercatio. Probo, equidem, vehementerque laudo, quod primum a Zenone dictum, multis deinde placuit harum rerum Scriptoribus, Dialecticam esse pugno similem, Rhetoricam palmæ: at simul illud moneo, utramque facultatem una eademque manu significari; una, inquam, manu, quæ neque contrahitur, neque diducitur, nisi per gradus. Atque ego hætenus perinde dixi, quasi cum veteribus Dialecticis agerem, qui toti in differendo erant; cum ad eos potius convertenda sit oratio, qui nunc scholas tenent, seque *cogitandi Artē* do-

docere profitentur. Horum *autem* duo sunt genera; alteri totam hanc laudem in eo collocant, ut notiones inveniantur a communi sensu remotissimæ, & in rerum universarum contemplatione positæ, quas ne illi quidem ex toto intelligunt, a quibus tractantur; alteri diligenti quadam idearum omnium, quæ formari possunt, meditatione, quid in re qualibet verum, quid falsum sit, perspicere student; & hanc sive scientiam, sive solertiam, quamvis in animo insistant, nec foras ad usum disputandi exeat, Dialecticam nominant Platonica loquendi consuetudine. Non quæro, in duplici hac cogitandi via, utri magis apposite cogitent; id dico, non esse mirum, istiusmodi studia, quamvis pulcra & sublimia, cum Rhetoricis non convenire, cum absint a Logicis quoque. Nihil potest esse nobilius, quam animum corporis pondere humi dejectum ad res altissimas meditando tollere, & veritatis lumine undique expresso collustrare; at nisi totum hoc in disputationes conferatur, & comprehendendi disputando possit, ad aliam quamdam pertinet facultatem, non ad hanc nostram, in qua versamur; sin autem & confertur, & comprehenditur, quid est, oro, causæ, cur cogitandi artem, quam disputandi, appellare malimus? Logicæ nomen in medium afferunt; *λόγῳ* autem ajunt rationem & cogitationem significari. Mitto, antiquum artis nomen, Græcis Latinisque familiarissimum, Dialecticam esse, hoc est disceptatricem, ut Cicero; disputatricem, ut Quintilianus interpretatur; mitto, ab Aristotele dici *διαλόγων τέχνη*, a Platone *προσομιλητική*, a Protagora *ἔρις κλέ*, ab aliis modo *ἑρωτηματική*, modo *ἐπιχειρηματική*; quarum vocum si ha-

si habenda ratio est, aliquid profecto amplius sonant, quam quod cogitatione perficitur: hæc, inquam, mitto omnia. Logica sit. Quid sentis de hac voce, M. Tulli? Te enim libenter interrogo, tamquam Apollinem quemdam, cujus auctoritatem si quis est qui contemnat, miror, non dicam, cur hic sedere audeat, sed quomodo hæc subsellia possit aspicere. *Altera* (inquit l. I. de Fin. c. 7.) *Philosophiæ pars, quæ λογική dicitur, est ars quærendi, ac differendi*. Percurrite singulas Organi Aristotelici partes; quidquid ubique præcipitur, id fere omne ad interrogandum & respondendum pertinet, & in quadam vertitur duorum, aut plurium concertatione. Omnes illæ de syllogismo regulæ; doctrina illa omnis de vocibus Categoricalis, de definitione, de divisione, de enunciatione; omnis denique ratio arguendi ac refellendi frigida est ac jejuna, si extra cogitationem non progrediatur. Jam vero quo se modo tuebitur Socrates, quomodo Pyrrho, quomodo Arcesilas, quomodo Carneades, quomodo reliqui veteres novique Academici, qui nihil sciri posse putabant, omnesque ingeniorum suorum contentiones ad disputandum referebant? Academicos dico? Dogmatici ipsi, atque adeo Græcia tota, disputandi studiosissima, omnem prorsus veri investigationem contemnit, quæ muta sit, & cogitatione finiatur. Habeant ergo sibi suam *cogitandi Artem* viri doctissimi, & ad eximia quæque invenienda nati; dum nobis in antiquo pulvere libenter manentibus communem illam multis ætatibus ac populis differendi rationem, quod æquum existimamus, non gravate relinquunt. Nunc illud fortasse requiretur, utrum

eos quoque Dialecticos cum Rhetoricis jungam ,
 qui se *Summulistas* dicunt , & in nectendis ac sol-
 vendis verborum cavillationibus otium & ætatem
 consumunt . Sunt illi sane magni ingenii magnæ-
 que industriæ disputatores , & , siquidem vera nar-
 rant , ducem sequuntur Aristotelem . Unde hoc
 sit , quove spectet , jam habete . Cum in ea tem-
 pora magnus hic Philosophus incidisset , quibus
 Megaricæ captiones valerent , eoque plus famæ
 sibi quisque compararet , quo plures posset suis
 interrogationibus irretire , & in arctum compellere ; id serio cogitare cœpit , quomodo insanam
 istam veritatis contaminandæ cupiditatem extin-
 gueret , vanosque homines ad silentium adigeret .
 Itaque ratiocinandi artem ingenti contentione
 scribere aggressus , miras subtilitates excogitavit ;
 quibus , tamquam clavo clavum , istiusmodi falla-
 cias truderet ; atque ab hac lue jam late fusa ,
 & in dies gliscente Philosophiam liberaret . Id
 posteris imitatione dignum visum est , & cum
 temporum felicitate Sophistas non invenirent ad
 oppugnandum , ipsi se abundantia quadam otii
 calumniari cœperunt , sibi que respondere ; & ,
 quæ prius necessitas fuerat , in ludum vertere ,
 De his Seneca epist. 45. *Nectimus nodos , inquit ,
 & ambiguum significationem verbis alligamus , de-
 inde dissolvimus . Tantum nobis vacat . Quid ve-
 ro si nobiscum viveret , totumque hoc artifi-
 cium videret infinitis rebus exaggeratum , quæ ,
 ut ipsius verbis utar , nec ignoranti nocent , nec
 scientem juvant ? Quid si grandia ista volumina
 aspiceret de ente prædicamentali & transcendentali ,
 de terminis univocantibus & univocatis , de
 dici de omni prioristico & posterioristico , de fu-
 turi-*

turitionis radice , de præcisionibus objectivis , de principio individuationis , de supposititalitate , suppositione , subalternatione , (sic enim inscribunt) quorum ne titulos quidem aut fando audisset , aut cogitando perciperet ? Cum enim id quoque in arcanis habeant , non oportere Philosophum usitate loqui , nemo ad illos accedere potest , nisi prius discat , quam cuique voci rem subjiciant . Novi equidem , morem hunc a Stoicis manasse , qui non sententia modo , sed verbis quoque a populo differre volebant ; sed ut multa a Zenone suo Seneca sumpsit de bonorum & malorum finibus , omninoque de beata vita , ita nodos illos , & ἀπὸρροις λόγους , in quibus reliqua Stoicorum turba sibi placebat , neque probavit umquam , neque duxit imitandos . Ex quo intelligitis , quid mihi sentiendum sit . Nihil magis Sophisticum putæ , quam quod ab hoc genere hominum adversus Sophistas disputatur . Opponunt enim acumina acuminibus ; & rigidam quamdam metiendi sermonis superstitionem tradunt , per quam ad oppugnandi & repugnandi exercitationem fortasse proficiscitur , ad eam , quam quærimus , veritatis illustrationem certe parum . Quod si teneamus , quid sit nomina pro rebus sumere ; ludere in ambiguo ; tribuere omnibus , quod convenit alicui tantum ; ex fortuitis necessaria colligere ; componere quæ non sunt componenda ; dividere quæ dividenda non sunt ; denique si illa captionum genera non ignoremus , quæ sunt ab Aristotele in Elenchis descripta , & ab optimis interpretibus ex communi consuetudine explicata , non erit opus istorum bibliothecis impalescere , ut per multas am-
ba-

bages & falebras tandem aliquando discamus ,
 signum cæleste non latrare , etsi *canis* nomine-
 tur ; Solem & Lunam non esse septem , quam-
 vis ex *septem* planetis sint ; poma non esse fu-
 gienda , licet *mala* dicantur ; quamvis Deus sit
ubique , tamen non esse adverbium . Quæstiun-
 culæ istæ tam leves , tam minutæ , tam frugis
 expertes , neque dicentem , neque differentem
 decent ; & quod idem Seneca monet , subtilius
 solvuntur , si contemnantur . Gravius quiddam
 est atque præstantius , in quo nos disciplinæ hu-
 jus nostræ rationem ponimus , & cum Oratoris
 opere conjunctum dicimus . Serio differatur oportet : serio autem differere , non est cavillosa ver-
 borum comprehensione populum admirantem ,
 quæ non intelligit , ludificare , aut cum ludifi-
 cantibus congregari ; sed certa ab incertis , a ve-
 ris falsa , probabilia ab improbabilibus , si fieri
 potest , & quatenus potest , plana & perspicua ora-
 tione separare : quæ quidem oratio quamdiu
 temperate fertur , Dialectica est ; ubi assurgit ,
 figurisque & affectibus incitatur , cognatæ facul-
 tatis nomen assumit . Abeant vero hinc apud
 barbaros , quicumque societatem hanc , non tam
 ab hominibus , quam ab ipsa natura conflata ,
 dirimere conantur , & Logicæ genere nescio quo
 nauseantes juvenum animos imbuere , per quod
 omnis antegressa litterarum cognitio , libero ca-
 pite & ingenuis moribus digna , oblitteretur .
 Quærant sibi alias terras , ubi se suamque illam
 tam exsuccam blâterandi formam venditare pos-
 sint , quæ cum hujus loci more atque instituto ,
 cum hoc Patavino ingenio ad humanitatem &
 elegantiam facta , cum hoc cælo atque solo a
 nu-

nugis alienissimo pugnat mirum quantum . Sed hic certe numquam pedem ponent, quamdiu vos, Viri doctissimi, quemadmodum facitis, exemplo vestro inter pauca præteritarum ætatum memorando resistetis. Audiant, si quis eorum tamquam vento jactatus ad hos parietes umquam accedit, audiant, inquam, ab his Philosophis, ab his Theologis, ab his Medicis, ab his Jurisperitis, quid sit vere & sapienter disputare; hinc cujusque rei quæ natura sit, & quomodo explicari debeat, si quid remanet sanitatis, aliquando cognoscant; ex hoc tamquam templo Palladis voces & oracula, hoc est disciplinarum dogmata rectis momentis examinata, & ad publicam felicitatem volentibus nolentibusque proposita, accipiant; ita denique statuunt, se, siquid sapere supra horum sapientiam velint, omnino desipere. Ego certe mihi disputandi leges non aliunde sumendas duco; quas ubique tenere tametsi pro dignitate non potero, voluisse tamen & contendisse, cum erit mihi semper apud æquos æstimatores honorificum, tum illa carebit invidia, quæ insolita afferentes comitatur. Hæc mihi exempla ante oculos posita dies noctesque contemplantur; & si quid umquam aut dicendo, aut docendo potui, in posterum eo conferam, ut ad hujus consuetudinem loci conformetur, in quo Dii hominesque Italicarum litterarum fortunam, multis casibus jactatam, statuisse videntur, & ad immortalitatem firmasse. Voluntatis hujus meæ consiliique testes habebo vos, lectissimi Adolescentes; teque in primis, nobilissime atque ornatissime *Prosyndice*, qui fraternæ laudis æmulator, non solum auctoritate reliquis præes, sed morum elegantia, gravitate, & splen-

& splendore quodam plurimum præstas: neque vero vos appellare auderem, si aut quippiam pollicerer, quod non esset e re vestra, aut quod polliceor in tanta celebritate, non quavis conditione præstandum putarem. Quod si rerum agendarum felicitas omine aliquo continetur, gratulor egomet mihi, quod primum hunc meorum laborum industriæque diem tu præsentia tua, optime ac præstantissime Senator, ornare volueris, ac pignus veluti quoddam mearum contentionum publico nomine accipere. Conspectus hic tuus admodum gravis, sed idem tamen longe suavissimus, ita me recreat atque confirmat, ac si Venetum ipsum Senatum, illamque majestatem summis Principibus verendam, repente in has ædes translatam viderem, ejusque me judicio ac sapientiæ committerem. *Mocenicum* nomen ex omni temporum memoria Patavinis faustum, & singulari quadam ratione, quantum in Republica licet, a nobis cultum, numquam se magis prodidit, & quale quantumque esset ostendit, quam cum tu, *Aloysi*, Præturam hanc dudum jacentem summo nostro bono suscepisti; tuaque ista prudentia plane Veneta, benignitate ista plane tua, gravissimis rerum angustiis ac difficultatibus aut levamen, aut solatium attulisti. Tene hunc virtutis ac beneficentiæ cursum a Majoribus cœptum; habes memorem Civitatem, in qua tibi tuorum benefactorum gratia diutissime constabit. Ego certe, ut de me spondeam, cum aliorum beneficiorum, quæ plurima & maxima accepi, tum hujus præsertim memoriam totius vitæ observantia studioque colam; & si quis addi sponte currenti

stimulus potest , tu mihi animo perpetuo obver-
faberis ; neque committam , ut quod opus tam
bonis auspiciis inchoavi , ullo umquam tempore
frigescat .

Habita est x i i i . Kal . Febr . MDCCXXIV .

EPISTOLA

AD LECTOREM

Præposita editioni primæ hujus Orationis.
AD GYMNASII PATAVINI MODERATORES.

JUVIT me, *SENATORES AMPLISSIMI*, *Oratoriam* *Artem* cum *Dialectica* vel ob id maxime conciliare, ut primum hoc laboris specimen jussu vestro suscepti ad vos ipsos ominis gratia afferre possem; & siquidem recte caderet, alia subinde generis ejusdem producerem, vestrisque nominibus longe splendidissimis exornarem. Nam ipsa per se *Dialectica*, ut est in *Isocratis* epistola ad *Alexandrum*, non pertinet ad viros *Principes*, qui neque inter se contendere verbis debent, neque aliis concedere, ut contra se disputent. Agnoscite igitur facultatem illius affinem, cujus in primis ad populorum regimen & reip. administrationem magnus est usus: Quamquam vobis totius rei literariæ moderatoribus nihil est ex hoc quidem genere, quod non magnopere conveniat; nisi ea forte de causa, quod ab auctore non satis idoneo profisciscatur. Et nimirum hoc restat excusandum, quod tam infirmi ingenii homo primum ad vos accedam daturus aliquid; deinde vero exiguum libellum promam, quod horæ unius opus videri possit. Ita sunt, credo, principia omnia; quæ si vos non improbabit, tempore ita crescent, ut etiam timendum sit, ne magnitudine ipsa aliquando laborent. Quidquid hoc erit, nutu vestro temperabitur, quibus, me totum fidemque meam ita obstringo, ut laboribus extinguere malim, quam aut ignavia deficere aut malitia fallere. Valere.

O R A T I O XIV.

DE DIALECTICÆ

AC RHETORICÆ DIFFERENTIA.

Habita in Patavino Gymnasio anno MDCCXXIX.

OMnes fere, qui in hunc locum ascendunt, ut publice doceant, diligentissime cavere solent in tanta ista, quæ sæculum tenet, opinandi licentia, ne quid forte proferant, quod aliquando revocare conentur. Ego vero illo ipso die, quo me primum vobis dedi, tale aliquid in medium attuli, & persuadere conatus sum, quod sane intelligerem, me non perpetuo defensurum. Quid enim? Cum contendebar, tantam esse Rhetoricam inter & dialecticam similitudinem, tantamque affinitatem, ut vix altera ab altera discerni posset, videbar ne vobis ex animi sententia loqui, an vero causæ temporique servire? Scilicet cum ex mitioribus studiis ad dura hæc atque aspera transirem, & ipse me collectis undique similitudinis rationibus solari quoquo modo conabar, & aliis nimia quadam cura in rem novam intentis admirationem excutere. Nunc quis me jure reprehendat sive Academicum hominem, ut mihi placet; sive Peripateticum, ut placet illis, qui studia nostra moderantur; quis me, inquam, jure reprehendat, si animo jam confirmato & ab humanis judiciis securo in contrariam partem dicere agredior; & ostendo, quam longo intervallo Dialectica a Rhetorica distet?

stet? *Mibi semper* (inquit Cicero in Tuscul. 2. c. 3.) *Peripateticorum Academiaeque consuetudo de omnibus rebus in contrarias partes differendi non ob eam causam solum placuit, quod aliter non posset, quid in unaquaque re verisimile esset, inveniri; sed etiam quod esset ea maxima dicendi exercitatio, qua princeps usus est Aristoteles, deinde eum qui secuti sunt.* Quamquam nihil est a nobis in prima illa exercitatione ad extrema ductum; sed ita quæ communia & similia sunt inter duo hæc studiorum genera commemoravimus, ut non dedecet hoc tempore, tamquam ex parte altera, afferre propria ac dissimilia. Addo etiam illud, venientibus primo in lucem hanc more majorum statim eloquentiæ campum patefieri; neque tam ab iis postulari in hujusmodi ingenii periculo, ut vera disputent, quam ut acute copioseque ostendant, se instrumentis illis non carere, quæ ad publicam disputandi formam necessaria sunt. At vero jandum dum occupata a nobis provincia, traditaque iterum ac sæpius veritatis inveniendæ ac judicandæ ratione, turpe esset, artium naturam adhuc obtegere; & per vana quædam simulacra, ad illius conditionem temporis quæsitæ, hominibus fucum facere. Accipite igitur non jam ab Rhetore, sed a Dialectico, quid inter utrumque differat, ne forte existimetis, artes ac disciplinas sine causa multiplicari.

Cum Dialecticam dicimus, vel institutionem quamdam significamus, quæ, recte differendi leges continet a rebus avulsas, & *docens* nominari solet; vel ipsam differendi exercitationem intelligimus, cum rebus, de quibus differitur, conjunctam, quæ *utens* communi scholarum nomine

appellatur. Eodem ferme pacto dividi Rhetorica potest, ut alia sit, quæ rationem dicendi tradit; alia, quæ in dicendo occupatur. Utraque igitur utrique conferri potest. Nos, nequid ambiguum afferamus primum Dialecticam *docentem* cum *docente* Rhetorica comparabimus; tum ad utramque *utentem* ordine deveniemus.

Dialectica igitur, primo illo modo si accipiat, est ars, quæ veri inveniendi ac judicandi præcepta tradit, qualia sunt, ea, quæ Topicis & Analyticis libris ab Aristotele comprehensa sunt; quæ qui tenet, quacumque in re versetur, recte differit, unde nomen ipsum dialecticæ est. Qui Artem hanc a Rhetorica differre nolunt, statim inveniendi præcepta communia faciunt; totamque illam institutionem Topicam, quam Aristoteles in Dialecticorum ditione posuit, ad Rhetoras propagant. Quod autem gravissimum est, id ipso fieri ajunt Aristotele auctore, qui initio Rhetoricorum multis verbis ostendit, argumenta in primis ad Oratoriam pertinere facultatem; eosque valde reprehendit dicendi Magistros, qui antea floruerant, quod nihil nisi de movendis animis & ornanda oratione præcepissent. Primum igitur animadverto, non defuisse ex veteribus sapientissimis viris, qui de argumenti inventionem nihil laborandum Rhetori existimarent. Non defuisse autem? imo verò fuisse omnes, qui de Rhetorica ante Aristotelem scripserant, si ejus testimonio credimus, quod nobis opponunt. Deinde concedo equidem, Topicam doctrinam causis adhibitam, idest quæstionibus finitis, quæ tempus, locum, personam respiciunt, in Rhetorum potestate esse; sunt enim cuilibet disciplinæ pro varie-

rietate materiæ Topica sua : attamen communia huius artis præcepta de generibus & formis, de causis & eventis, de absolutis & comparatis, de antecedentibus & consequentibus, ceteraque ordinis hujus per generales argumentorum classes digesta, & Logicis formulis expressa, non ab aliis quam a nostris, peti debent. Testem producimus illum ipsum, quem tanti faciunt, Aristotelem. Hic enim in Topicis libris, ut refert Catulus apud Ciceronem 2. de Orat. c. 36. *proposuit quosdam locos, ex quibus omni argumentandi via non modo ad Philosophorum disputationem, sed etiam ad hanc, qua in causis utimur, inveniretur*. Et sane cum Rhetorica & sit, & ab eo dicatur in libro Rhetor. 1. c. 9. *propago quædam & particula tum Dialecticæ, tum Civilis scientiæ; quemadmodum quæ ad mores & civilia instituta pertinent, non ipsa per se tractat, neque ex suo fundo ducit; ita aliunde mutuari debet quidquid sibi ad defendendam argumentis veritatem opus esse cognoscit*. Nolim videri difficultates difficultatibus augere apud eos, qui non facile concedunt, atque adeo ne intelligunt quidem, quomodo Rhetorica Civilis scientiæ pars sit. Id non una explicari ratione potest. Quidam ajunt, iccirco Rhetoricam eo referri, quod propria ejus materia actiones sint humanæ; ut est in Dialogo de Causis corrup. Eloq. c. 31. *Veteres intelligebant, opus esse, ut his artibus pectus implerent, in quibus de bonis ac malis, de honesto ac turpi, de justo & injusto disputatur*. Hæc enim est Oratori subiecta ad dicendum materia. Nam in judiciis fere de æquitate, in deliberationibus de utilitate, in laudationibus de honestate dicimus. Sed

quia res omnes, quæcumque in disceptationem cadere possunt; revera subiectæ Oratori sunt, quamvis aliæ magis, aliæ minus subjiciantur; alia quadam via Rhetorica ad Civilem rationem revocanda videtur. Sic igitur habete, tria esse in dicendo, quibus maxime victoria comparatur; primum ad dicentem spectat, cujus mores ad fidem faciendam maxime valent; alterum ad auditores, quorum animi affici debent atque inclinari; tertium ad rem ipsam, a qua probationes ducendæ sunt. *Ratio omnis dicendi* (inquit M. Antonius in libro Ciceronis 2. de Orat. c. 27.) *tribus ad persuadendum rebus est nixa; ut probemus vera esse ea, quæ defendimus; ut conciliemus nobis eos, qui audiunt; ut animos eorum ad quemcumque causa postulabit motum vocemus.* Quæ verba ex ipsis fere ducta sunt Aristotelis verbis 1. Rhet. t. 53. *Αἱ μὲν πίσεις εἰσὶν ἐν τῷ ἡθεὶ τῇ λέγοντος, αἱ δὲ ἐν τῷ τὸν ἀκροατὴν διαδεῖναι τος, αἱ δὲ ἐν αὐτῷ τῷ λόγῳ δια τῆ δεικνύαι, ἢ φαίνεσθαι δεικνύαι.* Adhibendi sunt igitur loci de vita & moribus ad conciliandos & permovendos auditores. Ac nisi volumus locos istiusmodi Rhetoricos facere, totamque Civilem scientiam suo jure spoliare; ne illos quidem, quibus ad probandum Oratores utuntur, Dialecticæ auferre debemus.

At quærat a nobis fortasse aliquis, si Topica doctrina omnino ad Dialecticum pertinet, qui fiat, ut eam tamen Rhetores tractent ferme soli? Dicam libere, quod sentio, quandoquidem mihi contigit in utraque facultate versari. Ex quo cœpit Rhetorica ante disciplinas rationales tradi, factum est, ut puerorum animi rebus vacui, haud aliter possent ad tolerabilem aliquam, si non elo-

quen-

quentiam, saltem loquentiam præparari, nisi dicendi magistri communes argumenti inveniendi locos in artem inferrent. Itaque nostræ huic disciplinæ Topicam doctrinam quasi clavam Herculi eripuerunt; ut jam Dialecticus de Topicis hiscere quidem audeat, aut plus paullo plus hiscere, quam licet in re ab alio usu capta. Quidam id censent eo fieri, quod cum olim Rhetorica, nondum inventa Dialectica, scholas occuparet, ipsi sibi Rhetores inveniendi præcepta formare coacti sunt; non quidem universe, quod postea a Dialecticis factum est, sed quatenus suo illi instituto, quod intra judiciorum controversias tenebatur, satis esse putabant. Quæ res in causa fuit, ut posterius eandem rationem secus, & ut sit in acquirendo jure, terminos prægressi, intra quos invenire quos sequebantur; ipsi Dialecticæ jam repertæ & ad summam perfectionem adductæ propria quædam hujus generis abstulerint, quorum in Rhetorica vix ullus sit usus. Qualiscumque tandem rei hujus causa sit, Stoici quoque ipsi, qui omnium subtilissimi in differendo habiti sunt, & ob excellentiam Dialectici nominati, Topica omittebant; non quod inventionem argumenti carere se posse existimarent, sed fortasse quod pars hæc ipsis prærepta, & juventuti mature tradita in Dialecticas scholas afferretur. Hoc nomine reprehenduntur a Cicerone in capite Topicorum secundo, qui locus notissimus est. Quamquam inveniendi argumenti artem qui totam Rhetori tribuunt, minus ægre ferendi sunt, quam qui, nostri quoque juris ratione habita, possessionem communem faciunt. Quid enim opus est, artes duas in rem unam venire, eodemque cardine

dine verti? Cum ego Dialecticus tibi aperui, quæ sint in genere univetslo cujusque rei facies, unde omnis inveniendæ veritatis ac defendendæ ratio colligitur, quid necesse est, esse Rhetora, qui doceat idem? Aut si Rhetor est, cur Dialecticus sine caussa consulitur? Aut si uterque idoneus habetur, quis tamen non videt, alterum esse dominum solummodo κρίσει, alterum etiam κρίσει; alterum uti propriis, alterum commodatis?

Utinam tamen hic hærent; nec in judicando, quod est alterum differentis munus, se nobis Rhetores conjungere vellent. Porro judicare nihil est aliud, quam, invento argumento aliquo, ita illud explicare verbis, & Logica trutina examinare, ut, quæ sit ejus vis, quantaque sit, perspicue cognoscatur. Id cum ex arte fit, quæ abstrusa latebant, statim emergunt; omnesque seu veri, seu falsi gradus recte cernentibus ac judicantibus se produnt. Vix puto esse aliquem ex vobis, qui non videat, totum id ad eam disciplinam pertinere, cujus est, ut Cicero scribit in Bruto c. 41. *rem universam tribuere in partes; latentem explicare definiendo; obscuram explanare interpretando; ambigua primum videre, deinde distinguere; postremo habere regulam, qua vera & falsa judicentur; & quæ quibus positæ sint, quæve non sint consequentia*. Definit profecto etiam Rhetor, dividit, argumentatur; sed ex legibus a Dialectica acceptis: in his autem ipsis non admodum diligens est, quod facile sibi putet orationis fuco fallacias oculere, & rem pro re cognitioni venditare. Sunt qui concedant, judicia veri ad Dialecticum pertinere: iidem tamen similia vero judicari ab Rhetore volunt; & quemadmodum
ille

ille syllogismi atque inductionis naturam aperit, quibus veritas manifestatur, ita hunc enthymematis & exempli leges explicare ajunt, unde efficitur verisimilitudo. Itane igitur, quot erunt veritatis gradus & conditiones, totidem constituentur disciplinae? Non sic profecto sensit Aristoteles cum scriberet in libro Rhetor. I. c. 5. *πότε ἀληθεὺς καὶ τὸ ὅμοιον τῷ ἀληθεῖ τῆς αὐτῆς ἐστὶ δύναμει ἰδεῖν*. *Ejusdem facultatis est, verum, & simile vero cognoscere*. Quamobrem idem eodem loco Rhetora ad Dialecticum mittit, ut ab eo argumentandi rationem sumat; quod cujusmodi sit diligenter attendite. Omnis argumentandi ratio procedit vel ab universalibus ad singularia, vel a singularibus ad universalia; hoc est, vel a mente ad sensus, vel a sensibus ad mentem. Primus modus syllogismum constituit, ut cum dico: *Affectio omnis differt a re, cujus est affectio; figura autem hujus tabulae est affectio ejus; igitur ab ea differt*. Hinc manat Rhetoricum enthymema, quod naturam syllogismi habet, nec ab eo differt, nisi modo quodam; ut nos alias ostendimus adversus Dialecticam turbam. Modus alter, qui a sensu ad mentem pergit, & ex singularibus colligit universale, inductio vocatur, cujusmodi erit, si dicam: *Prudentia, justitia, temperantia, fortitudo id habent singula, ut laudentur; laus igitur omnem virtutem consequitur*. Hinc enascitur Rhetoricorum exemplum: quod licet in singularia tendere videatur, & progredi ἀπὸ μέρους πρὸς μέρος, ut loquitur Aristoteles; attamen re ipsa tendit in universale, & ab eo vim suam capit. Nam cum dico: *Gracchi sunt occisi; ergo & Catilina debet occidi*: hujusmodi argumentatio eatenus valet, quatenus ta-

cita quadam virtute efficitur, si Gracchi sublati sunt, omnem seditiosum civem tollendum esse, proindeque & Catilinam. Quæ cum ita sint, nulla est Rhetorica agumentandi forma, quæ ad Dialecticam non referatur. Et ut a capite arcesam, tota veri judicandi ratio, imo & invenendi, ut est paullo ante demonstratum, nostra est; nec de illa præcipere aliquid, nisi ex hoc fonte petitum, Rhetores possunt. Quid est igitur, inquires, de quo præcipiant jure suo? Scilicet de modo ornandæ ac dilatandæ orationis. Esse (inquit Cicero in Orat. c. 32.) *perfecte eloquentis puto, non eam solum facultatem habere, quæ sit ejus propria, fuse lateque dicendi, sed etiam vicinam ejus atque finitimam Dialecticorum scientiam assumere. Quamquam aliud videtur oratio esse, aliud disputatio, nec idem loqui esse, quod dicere; attamen utrumque in differendo est. Disputandi ratio & loquendi Dialecticorum sit, Oratorum autem dicendi & ornandi.* Quid est autem per Deos immortales, cur Rhetoras suæ conditionis pœniteat? An levis operæ & exiguæ judicant, quod jam sit inventum, eloqui & expolire, nisi nostræ quoque artis munia sibi sumant? Teneat quisque fines suos. Cum rebus egent, a nobis petant; nos vicissim, cum verbis egebimus, ab illis mutabimur. Neque enim ii sumus, ut, quod nobis deest, turpi verecundia diffiteamur; aut cum fatemur, inquinatè tamen velimus obscureque disputare, ne ad alios artifices confugiamus. Utrique in omnem disceptationem venimus; idem tamen utrique præstare non possumus. Vires jungamus; nos illis argumentorum vim, illi nobis sermonis nitorem impertiantur.

Hic

Hic vero etiam a nostris mihi timendum video. Audiivi enim nonnullos, qui gravi supercilio dicerent, se non rhetoricare, sed veritatem quærere: quasi vero cum barbarie veritas coalescere possit, cum sermonis elegantia non possit. Quæ malum est veritas ista, quæ tam male habitat; quæ in luto volutatur; quæ lucem ferre non potest; quæ inter barbara & inquinata eminet, inter culta & nitida jacet? Nempe veritas Sophistica, quæ qualis sit, statim apparet, si ex suis tenebris & ambagibus educatur. Accipio excusationem, cum illud Manilii nobis occurrent lib. 3. v. 39.

Ornari res ipsa negat, contenta doceri.

Sed interim tamen mecum ipse reputo, quanta sit istorum hominum calamitas, qui suorum ingeniorum conatus ad monstra tam deformia adjecerunt, ut omnem respuant humanitatem. Nullum clarius esse puto argumentum pessimi, quam hoc ipsum, quod jactant ad excusandum. Nam quid isti simile Manilii habent? Ille rem novam atque intentatam Poeticis numeris comprehendere nitebatur, planetarum stationes, sortium discrimina, horoscopus, athla, & alia id genus Astrologica nomina, quæ ne flecti quidem Latine poterant. At qui naturales disciplinas, aut civiles, aut sacras tot locis, tot ingeniis, tot litteris elegantissime proditas atque explanatas, rursus dare aggrediuntur, novisque commentationibus amplificare, qua fronte Manilium appellant, & Poetam, & pro illo instituto nitidissimum, ut cœnum fordesque suas tanto nomine tegant? Appellent Ciceronem potius, omnium litterarum omnisque doctrinæ magistrum; & ab eo tandem aliquando discant, quo se modo

do metiri debeant, & quibus terminis suas contentiones definire. *Fieri potest* (inquit Tusc. l. c. 3.) *ut recte quis sentiat; & id, quod sentit, polite eloqui non possit. Sed mandare quemquam litteris cogitationes suas, qui eas nec dispo- nere, nec illustrare possit, nec delectatione aliqua allicere lectorem, hominis est intemperanter abutentis & otio & litteris.* Qui ita scribunt, perinde faciunt atque illi, qui optimas dapes in mensa conspurcant, ne ab aliis tangantur; ac proinde *suos libros*, ut idem ait Cicero, *ipsi legunt*, ceteri stomachantur. Magna hæc apud vos animi confidentia dico, ubi nemo sibi dicta suspicari potest. Quilibet vestrum & sumit ipse, quæcumque potest, ab arte dicendi, ad squalorem suarum disputationum detergendum; & alios plura sumere ad nitorem & ornatum, dum intra modum faciant, sine invidia & sine obtreptione patitur.

Sed jam de Dialecticæ, ac Rhetoricæ præcepti satis multa diximus. Nunc ad utriusque usum veniamus oportet. Et ne ab ordine in parte prima instituto discedamus, videtur ne vobis Orator communibus locis eadem ratione uti, atque Dialecticus? Hic plenas & perfectas definitiones requirit; ille descriptione quavis contentus est. Dialecticus dividendo & partiendo cavet, nequid desit, nequid redundet; Orator nihil fere huiusmodi habet legibus adstrictum. Alter causas rerum proprias & proximas, eventa causis respondentia, signa necessaria, antecedentia & consequentia adhibet in argumentando; alter causas quaslibet idoneas existimat, quamvis alienas & remotas, eventa fortuita, signa sive adjuncta sive conjuncta, affectiones cujusquemodi rerum ac

per.

personarum ; uno verbo , quidquid aliquo modo valet ad tractandos sensus hominum, & popularibus opinionibus imbuendos. Dialecticus refert probationes suas ad res ipsas, Rhetor ad auditorum animos accommodat : quia hic movere studet ; ille non item , satis beatus , si vicerit. Quid opus est pluribus? Orator cum populo agit, Dialecticus cum sapientibus ; ille actionem , hic cognitionem spectat ; illius virtus fere tota incivilibus negotiis cernitur, hujus in disputationibus scholasticis ; alter vincere acutis interrogationibus, alter persuadere morata oratione conatur. Hinc , opinor , manifestum est , quam diversis indigeant ad inveniendum locis ; eosdemque cum adhibent, quam diversa ratione adhibeant.

Sed longe maxima in usu veri judicandi harum disciplinarum differentia est: Quamvis enim ratiocinandi forma una sit, a Dialecticis profecta ; attamen aliam quamdam rationem nomenque induit, cum Rhetoricis argumentis inducitur. Nos , quia vera tantum, & veris proxima quaerimus, syllogismis atque inductionibus disputamus ex ipsa rerum natura petitis, & ad exquisitas artis leges castigatis: Oratores, qui persuadere quovis modo student, & populum ducere , primum quidem externa quaedam argumentandi genera adhibent , ex tabulis testibusque dicta ; deinde parium comparatione utuntur , quorum genus omnes exemplum vocant ; tum , ad interna quoties veniunt, non vera & necessaria curant, sed veris ac necessariis quoquo modo similia. Probationes porro ipsas , quarum partes Dialectici uno ordine semper efferunt , eoque recto, Oratores multipliciter variant & invertunt,

tunt, a complexione fere incipientes, & in propositionem desinentes. Quo spectat illud Cicer. in Partit. c. 13. *Altera argumentatio* (idest Rhetorica) *quasi retro & contra*, prius sumit quæ vult, eaque confirmat; deinde id, quod proponendum fuit, per motis animis, jactat ad extremum. Quid quod Dialectici universi generis quæstiones tractant, quarum finis non ultra cognitionem & victoriam in disputando progreditur; Oratores autem, quorum opera quæstionibus finitis est adjecta, id propositum habent, ut eos, quibuscum agunt, ad assensionem & actionem trahant, inclinent, impellant? Ex quo fit, ut Dialectica argumenta Græci dicant *ὑποθέματα*, idest, opinabilia; Rhetorica *πείσανα*, idest, persuasibilia. Neque enim satis Oratori est ita in foro, aut in Senatu dicere, ut qui audiunt, se minime pares resistendo fateantur; nisi animo victi atque inclinati id assentiendo probent & faciant, ad quod oratione impelluntur. Dialectico linguam vicisse fatis est; quamvis ille, quicum disputat, ut scribit Seneca ep. 82. *ad confessionem perductus aliud respondeat, aliud putet*. Hoc nihil est, si recte reputamus, in præsentī negotio valentius: quandoquidem nulla major excogitari distinctio potest, quam quæ oritur a fine, in iis præsertim facultatibus, quæ instrumenti rationem habent, & aliis inserviunt. Vulgo ea solet haberi differentia princeps, quod Dialectici presse & anguste, Oratores fuse lateque differant; Dialectici loquendo, Oratores dicendo; illi jejunis aridisque interrogatiunculis, hi plena perpetuaque oratione. Alii totum discrimen hoc contemnunt, tamquam in modo, non in re positi.

positum. Sed revera gravissimum est, & ab ipsa istarum artium natura officioque petatum. Et enim, si rem altius ab ipso capite repetere volumus, differentis officium est, primum quidem eas notiones invenire & apte conjungere, quæ vera germanaque societate sibi cohærent; tum eas quoque componere, quæ aliquam inter se affinitatem aut similitudinem habent. Primum illud qui præstat, Dialecticus dicitur; qui in altero excellit, Oratoris nomen sibi adsciscit. Uterque autem in Sophistam degenerat, si ea colligat, simulque sociare velit, quæ sibi respondere videntur, nullo tamen modo respondent. Dialecticus igitur cum ea conjungat, quæ vel natura, vel firmo quodam sapientum judicio inter se continentur, modo res clare nitideque explicet, nullis præterea indiget adminiculis. At Orator cum levia multa affinitatis ac similitudinis genera complectatur, quæ vel a suspitione nascuntur, vel a vulgari persuasionem, vel ab ipsa etiam sermonis ac litterarum figura, tam tenue differendi genus modis omnibus, quoscunque causa capit, fulcire & roborare debet, tum miscendo animi motum, in auxilium adscita Civili scientia, tum augenda & coloranda oratione, quæ ipsi propria supellex est.

Hæc cum ita sint, non tamen negare ausim, duas has facultates inter se coire, seque mutuo sustentare; ut in uno eodemque sermone utriusque vires ac virtutes appareant. Id cum fit, inventio ac dispositio Logici juris est; elocutio & actio pertinet ad Oratorem: quod recte vidit, & laculenter explicuit acerrimo vir ingenio, Gaspar Scioppius in Pædia Politices p. 21.

Qui rem his momentis expendet, jam intelliget, cur olim integra oratione contenderim, ad Rhetoricam accedenti magnam esse in primis verborum curam suscipiendam. Nam cum filius Rhetoricis exercitationibus formatus est, cetera subeunt aliunde adscita, & ad fidem faciendam facile promoventur. Minutuli quidam declamatores, qui plus judicant, quam intelligunt, statim putarunt, me veteres artium fines movisse, ac veluti Gracchum quemdam reip. litterariæ tranquillitatem perturbasse. Itaque alii alia requirere, iidemque alio tempore alia, quæ me artis ignoratione, quam a me ipso accepissent, omisisse fingebant. Sed cum maxime nitebantur, Tullianis formulis ex Nizolio sumptis & insulse compactis, modo hoc, modo illud Rhetorici adicere, informe nescio quid & confusum edebant, falsa quadam Latinitatis specie oblitum, in quo nihil esset, nisi sonus inanis. Hos ego jamdiu, qui tam stulte obtrectando inclarescere student, in ordinem coegissem, nisi navi & honesti hominis ira faciem hanc Rhetorici ludi prorsus indignam existimassem. Est illis supplicii loco *Et thus*,

Et piper Et quidquid chartis amicitur ineptis ?

E P I S T O L A

A D L E C T O R E M

Præposita editioni primæ hujus Orationis.

AD GYMNASII PATAVINI MODERATORES.

Quemadmodum Oratio hæc non potest ab illa separari, quam habui, cum primum publice docere cœpi, ita eisdem auspiciis uti debet, idest vestris. Aliter se esset, viri auderem ad exigui libelli præsidium nomina tam splendida compellare. Quamquam, utut est, res istiusmodi qui mole mœtatur, nihilo plus videt, quam quod in sensus incurrit. Ac siquid est in mole pretii, ea mihi litterarum pars a vobis commissa est, in qua non difficile sit grandia volumina invenire. Nam cum superioribus annis opinio increbuisse, Dialecticam esse fallendi artem ad alexandas scholasticas pugnas, fallendi autem viæ sint plane innumerae; factum est, ut non singuli modo homines, sed Collegia quoque in idem institutum sacramento adacta, bibliothecas potius, quam libros, ederent. Ego cum a Cicerone didicissem, disciplinam hanc nihil esse aliud, quam viam & rationem veri inveniendi; recta autem ad verum via una sit, eaque brevis; omnes ingenii mei contentiones eo contuli, ut veterem simplicitatem ac brevitatem revocarem. Habuistis alias rei hujus testimonium; & nisi me amor verum mearum fallit, etiam probastis. Nunc mihi visum est, in litterarii hujus curriculi instauratione Dialecticæ naturam magis magisque a-

perire; & a gravi quadam ambiguitatis suspicio-
ne, in quam cum ab aliis, tum etiam a me ipso
olim conjecta fuerat, liberare. Quod volui, num
recte præstiterim, vestrum erit judicare; pronam-
que in hac studia voluntatem, non verbis, sed
re, ut profecto soletis, promovere.

245

O R A T I O X V .

Habita ab Adolescente Scholastico ad instauranda
Artium Studia Gymnasii Patavini.

De Litterarum & Artium felicitate.

A Nimadverti (NN.) omnes fere Oratores, qui superioribus annis in hunc ornatissimum locum ascenderunt, de artibus ac literis verba facturi, unam ex omnibus Medicinam sumpsisse, de qua dicerent, in eaque una versatos esse. Quasi vero dies hic non artibus omnibus recensendis institutus sit; aut Medicinæ nomine ipsa quoque Theologia, Mathesis, Philosophia, Humanitas denique ipsa, & omne litterarum genus contineatur. Ego vero artibus ritu solemini proludere iussus, ita de universis dicam, ut nulla de silentio nostro queri possit; ita universas defendam, ut nullius causa prætermissa videatur. Placet enim mihi eorum criminationes refellere; qui antiquitatis admiratione capti, ac pæne lymphati, sæculi hujus studia contemnunt; nihilque probant, nisi *quæ terris semota suisque temporibus defuncta vident*. Contendam igitur, illos injuria queri, qui de nostrorum studiorum conditione queruntur; & quantum in me erit, conabor ostendere, ad litterarum & artium felicitatem nihil prorsus hac ætate desiderari. Id dum facio, tu primum fave, Præsul amplissime, qui totus ad facilitatem & benevolentiam compositus es: favete vos deinde, præstantissimi Civitatis hujus Moderatores, in quorum præsidio ac tutela non ego modo tan-

tulus adolescens , sed universa hæc clarissimorum virorum Corona libentissime conquiescit . Tu quoque nobis adesto auspicio tuo , nobilissime ~~Pro~~-Rector ac Syndice , & hoc primum die fac ut significes , qualis in posterum toto litterario curriculo futurus sis .

Duo sunt , quæ passim queruntur gravissimi antiquitatis patroni , & esse jam nimio plus a veteri studiorum industria descitum ; & in hac tamen artium ac litterarum incuria non deesse homines , qui novo quodam usi critices studio , Scriptores ipsos vetustate verendos ac prope sacros , sine ulla verecundia aggrediantur . Alterum illud cum sit minime verum , minime criminofum alterum ; non erit , opinor , difficile utrumque refutare : eisque re tota litteraria inter dicere , quæ privatas ignaviæ suæ causas in communem temporum conditionem stultissime conferunt . Quid enim deest hoc tempore homini , non invito prorsus Apolline nato , ad omne litterarum genus vel in patria , vel non procul a patria facillime capeffendum ? Quam multa in omnibus fere urbibus ad liberalem juventutis institutionem constituta Collegia ? Quot ubique artibus ac disciplinis excolendis positæ Academiae ? Quam varia ad animi corporisque cultum inventa exercitationum genera ? Ut jam non toto orbe , quemadmodum olim , magnis impensis ac laboribus conquirendi Magistri sint , sed contra Magistris innumeris ubique invitantibus , juvenus ipsa evocari debeat , rogari , cogi . Numquid est igitur , cur heroicæ illi Pythagoræ , aut Platonis ætati invidemus , quorum alter ut edoceretur , Ægyptum , Persiamque totam lustrare coactus est ; alter &

Ta-

Tarentinos sapientes adire, & Locrenses, & Ægyptios, & alibi sane multos? An vero illa sui desiderium reliquerunt aurea, ut appellant, Romanorum tempora, ad quos nec pervenere litteræ nisi sero, & cum pervenisse visæ sunt, in Atticam tamen ad eas comparandas migrare oportebat, aut Atticos homines domi alere; quod pleraque melius Græce, quam Latine, quædam etiam Græce tantum disputari posse crederentur? Illud ipsum Civile jus, quod nusquam amplius esse poterat, quam ibi, unde jura toti terrarum orbi dabantur; ita tamen erat, jejunum, ut se triduo jurisconsultum fieri posse, Tullius in causa Mureniana jactarit. Nunc autem & facultatum omnium professores passim occurrunt, & facultates ipsæ amplissimæ sunt, & qui ad eas contendunt, tanto sunt ubique numero, ut Collegia quædam loci angustia laborare cœperint. Sed qui nobis veteres Athenas opponunt, aut Latium, auctoritate magis & fama tantorum nominum, quam re ipsa congrediuntur; cumque nos litterarum atque artium initia eo libenter referamus, quid est, cur illi incrementa longe maxima nostræ huic ætati gravate concedant? Ætatem porro nostram cum dico, ab Antoninorum usque imperio memoria repetens, sæcula statim apage prope duodecim; quibus accisæ litteræ atque prostratæ, semel atque iterum efferre caput conatæ sunt, sed rursus labefactatæ miserrime contabuerunt. Eo velim mentem advertant severi nimium rerum nostrarum contemptores; tum vero ex fœdo illo Musarum squalore ac situ judicent, utrum jure nos beatissimos hac in parte prædicemus. Nihil est, cur dissimulent, & iniquissimis Attilæ

edictis Latinitatem primum exulare iussam, & litteras deinde omnes usque adeo fuisse probro, ut Amalasuntham Theodorici uxorem gravissime increparint Gothi Principes, quod Athalaricum filium præceptoribus instituendum tradidisset. Putabant enim stolidissima capita, litterarum studio frangi ingenia hominum, & ad otium inclinari; eaque erat in primis egregiæ fortitudinis commendatio, si quis ne scribendi quidem artem tota vita didicisset. Hinc non barbari modo Reges Theodoricus Ostrogothorum, Vithredus Cantix, & alii præterea multi fuere scribendi imperiti, sed & Chlodoveus, & senior Justinus, & ipse ille Carolus magnus, elegantiorum ceteroquin artium pro ea temporum calamitate instaurator. Ad Ecclesiam videlicet, tamquam ad asylum confugerant pulsæ undique litteræ; jamque obtinuerat consuetudo ad meliorem usque ætatem sermone scriptisque usurpata, ut litterati quicumque essent, Clerici appellarentur. Sed quam ibi quoque acceptæ non laute? cum argumento constet non uno, & Clericos bene multos, & Presbyteros quoque, addo etiam, quod calamitosissimum est, Episcopos aliquos, ne scribendi quidem artem tenuisse. O vos miseros, quicumque aut hæc ignoratis vulgata per omnes, aut cum ignorare nullo modo possitis, nescio qua tamen morum perversitate a veritatis confessione alienissimi, in præteritorum quotidie temporum laudatione versamini! Quis nunc non dicam Princeps, non patricius, non civis paullo honestior, sed sutor, sed tonsor, sed agricola in sua illa fortuna aliquanto copiosior, qui non litterulas aliquas, seu faventibus Musis, sive adversis, sibi comparet? Neque vero est, cur
bella

bella caussati majores nostri vix umquam intermissa, turpissimæ inscitæ caussas in fata potius, quam in hominum segnitiam tarditatemque conjiciant; cum bellum intuiti, quod sæculi hujus initia fœdavit, facile intelligere possimus, nec plures umquam uno tempore ad arma procurrisse gentes; nec opibus odiisque majoribus in mutuam perniciem conspirasse; nec latius ad humani generis exitium protulisse luem; nec diutius in magna varietate fortunæ constantiam retinuisse. Quo tamen tempore utrum est aliquid tota Europa de veteri Musarum disciplina remissum? Numquid aut sublata litterarum studia, aut impedita, aut paullum retardata? Ne vivam, nisi per annos ferme quindecim, quibus acerbissimo incendio conflagravimus, & novæ institutæ sunt artium pulcherrimarum Academiæ, & veteres aliquæ jam intermortuæ rursus excitatæ; & innumera excusa volumina, & litteratorum commercium mirum in modum amplificatum. Tutæ enim litteræ innocentia sua, vel in castra ipsa libere excurrunt; ictoque jam olim cum armis fœdere, commune sibi cum illis nomen, ut est a Græcis sapientissime confictum, Palladem constituerunt. Videtis, opinor, Auditores, quam nullum mihi negotium faceffant, qui litterarum gloriam tam longe repetunt.

Sed profecto major quædam cum iis futura pugna est ac difficilior, qui duobus ante nostrum proxime sæculis bonarum artium laudem ita deferunt, ut partem vix minimam ad nos redundare patiantur. Floruit enim revera per eam ætatem & in Italia, & extra Italiam ingens quædam doctorum hominum copia, qui bonas artes

ac litteras , illuvie situque obsitas , in pristinam lucem ac dignitatem vindicarunt . Sed quemadmodum iis solet contingere , qui per avia loca & abrupta , procul a luce hominumque commercio , iter susceperunt , ut cum denique in amœni alicujus ac belle ædificati prædioli conspectum exeunt , ad Hesperidum hortos repente se raptos existiment ; tantamque animo capiant delectationem , ut cetera subinde , quæ invenerint , multo licet amœniora , non valde mirentur ; ita erutæ tunc primum ex tenebris suis litteræ adeo repentino splendore hominum oculos perstrinxerunt , ut nihil amplius ad eas accessisse diuturni temporis opera videatur : immo præclare secum agi aliquando putent , si usu ipso quasi protritæ , de parta olim gratia & existimatione non multum amittant . Ceterum quis non videt , quam nunc late diffusa Græca Latinaque eruditio , ab elegantioribus populis ad Sarmatas quoque ipsos , & Moschos pervenerit ; quæ exiguis quondam terminis conclusa , non tam re ipsa , quam spe majoris progressus laudabatur ? Quod si non totam litterarum provinciam uno linguarum studio contineri velimus , ut profecto non continetur , quam sibi exiguam laudem , ac pæne nullam in ceteris facultatibus , ac disciplinis tempora illa pepererunt ! Jacuere Philosophica studia , jacuere Mathematica ; nemoque unus inventus est ad sæculum usque decimum septimum , qui Philosophi dignus nomine , veterum Sectarum jugum excuteret , rerumque naturalium scientiam novis inventis illustraret . Resonabant undique Aristotelis nomina & Platonis , Hippocratis & Galeni , Euclidis & Archimedis ; jamque sibi quisque vel

Phi.

Philosophi, vel Medici, vel Mathematici laudem sine controversia tribuebat, si, quæ illi tamquam ex tripode tradidissent, per quamdam quasi historiam memoriter didicisset. Primi vos scilicet extitistis, Galilæe in Italia, Bacon in Anglia, Helmonti in Belgio, Gassende in Gallia, qui antiquis repagulis tandem aliquando refractis, studiorum pomeria magno animo protulistis. Tum vero sublato veluti libertatis signo, Cartesius, Hervæus, Bartolinus, Borellius, Malpighius, Leibniti, Neutonus, & ubique innumeri, tanto conatu in barbatos illos scholarum Principes ac Dominos irruerunt, ut de antiquissima possessione prope dejecerint. Jam enim non singuli homines, sed magnæ quædam societates, studiorum ratione conjunctæ, meditando, investigando, experiundo, ita præsertim animalium Historiam, Anatomen, Mathematicam, Meteorologiam emendarunt, auxerunt, ornarunt, ut non illæ quidem olim fuisse minores, sed omnino vix fuisse videantur. Pudeat ergo Capreolos, Toletos, Durandos, Jandunos, Piccolomini, & id genus alias ejus ætatis delicias, quibus piaculi loco fuit Aristotelicos terminos, tamquam Herculis columnas, tantulum præterire; nec velint cum hominibus nostris, ad præclarissima quæque inveniendâ natis, in laudis contentionem descendere.

Sed nimium ajunt abuti nos inveniendi libertate; jamque honestissimam illam Philosophiæ propagandæ industriam in temerariam carpendi licentiam degenerasse. Hic enim vero, Auditores, necesse est de nostra levitate fateamur; si modo ex vitiosis nescio quibus triobolarius Philosophorum conatibus quippiam in nos temporum conjunctione redundat. Sunt enim, ut in castris, i-

za in hæc philosophandi palæstra gloriosi quidam milites, seu potius gladiatores, qui in magna virium infirmitate præstandi libidine ducti, laudatissimos totius antiquitatis viros injuriis strepituque laceffunt, secumque ipsi diu sine hoste colluctati, de parta demum victoria, deque profligato Stagirita sibi magnifice gratulantur. Stagiritam enim appellant pyrgopolynicæ isti, quem virum, bone Deus! ita inquam appellant Aristotelem, quasi unum de turba sine nomine, cui nihil sit gloriæ præter patriam. Ecce tibi homines, qui artem Criticam in hujus sæculi invdiam adduxere. Quorum vitio si quis censet studium per se optimum ablegari oportere, cur non is artes ceteras, & bona generis humani universa ableganda putat, & procul removenda, quod aliquando abutentium malitia in hominum perniciem convertantur? Ceterum si res non aliunde, quam ex natura sua, judicanda sunt, nihil est, aut excogitari potest in toto litterarum genere præstantius, quam libera illa, eademque honestissima Scriptorum censura, quæ parum detorto a Græcis nomine Critice appellatur. Hanc si tollas, noctem quasi aliquam veritati offundis, & atrum quoddam artibus ac litteris chaos inducis, quale fuisse ab initio orbis totius Poetæ fabulantur. Hæc enim non una aliqua facultas est definitis regionibus circumscripta; sed late vagatur facultatum omnium vindex, ubique in provincia sua, ubique domina, quoties aut falsa detegere, aut obscura illustrare, aut expedire confusa necesse est. Huc tamquam ad Lydium lapidem Chronologia, Historia, Philosophia, litteræ demum cujuscumque generis universæ revocari per omnes

omnes ætates, consueverunt; tantumque crevere singulæ copia rerum, & fama celebritatis, quantum illis industriæ pro temporum varietate navarunt Critici homines. Proinde qui nos hoc nomine reprehendunt, conanturque ad ignavam rerum omnium patientiam adducere; ii videntur mihi litteras oppugnare ipsas, & conditionibus premere multo durioribus, quam passas olim accepimus, cum barbarorum illuvione obrutæ diutissime conticuerunt; quod longe præstet, litteras esse plane nullas, quam esse depravatas. Sed qui ad ætatis suæ mores sunt adeo delicati, nihil ne umquam apud Græcos offenderunt, nihil apud Latinos; quod Criticam sapiat libertatem? Numquamne Plato, boni viri, in Parmenidem, in Protagoram, in Zenonem censoriam exercet potestatem? Numquamne in Platonem ipsum Aristoteles, in Aristotelem Theophrastus, & ne singulos homines percenseam, Scholæ omnes in se mutuo? Itane igitur Aristophanes Grammaticus, & Aristarchus fuere meticulosi, itane Socrates ipse vir, siquis alius, ea tempestate modestissimus, ut nihil umquam in Hesiodo, in Theognide, in Pindaro, in Homero castigare ausi sint? Memiserum, qui hæc tanta contentione disputo, quasi vero ullus in hac hominum corona lectissima possit esse dubitandi locus, quin Græcia per assiduas contentiones ad eam litterarum gloriam pervenerit, quæ posteros deinde omnes in sui admirationem pertraxit. At Romani minus certe contentiosi. Minus tamen etiam sapientes, quod & sero admodum disciplinas susceperint, & cito intercidere passi sint. In sua tamen illa, qua usi fortuna sunt litterarum & artium, unum

gen.

gentibus aliis opponunt Ciceronem, qui, quæ plurimum valebat facultate. Oratorum omnium ingenia viresque ad trutinam revocavit in pulcherrimo illo de claris Oratoribus libro; cum idem ipse tantus vir, Calvi Brutique censura non caruisset. Quod si ad ea sæcula descendamus, quæ vel ob Hetruscas litteras egregie cultas, vel ob Græcas Latinasque reparatas, aureis proxima solent appellari, quanta nobis repente se se offert utilissimarum seges contentionum! Ecce tibi manus conferentes, hinc Politianus cum Scalla, Nizolius cum Majoragio, Sigonius cum Robortello; illinc Castelvetrius cum Caro, Guarinus cum Norezio, Tassus cum Salviato; tamque præterea inter se multi, quot fuere per ea tempora litterati: quorum si quis forte fortuna præsentem caruit adversario, omnem antiquitatem provocavit. Tantum enim abest, ut cordati Scriptores pugnas detrectent, aut ægre recipiant, ut potius undique sibi adversarios comparent; seque non raro in se ipsos, quod maxime mirum est, fictis criminatibus arment. Adeo se tenuem adeptos gloriam existimant, si nulli videatur invidenda.

Quæ cum ita sint, etiamne eorum querelas pati possumus, qui nullius causæ patroni, in huius ætatis Criticos quotidie declamant! Cum enim illi nihil trutina dignum efferant, quique trutina castigantur, in hoc sibi etiam placeant; cur non aliquando ridiculam curam abjiciunt, & suis potius, quam communibus incommodis remedia quærunt? Sed nolunt, mihi credite, præclaram illam inertiae excusationem amittere, quod nihil sit tutum a Criticorum injuriis. Verum injuriosi siqui sunt in aliorum scriptis judicandis, eos
ego

ego non Criticos, sed conviciatores appello: nec satis intelligo, quo jure in litteratorum numerum obrepere velint, si ea non sunt humanitate imbuti, quæ cum litteris adeo conjuncta est, ut in ipsum litterarum studium humanitatis studium nuncupetur. Solent enim homines liberaliter educati, bonisque artibus ac disciplinis instructi, non tam inter se opinionis contentione, quam mutuis officiis certare; fitque plerumque, ut hujusmodi controversiæ, magno partis utriusque consensu compositæ, vel veteres benevolentia necessitudines confirmant, vel novas constituent, ad litterarum & artium commoda magis magisque propaganda. Ne igitur sæculo nostro injusta de causa bella moveant; discantque suum esse Criticæ exercitationi campum, longe lateque patentem, præter obtreptiones & sumptas de trivio contumelias. His qui delectatur, Momus quasi aliquis habetur inter Musas; cui si locus est in Republica litteraria ullus, non ea conditione est, ut nobis ad imitandum proponatur; sed ut, quid potissimum fugere debeamus, sua fœditate demonstraret. Erit hoc etiam ad ætatis hujus felicitatem referendum, ut cum bonorum copia tanta sit, quanta olim certe numquam, mala ipsa, quæ rerum humanarum conditionem sequuntur, in usum aliquem bonum convertantur.

Sed ab intento jam cursu me temporis ratio revocat. Multo vero magis vos ipsi revocatis; quos magna cum animi mei lætitia præsentis intueor, clarissimi Professores; quorum singuli vel præstabilis scientiæ, vel artis egregiæ, vel mitioris alicujus facultatis; vel omnium simul facultatum & artium eruditione præditi, exemplo magis

vestro, quam ullius possit oratio, importunos antiquitatis laudatores ad silentium compellitis. Illud propterea est reliquum mihi unum, ut hos, qui me circumstant, Adolescentes diligentissime moneam, ne tanta sæculi fortuna, ne parentum suorum cura, ne tot insignium Professorum industria, ne Principis Serenissimi liberalitate ad otium abundantur. Tanto enim major secutura ignavos poenitentia est, quanto circa se plures litteratos viros, quocumque se verterint, aspicient.

E P I S T O L A

Præposita editioni primæ hujus Orationis.

AD ASSANIUM LASCARUM
ARTIUM SYNDICUM.

VEteri instituto receptum est, ut Orationes, quæ in hoc Patavino Gymnasio ad instauranda literarum & artium Studia quotannis haberi solent, Syndicorum nomine & auspiciis in publicum emittantur. Cur ita faciat Orator quilibet, satis causâ habet, quod ita semper fieri consuevit. Ego vero, cum ad te venio, si more veniam, & id facere me dicam, quod ceteri faciunt, injurius profecto sim & ingratus. Domi scilicet auspicia sunt; Græcus Græcum, Sodalis Sodem appello: nec ego alium invenire poteram, in quo spes meas libentius collocarem: nec tu alium, a quo officia magis debita reposceres. Quod si in hujusmodi rebus nobilitas in primis spectari solet, qua potissimum homines Superum beneficio hominibus excellunt, quis est in tota Græcia, qui se Lascaris præferre audeat? Nullum prope est Græcæ historiæ monumentum, in quo Lascarus aliquis non celebretur. Genus late fusum, gratia opibusque abundans, armis ac litteris per omnem ætatem insigne. Hinc tu ad hujus Academiæ præsidium & ornamentum extitisti, unde omen & bene sperandi argumentum. Fac digna loco tam nobili; ut Civitas hæc intelligat, Græcas terras evasisse barbaras; Græcos homines adhuc humanitatem retinere. Vale.

O R A T I O XVI.

Habita ab Adolescente Scholastico ad instauranda
Studia Gymnasii Patavini,

*Quam facile est videri; tam difficile est
litteratum esse.*

NON deerit fortasse (NN.) qui miretur & quærat, cur ego, qui anno superiore loci huius majestatem magnopere veritus, publice dicendi munus ingenti trepidatione suscepi, nunc in idem periculum sponte veniam, artibus ac literis more solemni prolusurus. Non venissem profecto, nisi me quorundam rumusculi excitassent, passim querentium, nimium me Oratione illa sæculo nostro tribuisse; & ignavos adolescentes, quasi explicato supra fidem & veritatem domestico patrimonio, in ignavia confirmasse. Ego vero, Auditores, nihil minus cogitavi. Ac proinde rursus prodire volui; ut siquid forte commodorum nostrorum commemoratione aliquibus nocui, nunc incommoda ipsa memorando remedium adhibeam. Neque vero mihi telam retexere in animo est, aut ullo modo labefactare, quæ tanta animi corporisque contentione in Æde hac tam angusta, testibus Superis vobisque, firmavi. Iterum ajo ac defendo, artium ac litterarum studia hoc sæculo vel maxime florere; sed idem tamen ostendere aggredior, esse in iis studiis pro magnarum rerum natura fallacias difficultatesque tantas, ut quam facile est litteratum videri, tam sit difficile revera litteratum esse. Ecce vobis capita duo, quibus quasi terminis hodiernam hanc
exer-

exercitationem circumscribam; ex quibus demum apparebit, quanta animi providentia studiosi Adolescentes inanes & fucatas litteras vitare debeant, quanto labore veras & solidas confectari. Exercitationis hujus nostræ testes atque auspices habemus illos ipsos, quos tam benevolos anno superiore experti sumus, hujus Civitatis Præsides ac Moderatores ex omni sæculorum memoria optimos ac vigilantissimos: habemus eundem ipsum Pro-Rectorem ac Syndicum ASSANIUM LASCARUM, cui in annum alterum ob insignem virtutem dignitas propagata est: habemus eundem Professorum sapientissimorum Ordinem, qui jam nobis favere cœpit, & omnibus Adolescentibus qui in hunc locum ascendunt, favere solet. Itaque primo illo die, quo me vobis dedi, bene sperare volui; nunc ad experta beneficia, quasi-que obstrictam benevolentiam cum veniam, diei hujus felicitatem in tuto positam esse certo scio.

Cum præmia litteris ac disciplinis proposita sæculo nostro nec pauca sint, nec exigua, minime mirum videri debet, esse homines etiam minus idoneos, qui ad illa contendant. Desiderium hoc sive laudis, sive commodi, sive utriusque, multis commune, fecit, ut qui sua parere hoc in genere nequeunt, aliena ornent atque explicant; atque ita cum ipsis rerum auctoribus sociati & conjuncti eundem in locum veniant. Ajunt, fuisse primum viros sapientes, qui res præclaras in commune bonum invenirent; non defuisse subinde, qui inventas augerent & absolverent; denique eo jam ventum esse, ut ad famam & gloriam satis sit, has ipsas faciliore quadam via & ratione digestas atque illustratas posteris manda-

re. **H**actenus tamen ferenda esset conditio litterarum & artium, nisi eorum fallacis deterior fieret, qui omnem doctrinæ laudem in eo collocant, ut librorum inscriptiones syllabique addiscantur, & plurima Scriptorum nomina pro re nata recitentur. Hinc magno natu homines quidvis potius, quam litteras vita superiore consecrati, repente bibliotheca comparata, per argutulos quosdam controversiarum libellos, per epitomas, per elenchos, per ephemeridas inter magistros irrepunt, & prima subsellia occupant. Quam enim callide abdunt seque suasque merces, ubi insurgat aliquid gravius! quam nihil hæsitantes expromunt se totos, ubi in suam provinciam ventum esse animadvertant! Tam multos tibi de re proposita Scriptores referunt & interpretes; tam belle narrant de tempore, de loco, de causis, quibus editi libri sunt, oppugnati, explanati; tam prompte judicant, castigant, attendent; ut eos recens tanquam ex Apollineis Musarum ædibus demissos arbitreris. Quod si futile adeo litterarum genus non magna quadam calliditate tuerentur, omnia potius ferre parati, quam extra sua illa munimenta aperto loco pugnare; intelligeres profecto, quam nulli sint, quamque inepte in libros illos judices sedeant & quæsitores, de quibus nihil fere norunt, nisi quod ex actis litterariis & compendiis didicerunt. Acta hæc ad memoriæ magis, quam ingenii, exercitationem comparata, etsi in homine artibus disciplinisque gravioribus prædito sperni minime debent, sola tamen si inveniantur, vix honestiori bibliopolæ ad mercaturam exercendam satis præsidii afferunt & ornamenti. Hinc facile patior, hujusmodi homines queri

passim, nihil a nostris in lucem edi; ea demum esse valida ingenia, quæ typis quotidie aliquid committant; infirmos ac desides homunciones domesticis tenebris contineri. Scruta laudat scrutarius: quique librorum titulis perdiscendis nominis sui celebritatem & famam definiunt, nihil mirum si, non quidem bonos, sed multos libros laudant, ex quibus pro suo instituto proficiant. Equidem fateor, eum qui revera scit, non sibi uni scire debere; miseramque esse quorundam modestiam planeque ridiculam, qui se contemptu gloriæ famæque latere dicunt: sed tamen quodnam genus hoc impudentiæ est, omnes sine delectu ad cælum ferre rerum Scriptores; neque cogitare, quid quisque protulerit, sed quantum? Videte, quæso, a bonæ illius antiquitatis moribus ac studiis quantopere desciverimus. Cum enim olim nihil esset magis in viris doctis reprehendendum, quam scribendi cacoethes, tanta nunc rerum facta conversio est, ut vitii loco habeatur, *perituræ parcere chartæ*. Imo didiceris quantumvis multa, multa docueris, sis licet & Philosophus, & Jurisperitus, & Orator, & Poeta, & quod lubet; attamen nisi magni voluminis atque adeo multorum voluminum auctor es, in postremis jaces. Recinitur tibi identidem illud: quid habes hoc anno a te editum? quanti prostant opera tua? quo librario uteris, quo bibliopola? Perinde quasi non strenue quidem pugnasse egregia militis laus sit, sed sæpius in acie fuisse: & ille ipse Theristes suam sibi gloriæ partem, Trojano bello confecto, vindicaverit, quod in Græco exercitu una cum cæteris fortissimis viris decem annorum stipendia meruerit. Si hos demum intra fines do-

Strinx fama continetur, frustra in hac aquula velis remisque laboramus. Quid enim potest esse facilius homini non invita Minerva nato, quam vel obsoleta quædam Scriptorum opera parum immutata pro suis venditare, vel adversaria extrudere, vel externa patrio, vel patria externo idiomate reddere? aut, si nihil hujusmodi in promptu est, ad illam confugere populi totius segetem, Epicedia, Genethliaca, Epithalamia, Panegyricos? Qui via hac ad litterarum gloriam cuncti constituerunt, multum se profecisse putant, cum adhibitis in consilium amicis, de titulo deliberarunt. Votorum hæc summa est, si verba cupressis similia, plena, sonantia, pluribus ex linguis composita inveniant, quæ voluminis frontem impleant luculente. Neque enim quid opere toto præstare possint, solliciti sunt, sed quid initio statim polliceri debeant; polliceri autem sibi videntur egregie, si portenta verborum præfigant, quæ vix possint continenti spiritu singula pronuntiari. Jejunum est apud illos ac frigidum, *Demosthenis orationes, Plutarchi opera, Ovidii carmina*; multoque plus saperent probabiles isti ceteroquin auctores, si mimallonea διαγράμματα excogitassent, quibus accedentes statim oculos in admirationem perducerent. Usque adeone, Auditores sapientissimi, natus litterarum vigor extabuit, ut ampullas has, & (quod Synesius ait) φλεγμαίνοντα ὀνόματα homines probent? castam vero illam dicendi scribendique simplicitatem aut vetustæ superstitionis, aut inficetæ ficitatis nomine contemnant? Vetera nimirum fastidio sunt; ac sicuti vestes, ita litteræ videntur nobis exolescere. Inhæres, inquiunt, religiose nimium Cicero-

ni illi tuo; nimius es in Terentio lectitando; totus Plauti quisquiliis oles: tu te erige, si vir es; pone leviculam istam veterum verborum curam, magnosque animos sumens, aude aliquid dignum te, dignum hac sæculi gravitate & sapientia. In dubio tanti negotii discrimine salva tamen res erit, nisi qua tibi societas sit cum Aristotele. Huic vero homini bellum ubique indictum, est, magno quodam ejus flagitio, quod diu nimium discendi studiosis placuerit, eorumque animos & ingenia per sæcula multa prope solus ex Philosophis occupaverit. Ita facilis quædam ad nominis prædicationem & gratiam patefacta via est; ut si quis, cetera bardus, ausit in Philosophum facile principem impudenter garrere, statim incipiat esse aliquis, & ad publicam lucem emergat. Si auditoris judicium auferre satius esset, quam mereri, teterrimam hanc litterarum pestem a nobis non deprecarer; quod jamdiu fusa in plures late grassetur, plaususque & fortunæ bona, idest vulgi beatitatem, sæpissime pariat. Sed cum beatius mihi multo videatur soli placere Platoni, quam toti Atheniensi populo, quemadmodum Antimacho Clario recitanti contigit, quæso vos obtestorque, Juvenes ornatissimi, quibus me in hoc curriculo fortuna conjunxit, quæso, inquam, ut sanioribus studiis incensi, non ad levem paucorum dierum laudem, sed ad immortalitatem contendatis. Hoc siquidem fatuæ plebis studium clamoresque ut excitare facile est, ita, quod nullo satis firmo nitantur fundamento, vel statim evanescunt, vel tota ad summum vitæ perdurant. Ipsa hæc mehercule facilitas rei pretium imminuit; semperque cordati viri per difficilia &

abrupta vadere ad gloriam maluerunt, quam una cum populo planis tritisque itineribus ferri, ad asperiora quælibet trepidantes. Quæ cum ita sint, quid est, quo ego vehementius possim lectissimæ hujus juventutis animos ad litteras artesque inflammare dicendo, quam si ita ostendero auctas hoc tempore & exaggeratas, ut revera litteratum esse tam difficile sit, quam est facile videri?

Profecto si alibi dicerem, quam Patavii, magnum quoddam onus ac prope immensum suscepissem; cui vel numquam facerem satis, vel tum demum facerem, cum vetera memoria repetens novisque conjungens, universam artium ac disciplinarum provinciam longa oratione perlustrassem. Nunc autem ibi dico, quo tamquam in Musarum templum, rerum pulcherrimarum professores ac magistri ex omni Europa confluxere, quorum singuli artes minimum singulas, non nemo plures, universi autem simul omnia rerum genera, quæ certa aliqua regula ac ratione constant, & illam ipsam *ἡ γυμνασιαρχία*, quantumvis magnitudine rerum, copia, & varietate diffusam, complectuntur. Hos ego testes appello, num Historiæ, num Geographiæ, num Theologiæ, num Juris Legumque cognitio latius ætate alia patuerit; num Medicæ facultatis, num Physicæ, num Mathematicæ studia, vel auctorum, vel interpretum, vel sectarum numero varia magis fuerint ac multiplicia. Quænam non dicam Civitas, vel paullo honestior Academia, sed qui ludus, quinam homo est, vel homini similis, qui malit in publica hac scriptitandi libertate alterius sectator esse, quam nova excogitando familiam ducere, etiam per inania, modo sua? Nullus jam certus au-

auctor, nullæ hoc tempore certæ leges, fines denique nulli discendi studiosis præstituti, quo sibi ad extremum perveniendum intelligant, difficili aliquo, definito tamen, confecto itinere. Alibi obstrepitur Aristoteli, Democrito alibi, alibi Epicuro, cariosa nonnulli Etruscorum rudera movent, in recentibus quidam curiose exultant; nec desunt, qui nihil probantes, Socratico more in omnes promiscue insurgunt, omnemque rursus personam suscipere parati, nullo sibi vel tempore, vel loco satis constant. Ipsum hoc oratorium artificium quam est, bone Deus, Criticorum omnium disputationibus excussum, opinionum varietate distractum, formis ac præceptis infinite auctum! Quodque mirabilius videri debet, non Græce modo, aut Latine dicentibus & Asiaticæ, & Rhodiæ, & Atticæ, & Laconicæ pro Rhetorum libidine præscriptæ formæ; sed ipsa Italica lingua, quam in omnibus vitæ negotiis usurpamus, tam multis legibus illigatur, ut quæ olim videbantur terræ patriæ beneficia, labore comparare debeamus. Certe mecum ipse dum reputo, Græcos Poetas in altissimo jugo Deas litterarum præsidēs collocasse, quo esset hominibus per invia & confragosa omnia multis laboribus perveniendum, videntur illi mihi aut fuisse delicati nimium, aut suo illo divino furore, ut appellant, in futuras ætates prospexisse. Præclare enim cum illis agebatur, qui nullo linguarum studio retardati, statim se ad rerum cognitionem conferebant; in hac autem ipsa, angustis terminis conclusa, spe citius eminebant. Nobis primum & Latinæ & Græcæ litteræ diligenter tractandæ; tum vero tardius multo, quam sit pro artium difficul-

cultate fatis, ad discendum aggredimur; vixque ulli licet esse numero, antequam & singulas Philosophorum familias congnoverimus; & egerimus cum Mathematicis; & Jurisperitos audierimus; & Historicis, & Oratoribus, & Poetis familiariter usi simus: ut propterea quæ olim singula septenos Græciæ homines, totius antiquitatis principes, ad famam sapientiæ sempiternam abunde ornarunt, ea omnia simul collecta ne sapientiæ quidem studiosum, nostris hisce temporibus difficilissimis, fatis ornent atque instruant. Quid ita? Nimirum nascentibus tunc primum artibus sua vel mediocribus ingeniis laus erat; nunc autem ad justam ætatem & magnitudinem cum pervenerint, nemo suæ consulit gloriæ fatis, nisi Herculi, ut ajunt, clavam extorqueat, & prodigiis similia faciat. Ita prorsus cum primum institui cœptæ sunt navigationes, Jason ceterique Argonautæ exiguum mare mensi, cælum ipsum attigisse visi sunt, navisque illa luculenta, tamquam res divina, multorum commentis inter sidera est collocata; nunc vero vix paucis noti sunt Franciscus Drake, Thomas Candischius, Simon Cordes, Sebastianus Canus, qui tamen per maria omnia fœda monstris, prædonibus infesta, scopulis ac tempestatibus formidolosa totum hunc orbem quaquaversus obiere. Etenim principia rerum admirationem sibi insolentia & novitate conciliant; quæ aliquo exemplo fiunt, usu ipso & consuetudine plerumque vilescunt. Quid vero si ad hæc hominibus non valde copiosis maxima omnium accedat difficultas, librorum & magistrorum inopia? Quis non videt amplificatis adeo bonorum promiscue malorumque scriptorum licentia litteris ac disci-

pli-

plinis, nec sine ingenti bibliotheca tentari quippiam cum laude posse, nec peritissimo sine duce feliciter urgeri opus, & ad exitum duci? Hæc autem nisi sumptibus immensis non paranda, quam longe mediocritatem hanc nostram privatamque fortunam superant? Scilicet hoc unum deerat temporibus asperis, ut cum hominum externa bona pecuniæ imperio subjiciantur universa, animus quoque ipse, animoque insitæ facultates ab ipsa penderent; sicque miserrime fieret ad artium & litterarum detrimentum, ut quemadmodum pecuniosi homines laboris tædio in scholis sedere nolunt, ita tenuiores multarum rerum inopia impediti arcerentur. Ego equidem, nisi nobis divinitus contigisset, Adolescentes, ejus Reipublicæ auspiciis dare operam litteris, quæ nihil patiatur deesse bene conantibus, ad alia vos impellerem, unde certus aliquis laborum fructus existeret. Sed quoniam nihil est in hac Urbe ad doctrinam & eruditionem cuiquam desiderandum, nolite per vestram fidem Principis liberalissimi voluntati segnius respondere. Est sane ratio omnis litterarum ardua, salebrosa, pene ultra modum diffusa; magnum quiddam est litterati nomen, splendidum, augustum; vixque uni aut alteri singulis ætatibus concessum: sed tamen reputate, nihil esse experiretis ingeniis tam invium, quo nequeant acri adhibito conatu operaque diuturna tandem aliquando pervenire. Dixi.

EPISTOLA.

Præposita editioni primæ hujus Orationis .

AD ASSANIUM LASCARUM
ARTIUM SYNDICUM.

Utrumque nostrum incredibili modo consen-
tit astrum. *Juvat enim iisdem te affari ver-*
1. 2. Od. 27 *his, quibus Horatius Mæcenatem suum. Tu iterum*
Syndicus, ego iterum Orator; eademque fata nos hoc
anno conjungunt, quæ superiore conjunxerunt. Sed
in negotio valde simili dissimiles causæ sunt. Ti-
bi enim idem honor in annum alterum iccirco pro-
pagatus est, quod experta virtus expectationem fal-
lere non possit: ego rursus in eandem arenam vo-
cor, ut priore periculo monitus tolerabile aliquid e-
nitar. Itaque tuum nomen in tuto est; meum vero
majori cuidam discrimini obicitur. Illud me tamen
erigit & solatur, quod infirma firmis sociata facile
consistant; nec possit non probari, qui prodit in me-
dium auspicio bono. Tu igitur me tegere debes; &
efficere, ut omnes intelligant, publicarum exercita-
tionum Præsides nescio quid numinis habere, & exer-
citationes ipsus pro mortalium conditione fortuna-
re. Ego, quantum quidem in me erit, mihi non
deero, ausus etiam supra vires, quod bis in eodem
peccanti nulla venia speranda sit. Vale.

O R A T I O XVII.

Habita ab Adolescente Scholastico ad instauranda
Jurisprudentiæ Studia Gymnasii Patavini.

De Lege Regia.

CUM publicæ lucis experimentum (NN.) tam difficile sit ac periculosum, quam quod maxime, mirum videri profecto debet, inveniri quotannis adolescentes famæ securos, qui hujus auctoritatem loci non reformident. Id ea fortasse de causa fit, quod qui de Jurisprudentia, de Medicina, de Philosophia dicturi accedunt, nihil aliud sibi propositum putant, quam ut harum disciplinarum naturam in genere toto patefaciant; cujus quidem rei tanta copia est, ut aliena describere volenti, sibi que arrogare, magis laborandum sit, quid omittat, quam quid summat. Ego præter meam & multorum expectationem in hanc provinciam vocatus, statim cogitare cœpi, quomodo ex campo tam vasto exire possem, meque certis terminis concludere, quibus animus veluti compressus vires colligeret, ac de suo aliquid niteretur. Non tenebo vos pluribus. Legem illam, quæ *Regia* dicitur, prima hac studiorum nostrorum exercitatione ad auspiciū comparata, infirmare conabor, ac veluti furculum loco non suo per dolum & fraudem insitum excindere. Non ignore, quantum laboris ac periculi suscipiam, quoties reputo, Legem hanc viris longe omnium consultissimis fuisse probatam, & tanquam aureum antiquitatis monumentum ad firmandam Imperatoriam Majestatem in Romano Jure collocatam; attamen rogo vos atque obtestor, ne

ma-

magnorum Scriptorum nomine capti, contra adolescentem, causa nondum audita, pronuncietis. Primum enim nihil prohibet, quin magni Scriptores magnis Scriptoribus repugnent; deinde fieri potest, ut illi ipsi, qui minus doctrina valent, in ancipiti controversia eam partem suscipiant, quam viri docti æstu quodam ingenii rapti deseruerunt. Adeste animis de re non levi iudicaturi; meque, sicubi defecero, benevolentia & humanitate sustinete.

Sed quia video, qui Romani Juris periti non sunt, eos non satis intelligere, quid *Regiæ legis* nomine significetur, & quo spectet tota hæc controversia, initio rem totam aperiā. Cum Tribonianus digestionē illā suā, vetustis Legibus & Romanæ civitati minime commoda, multa turbasset, quæ ad legitimæ potestatis discrimina pertinebant; mentionem injecit legis cujusdam antiquæ, quæ *Regia* nuncuparetur, quæque omne Jus omnemque Populi Romani potestatem in Imperatorem transferret. Lege hac antiqua roboratum putat Ulpiani responsum, per quod (nisi in hoc ipso aliquid fraudis latet) summum rerum omnium arbitrium Imperatori recens creato tribuebatur; quo fiebat, ut & Βασιλεὺς a Græcis diceretur, & regio more populos civitatesque gubernaret. Atque ita quidem tales tantasque tenebras Jurisconsultis atque Interpretibus offudit, ut existimaverint, Rempublicam omnem ejusque auctoritatem ab Augusti dominatu intercidiſſe, & in quandam Regni formam tranſiſſe. Id nos ſcilicet negamus, contententes, nec *legem Regiam* fuiſſe antiquis temporibus ullam, nec per illud Senatus consultum, quod hoc nomine fertur, *regiam*

giam auctoritatem Imperatoribus fuisse collatam.

Quod antequam facio, peto a vobis hanc veniam, ut liceat mihi, ducibus magnis viris, de Triboniani fide dubitare, qui ut erat ad adulandum projectus, nulla commenta omittebat; quibus posset Imperatoriam potestatem amplificare. Age igitur videamus primo loco, num probabile sit, post Reges exactos latam fuisse legem, quæ *Regia* nuncuparetur. Qui ita sibi persuadeat, oportet illum in moribus atque institutis Romanæ civitatis rudem ac peregrinum esse. Ex quo populus ille, præter modum libertatis cupidus, Tarquinius eiecit, ita cavit, in minimis quoque rebus, ne quid sibi regium vel re, vel nomine obtruderetur, ut hac in parte abiisse ad extrema visus sit. Siquid unquam crudele patratum ab eo populo est, ceteroquin ad humanitatem mirifice comparato, in eos duntaxat patratum est, qui aliquam Regii nominis suspensionem movissent. Suspicio hæc prodidit homines de Republica optime meritos, Gracchos, Melios, Capitolinos, atque insuper alios quos non est opus commemorare: quique eos in populi invidiam adduxerunt, non aliud egerunt, quam Reges appellarunt; scilicet quod nimiam quandam præstandi cupiditatem præferrent, quæ fortasse in civitate æquo jure vivente ferenda non erat. Neque vero cum primum Imperatores libertatem labefecerunt, ullius nominis, aut potestatis Regiæ mentionem facere ausi sunt, rati populum Romanum iniqua omnia pati posse vel infra servilem conditionem, regiam vocem pati non posse. Quid existimatis in causa fuisse, ut illi ipsi, qui maximis beneficiis, propinquitate, familiaritate Julio Cæsari con-

uncti erant, ei necem molirentur, nisi quod imprudentia quadam M. Antonii *Rex* fuerat in Lupercalibus salutatus? Etsi enim Cæsar & Regium nomen, & Regis insignia publice repulerat; at tamen tantum illi invidiæ ex hac ipsa ludicra salutatione conflatum est, ut multi statim in illum exarserint, & quavis conditione perire voluerint. Post exempla hæc persuadere nobis conabitur Tribonianus, legem latam de Imperatoris auctoritate fuisse; quæ *Regia* nuncuparetur? Nisi forte putat, legem, quæ sub Regibus fuisset, a populo Romano esse renovatam, & ad Imperatorium dominatum translatam. Mitto, hoc ipsum odiosum esse, sicuti cetera quæ hætenus dixi, jura illa *Regia* convalescere, quæ Regibus exactis penitus abrogata sunt, magnisque contentionibus ex publicistabulis & ex omni memoria sublata; mitto, inquam, odiosum esse, ac proinde minus credibile; illud quæro, qua ratione, aut quo monumento probetur, & fuisse hanc legem, & esse renovatam. Si verbo ais, verbo nego. Mirum est enim, Auditores, quomodo illi qui *legem Regiam* nobis venditare conantur, nihil de loco, nihil de tempore, nihil de auctoribus hujus legis dicant; sed tanquam levem quandam Juris particulam, quæ ad privata negotia componenda pertineat, eam dicis caussa, & aliud agentes in medium proferat. Qui hoc quo spectet, non intelligit, aut nihil intelligit, aut certe non is est, qui ad Scriptorum fraudes cognoscendas accedere possit. Sed videte quam liberaliter agere velim. Concedo, *legem Regiam* fuisse, si Imperatores hoc jure vivebant, & imperabant. Et ne verbis ludamus, habete quid sit *lex Regia*. Tam

le-

legem hoc nomine significari puto, quæ uni homini supremum rerum omnium & perpetuum arbitrium tradit; quæ illum vita & necis, belli & pacis sine provocatione dominum facit; quæ omnibus civitatis legibus & oneribus liberat; quæ denique unum statuit, a cujus nutu universi ac singuli pendeant. Nunc ipsi vos, qui Romanam historiam tenetis, cum animis vestris reputate, num Imperatores hac lege uterentur: ex quibus **Adrianus** quidem palam edixit, cum imperium caperet, se Rempublicam ita gesturum, ut sciret populi rem esse, non propriam; **Alexander** vero dispensatorem se publicum professus est. Neque enim Principis nomen, quod Imperatori tribuebatur, Regium aliquid significat, cum ipsa quoque florente Republica, quem dignissimum Senatorem Censor judicasset, is Princeps Senatus diceretur. Itaque cum **Tiberius** agebat, se esse Dominum servorum, Imperatorem militum, & principem ceterorum, nihilo plus sibi potestatis tribuebat, quam quod liberæ civitatis Capiti debebatur. Non sum nescius, & **Tiberium** ipsum, & Imperatores reliquos, impotentia dominandi abreptos, tantum sibi licere voluisse, quantum poterant: sed hoc quidem tantum abest, ut ulla lege facerent, ut contra, quod ita facerent, in magno civitatis odio & perpetua quadam capitis dimicatione versati sint; donec populus consuetudine malorum fractus, & veteris libertatis plane oblitus iniquam dominationem pati didicit. At enim superest adhuc inter vetustatis reliquias Senatus Consultum, ex quo apparet, infinitam quandam potestatem **Vespasiano** tributam fuisse, nec vero difficile est conjicere, ad

cujusque principatum constituendum tale aliquid fuisse usurpatum. Videte, auditores, quam varia sint hominum judicia. Ex quo monumento adversarii argumenta ducunt ad *legem Regiam* confirmandam, ego hoc maxime utor ad eam evertendam. Nam si Princeps quilibet indiget Senatus Consulto, ut possit in Civitate jure dominari, nulla igitur unquam *lex Regia* lata est; quæ quidem si lata esset, Senatus populiue auctoritas exaruisset. Sed ex ipso Senatus Consulto cognoscamus, quænam sit tanta hæc potestas, quæ Imperatori confertur. Primum permittitur illi, ut possit *Senatum habere ac remittere, relationem ac Senatus Consulta facere*. Hic Reipublicæ Caput video, Regem Dominum non video. Deinde statuitur, *rationem habendam esse illorum extra ordinem, quos in petendis honoribus Imperator Senatui populoque Romano commendaverit, quibusque suffragationem suam dederit*. Videtur ne vobis Regia potestas in hac commendatione esse? Si verba hæc serio recteque perpendimus, nihil significant ejusmodi, ut Senatus populusque Romanus abdicasse sibi suam auctoritatem dici debeat, & in alium transfuisse, a cujus voluntate tanquam a lege unice pendeat. Additur, *ut liceat Imperatori pomerii fines proferre, cum e Republica censebit*. An non idem in summa Civitatis liberate multis civibus permixtum est? Verum ibi maximum rei totius momentum est, ubi habetur *Imperatorem solum esse legibus*. Hic vero auxilium peto ab incomparabili viro Joanne Vincentio Gravina, qui difficultatem hanc in omnes partes versavit, ac penitus sustulit. Dicam igitur illa,

quæ-

quæ tantus hic Jurisconsultus dixit; sed ille more suo, hoc est, elegantissime, ego more meo, hoc est exiliter. Primum igitur solutum esse legibus, si Dioni credimus lib. 53. nihil est aliud, quam liberum esse a pœnis, quæ in legum sanctionibus continentur. Quamvis enim nihil tam proprium Imperii sit, quam legibus vivere; ut scribit Alexander in leg. 3. Cod. t. 23. de Testam. attamen si Imperator deliquerit, non punitur. Præterea ut ut concedamus, Imperatorem legum vinculis fuisse solutum, non tamen solutus est vinculis legum omnium, sed certarum duntaxat, quibus adjectum fuerat, ne Princeps teneretur. Hujusmodi erant leges conjugales, caducariæ; & aliæ id genus, quæ solemnia quædam juris continebant, quibus obstringi dignitatem tantam non deceret. Ceterum nemini, qui in Romano jure parumper versatus sit, ignotum esse potest, teneri Principem lege Falcidia, & multis præterea testamentariis; ut proinde Augustus non ausus sit, aliquid supra legitimam portionem Liviæ uxori relinquere, nisi venia legis Voconiae a Senatu petita. Nunc reputate, quanti valeat *lex* ista *Regia*, quæ Imperatorem aliis legibus liberat, aliis non item. Atque ego tam multis verbis eminus tela jeci. Congrediamur. Si *lege Regia* Imperatoris munus & auctoritas nitebatur, cur Imperatores singuli, vel ii ipsi, qui superbissimi erant; & in omne crudelitatis genus profligati; cur, inquam, & Consulatus sumebant, & Pontificatum maximum, & Censuram, & Tribunitiam potestatem? Cur Augustus profitetur in monumento Ancyrano, *se Patriciorum numerum*

auxisse jussu populi & Senatus , cum esset Consul V. & Senatum ter legisse , & in Consulatu VI. Censum populi Romani M. Agrippa Collega egisse ? Concedo enim , interdum Imperatores tanta potestate Civitatem rexisse , quanta prope reges solent : sed tamen ajo , non per legem aliquam *Regiam* id sibi tribuisse , sed per potestates populares ac Senatorias , quas sumebant , & per temporum vices repetebant . Nolim videri justo longior , præsertim apud homines Juris legumque peritissimos , quibus nihil est hujusmodi ad intelligendum difficile . Habetis industriæ nostræ specimen , ut hinc cognoscere possitis , quam viam & rationem in Jurisprudentiæ studio teneamus . Reliquum est , ut rogem vos atque obtester , ne contententibus nobis ductu vestro & sapientia deesse velitis . Non deerit certe Eminentissimus hujus Civitatis Episcopus , a quo de more ante omnes auspicia petimus , ut appareat , quantopere litteræ cum religione conjungi debeant . Non deerunt Patavini populi Præsides ac Moderatores vigilantissimi , qui in hoc ipso sui Regiminis initio multis rebus demonstrarunt , se quidem totam Civitatem benefaciendi voluntate complecti ; attamen partem hanc singulari quodam studio prosequi , & tanquam filiolarum deosculari . Non deerit postremo loco generosi animi Adolescens , *Pro-Rector ac Syndicus* , qui munus hoc natura sua tam splendidum , quam is , a quo sustinetur , moribus , sedulitate , liberalitate ornare cœpit ; unde liceat toti huic studiorum curriculo bene ominari . Dixi .

E P I S T O L A

A D L E C T O R E M

Præposita editioni primæ hujus Orationis.

A D S Y N D I C U M.

CUm Orationem hanc, quæ publici juris fit, ad te potissimum affero, more & consuetudine facio; sed eodem tempore lætor, morem hunc cum mea erga te voluntate studioque consentire. Nam si mihi integrum esset, unum aliquem ex his omnibus Adolescentibus, qui in Patavina Academia vivunt, pro arbitrio appellare, & auspiciem rei hujus constituere, tu certe is esses, quamvis tanto honore ac dignitate careres. Neque enim admiror Syndici nomen, quantumvis illustre; sed indoles ista tua ad omnem virtutem & humanitatem conformata, & me, & illos omnes, qui paullo altius res spectant, vehementer capit, tenet, obstrictum habet. Cetera hominis bonæ possunt esse a fortuna, quæ temeritate regitur; hoc unum hominis ipsius bonum est. Mature cœpisti veræ laudi operam dare; & siquidem ita perges, ut procul dubio perges, videbis nomen tuum, non istiusmodi lucubratiunculis, sed maximis & gravissimis litterarum monumentis, ad hominum commendationem, & posteritatis memoriam propagatum. Vale.

O R A T I O XVIII.

Habita ab Adolescente Scholastico pro Artium
 instauratione Gymnasii Patavini.

*Juniorum Philosophorum inventa a Græcis
 fontibus derivari.*

SI cui forte mirum videtur (NN.) cur ego ,
 qui hujus discrimen loci , in quod me an-
 no superiore Jurisprudencia conjecerat, vix supe-
 ravi, rursus fortunam tentare audeam Artibus pro-
 lufurus, is, quæso, reputet, in humana vita quæ-
 dam contingere, quorum causa vel reddi omni-
 no non possit, vel publice reddi non debeat. Id
 pro certo habete, mihi quidem primi illius pe-
 riculi nondum oblito alterum hoc supervenisse ;
 quod nisi libenter & animose subeam , illorum
 consilio injuriam facere videar, quibus rerum no-
 strarum cura Principis judicio commissa est. At-
 que, ut ingenue fatear , quod res est , jamdiu
 cupiebam in eum locum adduci , ut de Philoso-
 phicis studiis publice dicerem ; quod concoquere
 nequeam , esse tam multos hac tempestate, qui
 veterem Græcorum nostrorum philosophandi ra-
 tionem contemnant, seque junioribus nescio qui-
 bus, non dicam in disciplinam, sed in obsequium
 & adulationem tradant. Ego equidem, quantum
 ætas hæc mea ferre potest , in istorum provin-
 cias excurri , qui nostræ infesti sunt ; nova re-
 bus nomina indita, experimenta passim jactata ,
 machinæ, tabulæ geometricæ , omnia in spectacu-
 lum & admirationem composita. Neque vero dis-
 fi.

siteor, in his ipsis quædam latere ingeniose inventa, quorum accessione Philosophicum studium crescet, & novam quandam figuram induat; veruntamen ita mihi persuadeo, si quis velit ex animo nobiscum agere, eum facile concessurum, rivos istiusmodi a Græcis fontibus derivari. Id si ostendero, quemadmodum spero, nolo vos iccirco, Adolescentes optimi, a novis Philosophis disciscere, sed eos cum veteribus confociare: qua societate fiet, ut undique muniti adversus pericula omniam in litterariis exercitationibus stare possitis.

Veteri Philosophiæ nomine non prisca quælibet Græcorum dogmata intelligo, quæ jamdiu colidesierunt, Pythagorica, Platonica, Stoica, Epicurea, sed doctrinam illam multorum sæculorum usu comprobata, & in dies magis per obstantia florescentem, quam ab auctore Aristotelem, a schola peripateticam nuncuparunt. Hanc ego ajo ejusmodi esse, ut si teneatur, ceteræ etiam, quæ novæ dicuntur, facile parari possint; & in unum quondam sapientiæ genus omnes omnino coerceri. Id vero non iccirco tantum dico, quod Peripateticum philosophandi genus subtile & acutum, ita hominum ingenia patefaciat, explicet, exauiat, ut omnia, quæ deinceps aggrediuntur, plana & expedita judicent; sed eo præsertim, quod pleraque omnia recentium Philosophorum inventa ab illo prodierunt, aut cum illo consentiunt, aut ad illud sine cura ingenti referri possunt. Et quidem cum universa Philosophia in tres partes distributa sit, ut est apud Ciceronem in libro de Oratore primo, *in naturæ obscuritatem, in differendi subtilitatem, in vitam atque mores* hoc est in Physicam, Logicam, & moralem, lubet

ne per singulas ire, ut has corniculas denudemus? Agedum a moribus exordiamur, quæ una olim habita est Philosophia. Quid nobis tam divinum afferunt homines isti de virtutibus ac vitiis, de animi tranquillitate & perturbatione, de vera & falsa felicitate, quod non multo ante docuerit Aristoteles in libris ad Eudemum, in magnis Moralibus, in Ethicis ad Nichomachum? Equidem non inficior, Sacrarum Scripturarum lumine multa nobis ad mores componendos innotuisse, quæ frustra quærantur in schola Peripatetica; veruntamen si quæ Philosophi ante Aristotelem omnes, Pythagoras, Socrates, Plato, si quæ ceteri post ipsum litteris tradiderunt, non Theologica, sed Philosophica trutina examinemus, hunc unum vidisse omnia fateri cogimur, quæ vix singula singuli, & quæcumque ipsa per se capere potest Philosophia. Nunc qui se plus sapere credunt, virtutesque ab Aristotele positas accusant, aut ordinem, aut officia mutant, non illi quidem suo, sed verbi divini lumine ducuntur; nec inde oculos avertunt, quin volentes nolentes in nostra incidant cogitata. Audivi aliquos ita acerbè animatos in Aristotelem, ut cum hæc negare non possent, eo devenirent, ut Ethicos libros ad alium auctorem vindicarent. Sed hoc vetus crimen est, & a Græcis Scriptoribus, & a Latinis abunde dilutum. Regnet igitur hac in parte late dominus, quam ne hostes quidem ipsi valde petunt, in ceteris occupati.

Ad Logicam veniamus. Sed quid Logicam dico? *Artem cogitandi* hoc tempore appellant; ut Peripateticis nomen quoque ipsum vetus ac pene sacrum extorqueant. Verum bene haber, quod præ-

præter nomina & ordinem vix quippiam mutant. Nisi forte illi magnam rerum mutationem inducunt, qui decem Aristotelis Categorias numero minore concludunt; aut qui hominis cognitionem a sensu incipere negant, innatasque ideas propugnant. Interim tamen easdem cogitationes, eosdemque cogitationis modos admittunt; nullam novam syllogismi formam, nullam veritatis notam de suo penu producunt; quidquid Aristoteles de simplicibus, & compositis notionibus, quidquid de enunciatione, de argumentatione, de Analyticis, de Topicis, de Sophisticis pronuntiat, ratum habent. Ergo valde homini Peripatetico laborandum est, ut Dialecticas Juniorum meditationes comprehendat; non est ingenii nostri ad hos elegantissimos libellos accedere, quos Aristoteli opponunt; sudandum & algendum, ut antiquis studiis oblitteratis, nos quoque cum Gallis, & Batavis recte cogitare incipiamus. Enimvero si tota horum hominum industria his finibus contineretur, nihil omnino causæ esset, cur se a nobis alienos putarent, & nova sibi subsellia construerent; sed, nequid dissimulem, hanc nobis ultro provinciam concedunt, seque in Physica jactant, quæ tertia est Philosophiæ pars initio proposita.

Haud equidem ita desipio, ut inficiari velim, multa Juniores ex ultima antiquitate reparasse, multa etiam de novo reperisse, quæ vel Peripateticis absunt, vel desunt, vel contraria sunt; at tamen id peto, ut mihi quoque pro sua humanitate non gravate concedant, ea, quæ cum disciplina nostra non pugnant, conjungi posse; quæ pugnant, explicari & in concordiam adduci. Non omnia

omnia tam brevi tempore complecti possum; sed tamen si capita rerum tantisper attigero, nullo negotio patefaciam, diffidia fere omnia verborum esse. Cur enim nostra principia *materiam, formam, & privationem* tantopere exagitant? An non illi quoque, si ullam rerum naturalium mutationem admittunt, idem re affirmant, tametsi verbo negent? Nulla certe mutatio fieri potest, nisi sit terminus, a quo res mutanda recedat, qui a nobis dicitur *privatio*; terminus, ad quem procedat, qui a nobis dicitur *forma*; res ipsa denique recedendo, & procedendo mutata, quæ a nobis dicitur *materia*. Quamquam cum *privationem* dicit Aristoteles, eo dicit, ut *negationem* excludat; quod quidem in generatione quam sit necessarium, illi satis intelligunt, qui hujus Philosophi Logicam non ignorant. Aliter explicari terminus iste voce una non poterat. At enim Peripatetica materia *neque quid est, neque quale, neque quantum*. Ita; quia nulla res definita est, sed unde res omnes. Atqui ne tuæ quidem particulae, o Gassende, neque trina Aartesi materia aut homo est, aut equus, aut lapis, sed aliquid, unde omnia. Pergite porro. Peripatetici putant formas esse substantias. Grave enimvero crimen. At si placet esse accidentia, adite per vestram fidem tertiam & sexagesimam particulam libri primi Physicorum, ubi omnes omnino motus Aristoteles numerans, *quæcumque fiunt, aut figuratione fieri*, dicit, ut *statua ex ære; aut accessione, ut res aucta; aut detractiōe, ut ex lapide Mercurius; aut compositione, ut domus; aut immutatione, ut quorum materia graves affectiones subit, & quodam modo variatur*. Numquid est aliquid hoc loco præ-

præter accidentia! Numqua substantiæ genitæ mentio? Nulla enimvero, nulla. Hinc facile turbas illas querelasque sedabimus, quæ in nos excitari solent, quod novas formas quotidie, veteribus pereuntibus, nasci dicamus, ortumque & interitum perpetua vicissitudine sibi succedere; quasi vero tritum illud vulgatumque ignoremus, *gigni de nihilo nihil, in nihilum nil posse reverti*. Sive enim forma hæc substantia nuncupetur, sive natura; sive essentia, vocabula quidem ipsa varia sunt, sed nihil omnino significant, quod cum superiore Aristotelis sententia pugnet, & ab illa materiæ modificatione, quæ per hodiernas scholas resonat, diversum sit. Id nemper ætatis hujus nostræ proprium est, ut vocibus ac nominibus diligentius studeat; prisci homines in rebus occupatissimi, sine magna verborum cura scriptitarunt, unde tam multæ controversiæ, disceptationes, commentarii ad unam sæpe voculam explicandam profecti sunt. Neque vero omnia Aristotelis sunt, quæ Aristotelici quidam, Latini præsertim, intemperantia quadam speculandi, & unum ex alio deducendi, ad illum referunt; multa multi ingeniose affigunt, alii aliter explicant; cumque inter se nullo modo conveniant, videntur tamen sibi cum Aristotele singuli convenire. Contentiones istæ Juniorum deliciæ sunt, qui cum Peripateticum aliquem feliciter oppugnarunt, tum se magnos Imperatores existimant, triumphum parant, & Aristotelem ipsum inter captivos ducunt ante currum. Est inter Peripateticos qui putet, vim quandam innatam esse corporibus, qua se ipsa per se naturaliter moveant? Statim dies dicitur Aristoteli; quantumvis Physicorum octavo in-

ingenti voce clamet, multisque verbis confirmet, *quidquid movetur, ab alio moveri*. Inducit aliquis bonus homo species nescio quas *intentionales*, a corpore spirituque distinctas? Scilicet reus agitur Aristoteles, quod formas sine materia sensiles in secundo de Anima posuerit. Perinde quasi cum sensiles dicit, non satis appareat, corporeas esse, sed ita tamen tenues ac defæcatas, ut, si corporibus compares, unde effluunt, materia carere videantur. Enimvero nihil aliud sonat, si lites tollere volumus, Juniorum effluvia, quæ a corporibus jugiter erumpunt, sensusque movent. Placet ne cuipiam de populo sectæ hujus lucem appellare qualitatem a lucidis rebus plane distinctam? Jam ipse pœnas luit Aristoteles; tametsi in libro de Anima 2. affirmative doceat, *lumen esse lucidi corporis in aliquo loco præsentiam*; & in secundo Poster. t. 53. *lumen per laternam transmitti, quod subtilioribus partibus constat*. At illi certe nunquam in mentem venit, ut ea præstaret omnia, quæcumque posterius suæ doctrinæ studiosi pro libidine commenti essent. Gravia sunt, quæ dico, Auditores, sed multo remanent graviora. Quid enim si ostendam, atomis pepercisse Aristotelem, aut cum his aliquando in gratiam rediisse? Sane in primo Physicorum libro, & in tertio de Anima res naturales definitos habere suæ parvitatæ terminos docet, infra quos descendere nequeant. Tu ne igitur, inquiet aliquis, Aristotelem Democriticum facis? Ego vere hinc tam longe absum, quam qui maxime: sed tamen, si modo, ut ante dixi, societas placet sententiarum, primum quidem Juniores in familiam nostram invitabimus; deinde verò, si cedere noluerint, nos

cum supellectile nostra in eorum domos non inviti migrabimus. Videmus enim illos nostris spoliis magna ex parte decoros; nec sane tam acerbos putamus, ut nullo unquam tempore in tanta cogitationum similitudine fœdus & amicitiam nobiscum inire velint. Quam enim multa de elementis, quam de gravitate multa, de motu, de tempore, de sensibus, de ideis, de patiente & agente intellectu disputare possem, quæ infinitam litium segetem Juniores inter & Peripateticos excitarunt, cum tamen sine ira explicata ad eundem omnino sensum revocentur!

Sed cogenda vela, ut aliquid etiam de Metaphysicis postremo loco, ac veluti extra ordinem, dicamus. Jam vero sive hæc altissimarum rerum contemplatio de materia generatim differat, sive spiritalia tractet, tota Peripatetica est, nullisque prorsus rebus non dicam ab Junioribus castigatur, sed ne augetur quidem, aut ornatur. Percurrite omnia, Viri Sapientissimi, quæ de ente ac modo entis, de ejus attributis ac primis notionibus ubique gentium disceptantur; accipite universa, quæ de Angelis, de Deo, de mente humana aut dicuntur, aut scribuntur, nihil aliunde, quam ex fontibus nostris manasse intelligetis. Nisi forte illa ad Metaphysicam pertinent, quæ olim ad nos advecta, hoc nomine jactabantur; cum tamen revera tam longe abessent a Metaphysica, quam illi qui jactabant, ceteroquin non indocti, ab hoc genere studiorum & a cogitandi sanitate aberant. Non est opus, ut eos nominemus. Sed nimio plus mihi sumo, qui coram doctissimis Philosophis tam audacter de omnibus Philosophiæ partibus judico. Isti vobis, Adolescentes opti-

optimi, recte philosophandi leges dicent; isti vobis viam ad sapientiam patefacient: quo in cursu nunquam deficietis, si vos ornatissimis Nationum Consiliariis strenue praeuntibus conjungetis: Aderit etiam vobis Eminentissimus hujus Civitatis Antistes pro sua erga litteras & disciplinas propensione; aderunt Patavini populi Moderatores, Viri summi, & ad benefaciendum nati, quibus nihil gratius facere poteritis, quam si, quod vestra plurimum interest, serio facie-

tis.

EPISTOLA

AD LECTOREM

Præposita editioni primæ hujus Orationis .

AD URBIS PRÆFECTUM ET PRO-PRÆT.

O Ratio hæc habita coram Te , SENATOR
 AMPLISSIME , non aliis auspiciis ,
 quam Tuis , in publicum exire debet , gravissi-
 mumque oculorum judicium subire . Neque vero id
 ad Tuam istam dignitatem solummodo refero , quæ
 summa est in hac Urbe , omniumque vota & obse-
 quia jure suo sibi vindicat ; sed mentis acumen
 & præstantiam maxime specto , qua totam hanc
 litterariam provinciam complexus es , unusque pot-
 es , vel pæne unus , de parte ejus qualibet rectis-
 sime judicare . Nunc demum intelligimus , quan-
 tum intersit ad Civitatis felicitatem , si viri sa-
 pientes imperent , suisque oculis uti velint , ac pos-
 sint . Nos litterarii ordinis Adolescentes supra ce-
 teros Tibi debemus , incredibili quadam beneficio-
 rum copia cumulati ; nec aliter respondere possu-
 mus , quam ingenua hac debitionis professione ,
 tanquam æterno ad posteritatis memoriam documen-
 to . Perge , quemadmodum cæpisti , bonis artibus
 litterisque favere ; unde religionis morumque ratio ,
 populorum felicitas , Reipublicæ gloria , & si quid
 est in terris majus , potissimum pendet .

O R A T I O XIX.

Habita ab Adolescente Scholastico pro Artium
instauratione Gymnasii Patavini.

De Medicis Judiciis.

QUod nautæ facere solent (NN.) ut quamvis in magna tempestate aliquando deprehensi , otium & quietem per omne votorum genus a Superis petierunt , tamen paullo post discriminis obliti rursus se mari committant ; id ego quoque facio , qui superioris anni periculo defunctus , interum publicæ lucis aleam subeo , hominumque de me judicia pertento . Sed illi quidem cum sponte agant , Deos hominesque iratos habent , si quando novis incommodis laborent : at ego improvise gravissimi Magistratus decreto , cui resistere nefas est , in hanc arenam vocatus , benevolentia vestra sublevari profecto debeo , si qua in parte deficere , aut labare dicendo videbor . Quanquam nihil est dubitandum , auctore tam bono :

*Invalidas vires ipse excitat , & juvat idem ,
Qui jubet ; obsequium sufficit esse meum .*

Facit enim ad rem nostram , quod scripsit Ausonius ad Theodosium . Interim , quandoquidem tempus tulit , ut rursus ex hoc loco de Medicina dicamus (quod volentibus , ac nolentibus bene vertat) causas & rationes explicare aggredimur , cur Medica judicia difficillima sint . Video enim , Medicos omnes in duo veluti genera dispertiri , quorum alteri illud firmum decretumque habent , ut statim atque accedunt ad
ægro.

ægrotos, fauste ominentur, eosque bene sperare jubeant; alteri velut ex instituto gravia ac molesta prænuncient. Habent utrique quid sequantur, magis tamen ex ea, quam sibi proposuerunt, callide vivendi & agendi lege, quam ex Artis natura petitur. Nam primi illi bene polliciti, operam suam initio commendare student, nihil de exitu laborantes; alteri exitum spectant, qui quidem Artem probat, si malus sit, vera prænunciantis; si bonus, mira patrantis. Num recte agant, atque utri rectius, non ausim decernere. Illud certe hinc colligo, firmiterque defendo, vel ex hoc ipso apparere, Medicorum iudicia multis gravissimisque difficultatibus implicari. Non opus est pluribus, ut intelligatis, qua de re dicturus accedam. Quod tamen antequam facio, ratio postulat, ut Medicum iudicium in suas partes dividam, & ab omni ambiguitate liberem. Totum igitur hujus nostræ Facultatis iudicium vel ad morbi causam & naturam, vel ad exitum pertinet; quorum primum a Græcis *διάγνωσις* alterum *πρόγνωσις* appellatur. De utroque, si mihi ea benignitate, qua cœpistis, adfueritis, singillatim disputabo; & quam potero planissime, utriusque difficultates explicabo.

Et ut de eo primum verba faciam, quod ipso naturæ ordine antecedit, idest de *διάγνωσι* neminem unum esse existimo, qui non videat, ad rectam morbi cognitionem corpus illud recte cognosci debere, in quo morbus est. Porro cum corpus quodlibet partim ex fluidis constet, partim ex solidis, ille demum corpus cognoscere dicetur, & quod consequitur, corporis morbos, morborumque causas, qui tum solida, tum flui-

da probe tenebit, sciteque explicare poterit. Hoc autem quantum est, bone Deus! Nam, ut a fluidis incipiam, quis unquam tam feliciter in re physica versatus est, ut fluidorum omnium figuram, contextum, mixturam ex iis glandulis sæpe manantem, quæ oculorum aciem effugiunt, aut perspexerit ipse, aut ab illis didicerit? Quis eorum motus, quis cursus, ac recursus, quis velocitatis & tarditatis momenta mensus est? Conjicere, divinare, suspicari possumus, scire non possumus. Cum igitur fluida nemo cognoscat, videtis, quam difficile sit eorum temperationem cognoscere; quando in rectam, quando in malam valetudinem vergat; num confirmari, an corrigi debeat; num Medico, an Coquo indigeat. De uno sanguine, ut aliis fluidis parcam, tam varia atque adeo contraria observata & scripta sunt, ut quotidie de ejus natura, de salibus, de acidis, de familiaribus & extraneis particulis, & quod maxime mirum est, colore ipso, qui sub oculos cadit, deque coloris significatione in Medicis scholis disputetur. Tantas has difficultates Medici quidam ut superarent, aut imminuerent, infundendi artem instituerunt; id est latices quosdam pararunt, variosque iis succos miscentes in brutorum venas infuderunt, ut alienis periculis docti, suæ nostræque saluti consulerent. Sed hoc ipsum quam fallax experimentum sit & frugis expers, vel ex eo apparet, quod ejus usus jam intercidit, præterquam apud illos, qui ad eruditionem & ornatum res Medicas tractant.

Verum de fluidis hæcenus. Ad solida veniamus, quorum genera cum plura sint, pluribus item difficultatibus sunt obnoxia, quas superare

nostrorum temporum Anatomici valde nituntur, illud pro certo habete, quamvis homines isti diligentissimi multa in humano corpore detexerint, & in dies detegant, majoribus nostris ignota, tamen multo plura esse, quæ adhuc latent. Quis musculos omnes numerare potest, vascula, fibras, nervos, glandulas, stamina denique universa, quibus machina hæc per infinitos pæne anfractus & ambages in hominis figuram confurgit? Attamen qui velit de iis recte judicare, prius cognoscere singula debet. Sed fac, in universum cognosci. An idcirco etiam in quolibet individuo cognoscentur? Si paucissimæ partes, quæ hominis vultum componunt, & eodem ferme modo dispositæ sunt, tamen pro exigua varietate situs, quem tenent, ita variant humanas facies, ut in Orbe toto duæ plane similes inveniri non possint; quodnam judicium ferendum erit de interna cujusque structura, quæ infinitis partibus constat? Nunc ipsi per vos cogitate, num eorum morborum, qui a solidis manant, magis lubrica *διὰ γυνωσι* sit, an illorum, qui a fluidis. Utraque certe anceps, periculi plena, & plerumque fallax.

Si, quemadmodum se quidam jactant, re vera Physici essent, hoc est totius naturæ periti, facile concederem, posse illos fluidorum & solidorum causas, quæque ex his causis pendent, sive bona, sive mala, perspecta & cognita habere. Sed nullum nomen magis vanum est, quam quo ipsi se appellant *Medicos Physicos*. Scilicet Physicos se dicunt Galenici, cum vocibus quibusdam ad rixandum inventis de substantia Peripatetica, de elementis, de qualitatibus disputare cum suis didicerunt; Physicos se vocant Epicurei, cum

omnia momentis, declinationibus, figuris, atomis definierunt: Physicos se nuncupant Cartesiani, Gassendistæ, Neutroniani, & reliqui minorum gentium disputatores, cum per quantitatem, & motum quæcunque in hac rerum universitate contingunt, callida oratione evolverunt. Cum veritas Physica una sit, omnes autem isti tantopere inter se differant, quo jure se Physicos dicunt? Pythagoram ferunt, cum reputaret, quam difficile sit, sapientiam acquirere, noluisse se *Sophum* nuncupare, sed *Philosophum*, unde nomen ad reliquos manavit. Maxime vellem, ut nostri quoque non se *Physicos*, sed *Philophysicos* nuncuparent, hoc est cognoscendæ naturæ studiosos. Si verecundia hac rerum Physicarum studia tractarent, eadem prorsus in medicam provinciam venientes, diu multumque dubitarent, hærent, quærerent, cogitarent, antequam ad alicujus morbi ^{εἰδὲν} se duci paterentur. Neque vero cum id dico, eos Medicos laudo, qui tanquam Harpocrates ægrotis assident, nihil judicare ausi. Hos ne Medicos quidem existimo. Cautum judicium laudo; nullum condemno.

Quod si quis ab hac parte repulsus, ad alteram migrat, & in Medica ^{προγνώσει} se conquirere putat, huic ego initio statim divini Hippocratis monitum recito *Moneo* (inquit Prædict. lib. 2. c. 3.) *ut quam prudentissime agatur, tum in reliqua arte tum, in hujusmodi prædictionibus. Nam is, cui successerit prædictio in admirationem erit apud ægrotum intelligentem; is autem, cui non successerit non solum odio erit, sed etiam insanus judicabitur.* Συμβελδύω ὡς σωφρονεσάτους εἶναι καὶ ἐν τῇ ἄλλῃ τέχνῃ, καὶ ἐν τῷ τοιούτοις προρρήμασι: γινώσκας, ὅτι ἐπιτυχῶν μὲν αὐτῆς

ἀντις τῷ προρρήματος θαυμαδεῖν ὑπὸ τῷ ξαυόντος ἀλγίον-
τος ; ἀποτυχὼν δ' ἀντις , πρὸ τῷ μισεῖσθαι . τὰχ' αὖ καὶ
μεμνηνὲν αἰδοῖται . Scilicet nihil est difficilius , quam
prædicere quid sit futurum de re , quæ ab innu-
meris causis externis internisque pendere potest ;
quæ in corpore quolibet peculiaribus conditioni-
bus prædita est ; quæ variatur in horas ; atque
ita interdum variatur , ut divini aliquid interces-
sisse , homines ignari naturæ sibi persuadeant .
Audi vi ego , id ætatis adolescens , Medicos gra-
vissimos , & fama nominis celeberrimos , repente
ludibrio habitos , quod suprema fata ægrotis qui-
busquam prænuntiaissent , eosque proinde deseruif-
sent , qui tamen postea mulierculæ curatione sunt
restituti . Itaque nostri , qui plane sapiunt , nihil
unquam affirmative pronunciant . Accedunt ad æ-
grotum graves & meditabundi , venas tangunt ,
quærunt de tempore , de vitæ instituto , de postre-
mis exercitationibus . In has fere morbi causam
conjiciunt ; & ambiguis verbis rem totam descri-
bentes , curationem ex alto ducunt ; eorum , quæ
præscribunt , vim & effecta ambagibus involvunt ;
sperare simul ac timere jubent ; uno verbo ita
orationem moderantur , ut quidquid acciderit ,
sive sua , sive naturæ causa , multo ante prædictum
esse videatur . *Hac iter ad Superos* . Enimvero si
in Arte ipsa certæ firmæque leges essent , quibus
morborum exitus sine errore cognosci posset , at-
tamen cum plura intervenire soleant sive ægro-
tantium impatientia , sive affidentium incuria ,
sive aeris siderumque mutationibus , quæ sane in
officio contineri nequeunt , prudentis Medici es-
set prædictionibus abstinere .

¶ Hic vero fortasse dixerit aliquis vestrum , Me-

dicam facultatem, quæ sui operis exitum neque polliceri, neque scire ullo modo potest, inter liberales non esse numerandam. Itane vero? Quin igitur & Oratoriam Facultatem, & Politicam excludimus, quarum neutra suæ contentionis exitum aut novit, aut præstat? Oratoris enim est dicere apte ad persuadendum, non persuadere; Politici est non felicem Rempublicam facere, sed illa omnia adhibere, quæ ad felicitatem Reipublicæ comparandam sunt idonea. Quemadmodum igitur satis est ad Oratoriam, & Politicam laudem, si omnia fiant boni exitus gratia, quamvis minime fortuna respondeat; ita ad optimi Medici nomen debet esse satis, si omnia adhibeantur, quæ ad morborum curationes conducere videntur, quamvis neque prædici, neque præstari sanitas in tantis difficultatibus possit.

Ceterum nolim quispiam judicet, me talia commemorando Adolescentum nostrorum studia retardare voluisse. Illud potius reputate, Juvenes studiosissimi, catenus a nobis διαγνώσεων & προγνώσεων difficultates recenseri, ut disciplinam latissime fusam, dubiisque rebus implicatam mature suscipiatis, sine intermissione tractetis, per omne laborum & industriæ genus cognoscere nitamini. Habetis in hac Urbe magna exempla ad imitandum; in hac, inquam, Urbe, in qua propter multa cæli solique subsidia non recte valentibus a natura parata, ex omni memoria temporum medicina floruit. Habetis Hippocraticos Viros, habetis Philosophiæ Naturalis studiosos, habetis Anatomicos, & Botánicos, qui omnes, in sua quisque arte, peritissimi sunt, & toto terrarum Orbe notissimi. Nolite abuti fortunæ beneficio,

quæ

quæ vos eo loco collocavit , in quo ad proficiendum nihil deesse potest , nisi voluntas . Monet atque excitat vos Eminentissimus Episcopus Patavinus , qui in tanta pietatis ac religionis cura litterarum curam non intermittit . Monent Civitatis Moderatores , Amplissimi Viri , qui cogitationibus in nos conversis , id agunt in primis , ut ex Patavina Academia , tanquam ex equo Trojano , viri præstantes quotidie exeant . Monent denique nobilissimi ac studiosissimi inclytarum Nationum Consiliarii , qui non ordine modo , sed contentione , & industria reliquos antecedunt , offusa illis verecundia , qui vel sequi nolint , vel tarde sequantur .

E P I S T O L A

A D L E C T O R E M

Præposita editioni primæ hujus Orationis.

AD CIVITATIS PRÆFECTUM ET PROPÆT

OMnes homines ita sunt natura comparati, ut res suæ, qualescumque sint, ornari velint, & in pretio haberi; nec ullus est artifex tam ipse de se demisse sentiens, quin quod facit, non maxime cupiat placere aliis, & commendari. Ex quo fit, ut qui aliquid dicunt, aut scribunt, quod prodire debeat, & hominum judicia subire, si forte dubitant de ingenio suo, aliunde præsidia querant, sæpe magno aliquo nomine, tanquam Ajacis scuto, adversus irruentia tueantur. Ecce tibi, Senator amplissime, quid mihi animo proposuerim, cum Orationem hanc auspiciis tuis habitam, non aliter in vulgus exire volui, quam iisdem auspiciis eodemque nomine tectam: ut cum ipsa per se parum valeat, titulo saltem ornata & munita tantam hanc litterarum lucem sine periculo sustineat. Quanquam quid ego mihi precipue arrogo? Quem potius, si recte cogitamus, appellare Musæ nostræ debent, quam illum, in cuius ditone & imperio sunt, a quo uno potissimum in hac Urbe pendent, cuius manu aluntur & sustentantur? Eas igitur tibi sisto, ad quem jure veniunt; meque in primis, earum nomine quasi facem anno huic litterario præferentem, tutelæ tuæ fideique committo. Tantum autem nobis in posterum de tua bonitate pollicebimur, quantum in præsentī velut ad orgen conferre volueris. *Vale.*

ORA-

O R A T I O XX.

DE ALEXANDRO ZENO
EQUITE,

Cum Marcianæ Basilicæ Procurator
creatus esset.

Doloris magnitudo, quem ex inopinato Zachariæ Canalis Equitis ac D. Marci Procuratoris interitu ceperam, non alia profecto sedari ratione poterat, quam si tu, Alexander, quem ego peculiari quodam studio colo & suspicio, relictum ab eo summæ dignitatis locum occupares. Angebar enim pro mea erga illum minime obscura animi benevolentia & observantia, non multæ ætatis hominem, ad hoc tempus valetudine integra usum, honesto otio sine ulla animi perturbatione fruientem, pietatis ac religionis officiis, quantum rei publicæ privatæque ratio patiebatur, unice deditum, importunissimo temporis articulo inter Medicorum manus ambigua loquentium expirasse. Sed cum fama tulit, celsissimam istam honoris sedem Magni Consilii auctoritate & sapientia tibi potissimum destinari, tum vero cœpi mœrorem animi novæ lætitiæ compensatione lenire. Statim enim mihi illa omnia in mentem venire, quæ ille, dum viveret, narrare præclare facta de te solebat, cum multis in rebus te sibi compararet, & hoc ipsum ominaretur, quod evenit, ut qui primus Procuratoris titulus vacaret, quamvis de suo nihil tale præsentiret, tibi uni ex o-

mini-

mnibus publico iudicio concederetur . Utinam vero, qua ille intelligentia, quo acumine, qua facundia totam Reipublicæ constitutionem in hemicyclo sedens amicis explicabat, homines hominibus, merita meritis, tempora temporibus conferendo, eadem mihi publica in luce uti liceret; sed quod ille me sæpe pro sua prudentia rerumque usu monebat, metiri se quemque decet, nec plus conari, quam possit, & in iis ipsis quæ potest, ita sibi temperare, ut non ingenio indulgere suo, sed moribus & loco servire videatur . Itaque ignosci mihi necesse est, si in hac, quam institui, [gratulatione communia quædam in medium afferam, quæ omnium mentibus infixæ populi sermonibus celebrantur. Vera dabo, non mira. Atque hoc ipsum, nisi fallor, in libera civitate, ad justam solidamque boni civis gloriam pertinet, si nulla in re se magnopere efferat, eaque ad honores via contendat, quæ certa & usitata sit; ut cum ad summa pervenerit, non impetu, non astu, non temeritate fortunæ, sed ratione & consilio pervenisse dicatur.

Ita natura comparati sumus, ut cum aliquem vel doctrina, vel prudentia, vel alio virtutis genere excellere supra ceteros videmus, & hominum iudicia tenere, statim quæramus, quibus potissimum initiis & fundamentis laus hæc excitata sit. Interdum a majoribus vetustaque gentis gloria argumenta rei hujus & causas ducimus; quod, ut in Veneto Patrio pro Civitatis amplitudine & antiquitate facile est, ita mihi quidem parum admodum videtur significare. Sæpius autem ad parentum institutionem oculos convertimus, unde

unde ita pendet reliquæ vitæ cursus, ut si quis parentibus ætate prima destitutus, in avi aut patruum curam incidat, nepotemque agat, is plerumque in vitia præceps delabatur, & quod rei nomen fecit, nepotari soleat. Vix quatuor Alexander excefferat annos, cum patrem amisit; anno autem ætatis decimo septimo matrem quoque. Quid expectatis ab adolescente ordinis primi, qui in maximo naturæ æstu ingentis patrimonii hæres & dominus est, multis, ut fit, fortunam ejus blandientibus, & pro more sæculi ad licentiam impellentibus? Scilicet quærit, cui pareat. In vivis erat patruus ejus Vincentius, vir moris antiqui ac severi, qui sese, mutata veste, in Ecclesiæ sinum abdiderat. Hujus fidei ac tutelæ se suaque tradit Alexander; hujus præceptis atque institutis tam ancipitis ætatis cursum moderatur, ab hoc & magistros, & morum formatores, & rerum suarum administratos accipit; ac veluti filius obsequentissimus sub patria quadam, quam sibi ipse crearat, potestate vivit. Nisi ita fecisset, non eam dare operam litteris ac disciplinis potuisset, quam certe dedit, via & ratione persecutus, quæ nunc juvenus laboris impatiens vix per summa capita & compendia delibare solet, tantumque arripere, quantum satis sit ad irridendum quod non intelligit. Sic porro profecit, ut cum postea pro varia Reipublicæ parte, quam administrandam suscepit, vel dicendum illi, vel scribendum fuit, omnes faterentur, ingenium ejus ad recte cogitandum formatum fuisse, & ad ea, quæ cogitasset, feliciter explicanda. Hinc ortum acumen ejus ac doctrina ad legum & judiciorum disceptandas controversias; hinc rectum exquisitumque
judi-

judicium ad ea cognoscenda, quæ in deliberationem caderent; hinc ille ipse litterarum ac librorum amor, quo factum est, ut domi suæ bibliothecam instrueret, & quidem ejusmodi, ut satis appareat, non ad spectaculum, sed ad usum paratam esse. Jam & togam virilem sumpseras, Alexander, & primos Magistratus gerebas, & annum attigeras sextum & vigesimum, nec tamen a patruī disciplina discedebas. Auctore illo quæsitā uxor, Clara Marcella, Petri Procuratoris filia, Virgo, siqua fuit unquam, aut esse potest, omni virtutum genere ornatissima. Hoc ille postremo in te benefacto vitam clausit; & hoc sane uno reliqua omnia complexus, te sibi memoria obstrinxit sempiterna. Non enim dissimulandum est, quod omnes norunt, uxoris virtutes & ingenium ad tuas laudes longe plurimum contulisse, ut, cum amore invicem & maritali studio certetis, illud quoque in ancipiti sit, uter utri ad mutuam felicitatem & commune familiæ bonum sit utilior. Domo tam bene constituta, nullum Reipublicæ manus erat, modo in ætatem illam conveniret, quod non tibi, alia ab aliis conjiciendo, destinaretur. Placuit a provinciali incipere, quod cum tibi majoribus titulis prædito esset oblatum, sine mora aut tergiversatione recepisti. Intelligis, me de Vicetiæ Præfectura loqui, in qua satis superque ostendisti, quantum naturæ vis & doctrina, etiam sine rerum usu, ad recte imperandum valeat. Instructa magnifice pro muneris dignitate, & Urbis elegantia tum domo, tum familia, statim communem omnium benevolentiam & existimationem tibi conciliasti, quod multum valet ad reliqui temporis auspiciū; ut etiam si quid post eveniat, in quo sit offendendum, non

homi-

homini, sed fortunæ, tribuatur. Durat adhuc, præsertim apud Ordinem primum, lætissimæ illius præfecturæ memoria, in qua rite parendi & imperandi officiis utrinque servatis, omnia ad civilem quandam societatem & hilaritatem referebantur. Neque vero ad tuendam hanc benevolentia constantiam aut nimia potentiorum licentiæ indulxisti, aut de tuo, aut de publico Jure quippiam remisisti. Nunquam sane ejus Urbis Præfectura fortiore animo administrata est; & cum tibi ad breve aliquod tempus Prætura quoque accessisset, efficere potuisti, ut nec Prætoris partes in Præfecto, nec Præfecti in Prætore desiderarentur. Nimirum enim eorum, qui reguntur, affectiones & studia non magis ex re ipsa, quam ex regiminis modo pendent; nec tam sæpe homines spectant, quid sibi imperetur, quam a quo. Hinc factum est, ut Vicetinae ditionis, ejus præsertim, quæ remotior ab Urbe est, status ac disciplina; cum solutior aliquando fuisset, in ordinem per te redacta, etiam clementiæ famam in summa legum custodia tibi pepererit. Ut magna ubique, ita ibi nihilo minor, fortasse etiam major, in vectigalibus exigendis difficultas; quod splendida natio animum gerat in sumptus liberales effusum, & solvere quidem Principi velit, ac revera solvat, sed paterna indulgentia petenti. Attamen huic ipsi parti egregie consuluisti, & quod in primis laudabile est, sine populorum querimoniis consuluisti, ingenti exacta pecuniæ vi, certisque constitutis legibus ac modis per agrum totum, quorum ad hoc tempus neminem pœnituit. Quid vero cum publicas curas ad eos populos contulisti, qui fines Venetorum tenent, & pro
loci

loci natura rerum omnium licentiam sibi deberi putant? Hos non modo in officio continuisti jure imperii, sed ipsorum cum proxima natione diffidia ex omni memoria temporum inveterata sustulisti, ut per quietem & otium agerent, irent, redirent, negotiarentur. Ita se tibi Lestarioli dedere, ita ipsi quoque Folgoretani, ut jam alteri alteros veluti populus unus, & natio eadem, mutuis præsiidiis & communi opera sustentarent. Mirum hoc, quod ab ingeniis ferocibus incredibili facilitate obtinuisti; illud vero mihi magis mirum, quod ejus ætatis homo adolescentiam vix egressus, totum id obtinere potueris. Justitia videlicet, industria, fides, religio eam tibi auctoritatem & sapientiæ opinionem peperit, quam aliis ætas afferre solet; sed acumine potissimum & intelligendi celeritate fecisti, ut te tui alienique vererentur, dignumque crederent, cui parerent. Ex iisdem plane fontibus Civitatis in te studia manarunt. Summa enim gravitate cum esses, quod ipsum non tam ab aliquo studio, quam a natura habes, nihilque non graviter ageres, & ex tui dignitate muneris, neminem tamen unquam re, neminem verbo, neminem vultu læsisti, ut illi ipsi, qui sub initium reverentia quadam subrustica accedere ad te non audebant, cum semel accessissent, nunquam postea dimoveri potuerint. Hinc tanta illa, cum decedendum provincia fuit voluntatum erga te significatio publicis privatisque gratiarum actionibus, Civium nobilissimorum comitatu, vulgi clamore plausuque celebrata. Nec vero pluribus argumentis Senatus indiguit, ut cognosceret, quid sibi de te polliceri posset, siquid gravius virtuti jam

exploratæ commisisset. Itaque non multo post Gallica Legatio consecuta est, in qua tempus ipsum & occasio magnam tibi diligentiam ostendendæ, magnam consilii ac prudentiæ materiam præbuit. Cum enim exterorum Principum exercitus in Italia essent, regionesque ejus florentissimæ bello involutæ flagerent, qua arte opus fuit, nequid nobis periculi ex proximo afflaretur; projectique ad audendum milites fuisse finibus continerent? Sed Regio Consilio persuadere pro causæ natura facile erat; illud vero difficillimum, mandata extorquere, quæ ad copiarum ductores mitterentur, Regisque voluntatem signis non dubiis significarent. Nempe animum ejus ceperas, tibi que devinxeras, qui unus in primis omnia poterat, Cardinalis Floriacensis; qui pro insigni probitate naturæ & Ecclesiastici nominis sanctitate honestos homines diligebat, & cum diligeret, libenter audiebat, sibi que ingeri patiebatur, quod ab justitia & Regni dignitate non abhorreret. In tantis rerum difficultatibus vix dici potest, quam libenter litteræ tuæ auditæ in Senatu fuerint; non solum quod graviter ac dilucide scriptæ essent, in quo sane plurimum vales, sed etiam quod semper aliquid continerent, unde constaret, quantum tibi Aula illa tam culta tribueret, quantique a Rege ipso fieres. Et vero cum filius natus tibi esset, & lustrali aqua Christiano more expiari deberet, Ludovicus ipse tanti Regni dominus, auspicia nomenque dare voluit, magno Regiæ domus operante Mysta, cunctisque proceribus & administris ad celebritatem convocatis. Non sum nescius, honorem hunc aliis quoque ante te fuisse communem, & quidem memoria

nostra Viro magnificentissimo, & summa omnia adepto, Aloyſio Piſano; ſed hoc ipſum ad tuam laudem facit, addo etiam ad omen, potuiſſe te veſtigia tam illuſtria ad immortalitatem impreſſa egregie conſequi & æmulari. Quidquid porro tibi tuiſque virtutibus pro eximia Regiſ bonitate concedebatur, ita accipiebas, ut quoties uſuveniret, ad patriæ utilitatem & commodum conferres. His adiumentis atque præſidiis obtinuisti, ut in magnis Europæ perturbationibus nos incendio proximi ſumma tranquillitate terra marique frueremur, & illud quoque pecunia nobis penſaretur, quod penſari juſtiſſimum eſt, ſed tamen interdum vel re, vel tempore, vel utroque impeditur. Accidit interea, ut Stanislaus, Regiſ pater, Poloniæ Rex eligeretur, unde tibi novæ benevolentiæ comparandæ occaſio ſeſe obtulit, cum ad gratulandum Legatus extra ordinem Senatus decreto declaratus es. Mitto, quam ſplendide Legationem hanc in Regiſ Meudoni ædibus obieris, cum in omni Reipublicæ adminiſtratione, ad ejus majeſtatem oſtendendam, tuarum magnitudinem fortunarum fervire volueris. Illud unum dico & confirmo, feciſſe te in toto Legationum tuarum curſu, ut, cum mentis præſtantiam, qui tecum agebant, maxime celebrarent, tum in ceterarum rerum apparatu nihil requirendum faterentur. Nondum Gallicam abſolveras Legationem, cum tibi Germanica apud Cæſarem commiſſa eſt. In quo profeſſo Cives tui quid de te ſentirent, cumulatiffime ſignificarunt. Vindobonenſis Legatio ipſa per ſe ardua & valde negotioſa ſemper habita eſt, quod ſinitimarum gentium commercia quotidianis difficultatibus & controverſiis implicentur. Tua vero
in

in tempora incidit non sane læta propter incerta belli, ex quibus Aula illa, pro rerum humanarum vicissitudine, spe obscura pendebat. Sed curam hanc alia excepit, cum Carolus VI. ex inopinato decubuit, & intra dies paucos naturæ cessit. Quamvis enim casus ad Venetos magnopere non pertineret, si omnia illa locum habuissent, quæ Cæsar multo ante sanciverat; attamen cum plures statim exorti hæredes, alii Germaniæ statum concuterent, alii minarentur Italiæ, apparuit, sublata inter magnos Europæ Principes pace, neminem non sollicitum esse oportere. Interim Senatus majori Caroli filiæ Ungarorum Reginæ Legationem extra ordinem pro veteri instituto decrevit; teque potissimum ad geminum hoc pietatis & gratulationis officium elegit. Sed bella ex bellis, incendia ex incendiis orta, & ad hanc diem obduratis partium animis continuata, pacis atque otii officia retardarunt. Totus fere Legationis illius cursus dubiis temporibus expositus fuit; vixque explicari oratione potest, quo consilio, qua sapientia, qua dexteritate opus fuerit in subita illa fortunæ conversione, rerumque omnium motu ad benevolentiam & existimationem conservandam. Quamquam præstare volenti, seque totum patefacere, fluctus quoque ipsi jactationesque lucro, apponendæ sunt, si incurrant non quæsitæ; quod non magni facere gubernatorem soleamus, qui probo navigio ventisque secundis perpetuo usus, maris pericula tempestatesque expertus non sit. Jam vero in patriam redeamus, non quidem ut Equestri dignitate semel atque iterum ornatus otio domestico fruaris, vel operam illam dumtaxat Reipublicæ impendas, quæ cum dome-

Iticis commodis conjungi possit; sed ut animuni eo revoces, unde cœpisti, ad Civitates gubernandas. Vix enim sumpta in supremo Sapientum Ordine Sexvirali toga, primoque absoluto curriculo, Patavina Prætura tibi decernitur. Quo tu illam animo acceperis, dubitandum non est, qui nihil unquam bono Civi pro patriæ bono recusandum existimasti. Nos certe summa animi lætitia nuncium accepimus: quippe in actis reperiēbamus, Zenorum nomen ex omni antiquitate faustum Patavinis fuisse. Nam ut nihil dicam de Zenis illis, qui in hac Urbe, cum libera esset, vel suis pareret, Prætores fuerunt, illud & publicis litteris testatum, & in animis nostris insitum qualique consignatum habemus, Reinerium Zenum Venetiarum Ducem anno MCCLVI. copias, arma, comēatus Philippo Fontanæ, Pontificis Romani Legato dedisse, quibus Ecellini exercitu victo fugatoque, Patavium liberavit, feramque illam extrusit, quæ nostrorum Civium sanguine pascebatur. Statim autem Præturæ tuæ ipsa quoque Præfectura conjuncta est, omniumque rerum moles uni incubuit. Tum vero cognovimus, Viro præstanti & experrecto nihil esse arduum. Mens enim tuā non magnis modo rebus ac præcipuis, quod & alii fecere, sed minimis quoque geminati hujus regiminis partibus continuo infusa est, omnesque abunde comprehendit & rexit, quæ in utroque continerentur. Et quanquam Administros longe optimos tibi adjunxeras, quorum fidem præstare posses; nihil tamen ab iis agi patiebaris, quod non ipse ante vel voce, vel scripto cognosceres. Id eos non modo in officio retinebat, sed illud quoque efficiebat, ut operam omnem & industriam

striam in suo quisque munere adhiberent, nihilque temere aggredierentur. Accedebat etiam, quod cum facillimus esset ad te privati cuiusque aditus, precesque & querelas æquo animo vultuque audires, iis, qui circa te erant, quicumque essent, nullus relinquebatur fallaciæ locus. Satis constat, hanc ipsam admissiõnum facilitatem, quæ populares Prætores facit, nisi iidem prompti & acuti sint ad ea, quæ latent in hominum animis pervidenda, non leves errores parere posse. Sed tu quidem, quod sæpe animadverti, rem quamlibet ad te delatam incredibili animi celeritate in partes omnes excutiebas; cumque concedenda cito concederes, si quid non probares, vel silentio, vel brevi interrogatione repellebas, ceteroquin alienus a garrulitate & contentione, quæ imperantis majestatem minime decet. Quamvis porro maiorem quandam in rebus omnibus veritatis ac iustitiæ rationem haberes, nemo tamen inventus est, præsertim ex miseris & afflictis, qui humanitatem & clementiam in te requireret. His virtutibus præcipua, sed nimirum ausim vel sola dicere, eorum qui imperant, merita continentur, & eorum quibus imperatur, felicitas; atque ex his oritur illa, quæ Civilis gloria dicitur, quam nec invidia minuere potest, neque tempus extinguere. Audivi sæpe, Vicetinos Cives de tua sibi Præfectura valde placere: sed ut fateamur, quod res est, ad eam nihil aliud attulisti, quam optimam naturam, earumque disciplinarum præsidium, quas tibi domi comparaveras; ad nos & ætatem insuper attulisti, & quæ ætatem necessario poscit, multarum rerum experientiam, Legationibus obeundis, moribusque aliarum gentium cognoscendis

partam; quæ duo cum plurimum valent ad ceteras virtutes acquirendas, tum in primis ad prudentiam, sine qua virtus nulla stare potest. Multa sunt in Patavino regimine, quam in aliis ex toto continente, difficiliora; sed Gymnasium maxime Rectores exercet. Pars hæc Civitatis multarum rerum difficultatibus impedita, præcipuam quandam curam & vigilantiam postulat, ut primum quidem incommoda consilio prævertantur; deinde si qua præverti nequeunt, iis curationes adhibeantur minime periculosæ. In eo autem plurimum momenti est, si litteræ pareant illi, a quo cognoscantur & amentur. Primis statim mensibus ea fecisti, ex quibus te suum esse litterarius Ordo sibi persuasit. Cum enim vectigalia omnia, excussis fallaciis, certa ratione composuisses, tum Gymnasticum in primis ad trutinam revocasti, quod in dies magis aliis atque aliis de causis obsolescere dilabique cognovisses: jamque illud effecisti, ut, quod ipse non potueris, non Præfectis, aut Quæstoribus, sed ipsi rei suo quodam morbo laboranti imputandum judicetur. Neque vero de ærario duntaxat cogitasti, sed partium singularum suscepto patrocinio, legibus, tabulis, monumentis diligentissime examinatis, nunquid detrimenti cepissent, quave ratione reparatæ aliquando essent, aut in posterum reparari possent, cognoscere voluisti. Videbitur fortasse Oratio mea, Legationes leviter attingendo prætervecta cum sit, in Patavina Prætura nimio plus immorari; sed ego quidem ex illius temporis recordatione tantum capio voluptatis, ut vix temperare ingenio possim; & quando alia nulla ratio est referendæ tibi gratiæ, aliquam mihi fumo prædicandæ. Modum adhibeamus

mus. Vix absoluto Patavini regiminis cursu, cum primum se dedit occasio, Sexvir publicis consiliis regendis rursus creatus es. Ex quo conjicere licuit, quid tibi sperandum esset, si id evenisset, quod evenit, ut D. Marci Procuratio vacaret. Jam id ipsum obtinuisti, nec mirum in domo tua, neque novum. Fuere hoc nomine & honore præditi superioribus sæculis plane multi, ab ipsa hujus Ordinis institutione; sed reperti sunt etiam patrum nostrorum memoria, qui cum in magna meritorum luce viverent, titulosque petendi & causas haberent, abstinere maluerunt, ut ex eo quod ipsis debebatur, ad nepotes aliquid redundaret. Hieronymum dico, atque Alexandrum, qui sæculo proximo exeunte, cum gravissimas Legationes ad summos Europæ Principes obiissent, ac subinde inter Sexviros relati essent, Equestri honore contenti vixerunt. Pater tibi in ipso ætatis flore præreptus est. Frater, natu major, vix primis patriæ honoribus delibatis, Monasticæ vitæ studio abreptus, ad Euganeos Camaldulenses migravit; & ut ostenderet, se non impetu, sed ratione solitudinem quæsisse, ipsas ejus Ordinis Præfecturas ultro sibi delatas, cum ad obedientiæ testimonium recepisset, postea dimisit. Nimirum tibi uni familiæ honores fortuna servavit. Patere igitur, ut dum tibi dignitatem hanc meritis procul dubio partam gratulamur, fortunæ quoque ac felicitati nonnihil largiamur; fortunæ, inquam, quæ ubi diuturna est & constans, divini nescio quid habet, hominum admiratione & reverentia dignum. Scilicet in te ornando fortuna ipsa, fidelis consiliorum tuorum comes, cum virtute certavit, atque ita certavit, ut utramque in potesta-

te habuisse videaris. An non enim fortunæ tribuendum, quod, parentibus sublatis, in patrum incideris, qui omni abjecta reliquarum rerum cura, tuis commodis unice augendis vacaret? At virtutis fuit ab ejus voluntate nutuque pendere, ac tanquam patri in rebus omnibus obtemperare. An non fortunæ tribuendum, quod pulcherrimam eandemque sanctissimam uxorem inveneris, quæ te per omnia constantissime secuta, magna onerum parte levaret? At virtutis fuit ejus fidei atque ingenio honorem habere, tantumque illi dare atque concedere, quantum Liviæ suæ Augustus solebat. An non habenda fortunæ gratia, quod liberos susceperis & multos, & recte valentes, & egregia naturæ indole præditos? At tuæ virtutis est, quod recte instituendos cures, nullisque aut impensis, aut industriæ parcas, ut bonis artibus ac disciplinis informes. An non demum fortunæ est divinitus tibi adiunctæ, quod honores alios super alios ab initio adeptus ætatis, nunc illum ipsum, de quo agimus, ceterorum amplissimum, quasi tibi uni ex tot Civibus meritis debitu, nemine tecum petente, obtineris? At virtutis est, atque adeo virtutis tuæ, quod gradatim honores absque ullius obrectatione petieris; eorumque splendorem ita excipias atque sustineas, ut totum hoc, quicquid est, sine admiratione nimia certo judicio perpendas. Scio, esse aliquos, qui fortunæ vocem ægre ferant, quod nihil magis rationi contrarium putent. Sed quid sit hoc, non definiunt. Mihi nihil est aliud, quam mens illa Mundi præses, nobis ignota, cujus nutu ac providentia res humanæ earumque vicissitudines temperantur. Menti huic, Alexander, quod

quod pie ac religiose servias, eosque servire voveris in omni Rei publicæ administratione, quibus imperasti, cuncta tibi prospere feliciterque evenere. Manent adhuc Vicetinis nostrisque monumentis consignata, quæ pro divino cultu, & sacrorum religione, si quando opus fuit, ex officio & auctoritate Prætoria fieri curasti. Idem tibi sensus in domo tua, & in omni vitæ gubernatione est: neque unquam severius cum domesticis, aut etiam cum filiis agis, quam cum forte hac in parte, quæ tibi summa est rerum omnium, segniores videntur. Hoc animo si pergis, & perges enimvero, habes debitorem gratum; non solum te, quam modo dixi, fortunæ indulgentia non deferet, sed bonis omnibus cumulatum ad ipsum fastigium aliquando extollet. Novi equidem, satis tibi esse quod obtinuisti; & sane pro ætate tam florida debet esse satis. Nobis tamen aliquid superest adhuc precandum: dabis huic civitati tarda illa quidem, & mihi fortasse non visenda, sed tamen aliquando dabis nova lætitiæ publicæ spectacula. Interim ego illam ipsam lætitiā cogitando præsumo; & quando modestia tua mihi manum injicit, omine tam bono finem dicendi facio.

O R A T I O XXI.

D E L A U D I B U S

LUDOVICI PISANI Eq.

Cum electus S. Marci Procurator in
loci possessionem veniret.

SI quis a nobis forte quærat, Senator amplissime, quem potissimum ex Marcianæ Basilicæ Procuratore tanto consensu tibi delata jucunditatis fructum capias, affirmare non dubitaverim, nihil esse rerum omnium, quod te magis teneat ac delectet, quam quod omnes civitatis ordines sine discrimine lætari vides; nec tibi modo, sed sibi inter se, quasi de suo quemque honore suisque commodis, gratulari. Commune enim civitatis beneficium est, quod confertur in civem optimum. Omnino hac de causa majores nostri dignitatis tam splendidæ possessionem summa celebritate capi voluerunt, & spectaculo esse, ut publicum de ejus meritis judicium fieret, qui illam obtinisset: ex quo judicio & ipse justum antea vitæ solatium reportaret, & respublica futuræ quoddam quasi pignus acciperet. Dies hic auspiciatissimus speciem quandam & imaginem triumphi repræsentat, qualem prorsus tempora nostra moresque ferunt, animi viribus, non corporis partum, in ea urbe, quæ cum pacis & libertatis domicilium sit, illa parat domesticæ fortitudini præmia atque ornamenta, quæ Romani, ad amplificandum

dum imperium unice intenti, bellicæ parare consueverunt. In hac totius populi lætitia, quam præ se quisque voce vultuque ferre studet, ego mihi eas partes sumpsi, ut egregie facta dicendo explicem, quæ te ad celsam hanc dignitatis sedem supremæ proximam extulerunt: in quo quidem nihil aliud reputavi, quam ibi me dicturum, ubi omnes te recte nossent; totidemque viderem dictorum meorum testes, quot auditores. Tibi uni fortasse pro tua in rebus omnibus modestia animique moderatione nonnihil molestiæ dicendo afferam: sed quid tandem? *Sume superbiam quæsitam meritis;* & cum tam multa laudabiliter egeris, da huic publicæ gratulationis officio, ut libere nobis liceat tuas laudes commemorare; ex quibus intelligatur, te tuis civibus, quantum in te fuit, non minora tribuisse quam acceperis.

Hor. l. 3.
od. ult.

Qui pueros instituunt patricii generis, illud in primis curant, ex vetusta Græcorum παιδεία, ut cum interrogare incipiunt, & discendi desiderium ostendere, præmissis quæ ad religionem pertinent, facta præclara & illustria narrent, quorum imagine illorum animus mature imbuetur atque excitetur. Et quia ita sumus omnes natura comparati, ut nostra nos magis, quam aliena capiant & moveant, recte cum illis agitur, qui ea in patria vivunt, & ex ea domo sunt orti, ut nihil ipsis audire sit opus, nisi sua. Tibi certe, LUDOVICE, hujus generis adjumenta ad ciendos primæ ætatis spiritus, mentemque formandam non defuere, cum Venetas historias percurrentibus nulla fere se offerat ætas, qua non Pisanus aliquis domi forisve infi-

inignis rempublicam administrarit. Nam, ut u
 præstantes illi morum magistri, qui pueritiam
 tuam regebant, ab antiquitate ultima repetere
 monumenta noluerint, certe de **VICTORE** Pi-
 fano tacere non potuerunt, Venetæ classis adver-
 sus Ligures imperatore, qui, licet adversis ali-
 quando jactatus, tanta apud populum benevolen-
 tia, gratia, & auctoritate valuit, rebus præclare
 gestis parta, ut in summis patriæ periculis, ma-
 gnaque desperatione rerum hunc unum dari sibi
 ducem optarit, ac pæne voluerit, ejusque auspi-
 ciis armari. Paucis post annis fato contigit, ut
 vir tantus, patriæque tam utilis, in imperio cum
 esset, Siponti moreretur: justa autem illi Vene-
 tiis ingenti funeris apparatu coram Duce Senatu-
 que omni, ad publicum civitatis luctum osten-
 dendum, celebrata sunt, & statua pedestris posi-
 ta. Atque haud scio, an non fatale aliquid ex
 hoc mortis genere Pisanis hæserit. Quatuor enim
 subinde ex eadem gente, volventibus annis, viri
 fortissimi longeque principes, dum militarem rei-
 publicæ operam navarent, procul a patria sunt
 extincti, **LAURENTIUS** Candiaæ Præfectus in
 urbis illius obsidione, **ANTONIUS** Trierarchus
 in Amphimaliæ aquis, **NICOLAUS** navium
 majorum Ductor ad Cenuffas Insulas, **ANDREAS**
 classis Imperator Corcyræ. Quid, cum eos
 tibi ex tuis majoribus referrent, qui se re-
 bus civilibus dediderunt, Sexviros, Decemvi-
 ros, Legatos, terrestris maritimæque ditionis
 vario nomine variaque auctoritate moderatores?
 Quid, cum ad Sacerdotia quoque narrando pro-
 gressi, **FRANCISCUM** Cardinalem memora-
 rent, Jurisperitum suæ memoriæ celeberrimum,

Leoni X. in primis carum, qui cum Patavinam Ecclesiam regeret, Episcopales ædes magnifice extruxit? Quid, cum ALOYSIUM adderent Episcopum item Patavinum, disciplina litterisque præstantem, Pii IV. judicio & auctoritate Cardinalium Collegio adscriptum? Quid, cum alios minoribus quidem titulis præditos, sed moribus, doctrina, charitate in patriam, benignitate in omne genus hominum effusa nobilitatos tibi ad imitationem ante oculos ponerent? Hinc scilicet vis atque inadoles Pisani sanguinis excitata, & quodammodo accensa, stimulos tibi viresque adjunxit, ut virtutes illas acquireret, quas in omni vita necessarias existimasti ad tuendum & ornandum fortunæ statum, in quo te Superi collocarunt. Itaque cum tibi primum versari in republica licuit, atque ostendere per minores administrationes, quid polliceri de te posses, navalibus præpositus es: quo in munere plane gravi non fidem solummodo atque industriam præstitisti, ut omnia pro temporum necessitate in promptu essent, neve ex tam multis, qui tibi parebant, ullus ab officio recederet, sed rationem ipsam construendæ navis & artificium omne cognoscere voluisti; quod intelligeres, parum bene agi cum domino, qui fervorum non solum manu, sed etiam mente indiget. Sed cum Pater ad summum civitatis locum ascendit Dux Venetiarum creatus, vacandum tibi ex patriis legibus fuit, cura una relicta, ut quæ ad familiæ dignitatem pertinerent, optimi senis arbitrio cuncta liberaliter splendideque fierent; ne, cum in privata fortuna unus omnium ALOYSIUS munificentissi-

mus habitus esset, ad regium fastigium evectus a seipso desciscere videretur. Et sane quid unquam per eos annos prætermisum, quod ad munificentiam declarandam pertineret? Cui vel civi, vel hospiti, ubi res tulit, non benigne factum? addo etiam, cui non large, modo cum ratione peteret, effuseque donatum? Vivebant in tanto illo Pisanæ familiæ splendore patrum immortalitate digni, HERMOLAUS, & CAROLUS, quibus pro tua erga illos reverentia & pietate omnia deferebas: sed alter se totum, emenso ambitionis honorumque cursu, bibliothecæ parandæ in usum civitatis dederat; alter militari multorum annorum labore fatigatus, gloriaque & dignitatibus auctus, honesto otio fruebatur. Rerum moles domesticarum, quæ in publicas identidem incurrebant, tibi pæne uni incubuerat; & vel ex eo tempore intellectum est, quam esses rebus agendis idoneus. Itaque, extincto patre, novoque suffecto Duce, ad Brianos regendos missus es auctoritate Prætoria, cui Præfectitia quoque per menses aliquot accessit. Tam gravi publicæ personæ suscepto onere, statim privatam exuisti; nihilque cogitare aliud visus es, quam quod ad ejus civitatis commodum & salutem referretur. Agebas enim, non te tibi Præturam gerere, sed reipublicæ; nobilissimam provinciam non potestati tuæ traditam, sed fidei ac tutelæ commissam; te illuc venisse ad bonorum jura tuenda, ad commune omnium commodum procurandum, ad veterem custodiendam populi fidelissimi tranquillitatem. Captis de more in templo auspiciis, statim significasti, quinam tibi sensus erga illos

illos futurus esset, qui religionem laderent; tuosque in primis divinitatis metum ostendere jussisti, ut aliis exemplo essent. Egregia vero initia, magnoque viro, & sapiente Præatore digna. Quis enim ignorat, ex nulla re magis, quam ex religionis cura opinionem gigni probitatis & justitiæ, quæ maxime valet ad eorum mentes occupandas, quibus imperatur, cupiditatesque continendas? Vix autem prodire cœpisti, teque civitati dare, cum ipso oris vultusque habitu omnes cujusque generis homines tibi conciliaisti. Prima enim commendatio a natura est. Quid vero cum ad publica negotia expedienda ventum est, ad jura privatis reddenda, ad fontes puniendos, ad pacanda diffidia, ad exigenda vectigalia? Tunc enimvero apparuit, qualis quantusque esses & vir, & Prætor. Omnia enim sic agebas, ut nec celeritas deesset ingenii ad intelligendum, nec judicis gravitas ad decernendum, nec animi lenitas & placabilitas ad æqui, siquid molestius eveniret, bonique faciendum. Illud autem maxime ad prudentiæ tuæ commendationem attinet, quod quamvis implicata quædam ipse per te explicare posses, nunquam bonorum consilia rejecisti. Hoc enim ipsum inter rectæ gubernationis arcana ad effugiendam multorum offensionem habetur, ut qui præest negotiis, interdum doceri velit; & illa ipsa, quæ scit, ab aliis cognoscat, eorumque judicio se agere profiteatur. Quemadmodum autem tu tibi aliorum consilia non inutilia esse putabas, ita eos, qui tibi adsidebant operamque præstabant, nihil agere, te inconsulto, patiebaris; & cum officia pro regiminis magnitudine mul-

multa essent, & in multos dispersita, tu tamen singula mente complexus assidue diligenterque inspiciebas. Sunt, quibus hæc ipsa diligentia nonnihil molestiæ afferat, nisi magno judicio sit adhibita, & morosi ingenii suspitione careat; at ea erat de tuæ bonitate naturæ non unius aut alterius, sed omnium opinio, tam alte inhærens ac penitus insita in hominum animis tuæ virtutis existimatio, ut nihil velles, nihilque faceres, quod non omnibus probaretur. Ad hoc laudis genus multa tibi subsidia natura præbuit, cum frontem explicuit, cum micantes oculos annuentesque dedit, cum faciem totam ad concilianda hominum studiu conformavit; at fortitudinem & constantiam studio tibi comparasti. Neque enim omnia ad lenitatem referenda sunt; præsertim in administratione tam fusa, ubi esse aliquos necesse est pro humani ingenii varietate, quorum audacia nisi metu contineri nequeat, Ex quo efficitur, ut inter omnes imperantis virtutes primo loco habenda justitia sit. Verum, cum duo sint in eo, qui imperat, justitiæ exercendæ modi, quorum unus in tuenda rerum contractarum fide positus est, alter in prohibendis injuriis coercendaque improborum licentia; ad primum illum omnia tibi, quoties oporteret, in promptu erant, siue communi jure agendum esset, siue per ea, quæ apud Brixianos peculiari lege constituta sunt, populique consensu recepta; at vero de altera cum ageretur justitiæ parte, non tu quidem eam negligebas, sed invitus ad pœnas decernendas accedere videbaris; nec unquam acerbiores esse passus es, quam tuæ ratio posceret bonitatis ac man-

sue-

fuetudinis . Non enim crimina tantum spectare consuevisti, legemque omnibus una voce loquentem, sed cuncta simul, quæ legis vocem æquitate ac ratione temperant, quis deliquisse dicatur, quo loco, quo tempore, qua de caussa ; num scelere, an errore potius ; num consulto, an casu ; num iratus & in re præsentì, an multo post tempore ; num dolo & insidiis, an aperte & ex condicto ; num per vim & injuriam, an laceffitus . Novi equidem, eorum qui judicia exercerent, vix ullum inveniri, qui non sibi ex hoc cautionum genere laudem quærat ; sed ea est de animi tui æquabilitate communis omnium existimatio, totius vitæ usu moribusque spectata, ut, cum de aliis interdum dubitetur, vel dubitari posse videatur, de te nemo unquam dubitarit. Fit enim, quamvis raro, sed tamen fit, ut collecta quidam integritatis ac virtutis fama, quales fuere ad posteritatis exemplum Aristides Athenis, Cato & Fabricius Romæ, non modo extra omnem peccandi suspicionem habeantur, sed etiam nescio quo pacto extra periculum . Jam vero fortuna ipsa mentis tuæ vim & consilium experiri voluit. Repente enim ingravescere annona cæpit, eorumque multitudo, qui in diem vivunt, in metu esse. Hic vero quis tuam in agendo celeritatem & solertiam explicare potest, quis intelligentiam in providendo, ut comportatis undique frugibus atque expositis, inopiæ occurreretur? Brevi tempore, excussis per totam provinciam horreis, illectisque vicinotum locorum mercatoribus, rem frumentariam non solum restituiisti, sed exaggerasti. Macellum quoque laborabat, correptis su-

bita quadam contagione luis, & absumptis magna ex parte bobus. Tum tamen singulari sapientia fecisti, quod difficillimum videbatur, ut nec agris cultura, nec urbi carnaria deessent. Eadem opera & providentia reliquis provinciæ partibus consultum est, ut jam te non Prætorem modo, sed custodem, patronum, ac prope parentem appellarent, dignumque arbitrarerentur, cui, si licuisset, perpetuo parerent. Id præsertim intellectum est, cum, exacto Præturæ tempore, inter populi plausum & gratas acclamantium voces, Magistratus insignia posuisti. Ne tu quidem in tanto illo civitatis motu tibi temperare potuisti, quin te amari sentire, proindeque non plane lætum discedere, verbis humanissimis declarares. Certarum utrinque est, non officiis ex formula, sed caritate quadam, & mutua voluntatum significatione; nec ullus fortasse ex omni memoria Prætor tam sibi unum aut alterum benevolentia obstrictum reliquit, quam tu tibi universos.

Cum in patriam rediisses, non ita multo post Palmæ præfectus es, qui locus in ipsis Venetæ ditionis finibus positus non multum negotii viro navo exhibere videtur, nisi forte extra ordinem. Curam tibi aliquam & cogitationem afferre debebat, quod viro succederes magnificentissimo FRANCISCO LAURETANO, qui nunc principem patriæ locum tanta cum dignitate tantoque splendore tenet: veruntamen liberalitas & magnificentia ita propria Pisanorum est, ut tum maxime gaudeant, cum ad hujus laudis æmulationem vocantur. Qui te norunt, nihilo plus quærunt, ut intelligant, quo

quo apparatu munus susceperis, quam copioso, quam splendido, omnino ut appareret, non tam ubi esses, quam quis esses. Non sane diu tibi otium fuit. Etenim cum moenia, & propugnacula præsertim duo tempore disiecta labarent, Senatus restitui per te iussit, valloque & fossa muniri. Tua igitur opera & industria effectum est, ut non modo pacis tempore ad oppidi famam tuendam suffectura in posterum videantur, sed etiam, si quid forte ingruat, arcere pericula possint. Quid aquæductum memorem, quem ex ligneo marmoreum ingenti substructione fecisti, opus oppidanis salutare, omniumque votis diu multumque expetitur? quid arma ignea ad sæculi morem & aliarum nationum exemplum renovata? quid armamentaria ipsa, & militum contubernia vel reparata, vel resecta? quid tela generis omnis & bellica tormenta conditoriis importata? Ne multa: id egisti, ut posterique scirent, ac lætarentur, te Palmæ cum imperio fuisse. Jam nemora quoque publica invisebas, cum subito iussus es gravi de causa, quæ motum Cræmæ exciverat, in eam urbem migrare. Ibi vero cum te ex inopinato ostendisti, cives illi omnes, veluti nautæ viso Castore, spe tranquillitatis elati perinde loquebantur, quasi jam haberent, quod afferebas. Res profecto erat non leviter impedita, tu tamen illam tanta evolvisi celeritate, ut, cum alii alia cogitarent, repente expeditis difficultatibus, omnium vota & consilia præverteris. Post tot ac tanta in rebus gerendis prudentiæ, fidei, virtutum omnium experimenta nemini mirum videri debet, si summa tibi omnia cives tui detu-

lerunt; si statim gravissimo Xvirum Consilio adscriptus es; si, quæ prima vacavit Marcianæ Basilicæ Procuratio, tibi vacavit. Ex quo cœpisti in hac honorum contentione versari, incredibili quadam felicitate usus, omnia obtinuisti petitione prima.

Sed ille me ex orationis cursu dies revocat, quo te supremum Civitatis Consilium non tam suffragiis, quam voce ad summam hanc dignitatem elegit; tum duo illi deinceps secuti, quibus officia & gratulationes domi tuæ recepisti. Hærebant adhuc mentibus hominum penitus infixæ solemnia illa apparationum, quibus eundem hunc honorem CAROLUS Patruus magna omnium admiratione celebraverat; illa quoque memorabantur, quæ Pater tuus, delato sibi Principatu, longe majora atque illustriora in ædibus publicis præbuerat: effecisti tu tamen singulari quadam magnificentia liberalitatis, ut ne tui quidem tecum in hujus laudis contentionem venire possent. Debes plurimum (fatendum est enim) FRANCISCO Fratri, Senatori optimo atque ornatissimo, qui non minore animi magnitudine præditus cum sit, vias omnes & rationes quæsit, quibus benignitatem ostenderet erga illos præsertim, quibus non ad spectaculum, sed ad rationem benigne faciendum est. Ne sibi quidem ipsi pepercit in tanto illo rerum atque hominum motu, de tua magis laude, quam de sua valetudine per eos dies non valde firma sollicitus. Est in utroque vestrum similis quædam probitatis ac virtutis significatio, ex qua oriatur amor necesse est ipso illo major, quem natura peperit. Fraternali istam animorum
con-

conjunctionem atque concordiam, quæ in Pisana domo nunquam desiderata est, Deus Opt. Max. numine suo firmet, iisque bonis & honoribus augeat, ut alter alteri, quantum patria instituta legesque sinunt, ornamento sit. Tu autem, LUDOVICE PROCURATOR amplissime, frueris tam honorifico de te supremi Consilii iudicio ad animi fructum & lætitiā; frueris tanta hactenorum civium benevolentia, quam inter paterna bona velut hæreditariam habes; frueris demum redintegrato superioribus diebus per nuptias gaudio ad uberiores Pisanae familiæ propagationem, quæ inter ceteras benefaciendi fama celebris, ex bonis, quibus abundat, tantum capere voluptatis creditur quantum aliis commodi affert.

SERENISSIMO PRINCIPI
FRANCISCO LAURETANO
DUCI VENETIARUM

F

CUm bonorum civium gesta, & præmia gentibus collata celebrantur, pro certo haberi debet, eum in primis letari, qui caput & Princeps civitatis est. Paucis habes, Dux Serenissime, cur ego Orationem hanc ad te potissimum instituam, tuaque ipse auspicia quæram. Agitur in ea de Ludovici Pisani meritis, quem supremum reip. Consilium, te auctore atque auspice, S. Marci Procuratorem creavit; eoque die agitur, quo se ille tibi in magna Optimatum corona ritu solemni sistit, ut alloquatur, teque sibi de se loquentem audiat. Miram videbitur, esse hominem ita sibi præfidentem, ut post augustas Principis voces iisdem de rebus verba facere audeat; & siquis est, certe prodire non debet, quin prius gonibus advolutus tuis veniam & facultatem dicendi petat. Dabis, quemadmodum spero atque concedes, ut optimi Senatoris egregie facta, quæ tu pro personæ quam sustines, majestate breviter collegisti, ego sigillatim exponam; nec nostris modo, qui viderunt atque audierunt, sed posteris quoque ad memoriam & imitationem tradam. Plurimum enim interest, notum fieri omnibus, quanti valeant, te Duce Venetiarum, in magna
fortu-

*fortuna magnæ virtutes, & quibus honoribus pro
 patriæ amplitudine ornari soleant. Intellego sane,
 quantum oneris ac negotii in hac mearum virium
 tenuitate suscipiam; sed nihil est hujusmodi, quod
 ego jamdiu Pisanis obstrictus pro eorum gloria su-
 scipere non debeam, teque annuente, suscipere non
 ausim. Non poterit civitas conatum hunc, qualif-
 cunque sit, non probare, quem & officii religio-
 ne a me susceptum, & judicio tuo probatum vi-
 derit.*

O R A T I O XXII.

JUVENES AD ELOQUENTIAM APTIORES
ESSE, QUAM SENES.

*Habita xi. Kal. Jan. MDCCVII. ad instauranda
Seminarii Patavini Studia coram
civitatis Episcopo*

GEORGIO CARD. CORNELIO .

VEterem illam atque usitatam in litteraria concione dicturis formidinis professionem, tritamque veniæ petendæ quasi formulam, licet mihi in tantam hanc ingeniorum lucem nunc primum venienti, citra artis injuriam & hominum offensionem prætermittere. Habent enim alii fere omnes, qui in publicum prodeunt, quid existimationis amittant, si forte dicendo peccaverint; at ego, cujus vix ullus est umbratilis exercitationis usus, fama vero omnino nulla, videor mihi in discrimen prope nihil adducere, de quo sit magnopere pertimescendum. Videlicet jussus accedo; nec ea sane mente animoque accedo, ut statim Oratoris partes nomenque occupem, tota plane cessurus provincia, si forte conatus hic primus in loco tam gravi minus prospere videbitur cecidisse. Quamquam jubet me ipsa bene sperare eloquentiæ ratio & natura, in qua conniti laudabiliter, ut ut a me judicetur alienum, a mea certe ætate non vehementer abhorret. Immo si quis in adulescentes ingenio doctrinaque instructos conver-

tat

tat animum, inveniet profecto, facultatem hanc, ætate cum ætate collata, juvenum magis, quam senum propriam dici debere. Absit dicto invidia. Hoc enim est, quod in præsentī, Auditores, contendo; si mihi pro vestra humanitate datis atque conceditis, ut quo primum tempore dico, pro causā mea dicam, idque sumam argumenti, quod me in suscepto instituto, si fieri potest, toto reliquo vitæ cursu confirmet. Verebar enim aliquando hujus aleæ periculum fortasse plus nimio; verentemque sponte mea deterrebant insuper hominum judicia gravissimorum, a quibus eloquentia dicitur munus quasi divinum, quod minime deceat juvenum levitati, ut ipsi loquantur, demandari. Idcirco statui, siquando mihi potestas fieret orationis, ea vobis exponere, quibus effici videretur, adolescentes ad eloquentiam non solum non esse ineptos, sed etiam senibus toto genere magis aptos. Intellego sane, quanto discrimini objiciar; planeque sentio, visurum me illis monstra afferre, qui sentiunt, certis eloquentiam ac prope immensis includi difficultatibus, quæ nunquam ab homine universæ, vel totius vitæ labore & contentione dumtaxat superentur. Verum enimvero liceat mihi, non pro me quidem, sed pro ætate pugnare mea; eamque supra senilem efferre, vel quod ita sentiam, vel quod ingenium exercenti ardua movere interdum expediat, & in partem quamlibet animose disputare. Neque enim hoc loco dicentes capite, vel fortunis dimicamus, ut eæ nobis ad decertandum controversiæ deligendæ sint, quarum certa victoria constet: sed cum illud nobis propositum unice sit, ut publicum aliquod in-

dustriæ specimen exhibeamus, quid est quod magnopere laboremus, si forte causæ vitio ceciderimus, modo in causâ ipsa explicanda ac defendenda non improbemur? Itaque ante denuncio, & ex animo testor, ita me pro juvenibus stare, ut senes tamen magnopere verear; eoque me animo partem hanc tueri, ut qui pro altera, si opus fuerit, pugnare paratus sim.

Cum ætas non una sit, quæ potest in certamen eloquentiæ descendere, sitque mihi cum una tantum instituta contentio, pacem cum virili esse volo; eique de re tota non moleste concedo, quod cum maximarum facultatum perfectam sibi possessionem pro viribus naturæ vindicet, nequeat illi eloquentiæ principatus denegari. Juveni cum sene hodierna disceptatione res est. Juvenem porro cum dico, vigentem aliquem vitæ statum intelligo, qui nec sit infra annum quintum & vigesimum, nec valde supra trigesimum; quæ ætas promiscue solet modo adolescentia, modo juvenus appellari. Tria sunt autem initio statim distinguenda oratoris officia, quorum primum in probando, in delectando alterum, tertium in movendo collocatur; ut cum planum fuerit, triplici hoc laudis genere juvenes antestare, tum demum satis vobis esse factum de re proposita arbitremini. Ajo itaque, adolescentiam senectuti comparatam copiosius invenire, quæ doceant auditorem; ajo, splendidius ornare, quæ inventa fuerint; ajo, affectibus uti multo aptius. Jam vero ut primum expediat oratio mea, quod esse debet in quavis oratione primum, quid est, cur tarda illa & fatigata senum ingenia cum juvenum vegetis, &

ad excogitandum promptis conferantur? Quem-
 admodum enim sensus nobilissimi, auditus, &
 visus, inclinata ætate dilabuntur, & una cum to-
 to corpore sensim ad interitum ruunt, ita vis a-
 nimi illa, quæ ingenium dicitur, senectutis ac-
 cessione minuitur, & in dies magis magisque
 contabescit. Est profecto animus in corpore qua-
 si compagibus septus & inclusus, ut nihil possit
 absque sensuum opera assiduoque ministerio ipse
 per se moliri: unde facile intelligitur, animum
 ipsum consensu quodam naturæ sentire damna
 corporis, ministrisque deficientibus suis, non
 posse non deficere, & una cum illis quodammo-
 do consenescere. Oratoria autem inventio & con-
 firmatio non qualicunque efficitur ingenio, sed
 magnam requirit vim ac virtutem, conatus in-
 gentes, hominem totum; ut si quis propterea, se-
 nex cum sit, in hoc se discrimen conjiciat, fru-
 stra ille quidem conetur, aut tale quiddam pa-
 riat, quales solent animantia fetus gignere, si
 forte exacta jam ætate effœtaque natura conci-
 piant. Quapropter Pythagoras cum inter huma-
 næ vitæ status atque anni tempora comparatio-
 nem instituisset, juventutem quidem hilari ac fe-
 cundæ æstati, senectutem vero horridæ hyemi,
 contractæ, sterilique similem judicavit. Sed quod
 gravissimum est miseris senibus, ipsa etiam de-
 stituuntur memoria: ex quo facile consequitur,
 ut, cum parum apti sint ad sua procreanda,
 ne alienis quidem uti possint. Ferremus enim
 illos æquiore animo, si cum minime valeant
 ingenii fecunditate, memoriæ tamen ope sufful-
 ti in commune penus excurrere possent, sibi que
 pro causâ susceptâ natura consulere aliunde mu-
 tuan-

tuan-tes . Quantulam enim in senē putatis esse memoriam, in cuius exsucca organa atque obdurata rerum simulacra difficillime recipiuntur, quæque prius fuerant recepta, non secus atque imagines in veteri pariete depictæ, situ ac ruina oblitterantur? Hinc intelligitis, quam nullum nobis negotium faceffant, qui idcirco senem præferunt adolescenti inventionis laude, quod ille multa didicerit longo usu, assiduo studio, diuturna artium ac litterarum tractatione; hic vero admodum pauca pro vitæ cursu tam exiguo. Qua enim juvenes felicitate memoriæ valent, tam alte defigunt animis, ac suum pæne in sanguinem convertunt, quæcunque perceperunt, seu multa, seu pauca, ut illa, cum opus est, tamquam ex ingenio suo fundant & vel ad subitos casus gignere videantur. Verum adhuc ibi versamur, ubi ad victoriam non satis momenti est; quod non sit difficile, ut ait Auctor ad Herennium, invenire quid sit, causæ adjumento, difficillimum vero sit inventa expolire, unde existit delectatio, quod erat ex oratoris officiis antea propositis partitione secundum. Fateor lubens: addo etiam, inventionem multis esse communem minime disertis, elocutionem vero ita unius esse oratoris, ut ab ea artem dicendi omnem eloquentiæ vocabulo majores nostri sapientissime nuncuparint. At illud etiam affirmo, inter oratores ipsos multo eloqui ornatius juvenem, quam senem, ideoque alterum altero magis delectare. Enimvero orationes nostræ liberi veluti nostri sunt, qui parentum naturam, mores, affectus ore ipso atque habitu plerunque refe-

runt:

runt : proinde qui fieri potest, ut sicca illa, aspera, strigosa senilis ætatis constitutio orationem gignat verborum delectu & positione concinnam, translationibus festivam, numeris suavem, sententiis illustrem? Anni, anni ipsi profecto lætissima ingenia opprimunt, nec veniunt assurgere patiuntur; & qui, dum ætate florent, lepore atque hilaritate redundabant, viriles annos prætergressi, salebrosam nescio quem dicendi modum, & impexam antiquitatem confectantur. Ipse ille Isocrates, cujus tota fere gloria, quamdiu oratorem egit, in numero & elegantia orationis fuerat, ætate in senium vergente, visus sibi inornatior, sponte siluit. Et, nequis eum forte levitatis insimularet, propositi sui causam explicuit in epistola ad Jasonis liberos. *Puto, inquit, me quidem in consilio dando valere: nam experientia senes instruit, atque efficit, ut quid expediat, acutius quam alii, perspicere posse videantur. De propositis autem rebus suaviter, concinne, atque elaborate dicere jam non nostræ ætatis est.* Ἡ γὰρ ἐμὴ συμβουλία μὲν ἀκμῇ ἔχουσα αἰγὰρ ἐμπερίᾳ παιδύουσι τὰς τηλικύτας, καὶ δοκῶσι μάλλον τῶν ἄλλω δυνάσθουσι καὶ δορᾶν τὸ βέλτιστον. εἰπεῖν δὲ περὶ τῶν προτεθέντων ἐπιχαρίτως, καὶ μεσικῶς, καὶ διαπεποιημένως ἔκ' ἐστὶ τῆς ἡμετέρας ἡλικίας ἔργον εἶναι. Nimirum graviora cogitamus, cum exuendæ mortalitati proximi sumus; ac, sicuti vestem paulo lætius pictam, atque artificiosius complicatam, ita floridam dictionem & expolitam putamus senem hominem dedecere. Non ignoro, esse quosdam asperioris ingenii homines, quibus probetur, qualiscunque sit, senilis orationis jejunitas? studeantque a vitio liberare, quod frig-

gidum est, grave solidumque appellantes. Sed hujus generis homines nulli sunt, opinor, in hac civitate, inter vos certe nulli, qui qua estis naturæ morumque suavitate, in rebus omnibus quibus actio vitæ continetur, ampla & jucunda quæritis, in loquendo autem præsertim ac scribendo ab inornata istorum siccitate plane abhorretis. Itaque nihil mirum, si senum duritiem averfati ad juvenes oratores libentius acceditis: qua in re perinde facitis atque illi, qui fructus ex agro quærentes, non vetulas arbores, sed novellas vegetasque excutiunt. At ego maxime vellem, ut genus hoc senilis eloquentiæ, quo duci se aliqui dicunt, certa aliqua in parte orationis designarent. Cum enim tardior sit senex ad inveniendum, quod est antea pro modulo nostro demonstratum; cum sit nihilo in ornando felicius, quod vix ullus, modo loquatur ex animo, negare audeat; num est tanta ista dicendi præstantia in animorum concitatione posita, quod erat tertium a nobis propositum? Hic vero rogo vos etiam atque etiam, quod interdum facere in media oratione ipsi quoque poetæ solent, ut animos intendatis. Ut enim in movendo potissimum ars & virtus oratoris sita est, ita quæ aptior videbitur ad movendum ætas, pro ea vos stare in præsentī controversia oportebit. Certe, ut ad misericordiam excitandam non inutilis sit aliquando senectus, ad reliquos affectus pertentandos, iram, invidiam, spem, lætitiā parum valet. Neque enim possumus ea concipere, a quibus natura ipsa abducimur, ignemque inde excutere, ubi nihil est nisi frigore & glacie quasi quadam constrictum.

Hac

Hac scilicet maxime in parte dicendi genus debet esse incensum, acre, concitatum & ad pertrahendos audientium animos, quocunque procaussæ necessitate libuerit, vehementissimum. Hic locus est, ubi audacter provocandus reus, vel gratia, vel opibus, vel nobilitate potens; quod quis ausit, nisi ille, qui & natura ferveat, & sit virium suarum confidentia valde animosus? Hic ubi imploranda judicum fides, odium creandum, incutiendus terror, minæ intentandæ, rostra, subsellia, forum permiscendum: quod certe præstari ab illo nequit, quem vox, latera, spiritus senio deficiunt. Quid si ad milites verba facienda? Nonne ridiculum sit senem producere in concionem? Quo ille pacto, qua vi erumpet in armatorum animos, audaces comprimet, timentes eriget, terrebit seditiosos, clamores faciet, tonabit, fulgurabit, bacchantemque exercitum, & quasi limphatum oratione sua ad pugnam compellet? Hæc enim vero grandiora sunt, quam ut capiat senum infirmitas: ac, sicui forte contigit in foro & judiciis ætatem vitæ ultimam non infelicitè agere, in castris certe oratoribus istiusmodi nec fuit unquam, nec potest esse locus. Sed a foro etiam recedant, siqui sunt, juvantesque consilio accessuros ad se, abstineant patrocínio. Fateantur non inviti ad maximum oratoris officium se minus idoneos; utque credant, facultatem sibi non deesse optima quæque parandi, pronuntiare saltem pro dignitate se posse diffidant. Juvat enim pronuntiationem huic parti conjungere, non quod ad probandum & delectandum habeat momenti parum, sed quod in movendo

pecu-

peculiarem quandam sedem sibi vindicet, ac veluti principatum obtineat. Rem paucis expeditio. Modo enim reputetis, pronunciationis dignitatem figurata quadam vocis firmitudine, corporisque motu contineri, jam arduæ non erit operæ judicare, utrum ille ad oratoriam pronunciationem comparatus & idoneus dici possit, cujus frigida ætas & vieta vocem pæne omnem motumque laxavit, depreffit, infregit. Indulgendum fortasse senatori: at in foro qui versari velit, & cum populo agere, parum mihi sapere videtur, causamque prodere, si nec voce satis valet, nec gestu ad ea, quæ dicit, in sensus hominum animosque infigenda. Hæc autem quam vera sint, ostendunt reipsa oratores non pauci, qui gloria contenti florentibus annis parta, denique a sole & a pulvere discedunt, scribentes domestico in otio ad aliorum utilitatem, quæ rerum usu & experientia didicerunt, aut responsa dantes accedentibus tamquam ad oraculum. Quod si quis desinere nescit, *peccat ad extremum videndus*; & dum oratoris laudem extra tempus quærit, prudentis viri nomen & existimationem amittit.

At enim habent senes, quo se tueantur; habent sua quædam præsidia, quibus ad eloquentiæ laudem sine intermissione contendant, nullosque sibi terminos nisi vitæ constituent. Primum quod jactant, auctoritas est, qua se putant in hominum animos quodammodo dominari, & quod suadent, facile persuadere. Non diffiteor, plurimum ponderis habere auctoritatem, si in teste sit, ad fidem faciendam; at in oratore si quando valet, minus valet, quam isti
arbi-

arbitrantur. Sed valeat interdum, siquidem M. Scaurus accusatus hac una causam suam feliciter dixit. Quid tum? Num idcirco tota est senectuti concedenda! Quid si etiam ostendo, in sene oratore plerumque dilabi? Domitium certe Afrum accepimus auctoritatem prioribus annis magno populi Romani consensu in foro partam, non solum non auxisse beneficio senectutis, sed valde imminuisse; & quod auctoritati nihil est contrarium magis, risum frequenter illis ipsis, quibus ante admirationi fuerat, verecundiamque movisse. En vobis ipsum Quintiliani testimonium ex libro Institutionum XII. cap. XI. *Vidi ego, inquit, longe omnium, quos mihi cognoscere contigit, summum oratorem Domitium Afrum valde senem quotidie aliquid ex ea, quam inervuerat, auctoritate perdentem; cum, agente illo, quem principem fuisse quondam fori non erat dubium, alii viderent, alii erubescerent.* Hinc censet egregius eloquentiæ magister receptui canendum, antequam in istas ætatis insidias deveniatur; & relata integris viribus trophæa domestica in umbra procul a periculo custodiri jubet. Sed sit in sene, & valeat auctoritas; numquid utilis in causis omnibus oratori est? Imo vero interdum nocet. Itaque Cicero in causa Sex. Roscii Amerini, qui Syllæ dominantis opibus premebatur, ad se adolescentem ventum esse profitetur, quod oratores alii auctoritate atque amplitudine impedirentur, ne de republica verba facere auderent, & adversus temporum iniquitatem in foro libere queri. Alterum, quod nobis objicient, sapientia est, quæ cum grande aliquid sonet, multoque labore acquisitum,

tum, esse non potest nisi in illo, qui diu vixit; eloquentiam autem sine sapientia frigescere ajunt usque adeo, ut olim iidem haberentur sapientes & eloquentes. Ego vero in duas classes veteres scriptores tribuo, qui de sapientia meminerunt; quorum alteri ita eam in arctum detruserunt, ut soli Deo conveniret, cujus opinionis fuisse Simonidem ferunt, & Milesium Thaletem; alteri vero ita amplificaverunt, lateque fuderunt, ut non Philosophis modo, oratoribus, ac poetis, sed musicis quoque ipsis nomen hoc tam augustum, Strabone teste, impertirentur. Si in illorum placet sententiam ire, divinum nescio quid sapientia est, omnem oratoris facultatem ætatemque supereminens. Quod si liberalius agentes cum secundis, sapientiæ vocem latiore aliqua significatione usurpamus, nihil est cur cytharædi & cantores appellentur sapientes, orator vero, quamdiu floret ætate, nominis hujus honore careat. Qui revera valet eloquentia, valet etiam sapientia. Tertium denique restat, quod nobis opponunt, exercitatio dicendi. Quemadmodum enim, inquiunt, qui artes alias exercent, diu multumque agendo apti fiunt ad agendum; ita qui se Oratoriæ dediderunt, diu multumque dicendo apti fiunt ad dicendum. Atque illi quidem hac in parte ita loquuntur, ut non juventuti modo, sed cuilibet ætati senectutem præferre videantur. Verum quid ista, per Deos immortales exercitatio est tamdiu producenda? Num est aliquid infinitum, quod comprehendi non possit nisi spatio vitæ totius? Ergo cum artes reliquæ certis finibus concludantur, ad quos florida vigenisque ætas possit

possit pervenire, eloquentia ita morosa est, ut non patiatur accedere ad se nisi cito morituros? Nunquamne igitur absolvi potest dicendi exercitatio, nisi dissolvi incipiat dicentis natura; ac tum demum speranda est eloquentiæ laus, cum jam erit de vita ipsa prope desperatum? Cum porro scopulum istum nihil veriti Demosthenes, Cicero, Crassus, Cæsar, Hortensius, ab ipsa adolescentia causas gravissimas susceperunt; imo Romanorum prætextati nonnulli ante ipsum tirocinii diem in foro dicere ausi sunt? Videtis, opinor, lectæ spei juvenes, disputari ista artificiosius ab adversariis, ut ab hac gloria deterreamini. Est profecto eloquentia majus quiddam ac difficilius, quam quidam arbitrantur, nec sine exercitatione parandum; sed est tamen illud definitum, & intra hominis vires a natura positum: ac, sicuti qui assidua annorum aliquot exercitatione frustra contendit ad eloquentiam, eum fas est affirmare ad dicendi laudem non esse natum; ita qui ad illam natus est, modica quadam exercitatione non potest fieri orator. Quid igitur restat, nisi ut magnos animos sumatis, atque illuc properetis, quo laboribus vestris atque industriæ patere aditum boni Superi voluere? Ipse vos Rhetorum arbiter Quintilianus evocat ex umbra, & in conspectum prodire jubet, ne nimium ingenio diffidentibus id demum contingat, quod Porcio Latroni contigisse refert; qui cum ab umbratili ludo, ubi exercendo stilo prope consenuerat, in forum esset tandem aliquando deductus, cœpit impense rogare, ut in basilicam subsellia transferrentur. Adeo, & jure ille quidem, lucem publicam formidabat, qui prima illa ætate, qua omnia fidenter audemus, luci

Lib. 10.
c. 5.

publicæ non affueverat. Ergo erubescendum multis ex vobis fuerit potius, quod tam exiguos in oratoria arte progressus feceritis, quam pertimescendum, ne illam nisi sub vitæ finem adipiscamini. Ad me quod attinet, qui viam præire ju-beor, studio conatuque omni contendam, ut quæ dixi fieri posse, naviter faciatis. Adest vobis auctoritate & patrocinio Princeps Eminentissimus, qui cum bis in anno diligentiam vestram in scholis adhibitam, eorumque industriam, qui vos instituunt, præsens expendat, rectissime novit, quos fructus ætas quælibet hoc in genere ferat, eosque pro suo jure a vobis nobisque reposcit.

O R A T I O X X I I I .

SENES AD ELOQUENTIAM APTIORES
ESSE, QUAM JUVENES

Habita xi. Kal. Jan. MDCCVIII. ad instauranda Gymnasii Patavini Studia coram civitatis Episcopo.

GEORGIO CARD. CORNELIO:

SI quis est unus, qui possit se ipsum lædere non gravate, thesaurumque domesticum, quod proverbio vetamur, calumniari, is hodierna luce mirabitur, cur ego inusitato quodam timore perculsus ad dicendum accedam, nec animo solum, sed voce quoque ipsa, præter coronæ expectationem erga nos tam benevolæ, contremiscam. Videlicet propositæ superiore anno controversiæ partem alteram

teram propugnare jubeor; delatamque per me hoc ipso in loco adolescentibus eloquentiæ palmani idem ipse cogor abripere, senibusque nihil tale sperantibus orationis contentione tribuere. Non ego profecto is sum, qui possim, quemadmodum Græcus Carneades ad Romanos Legatus, & pro justitia, & contra justitiam disputare: ac si hodie rem viribus longe majorem aggredior, cogitate, ab eo mihi impositum fuisse onus, cujus & judicium summopere vereor, & imperium nequeo sine piaculo detrectare. Tametsi, ut vere dicam, illa me cogitatio valde erigit, quod, sive feratis, ut contendo, pro senectute sententiam, magnum mihi solatium oboriatur, cujus orationi tantum tribuisse videamini; sive magis adolescentum vobis causa probetur, jure nihilominus gratuler ego met mihi, cujus ætati in re tam gravi altera illa, audita utrinque causa, cedere compellatur. Quicumque autem me manet exitus, illud a vobis initio statim peto, ut reputetis, non quid adversus adolescentes dici possit, sed quid adolescentem dicere conveniat. Nonnulla quidem afferri libere poterunt, & ornari; plura tamen erunt tractanda levius, quasque summis labris delibanda; aliqua etiam innuenda dumtaxat; non pauca omnino reticenda. Tametsi res adeo ipsa pro senibus pugnat, adeo Scriptorum suffragia conveniunt pæne omnia, ut ad illorum causam tuendam non magna sit opus eloquentia. Dicam pro tenuitate mea, pro temporis modo, pro causæ genere non admodum copiose; ut ex hoc ipso intelligatis, uberem illam & præclaram dicendi facultatem, quæ oratorem constituit, majoris ætatis esse.

Qui hac in causa pro adolescentibus disputant,

omnino tria ponunt, quæ cum probarint concioni suæ, necesse sit senectutem de tota eloquentia æmulæ ætati concedere; quod nos ipsi præteriti anni studiis ex hoc ornatissimo loco proludentes, efficere conati sumus. Nimirum videtur adolescentia probare plenius, quod vivida & ubere virtute valeat ad inveniendum, fitque quasi ver humanæ vitæ, cui vix liceat frigidam effœtamque senectutem comparare; tum creditur delectare facilius propter festivam quandam & redundantem ingenii vim, qua nihil non elegans, lætum, mirabile confectatur, jacente fere senectute inter sicca omnia, dura, impexa, & antiqua; denique ad movendum aptior prædicatur, quod affectuum concitatio ferme omnis ex ignea quadam sanguinis temperatione, ex celeri spirituum motu, ex voce, ac lateribus proficiscatur quibus quanto plus valent adolescentes, tanto minus valere senes, ita ferente natura, necesse est. Hos scilicet ipsos nobis fines terminosque statuimus, satis senectuti facturi, si ostenderimus, eam probare multo utilius, quam adolescentiam, ornare aptius, flectere vehementius. Sane cum moribus suis & nomine ipso potissimum fidem faciat orator, sæpiusque persuadeat is qui dicit, quam id quod dicitur, quid est quod nos ignoti adhuc nulliusque auctoritatis adolescentes ei hominum generi bellum moveamus, qui longa dicendi consuetudine id jam in affectu sunt, ut in foro regnent, & Curia? Hæc nimirum a primis usque litterarum temporibus ætatis hujus nostræ calamitas fuit, quamdiu erunt litteræ, duratura, ut quoties in rostra ascendimus, circumspiciant nos undique homines; ad ea, quæ dicimus, assurgant curiosius; quærant morosi vel

in scirpo nodos, ex præjudicata illa opinione, quod nequeat optime dicere, nisi qui diu multumque dixit. Quo fit, ut non liceat nobis nisi in causis privatis & levioribus versari, in quibus non requiritur dicentis auctoritas; senibus interim publicas illas gravissimasque suscipientibus apud Centumviros, ad populum, in Senatu. Parit siquidem per se vita honeste acta etiam sine exercitatione dicendi fructum quendam auctoritatis in senectute, ut & M. Scaurus simplici se negatione defendere in populari judicio potuerit, & Menenius Agrippa Romanam plebem seditione concitatam fabella compescere. At enim Cicero adolescens Roscii Amerini causam in publico judicio adversus Chrysogonum Syllæ dominantis libertum feliciter defendit. Ita sane: sed statim post abijt in Græciam, ibique triennium commoratus est. Numquid ille adolescens contra Rullum Tribunum plebis, legesque ejus agrarias dicere ausus esset? Hic vero in primis Tulliana apparuit eloquentia, quæ coegit Tribus Romanas, ut Plinius ait, abdicare alimenta sua: sed eloquentia erat jam matura, & suam quandam prope senilem auctoritatem adepta, per quam visus est orator popularis, dum populi commoda oppugnaret. At in iis, quibus nondum per ætatem emergere licuit ad hominum existimationem, quid potest esse momenti ad fidem faciendam? Omnia sunt extra nos quærenda; agendum rationibus, tabulis, testibus, more majorum; iis denique instrumentis omnibus, quæ possit quisque maxime artis, industriæ, ingeniique auxilio invenire. Ubi tamen etiam a senibus vincimur, quorum ut major est rerum usus, doctrinæ copia, eruditionis appara-

rus, ita uberiores oportet esse ingenii fecunditatem ad ea promenda, quæ auditores utiliter doceant. Neque enim recte existimat, qui hiemem quasi aliquam appellat senectutem, cujus vietum ingenium sit ad res novas gignendas, & ad veteres efferendas labefactata memoria. Profecto nec Sophocli ingenium defuisse dici potest, qui omnino grandis natu tragœdiam edidit, nec Isocrati, qui quarto & nonagesimo anno Panathenaicum scripsit, nec Platoni, qui quæ in ejus operibus maxime præstant, summa senectute litteris mandavit. Memoriam sane haud inficior, ingravescente ætate, fieri plerumque minorem; quod omnes fere laboris tædio, cum senuerint, linguæ ac stili exercitatione abstineant, qua maxime alitur memoriæ facultas, & sustinetur. Ceterum da mihi oratorem, qui semper in acie fuerit, semperque si non dicendo, saltem scribendo egerit aliquid, non modo obliviosum non deprehendes, sed vix intelliges, utrum magis ingenio, an memoria valeat. Sunt enim istæ colligatæ inter se animi virtutes, mutuisque crescunt auxiliis, ut, quemadmodum juvenes pauca reminiscuntur, quia pauca ediscere potuerunt, ita senes quia perceperunt plurima, memoria quoque plurima teneant. Ex hac rerum plurimarum recordatione legendo parata, meditando, & agendo, sapientia illa est, sine qua nec senator bonus, nec probabilis orator esse potest. Quapropter Solon egregie sagax lege cavit, ne quis in sua civitate adolescens magistratum gereret, aut fieret publici consilii particeps; Lycurgus autem Spartanecos pueros ad mediam usque ætatem in agros amandavit; omnesque bene constitutæ respUBLICÆ curia

ado-

adolescentes prohibuerunt, Senatūque ipsum a senibus appellarunt. Utinam autem hæc consilli imbecillitas, quæ nos arcet a curia, non etiam removeret a luce forensi, quod simus hic quoque & ad inveniendum tardiores, & ad ea, quæ invenimus, distribuenda parum idonei. Id affirmate, quamquam non sine dolore, dico: nisi forte est aliquis hoc in loco, qui nesciat, inventionem ac dispositionem opus esse doctrinæ, atque experientiæ, quæ duo ab artium studiis & exercitatione potissimum pendent. Proinde quicunque nobis hoc nomine veterum monumentis laudantur, ii vel magna ac diuturna rerum administratione hoc sibi præsidium pepererunt, ut Agamemnon, & Menelaus; vel plena quadam disciplinarum notitia, quemadmodum Socrates; vel regionum ac gentium perlustratione, sicuti Ulysses; vel ipsa demum vitæ diuturnitate, uti Nestor, qui valde sapiens, quia valde senex, a Poeta sapientissimo appellatur. Vester igitur hic campus est, Senes sapientissimi, ubi pro gravitate consilii, rerumque usu optima quæque colligitis, eaque suis momenti examinata & expensa in oratione collocatis. Contra adolescentes suo quodam ætatis impetu atque ardore permoti, e schola in forum evolant, causasque susceptas, vix nullo habito delectu, redundantia sermonis onerant, iudicesque fatigant. Attamen istiusmodi verborum sartago levioribus ingeniis adeo placet, ut inde etiam existere oratoriæ facultatis partem ordine secundam, elocutionem videlicet arbitrentur: perinde quasi eloqui nihil sit aliud, quam plurimam loqui, concionemque obruere conquisitis undique figuris, effatis, sententiolis, seu bene, seu male

congruentibus; prorsus ut Medici quidam faciunt, qui farcimina multis conflata succis ægroto præbere solent ipsa nominum varietate suspenso, & mirum quiddam expectanti. Si hoc demum eloqui est, concedimus non gravate eloquentiam adolescenti; sed senum modum, atque adeo siccitatem, ut isti vocare malunt, magis laudamus, qui ea tantummodo ex omni apparatu deligunt, quæ & solida sint, & rei propositæ cohæreant apte, & loco temporique respondeant; plane ut arboribus contingit, quæ cum ætate processerunt, fructus edunt nec ita multos, nec ita venustulos, suaviores illos tamen, magisque salubres. Ego certe (utinam & possem in hac virium mearum tenuitate præstare quod sentio) ego, inquam, non in vasta illa structura orationis, & copia verborum blande cadentium statuo dicendi elegantiam, sed in pressio & Attico dictionis genere, sententiarum gravitate, & figurarum temperatione, tanquam luminibus, iudicio & ratione distincto; ut torvam illam potius referat Macedonum aciem, equis armisque præclare instructam, quam molles Persarum copias auro gemmisque fulgentes, quibus non modo non terreatur hostis, ut Dario exprobravit Charidemus, sed potius ad prædam alliciatur. Sunt enim & sua dicentibus arma, & cultu prope bellico ornatur oratio, quæ ex umbra domestica prodeat ad forenses impetus sustinendos. Ac, sicui libitum est domi alere gloriam suam, extra contentionum discrimina copiose & ornate scriptitando, quales ex Græcis Thrasymachum Chalcedonium fuisse ferunt, Leontium Gorgiam, Theodorum Byzantium, & omnium instar Isocratem; hi tamen ipsi *λογολαίδαλοι*

nunquam ornasse melius visi sunt, quam cum senectutis beneficio minus in ornando laborarunt. Habet, ut fateamur quod res est, concinnitatis nonnihil ac deliciarum juvenilis oratio ad allucandos homines, sed est totum illud vinis recentioribus simile, quæ quo plus habent dulcedinis, eo sunt facie majore permixta; vetusta vero asperiora illa quidem, sed tamen puriora sunt, & saluberrimi saporis plena. Deliberandum est de bello, aut de pace in Senatu: quid tu mihi molli quadam minimeque senatoria verborum volubilitate sententiam dicis? Concitandi iudices in Verrem, Miloni conciliandi: quid tu verbis uteris blande concinnatis, quæ sint ludo magis ac scenæ apta, quam veræ illi gravique judiciorum concertationi? Agendum ad populum, inflammandi milites, placanda seditio: quid troporum fūco, & numerosæ orationis ambitu delicias facis? Si te istiusmodi lenocinia delectant, quin eo in genere versaris, quod epidioticum nominant, ubi liberius possis verborum ac sententiarum ornamentis, omnique figurarum genere lascivire? Veruntamen memineris, te unum aliquem de Sophistis hac ratione futurum, non vero Oratorem. Est enim quiddam eloquentia supra phaleras positum ac myrothecia; & ille ipse Isocratis Panegyricus, quod tinnulus nimium & circumfluens, visus est Ciceroni infra Oratoriam majestatem jacere, artemque sapere Sophistarum. Id, nisi fallor, in causa est, cur mediocrem verborum ornatum de industria senes confectati, malint interdum minus politi videri oratores, quam ipsum oratoris nomen luxuriantes amittere. Neque enim credibile est, absumptam esse ornandi vim senectute;

stute; quasi vero quod rebus corporeis accidit, ut usu conterantur, id animo etiam contingat, ut longa cogitandi consuetudine exarescat. Imo vero crescit in dies ex cogitationum abundantia sermonis copia usque adeo, ut inter senilis ætatis vitia garrulitatem in primis numeremus. Quod si temperant sibi, natura obnitente, cordati homines, ut veram illam non Sophistarum, sed oratorum laudem consequantur, næ ille parum sapit, qui nescio quos juveniliter exultantes senibus præfert. Jam vero ad animorum motus veniamus, quod erat tertium a nobis initio propositum. Videte, Auditores, quam sit senum ætas ad omnes eloquentiæ laudes una comparata, ut cum inveniat copiosius, quam adolescentia, cum ornet gravius, possit etiam hoc ipso movere vehementius. Colligantur enim hæc communi quodam vineulo inter se, docere, delectare, movere, ut qui vel artis, vel naturæ ope supra ceteros sit acutus, ac politus Orator, nequeat in tractandis animis non esse callidissimus. Ut autem hic locus est, ex quo maxime vehementis oratoris copia & virtus efflorescit, ita plus litterarum, ingenii, doctrinæ, uno verbo ætatis plus postulat. Est enim difficile quiddam, longaue industria & labore parandum, penitus ingredi naturas hominum, eorumque intimos sensus & cogitationes introspicere, ea cuique ut commemorares, quibus maxime doleat, lætetur, invideat, irascatur, timeat, exardescat. Fit autem interdum, ut boni adolescentes speciosa aliqua quæsitæ doloris pompa in lacrymas effusi risum excitent; & reo suo misericordiam imploraturi, iudicium in se indignationem moveant. Venia

nia tamen aliqua ætati concedenda, quod iudicum animos fere turbare nequeant, nisi qui & in accusatores multa ingeniose retorqueant, & iudicibus ipsis caute minitentur, & de republica libere dicant, & temporum ac morum conditionem aliqua cum invidia querantur: quod quidem cum dignitate præstabit nemo, nisi sit idem senectutis auctoritate munitus. Hinc enim secura quædam existit *παρρησία*, qua Philosophus ille Solon, Pisistratum tyrannum animose infectatus cum esset, interroganti cuiusnam quid ita auderet, non alio, respondit, præsidio tutus, quam senectute. At adolescens quam sit oportet in querelis cautus, in accusationibus parcus, in omni dicacitatis genere meticulosus, præsertim vero si magistratibus velit ac reipublicæ dare operam! Ergo nimis putant vulgare negotium, & in medio positum eloquentiam, qui cum de animorum perturbatione disputant, rei totius difficultatem in nervos ac latera conferunt, & munus oratoris longe gravissimum strepitu vocis, jactatione manuum, ac pedum suppositione confici posse arbitrantur. Est certe momenti plurimum in gestu ac motu corporis, in vocis ac laterum firmitate ad vim orationi addendam; nihil tamen huiusmodi supra vulgi virtutem est, si careat prudentia illa, quæ tota longi est usus, ætatisque valde maturæ. Quamquam, unam si tollatis iracundiam, reliquæ affectiones animi universæ quieta illa ac remissa senum oratione agitantur multo facilius, quam tragicis adolescentum clamoribus, quibus rei plerunque nihil subest, quemadmodum nihil continetur vasculis, quæ maxime tinniunt. Acuto in primis versutoque ingenio opus est, ut concionis

De Se-
nect., c. 5.

animi pertententur; omnes philosophiæ ope & auxilio pernoscendæ naturæ vires; cujuslibet ætatis, sexus, ordinis, dignitatis mores ac studia pernoscenda: tum, si vocis, oculorum, atque oris totius liberalis quædam accedat conformatio, ne illius quidem actionis laus, quæ concitata dicitur, in senectute desiderabitur. An non enim M. Cato apud Ciceronem gloriatur, se annos. natum quinque & sexaginta legem Voconiam bonis lateribus suasisse? Nonne Cyrus apud Xenophontem negat se unquam senectutem expertum ulla in parte superioribus ætatibus imbecilliorum? Scilicet eorum effœta senectus est, & a publico arcenda, quorum fuit vel vitiosa adolescentia, vel tota superior ætas otiosa. At vero honesti hominis vox perficitur usu, vires actione confirmantur, manus oculique erudiuntur exercitatione, & talis quidam efficitur dicendi habitus, ut semper æquabiliter, ac sine labore dicamus. Hinc illa est actionis dignitas, eruditorum scriptis tantopere commendata, qua cum media extremaque ætate mirum quantum excelleret Demosthenes, adolescens tamen adeo caruisse fertur, ut quoties in publicum esset proditurus, eam sibi domi aliquanto ante per otium compararet, adhibito etiam speculi auxilio. Nimirum fieri nequit, ut is recte agat, qui diu antea non egerit; cumque omnis fere ars tempore atque usu perficiatur, quis sibi persuadeat, actionis oratoriæ facultatem annis & exercitatione amitti? Actionis dico? Quid est, oro vos, in toto hoc dicendi munere, quod non dicendi usu magis paretur, quam schola & præceptis, atque adeo illa ipsa disciplinarum omnium ἡγεμονία? An non sæpe adolescentes illustri in-

genio præditi, doctrinaque instructi, quod nondum se dicendo satis exercuissent, duriusculi in toto genere visi sunt; senes vero natura rudiores, pertinaci tamen exercitatione mirabilem quandam sermonis facilitatem adepti, in foro curiaque regnarunt? Quædam enimvero sunt & in artibus, & in rebus omnibus, quæ anni ipsi suapte vi afferunt; nosque inepti sumus, si naturam pervertere conamur, maturitatem ejus ac perfectionem ad acerbicatem revocantes. Tota reclamat antiquitas, omnis in nos exsurgit Scriptorum turba, sancitque, gravissimum Oratoris nomen nemini antea usurpandum esse, quam & in foro, & in rostris, & in curia, & ubique multa quasi stipendia meruerit. Quo spectasse crediderim Iliados primo Musarum patrem Homerum, qui eloquentis viri exemplum daturus, novam quandam senectutem ab adolescentia remotissimam effinxit, Nestoremque suum, tribus denique exactis humanæ vitæ ætatibus, oratorem appellavit. Et vero sapientissime ille quidem, ut nihil non sapienter. Si enim rerum scientia oratori est necessaria, annis scientiam comparari, libro Institutionum ultimo sentit Quintilianus: c. 11. si morum disciplina, ab ejus possessione adolescentes removet in primo Ethicorum Aristoteles: c. 3. si auctoritas, si gravitas, si sapientia, hæc omnia inter senectutis fructus numerat M. Tullius in Catone, in Oratore, in Bruto. Sed ego licentius fortasse, quam oporteat, rem persequor; verendumque magnopere, ne mihi commissos adolescentes præter institutum operis finem a dicendi studio deterream. Verum enimvero quidni potius majores capiant animos viresque intendant,

dant, dum reputant, quod adhuc consequi non potuerunt, fieri tamen posse ut aliquando consequantur. Colligite hinc; seduli juvenes, non exiguis conatibus; nec paucis illis artis præceptis, quæ a nobis accepistis; fieri vos protinus oratores posse; tota propemodum vita strenue laborandum, cognoscenda antiquitas, addiscenda philosophia, Romana jura legesque tenendæ, de moribus hominum optima quæque volumina prevolvenda; ut cum vobis dicendi præstantiam comparetis, quam pro dignitate & amplitudine sua nemo unquam potuit nisi tarde comparare. Quod si quis tamen vestrum mature adeo in hoc laudis campo versari cœpit, ut ætatem anteverterit, acceptum id referat Principi nostro Eminentissimo, cujus imperio, sapientia, & auspiciis ardua quæque aggredi licet, Superisque faventibus efficere.

O R A T I O XXIV.

P R E S B Y T E R I

Nomine Synodum Diœcesanam alloquentis, quo primum die aperta est.

Confessus hic vester tam copiosus; tam gravis, tam augustus ita oculos meos animumque afficit, ut nunc demum intelligam, quantum sit in Religione decoris, amplitudinis, majestatis. Quamvis enim non ignorem, quid in singulis rerum sacrarum ministris positum sit ad splendorem, & dignitatem; attamen tanta hæc om-
nium

nium ordinum frequentia & concordia ad quandam cælestis illius sedis imaginem disposita, me quodammodo extra me ipsum rapit, & in altissimam totius Ecclesiasticæ Hierarchiæ contemplationem adducit. Id mihi in mentem revocat Ignatii Martyris pronuntiatum in Epistola ad Tralianos : *Veneramini (inquit) Episcopum tamquam Dominum Jesum Christum cujus locum tenet, Presbyteros tamquam confessum Dei, & Apostolorum congregationem, Diaconos tamquam ministros Jesu Christi. Sine ipsis non est Ecclesia.* Cum vero cogito, quo consilio hunc in locum auspicatissimum post publicas privataeque supplicationes conveneritis; cum mentem Concilii Tridentini reputo, qui vos convenire jubet; cum causas expendo, quibus permotus Episcopus noster optimus ac sapientissimus hoc vos tempore potissimum advocavit, sibi que adfidere voluit; hæc omnia, inquam, cum animo verso, magnam quandam curam & sollicitudinem vestra causa suscipio. Video enim, quantum singulis atque universis oneris incumbat, sive de se quisque cogitet, sive de grege sibi credito, sive de tota hac Ecclesia, cujus etsi multa

AA. 4. 12

sint membra, tamen est *cor unum & anima una.* Hæc ego tria brevi oratione persequar, non quod aliquis vestrum monitore indigeat, sed quod in magni cujusque negotii pertractatione finis & officium tandiu ac tantopere inculcari debet, ut non modo mentibus, sed oculis pæne ipsis, ut ita dicam, infigatur. Ac si mihi de unius dumtaxat parœciæ regimine sermo esset habendus, tamen valde metuerem, ne in re nimis gravi frigidus apparerem: nunc vero quo me animo esse putatis, cum de amplissimæ Episcopalis Diœceseos digni-

Matth.
28. 20.

gnitate & salute, & de urbis & agri disciplina, de communi totius Cleri concordia, uno verbo de illis omnibus, quæ ad ingentis populi felicitatem pertinent, dicere debeo, & pro tantarum amplitudine rerum orationem moderari? Ille nimirum præpotens Spiritus verba mihi sententiaſque dictabit, cujus instinctu afflatuque concionem habeo; ille, ille inquam, qui *ubi duo vel tres ejus nomine congregantur, in medio illorum est*. Tantæ hujus virtutis confidentia nifus, offusum mihi publicæ lucis metum, pudoremque subrusticum tantisper depono; & in hac magnorum virorum corona, qui unus maxime filere deberem, ante omnes verba facere aggredior.

Act 9. 15

Quemadmodum inter mortales nullus est corpore tam robusto, viribusque ita firmis, ut non morbo aliquo interdum laboret, & Medico uti cogatur, sic nullus est in Ecclesia sacerdos tam confirmata constantique virtute, ut non aliquando labascatur, & aliorum præsidio indigeat. Hoc illi præsertim accidit, qui aliis regendis præpositus est, cujus quantacunque diligentia sit, nunquam tamen rerum humanarum vicissitudines prævertere consilio potest, & ad incerta casuum in promptu remedii copiam semper habere. Hinc orta Synodorum necessitates, ex quibus sibi quisque, suæque Ecclesiæ, si qua parte laboret, præsidia quærat; &, quod solus nequit, per multos efficiat. Ego equidem cum reputo, quantopere de se anxius ac sollicitus fuerit D. Paullus, qui tamen vas electionis erat, ad celebrandum *Christi nomen coram gentibus, & regibus, & filiis Israel*, vix intelligo, quomodo nos eodem vocati, sed ab ejus perfectione remotissimi, honore hoc placidissime frua-

fruemur, nobisque ipsi satis placeamus. Neque enim se Dei minister in tuto esse putet, si culpis gravioribus abstineat, eaque præstet, quæ Christianus quilibet ad nominis dignitatem tuendam præstare necessario debet. Quemadmodum enim pretiosæ & ad nuptiarum solemnia comparatæ vestes levi qualibet macula fœdantur, quæ ceteroquin in sago & communi toga ne apparet quidem; ita homines in sortem Domini vocati, & ad ejus mysteria evecti illis quoque rebus contaminantur, quæ quamvis suapte natura criminossæ non sint, specie tamen aliqua moris obductæ liberioris, criminis suspicionem movere possunt. Id ego hoc in loco audacter dico, ubi cum omnes castigatissimis moribus sint, & ad veræ pietatis exemplum conformatis, nemo suspicari debet, sibi aliquid exprobrari. Attamen dicendum est, iterumque ac sæpius repetendum, ut & præsens disciplina custodiatur, & in futurum monitis saluberrimis roboretur. Jam vero, quod erat alterum a nobis propositum, illorum quoque habenda ratio est, quibus sacrorum mysteriorum arcana aperire jubemur, atque æternæ vitæ alimenta præbere. *Non enim summos tantum Antistites* (inquit Leo Magnus Serm. x. de Quadrag.) *aut secundi ordinis sacerdotes, nec solum sacramentorum ministros, sed omne corpus Ecclesiæ, univsumque fidelium numerum ab omnibus contaminationibus oportet esse purgatum.* Purgare autem ad eos pertinet, quibus Christus Dominus tanquam medicis sempiternæ salutis pharmaca, idest sacramentorum distributionem commisit: quod quidem cum omnes Ecclesiæ ministri præstare debent, tum vero illi maxime, qui

se ad animarum regimen idoneos existimarunt, tantamque sarcinam suis humeris imponi passi sunt. Quod quantum sit, si homines diligenter reputarent, non sane opus tam grave Beneficii nomine appellarent, & tamquam suorum laborum præmium ac otium & quietem sibi deposerent. Stolidam hanc & temere susceptam cogitationem reprehendit D. Bernardus epistola ad Henricum Episcopum Senonensem. *Curritur passim, inquit, ad Ecclesiasticas curas, tamquam sine curis quisque victurus tunc sit, cum pervenit ad curas.* Siquis est hoc tempore, qui in hanc reprehensionem inciderit, mature cogitet, quid sit non suos modo, sed alienos quoque præstare mores, inspicere, lustrare, arguere, totumque vitæ genus ita instituere, ut non sibi soli, sed aliis quoque serviat. Tu pie religioseque vivis; non satis est, nisi ita illi quoque vivant, quorum curam demandari tibi postulasti: neminem tu lædis; non satis est, si alii lædunt, qui a te vivendi præcepta accipere debent: tu iram, libidinem, ceterasque perturbationes compescis; non satis est, nisi illi quoque compescant, quibus ipse compescendi viam & rationem tuo quasi jure præscribis. Hæc nos in præsentī tamquam nimis remota parum tangunt; sed gravissime tangent, cum ille adstabit mortalium omnium iudex, rationem repetiturus. *Quid tunc* (inquit D. Prosper de vita contemplat. c. 20.) *quid tunc cuique proderit suo non puniri, si alieno sit puniendus peccato?* Quandoquidem igitur eo fine hunc in locum convenimus, ut communi opera pensitemus, quā potissimum ratione tantum opus perfici possit, sui quisque gregis imbecillitates libe-

libere exponat, & remedia ex animo quærat. Tertium denique restat, de quo mihi verba facienda sunt, universæ nostræ hujus Ecclesiæ bonum. Cum enim de se quisque cogitarit, ac de suis, ad corpus totum, cujus ipse cum suis pars est, cogitationem convertere debet. Hic vero nimis multa dicenda essent, si daretur temporis satis. Illud certe omittere non possum, quod ad mutuum totius cleri caritatem & concordiam pertinet; quæ vel in primis Synodo huic, atque adeo Synodis omnibus debet esse proposita. Ut enim nihil valentius concordia est ad res parvas augendas, ad infirmas roborandas, ad collapsas restituendas, ita nihil discordia exitiosius ad firma quæque debilitanda & evertenda. Denuncio itaque vobis Apostoli nomine, ut *stultas & sine disciplina quæstiones devitetis, scientes quia generant lites*. Abeant, siqui forte sunt ad contentiones litesque proniores, abeant ex regis pacifici aula; templa relinquant, fora frequentent, aris & sacrificiis valedicant, stent ad tribunalia vadimonia obeuntes; verbo expediam, aut vitæ genus, aut habitum mutant. Homines istiusmodi nec quiescere ipsi possunt, neque alios quiescere sinunt; unde ingens solet existere divini cultus & Christianæ pietatis detrimentum. Hæc igitur prima erit cogitatio & cura, ut concordia custodiatur; & sicubi desit, quidquid est virium, eo conferamus ut restituatur. Proxima autem ut Synodales Examinatores decernantur, qui pietate & doctrina reliquis sui ordinis præsent. Cum enim Episcopo assidentes judicum nomen & subsellia teneant, omnium in se oculos convertunt. Proinde monitos volo, quicumque ad

Ad Ti-
moth. 2
21.

hanc veluti censuræ dignitatem vestro suffragio assumpti fuerint, ut si alios excutere magno animo volunt, ipsi se primum excutiant; tum illud reputent, multo magis expedire, paucos esse in Ecclesia ministros, sed idoneos, quam multos eisdemque inutiles. Verum quo me nimia dicendi confidentia rapit? Me ne alios monere? Me ne viris sapientissimis præcepta dare? Me ne dicenda ac facienda dictare? Ille in vos veniat, vobisque dictet, qui mentes hominum illustrare unus, & impellere potest, *spiritus sapientiæ & intellectus, spiritus consilii & fortitudinis, spiritus scientiæ & pietatis*. Illo operante, verbis nostris non indigetis; cessante illo, nemo est, qui aliquid dicendo possit. Ego igitur supersedebo, nihilque insuper addam nisi Theodulphi monitum Episcopi Aurelianensis in Capitulari ad suæ diœceseos sacerdotes. Scitote, inquit, *vestrum gradum nostro gradui secundum & pane conjunctum esse. Sicut enim Episcopi Apostolorum in Ecclesia, ita nimirum presbyteri ceterorum discipulorum Domini vicem tenent; & illi tenent gradum summi Pontificis Aaron, isti vera filiorum ejus. Unde oportet, vos semper esse memores tantæ dignitatis, memores vestræ consecrationis, memores sacræ quam in manibus accepistis unctionis; ut nec ab eadem dignitate degeneretis, nec vestram consecrationem irritam faciatis, nec manus sacro unguine delibutas peccando polluatis; sed cordis & corporis munditiam conservantes, plebibus exemplum bene vivendi præbentes, iis, quibus præestis, ducatum ad cælestia regna præbeatis*. Hæc Theodulphus Cap. I. quæ si animo infixæ probe servabitis, non erit in posterum Synodis opus.

O R A T I O XXV:

HABITA IN PATAVINO S. JUSTINÆ

TEMPLO AD EXSEQUIAS CELEBRANDAS

P. ALEXANDRI BUSENELLI

Abbatis Cassinensis, & publici Philosophiæ
in Gymnasio Professoris anno
M DCCVII.

CUM omnia sunt Ordinis hujus vestri, Patres religiosissimi, instituta præclara planeque divina, tum illud est singulari providentia constitutum, ut Abbati cuilibet naturæ necessitate vobis erepto, non communibus solum officiorum generibus, sed etiam laudatione publica parentetur. Etsi enim mundanis hisce carceribus emissi eximæ virtutis viri eam felicitatem consequuntur, cui nihil addi viventium sermone & laudibus potest, juvat nihilominus posteritatis gratia eorum facta imitatione digna commemorare, ut qui legum præcepta mutis cabulis consignata parum attendunt, exemplis ante oculos politis excitentur. Ceterum, ut mihi quidem videtur, longe melius interdum mortuorum meritis & famæ admiratione tacita consuleretur, quam oratione; idque certe in præsentī fit, cum Monachus coram Monachis; Abbas coram Abbate, Philosophus coram Philosophis laudandus pro dignitate est; & ab eo laudari debet, qui propter ingenii tenuitatem,

& paucarum horarum angustias , quibus se ad dicendum comparavit , laudes argumenti amplitudine dignas afferre nequit . Ut ut est , de Alexandro Busenello verba facere aggredior , Monacho , Abbate , & Patavinæ Universitatis Professore , viro sane quovis in munere spectatissimo , nec de sui modo Cœnobii commodis & splendore , sed etiam de publici Gymnasii gloria præclare merito ; ut propterea non hosdumtaxat sibi domesticos parietes dolore luctuque moriendo compleverit , sed ingens nobis omnibus sui desiderium reliquerit . Excipe tu illum in primis , magni hujus Monasterii Abbas & Moderator sapientissime , laudesque ejus , quem tantopere nosti , assensu tuo judicioque proba ; si minus poteris laudatorem .

Et si læta virtutum seges interdum exsurgere visa est , unde pro soli sterilitate nihil magnum expectabatur , vulgaresque homines non vulgarem sibi rerum gestarum gloriam aliquando pepere-
runt , id tamen cum accidit , mirabile quiddam quasque portento simile judicare solemus ; rati videlicet , suis omnia principiis stata naturæ lege respondere , & a columbis columbas , ut ait Horatius , ab aquilis aquilas progigni . Itaque illud est a vobis , Patres optimi , sapienter institutum , ut quicumque in vestram hanc Cassinensem societatem recipi vellet nomenque profiteri , majores ostenderet suos , unde egregios duceret spiritus , sibi que indita traheret ad recte agendum incitamenra . Ubi enim ad præclaram indolem vestra hæc accesserit institutio , perfectum nescio quid existat necesse est ad rectam Monasticæ vitæ rationem , ad religionis
decus ,

decus , ad Ecclesiæ totius incrementum . Id est potissimum , quod in ipso cænobii limine Alexandrum Busenellum commendavit ; nec inventus est ullus , qui ortum familia tam nobili non judicaret , magna quædam de se polliceri , si & doctrina vim insitam promoveret , & animum corporis temperatione ad honesta conformatum excoleret disciplina . Versabantur in omnium ore atque auribus duo Alexandri , Avus , & Pater ; cives in republica infra Patrios facile principes , publicis in negotiis tota vita occupati , ad Legationes adhibiti , præcipuis patriæ honoribus cumulati , litteris artibusque exculsi ; nec fieri posse videbatur pro constanti rerum naturalium ordine , ut tertius hic Alexander , quantum quidem instituta vitæ ratio pateretur , suorum esset ulla in parte dissimilis . Accedebant Fratris virtutes in dies plures ac splendidiore supra ætatem , supra hominum expectationem , quibus egregie navata reipublicæ opera , & sibi amplissimam Magni Cancellarii peperit dignitatem , & vestro huic Monacho stimulos addidit vehementissimos ad præclara quæque suscipienda . Tametsi nunquam profecto fuit , cur ei adhiberentur stimuli , qui prompte ipse per se ad virtutem contendebat ; statuebatque , nihil sibi tantam generis claritatem asserre præsidii , nisi effecisset studio ac labore , ut quod solius erat fortunæ bonum , sibi tamquam proprium debitumque vindicaret . Proinde non secus ac novus homo aliud quoddam molitus nobilitatis genus , moribus primum recte compositis , artibus deinde liberalibus comparatis , sacraque Theologia veluti fastigio quodam

suis studiis imposito, cœpit non solum apud
 suos, sed etiam apud viros Romanæ Ecclesiæ
 principes magni nominis fama florere. Annon
 enim ipsi quoque Alexandro VIII. Pontifici
 summo magnopere placuit, multis ab eo bene-
 ficiis auctus, vestrique Ordinis proceribus semel
 atque iterum commendatus? De Octavo cum lo-
 quor Alexandro, intelligitis, opinor, Princi-
 pem dici in hominibus judicandis utique cal-
 lidum & perspicacem, cui quidem placuisse omnium
 videri debet commendationum instar, quod illi
 placuerit nemo nisi plurimis maximisque præ-
 ditus ornamentis meritorum. Sed quid ego tam
 longe virum quæro? Numquid non satis, qualis
 quantusque esset, tum denique declaratum est,
 cum illum Patavini hujus Gymnasii Moderato-
 res vigilantissimi ex Cœnobitico secessu ad Phi-
 losophiam publice profitendam honorifico Sena-
 tus decreto exciverunt? Intelligo, quam dif-
 ficili loco versor; nec ignoro, morosis qui-
 busdam ingeniorum æstimatoribus Alexandrum
 non satis magnum in luce tanta visum esse
 Philosophum, quod Philosophiam neque novam
 ad sæculi ingenium, nec admodum elegantem
 ex Monasticis scholis attulisset. Nullus scilicet ex
 omni memoria Philosophus placuit omnibus. Au-
 divi ego hominem, audivere summa cum voluptate
 multi veterem illam Peripateticæ scholæ doctri-
 nam acute graviterque pertractantem, exigentem
 singula ad amussim non Thomistarum, vel Sco-
 tistarum, sed Aristotelis ipsius, dogmata confir-
 mantem validissime omnia, quibus temere obla-
 trant novatores nescio qui, contentionis alen-
 dæ, quam veritatis aperiendæ cupidiores. Quod
 si ex-

si exquisitæ Latinitatis colore, & eruditionis longe petitæ floribus, quæ disputaret, minime ornabat, num illæ etiam contemnendæ erant Philosophicæ doctrinæ, quæ veritate ipsa & lumine suo satis ornatae atque illustres, eloquentiæ fucō non indigebant? Tullius certe de arte sua non ita sensit elate, ut putaret neminem nisi disertum esse Philosophum; sed facile patiebatur esse quosdam, qui in naturæ causis ac principiis cognoscendis toti occuparentur, qualem Chrysippum memorat in libro de Oratore primo, nec ullis sese humanitatis studiis immiscerent. Sive ergo natura ipsa, sive voluntate & consilio pigmentis abstinuit, laudanda profecto illa est in Alexandro recta ac simplex philosophandi ratio, quæ Peripatetica dicitur, & vitio fortasse temporis cœpta est ornamentis alienis, ac novitatibus circumfundi. Alexandri ingenium & doctrinam vos certe probastis, sapientissimi Patres, vestræque primum in Theologica schola instituendæ juventuti præfecistis, deinde vero ad impensæ operæ laudem declarandam in Abbatum Collegium magno omnium consensu cooptastis. Nunc demum eo ventum est, ut nihil possit splendidius de Monacho dici. Ac si vulgaria essent, quæ hætenus attuli, pluribusque communia, nonne, Abbatem Cassinensem cum dico fuisse Alexandrum, quivis intelligit & docuisse illum, & fecisse, quæ sociorum merita laudesque superarent? Non ibi sumus, ubi dignitates ad gratiam projiciantur; pensatur hic potissimum vitæ morumque probitas, ad trutinam revocatur ingenium, naturæ industriæque prædia requiruntur; tum vero sensim & per

gradus ad summum hoc honoris fastigium, ex-
 æta plerunque ætate, pervenitur. Quapropter de
 Alexandri meritis dubitari nequit, quin de ve-
 stra in iis judicandis fide ac sapientia eodem tem-
 pore dubitare necesse sit. Et vero, si quando un-
 quam, tum certe magistratus ostendit hominem,
 cum Veronenſi Monasterio præfectus tanta gra-
 vitate & prudentia locum nomenque ſuſtinuit,
 tanta diligentia & constantia negotia geſſit, tan-
 to conſilio Monachis omnibus conſuluit, ut in-
 de excitus adminiſtrationis ſuæ memoriam reli-
 querit jucundiſſimam. Ceterum quodocunque &
 ubicunque præſuit, tanta fuit erga ſingulos at-
 que univerſos humanitate, manſuetudine, indul-
 gentia, ut ſub eo maxime intellectum ſit, Ab-
 batis nomine & officio parentem optimum ſi-
 gnificari. Neque enim pro inſigni quadam to-
 tius vitæ integritate atque innocentia peccari
 quippiam poſſe in Monaſtica familia judicabat,
 quod acerbioribus, non dicam pœnis, ſed ver-
 bis plectendum eſſet. In Gymnaſio quidem o-
 mnium ſermone percrebuerat, vix ulli ex omni
 Profeſſorum ordine ſtudioſam bonarum artium
 juventutem eſſe cariorem; ut ſacili argueremus
 conjectura, qualis in bene morati Cœnobii ad-
 miniſtratione fuiſſet, qui ab adoleſcentibus nimia
 quadam libertate fruentibus eam ſibi benevolen-
 tiam & exiſtimationem conciliaret.

Sed, quod hominibus probis in hoc vitæ cur-
 ſu ſæpe contingit, ut morbis iisſque diuturnis
 conflictentur, ne, ſiquid humana ſit imbecil-
 litate peccatum, alibi potius luant, idipſum
 contigit Alexandro, ut biennium ferme ægro-
 tatione difficiliſſima, doloribusque nunquam in-
 ter-

termiſſis vexatus , cæleſtem ſibi tolerando pareret juſtorum mercedem . Quid autem , bone Deus , ejus animo firmitus , quid ad duriffima quæque paratius ? Quando unquam vel doloris magnitudine frangi viſus eſt , vel mortis propinquitate terreri ? Quando eſt de ſua illa intra Zotheculam ſolitudine conquieſtus , qui antea publica in luce atque hominum ſocietate non ſine plauſu verſari conſueverat ? Iſtiusmodi conflictationes qui tanta conſtantia & fortitudine ferat , eum neceſſe eſt aut in aliam quandam migraviſſe naturam , aut tota antea vita diligenter elaboraviſſe , nequid ſibi unquam accideret , quo animus percelli poſſet , deque virtutis ſtatu dimoveri : Utinam vero hic liceret mihi per vos , utinam per tempus liceret , perpetuum illud intaminatæ vitæ propoſitum oratione explicare , & oſtendere quibus maxime rebus ad acerbiffima hæc obduruerit , ſequæ ad graviora etiam , ſi opus fuiſſet , comparaverit . Paucis omnia complectar , ſi dixerò , primum illud Monafterii vitæ ſtudium , quod Alexander hoc ipſo in loco ſemel ſuſceperat , nunquam deferbuiſſe . Cum ſe Veronenſi abdicaret Præfectura , utque ſentiebat ipſe de ſe demiffæ , noluiſſet amplius in ſui provincias Ordinis mitti cum poteſtate regiminis , viſus eſt quibuſdam privatæ vitæ otium quærere , in quo ſibi commode lauteque indulgeret . Sed nihil ſane minus . Nam & publicæ ſcholæ onus ad extremum uſque ſpiritum conſtanter ſuſtinuit , nec ſibi ad quotidiani laboris ſolatium quippiam permixſit , quod veteris inſtituti temperantiam prægrederetur . Enimvero cum pecuniæ vim non

exi-

exiguam ex patriis bonis , majoremque ex Principis munificentia colligeret , possetque omnia sibi vitæ commoda abunde parare , quanta tamen semper modestia , parsimonia , & frugalitate usus est ! Illud scilicet ostendere voluit , vel medias inter opes tutam consistere posse paupertatem , & in magna bonorum omnium copia , hominumque frequentia Monacho locum esse . Sive enim Monachum *διδραπευτήν* , hoc est Dei cultorem cum Dionysio interpretemur , quam ingens fuit Alexandri in Deum pietas & religio ? Sive *ἀσκητήν* , hoc est pugilem cum Basilio dicamus , quam fuit in omni rectæ disciplinæ genere assidua & laudabilis ejus exercitatio ? Sive *φιλόσοφον* , hoc est sapientiæ studiosum cum Chrysostomo appellare malimus , quis Alexandro sapientiæ studiosior , qui , reliquarum rerum curis mature abjectis , inter sapientiæ studia vixit atque extinctus est ? Tantæ ergo Monachum virtutis , tantæ Præsulem dignitatis , tantæ Philosophum sapientiæ si vobis nobisque doletis amissum , facitis enimvero , Patres religiosissimi , pro vestra ista nunquam satis laudata prudentia ; sin autem tota hæc doloris significatio ad illum refertur , videte quæso , ne sine causa dolere videamini . Quid enim ? Si ethnicorum nonnulli , qui sapientes habiti sunt , ad diuturni laboris finem sine ulla alterius vitæ expectatione mortem expetiverunt , quanta ab Alexandro exceptam fuisse mortem hilaritate putandum est , qui morientem se ab infesta & acerba diuturni temporis valetudine ad summum & sempiternum bonum transire sentiebat ? Jam eo perveni , ubi liben-

benter confisto ; teque potius oratione compello , Alexandri anima , ex tam misera edueta custodia , vinculisque liberata ; intueri ex illis beatorum sedibus extrema , quæ tibi persolvuntur , officia ; excipe propensos erga te nominisque tui memoriam tuorum Monachorum animos ; Cœnobium , Gymnasium , Civitatem Deo Opt. Max. impense commenda ; precibusque effice , ut in cœtu hoc tam antiquo , tam illustri , tam Ecclesiæ Catholicæ fructuoso tui similes plurimi quotidie succrescant.

O R A T I O X X V I .

Habita in Seminarii Patavini Templo anno MDCCCVI.
sextili mense, cum dies tertius ab obitu

V I N C E N T I I B O N I F A C I I

E P I S C O P I F A M A U G U S T A N I

celebraretur, coram

G E O R G I O C A R D . C O R N E L I O

Civitatis Episcopo, cui Vicariam
operam præstiterat.

SI te amissionis acerbissimæ dolor respirare jam finit, Princeps Eminentissime, ac de nobis nostrisque rebus cogitare, facile intelliges, nos quoque fuisse Vincentii Bonifacii Episcopi Famaugustani interitu valde perculsos; nec tam parentalia hæc ad leniendum mœorem tuum, quam ad nostrum significandum celebrare. Nihil te fane perturbare potest, nihil commovere, quin nos quoque multarum rerum communionem tangat, sed præsens infortunium ejusmodi est, ut non te magis, quam nos afficiat, privatamque singuli calamitatem putemus quæ multis communis est ac pæne publica. Amisisti tu Præfulem amantissimum tui, nos patronum benevolum ac liberalem; tu muneris tui adiutorem, multarum magnarumque

rerum administratione spectatissimum, nos litterarum nostrarum, totiusque loci hujus curatorem nullo unquam labore, quamdiu vixit, nullaque satietate fatigatum; tu ministrum certe quidem probatissimum, sed nihilo plus quam ministrum, nos præsidem, nos ducem, nos parentem alterum. Noli proinde levationem ullam a nobis hoc tempore expectare, qui magis ipsi levatione indigenus; nec existimes, posse me, aut ullum ex nostris officium tanti viri memoriæ persolvere sine lacrymis. Nisi forte minui dolor tuus hoc ipso potest, quod in alios manat; tantumque tibi molestiæ detrahatur, quantum additur plurimis in causa tua mœroris conjunctione consentientibus. Hinc tibi siquid potest esse levaminis, pauca quædam pro temporis angustiiis de illo dicam, ex quibus appareat, jacturam hanc ejusmodi esse, ut eam omnes deslere consensu uno, communique lamentatione prosequi debeamus.

Honores ac titulos mortalium voto maximos sanguine propagari ad posteros etsi placet ubique fere, videtur hoc mihi & naturam quodammodo lædere quasi hominum parentem minime æquam, & virtutibus ad promerendum idoneis injuriam facere, quasi vero nascantur nobiscum, non recte vivendo comparentur. Quod cum dico, non perinde accipi velim, ac si ego existimem, nullam vim habere optimorum habituum semina naturæ principiis indita, de quibus tam pulchre disputat in libro Ethicorum secundo Aristoteles: nego, nasci hominem cum virtute, cum apta quadam ad virtutem proclivitate nasci non nego; assero etiam, idque exemplo confirmo Vincen-

centii Bonifacii Episcopi Famaugustani . Ortus enim hic ex familia duarum civitatum nobilitate clara, Rhodigii, & Tarvisii, ex qua extitere viri summi, patriæque suæ pacis bellicue artibus utiles, ab ipsis statim pueritiæ crepundiis initia quædam protulit animi ad pietatem & religionem compositi, ex quibus appareret non obscure ad sacra natus . Excitavit hos velut igniculos Avi memoria Joannis Bonifacii Poetæ & Historici, non docti solum, sed probi in primis atque honesti; fovit Patruus integritate ac litteris celeberrimus; provexit solertissima institutio parentum; explevit omnino exercitatio disciplinarum studiose ab eo naviterque suscepta. Hac ille commendatione in Tarvisianum Canonicorum Collegium celeriter cooptatus est; quo loco tam illustri qua ratione se gesserit, satis superque cognoscetis, si dixero placere potuisse illi, cujus judicium per ea tempora instar omnium habebatur, Cardinali videlicet Basadonnæ præstantium virorum patrono ac Mæcenati. Itaque se Romam contulit; eaque dedit Cardinalis hujus auspicio experimenta virtutum, quæ non recenseo ego quidem, sed ajo fuisse tanta, ut insulas illi Famaugustanas expectatione citius promeruerint. Honore hoc tamquam in lumine meliore positus cœpit eminere; eaque in urbe, seu potius variarum gentium orbe, ubi vix maxima conspiciuntur, non benevolentiam modo, sed etiam admirationem inter sui ordinis Præsules cito sibi conciliavit. Tum vero, siquando alias, Famaugustæ fatum in Christiana republica defletum est; tum, inquam, cum vidimus, quanta fuissent ibi fidei ac religionis incrementa futura studio & opera
ejus

ejus, qui tam multa laudabiliter Romæ ageret, & majora de se in dies polliceretur. Tu quoque, opinor, angebare, optime Præsul, quod ea tibi commissa provincia esset, cui præsto esse non posses, atque ita ad rem Christianam propagandam vocareris, ut vetitum tibi aliunde esset officio satisfacere. At non obscura Superis est hominum voluntas ad bonum parata; cumque esset in fatis, ut non posses curare tua, tibi sunt aliena concredita; ne tanta animi vis diutius retardaretur, sed læte succresceret, fusaque effunderetur ad animarum emolumentum. Hinc ille, qui de re nulla sollicitus fuit magis, quam de bono Ecclesiæ suæ in Bonifacium oculos vertit Gregorius, omnium sæculorum memoria Venerabilis Cardinalis Barbadicus, eumque in laborum partem invitavit, non ut sibi laborem minueret, qui inter labores extinctus est, sed ut via & ratione omni suis consuleret, quibus nunquam satis putabat esse consultum. Lætor vehementer, me Patavii dicere, apud eos scilicet, qui Barbadicum in oculis conspectuque civitatis positum suspexerunt; curamque & consilium ejus in deligendis hominibus, quibus ad Ecclesiæ hujus ministerium uteretur, experti sunt. Neque enim Bonifacium excepisset inter suos vir summa altitudine ingenii, suisque omnibus præfecisset, nisi illum insigni aliquo supra ceteros meritorum genere excellere cognovisset. Hic vos vestris proponite animis Barbadici Vicarium, magno conatu vestigiis hærentem viri optimi & sapientissimi, spectantem singula quæ imitaretur, vigilantem ad omnia quæ acciderent, omittentem nihil, quod putaret ad Patavinæ Ecclesiæ felicitatem pertinere.

re. Ita enim demum sibi persuaferat, nec placere se posse Episcopo suo, nisi ad summa contenderet, nec rectius contendere se posse, quam si illa ageret, quæ acta prius vidisset ab ipso. Quod siqua ratione virtutis visus est ad eum proxime accedere, certe liberalitate potissimum, qua conatus est munificentiam illam incredibilem pro modo facultatum suarum æmulari. Quapropter & ipse dare consuevit, & obtulit illi interdum aliqua pauperibus eroganda, cum petentibus dandum putaret Cardinalis supra fidem & exempla liberalissimus, nec tamen haberet quæ daret, quod jam sua omnia dedisset. Felices animæ (jam enim subit orationem ex luctu ad gratulationem convertere) quas juit mutua sibi præstare adjumenta virtutum, laborare, atque eniti incitata quadam ultro citroque magnitudine contentionum salutis æternæ gratia; consensuque uno pietatis studium, charitatis, religionis, disciplinæ promoveri. Fruamini illo, quo certe fruimini, divino sapientiæ ac pietatis vestræ fructu; sitque communis utrique beatitas, quorum communis fuit ratio meritorum.

Jam vero qui tanta potuit, magno illo proposito exemplo præstare, numquid minora præstitit solus? Ad eos dies, quæso, cum orbata est Patavina Ecclesia Episcopo suo, animum attendite, percurrite incommoda ab illo sponte suscepta, remedia pro temporis conditione caute adhibita, officia patris diligentissimi, quantum quidem licuit per aliena jura, nunquam intermissa. Utinam vero non fuisset aliquando a nobis discessurus. Abiit enim (quod magno cum dolore reminiscimur) abiit non magistratu modo, sed
etiam

etiam urbe; cumque nos votis abeuntem retine-
remus, abiit tamen, quandoquidem non ea-
dem, quæ prius, causa habere eum poterat
nostris in rebus occupatum, nobisque uti-
lem. Manebat adhuc mentibus infixus Barba-
dicus, nec ferre nisi ægerrime poteramus,
ut duos uno tempore patres amitteremus. Hæc
nimirum rerum humanarum conditio est, ut
certo quodam nexu colligatæ se se mutuo tra-
hant; & uno aliquo infortunio calamitosos
calamitates aliæ supra alias consequantur. Po-
stea tamen respiravimus, duplicique casu labe-
factatos duplex erexit repente faustitas; prima
cum te nobis Episcopum summus Christiani no-
minis Arbiter Clemens XI. dedit, altera cum
tu Famaugustanum Præsulem, collata rursus
Vicarii Generalis potestate, in pristinum lo-
cum restituisi. Vidisti enim statim, quamvis
longe abesses, virum eximium, cujus vigilan-
tiæ notam ipsi provinciam commendares; vi-
disti, inquam, pro mirabili ista prudentia tua,
quam in perspiciendis ac dijudicandis homi-
num ingeniis toties ostendisti. Nunc vero ade-
ste vos mihi, Auditores, quos cura ejus ac
solicitude non latuit in superiore jactura com-
pensanda, in Curia componenda, in parandis
absolvendisque rebus omnibus, quæ novo Epi-
scopo ab ultimis Europæ finibus advenienti pro-
barentur. Magnopere lætor, Princeps Emi-
nentissime, quod ea videris per annos multos
agi te coram, quæ acta dico absente te. Vir
plane constans & in virtute obfirmatus quam
viam semel iniit, eandem perpetuo tenuit, di-
gnus propterea, quem tantopere diligeres, cui

tantam faceres rerum tuarum potestatem , ac de quo verius multo affirmares , quod olim Philippus Macedo de Antipatro , Bonifacium tibi vigilare . Vicariam Episcopi provinciam Patavii sustinere quanti sit ponderis , ignorat nemo ; amplitudo diœceseos , ingenia hominum non tarda ut alibi , aut sopita , sed prompta & experrecta , cultus aliquis vel infimorum , quantum parerent in negotiis explicandis difficultatem homini non satis tecto , non bonorum malorumque gnaro , non gravi , non constanti ? Tanta ille solertia , tantoque ingenii acumine egit omnia , ut quamvis tempora inciderint aliquando difficilia , nihil omnino offenderit , nusquam incurrerit . Non ætas annorum fere septuaginta , non pedum dolores remissi quidem interdum , sublati vero nunquam , non frigora , non æstus de quotidiana ejus opera & assiduitate quippiam detraxerunt . Afferebantur libelli supplices ? Excipiebat facile , examinabat attente , subsignabat caute . Agendum de Clericis , de Paræcis , de Monialibus ? Mandata dabat , monebat , vetabat sine verborum ambagibus , & sine diuturnis consultationibus . Ordinatio sacra habenda temporibus non satis commodis ? Aderat non gravate . Non gravate dico ? Promptius etiam voto tuo , qui obnitebaris aliquando ætati ejus defatigatæ corporique non una de causa affecto consulturus . Mirum tamen , quod , cum tam multa , tantaque cum dignitate ageret , ita sentiret de se demisse , ut quasi oneri non sufficeret , ultimis hisce temporibus de munere abdicando cogitaverit . In quo fatale aliquid atque ominosum intelleximus .

mus. Cum enim, rebus adornatis fere omnibus, jam esset discessurus, Penates puto nostri invitum retinuerunt; nec passi sunt alibi potius, quam inter beneficia sua expirare. Habetis, Auditores, hominis merita publico bono dicati: prætereo privatæ vitæ decora & ornamenta, quæ quamvis communia pluribus, ipse tamen peculiari quadam naturæ temperatione, usuque perpetuo fecerat prope sua: omitto liberalium artium studia, historiæ vero præsertim, in qua tantum valuit, quantum Tarvisiana monumenta ejus labore & industria plurimis additionibus illustrata satis ostendent, cum publicam lucem aspicient auspice te, Princeps Eminentissime, qui in curam operis supremis ejus tabulis compellaris: omitto morum innocentiam, modestiam, suavitatem, quibus viros in republica principes sibi devinxerat: nihil dico de frugalitate, de parsimonia, de opum contemptu, quibus pro tanta dignitate non abundabat ille sane, sed tamen ita utebatur, ut quas non haberet, sibi aliquando oblatas modeste recusaret, & quas haberet, ubi opus esset, libentissime largiretur. Prodebunt nihilominus ipsa hæc splendore suo, & foras erumpent ad hominum prædicationem; quantoque illustriora fuere, tanto magis, sublato auctore, votis ac sermone desiderantium percrebrescent. Hoc nos in præsentī jactura solatio utimur, ut videatur nobis non plane ereptus, cujus nomen & rerum gestarum memoria animis nostris infixæ nunquam intercidet. Vivat ergo ille aliquando sibi inter beatos, qui tamdiu vixit nobis; gaudeat bono suo, & quidem summo ac

sempiterno, qui tot annos curavit bona nostra;
fruatursue immortalis felicitate, qui quamdiu
inter mortales fuit, tantopere curavit, ut alios
felices faceret.

O R A T I O X X V I.

P R O V E R N A C U L A L I N G U A

A studioso adolescente in patria
Academia recitata.

Magno quodam Italicarum scholarum consensu, etsi non magno fortasse ipsarum bono factum est, ut adolescentes, vernaculæ linguæ studio prætermisso, Græcis Latinisque litteris se unice dederint. Contra morem hunc liceat mihi per vos, Academici præstantissimi, hodierna exercitatioe verba facere; non quod ullum mihi cum Græcis, aut Latinis bellum susceptum sit, sed quod officio desim, si vel metu hominum, vel gratia, quæ ad rectam scholasticæ vitæ institutionem pertinere puto, non ausim hac in luce patefacere. Ceterum perinde agam ut in dubia & ancipiti controversia apud Judices agi solet; nec vos ante in consilium dimittam, quam Græci quoque sermonis & Latini causam dixerò, ut omnes intelligant, quam nihil in præsentī mihi sumam, qui contra me ipsum alias dicere paratus sim. Si ita demum difficilium quorundam ingeniorum offensionem effugero, illudque impetravero, ut de re ipsa judicantes, non mihi pilos & ætatem imputent, præclare mecum agi existimabo. Tametsi, quoquo tandem casura res sit, ea me cogitatio valde recreat, jubetque bono animo esse, quod in magna au-

ditorum frequentia necesse sit hoc in genere aliis alia, nec solum varia, sed etiam contraria probari: non deerunt, qui me iudicent, nimis audacter vela dare, fluctusque tere; sed sunt etiam, in quibus parata video tempestatis auxilia. Tertium est genus quoddam hominum æquiorum, quos Latinæ quidem litteræ Græcæque delectant, non ita tamen, ut eos sæculi pœniteat, Italosque Scriptores pro nihilo habeant. Sunt in veteri eruditione toti, putantque absolutam rerum scientiam, quam graviore nomine sapientiam dicunt, aut nuspiam, aut in antiquis certe monumentis reperiri: sed est aliquid laudis, quod nostris quoque ingeniis concedant; & æquo patiuntur animo habere nos oratores nostros, dummodo Demostheni & Ciceroni; habere Poetas, dummodo Homero ac Virgilio; habere historicos, dummodo Thucydidi ac Livio fasces submittant.

Unum est, quod ægre patiuntur, esse Italos Grammaticos nescio quos, qui leges loquendi ferant, communemque omnibus linguam sibi obnoxiam faciant, & in præceptorum angustias compellant. Ecce vobis contra quos hodie veniam: ceterum ego quoque antiquæ eruditioni deditus ab ipsa pueritia fui; tantusque hæsit animo prima illa institutione contractus veterum linguarum amor, ut pro vernacula quoque lingua dum dico, libenter Latine dicam.

Ut autem ab eo incipiam, in quo se maxime jactant, non sane Italicæ linguæ consulant, qui eam a Grammaticorum legibus vindicantes jubent ferri liberam, augeri, minui, mutari non arbitrata modo scriptoris cujusque,

sed

sed populi. Quid si etiam maxime officiant? Tollite enim Grammaticos, & certa illa sermonis construendi præcepta, nonne scæda statim vocum colluvies in sermonem irrepet, totumque pervertet, quemadmodum urbana omnia perverti necesse est, urbis præside legibusque sublati? Neque tamen idcirco usui, quem penes arbitrium est, & jus, & norma loquendi, quippiam eripio, neque plus æquo Grammaticis indulgeo. Tunc enim isti mihi sapere videntur, si verba quidem ipsi nulla inveniant, sed inventa jam & usitata deligant, & in quodam veluti thesauro collocent, ubi explicata luculenter communi judicio subjiciant; eo videlicet consilio, ut verborum copia loquentibus & scribentibus suppetat, nec aliena atque exotica in ullo rerum genere mutuari cogantur. Non est igitur Italorum Grammaticorum ars, ut quidam sibi persuadent, libertati sermonis adversa, nec illum ad inopiam redigit, sed cribrat, expolit, amplificat, & ad publicum usum in lexicis recondit. Quod si deessent homines eo ingenio & industria qui hæc colligerent, & ad communem utilitatem interpretarentur, mutatis magna ex parte temporum mutatione linguis, jam veteres libros, hoc est majorum nostrorum inventa ad posteritatis eruditionem litteris consignata quis intelligeret? Hinc, exteris quibusdam hominibus divinus Dantes alicubi ineptire videtur, quod ejus sensa vetustorum quorundam vocabulorum ignoratione non satis capiant; hinc Villanos Fratres eadem de causa quidam ablegant, alii Boccacium ipsum, &, si Diis placet, etiam Petrarcham. Sed hæc linguarum fere omnium

Hor: in
Poet.

omnium calamitas est , ut vulgares nimium videantur suis ; nec putent earum cultum esse tanti , ut plus aliquando præstet temporis atque industriæ illis tribuere , quam quantum prima illa puerili institutione tributum est . Nec vero Romani minus , quam nostri , aliena capti lingua , sua interim incuriose utebantur . *Omnia Græce* (inquit indignatus Juvenalis Sat. 6.) *cum sit turpe magis nostris nescire Latine* . Idque ipsum monendum in primis putavit Quintilianus Inst. l. i. c. i. ne pueri Græco sermone superstitiose adeo imbuerentur , ut diu Græce tantum loquerentur , aut discerent . Nemo tamen illorum de lingua sua ita sentiebat demisse , ut ne præcepta quidem Latine loquendi pateretur esse , quemadmodum nostri quidam artem suæ linguæ omnem seu contemptu , seu tædio a scholis amandant . Cum enim ajunt , florentis idiomatis , quale nostrum est , nullas oportere leges esse , quod rerum viventium more mutetur in dies , nihil plane conficiunt . Annon enim ipsa illa aurea Latini sermonis ætate de ejus ratione atque usu Tiro Ciceronis Libertus accurate scripsit ? Nonne Terentius Varro , nonne Cæsar ipse tantus vir Grammatica quædam suæ linguæ præcepta tradiderunt ? Et primus quidem Crates Malleotes ad certas leges Latinum sermonem revocavit , ut est apud Suetonium de Illustribus Grammaticis c. 2. & 3. *Postea vero magis ac magis* (juvat ipsius Suetonii verba referre) *& gratia & cura artis increvit , ut ne clarissimi quidem viri abstinuerint , quominus & ipsi aliquid de ea scriberent ; utque temporibus quibusdam supra viginti celebres scholæ fuisse in urbe tradantur .*

Nihil

Nihil mirum propterea, si objecta Salustio verborum vetustas est, M. Antonio incuria, Livio Patavinitas. Ergo ferant æquo animo nostri quoque Itali Scriptores, non omnia sibi licere, sed esse aliqua sermonis præcepta, intra quæ concludantur; esse Grammaticos ac Lexicographos, quos de linguæ suæ usu atque elegantia sine verecundia aliquando consulant. Si quid enim hinc cœperint vel primoribus labris tandem aliquando delibare, paullatim illecti denique sentient, frustra se alibi ad scribendi voluptatem meliora quæsisse. Prisca enim Græciæ Latiique volumina & pauca sunt, & quædam ex illis fidei tam dubiæ, ut viri eruditi sæculo nostro non defuerint, qui ex omni Latina antiquitate Ciceronis dumtaxat, & Plinii quædam, Virgilii Georgica, Horatii Sermones & Epistolas in dubium non vocarint. Equidem in horum opinionem nunquam me rapi sinam, ut nulla præterea ad nos pervenisse germanæ Latinitatis monumenta putem: sed tamen quidquid Latinum est, quidquid Græcum, Italico sermone redditum invenitur; estque consilii non admodum sani per summos labores aliunde exprimere, quod possis nullo labore inter domestica reperire. Enimvero luxuriosis hominibus similia facis, qui cum cibis exquisitissimis in patria abundant, longe quæsitæ fercula sibi curant, non quod meliora sint, sed quod paucioribus concessa, magnisque impensis ac difficultatibus comparata. Quid si etiam interdum deteriora? Nam, ad rei ipsius veritatem quod attinet, si Italici sermonis rationem naturamque inspiciamus, nescio an quippiam sit in Latino,

tio, Græciaque univërſa ad res blande ſuaviterque efferendas accommodatius. Cum enim Græcis ac Latinis conſonantes litteræ familiariffimæ ſint, & verba pleraque conſonantibus claudant, moleſtam quandam moram pronuncianti afferunt, ut identidem hæere ac ſubſultare cogatur; Italus vero contra vocalium multo amantiffimus ita eas per ſingula verba diſtribuit, ut nulla ſit junctura aſperior, claudicatio nulla, totaque oratio æquabiliter, expediteque fluat. Quam quidem ſuaviloquentiam ut in melius proveherent Academici noſtri, verba omnia durioribus litteris conſuſa procul amandarunt; aſpirationem multis ex locis majorum incuria occupatis expulerunt; minutas voculas, quæ hiantem ac diſſolutam efficiunt orationem, ubi recte fieri poſſe viſum eſt, ſimul conjunxerunt; denique ſimilium litterarum concurſum, & inverſionem illam periodorum, quæ Italici ſermonis incunabula, atque intermorientis Latinitatis colorem referebat, omnino ſuſtulerunt. Quid quod non lenior modo Italica lingua, ſed gravior etiam Græca Latinaque viro doctiſſimo, deque litteris non minus, quam de religione merito Cardinali Pallavicino viſa eſt? Eſſi enim conſonantium litterarum concurſus, mora inducta pronunciandi, majeſtatem quandam videatur Græce Latineque loquentibus addere, tamen quod modo nullis temperetur vocalibus, modo tenuiſſimis, nimis aliquando ſtrigoſam, aliquando nimis exilem & languidam efficit orationem. Noſtri vero cum vocalibus abundant, graviores & conſonantiores adhibentes, & ſalebroſam veterum aſperitatem effugiunt, & pondus tamen

gra-

gravitatemque non amittunt . Quid est porro aliud , cur nationes exteræ Italica lingua tantopere alliciantur , eamque tam libenter addiscant , quam probe temperatus sermonis numerus , ut cum graviter feratur , non tamen in falebras tumoresque offendant ; cumque suavissime fluat , nunquam tamen diffluat , nimiamque ad mollitiem degeneret ? Nisi forte nobis negotium faceffit Gallus Grammaticus nescio quis , cui sapit nemo nisi Gallus , nec nostris magis , Boursius quam cujusvis nationis & ætatis scriptoribus oblatrat . Inaudita enim quadam *φιλαυτία* laborans non solum non putat , alibi quam in Gallia esse litteras , sed quod ridiculum est , ne linguam quidem vult esse ullam nisi Gallicam ; ceterasque nationes non plane loqui , sed Sinas quidem , aliosque Asiæ populos canere ait , Germanos rudere , Hispanos declamare , sibilare Anglos , Italos suspiria mittere . Hæc vero , & his similia concedamus homini sibi uni credenti ; nec valde laboremus , quod nos illi non placeamus , cui nihil placet alienum . Tametsi non æque concessere liberaliter duo illi in omni litterarum genere ævo suo facile principes Muratorius , & Ursius , quorum alter Mutinæ , Bononiæ alter lucubrationibus adversus Bourcium editis tantæ in Italos acerbitatis pœnas expetiverunt . Sed quid est , cur ego coronam auditorum lectissimam pluribus fatigem , in qua non paucos video , qui vetustis linguis satis instructi , ad hanc demum suam totos se contulerunt ; operibusque soluta & ligata oratione egregie scriptis , novum sibi gloriæ campum aperuerunt ! Horum vestigiis si scholæ insistant , non erit ,

erit , cur Italiæ pars nobilissima vernaculæ elegantia & festivitatis oblita esse videatur . Ad vos potius sermonem converto , optimæ spei juvenes , qui hodiernam Academiæ nostræ exercitationem præsentia vestra ornare voluistis ;
 lib: 1. c. 10. vosque oro atque obsecro , ut , quod Favorinus apud Gellium monet , moribus vivatis præteritis , sed verbis utamini præsentibus ; cumque multa nobis bona sint , ne sola quæratiss , quæ esse desierunt .

Hinc orta Italica Orthographiæ occasio , quam divulgavit , typisque edidit Auctor anno MDCCXVIII.

F I N I S .

NOI RIFORMATORI

Dello Studio di Padova.

COncediamo Licenza a *Bortolo Occhi* Stampator di *Venezia* di poter ristampare il Libro intitolato *Jacobi Faciolati Orationes Selectæ XXVII. &c.* ristampa osservando gli ordini soliti in materia di Stampe , e presentando le Copie alle Pubbliche Librerie di *Venezia* , e di *Padova*.

Data li 17. Settembre 1786.

(*Andrea Querini Rif.*

(*Francesco Morosini Kav. Proc. Rif.*

(*Niccolò Barbarigo Rif.*

Registrato in Libro a Carte 200.
al Num. 1837:

Giuseppe Gradenigo Seg.